



TEOLOGIA
DOMINICA

163

B.

24.

BIB. NAZ. NAPOLI

BIBL. NAZ.
VITT. EMANUELE III

163

B

24

NAPOLI

1
2
3
4

G A Z Z A N I G A

E T

B E R T I E R I

T H E O L O G I A D O G M A T I C A .



72

THEOLOGIA

DOGMATICA

IN SYSTEMA REDACTA

A FR. PETRO M. GAZZANIGA

ORDINIS PRAEDICATORUM

ET FR. IOSEPHO BERTIERI

ORD. EREM. S. AUGUSTINI

PROFESSORIBUS VINDOBONENSIBUS

IN QUATUOR TOMOS DIVISA

ADDITA IN CALCE

FRANCISCI VERONII

REGULA FIDEI CATHOLICÆ

TOMUS IV.



NEAPOLI,

Apud Januarium Mirelli bibliopolam
Via dicta Quercia Num. 17.

MDCCCXXX.



Ex Typographia Januarii Palma.



THEOLOGIE DOGMATIQUE

PARS SEPTIMA

SECTIO III.

DE JUSTIFICATIONE ET MERITO.

PROOEMIUM.

Ex uberrimis actualis gratiae donis, quibus ad iustitiam adipiscendam disponimur, nec non ex novi foederis Sacramentis, unde fructus passionis Christi Domini nobis applicatur, habitualementem, sive gratiam sanctificantem acquirimus. Quamobrem recti ordinis ratio, qua si careas, nec completam perfectamque rerum notionem, nec claras distinctasque ideas ad scientiam omnino necessarias habere queas, postulat, ut de justificatione et merito sermonem instituamus.

CAPUT PRIMUM.

De Justificatione.

§. CCCLXVI.

GRATIA sanctificans, quae etiam habitualis dici solet, donum est adeo excellens, ut praeter Deum ipsum ea nihil sublimius esse queat. (*) Ea enim Natura et indoles gratiae sanctificantis.

(*) S. Thomas 1. 2. q. 113. art. 9. ad 2. ait: *Bonum gratiae unius majus est, quam bonum naturae totius universi.*

abstergit ac tollit animae maculas, Sanctitatis decore ornat, justitiam operatur ac virtutes caeteras, quae ad complendam Sanctitatem aptae accommodataeque inveniuntur: ea per Spiritum sanctum in cordibus hominum diffunditur, et inhaeret, ex inimicis nos Dei amicos reddit, atque secundum spem regni coelestis haeredes (§. XLVIII.); cujus naturam, ut magis perspicias, eam duplici sub aspectu consideres, oportet: nam si, uti ex Dei parte est, eam intuearis, ipse est in nobis, qui inhabitat, Spiritus Sanctus; si autem ex parte nostra, caritas est non quidem pertransiens, sed permanens, animoque nostro inhaerens (§. XLIX.). Et vero sanctificantis gratiae effectus omnes caritati in cordibus diffusae sacrae litterae attribuunt. Nam ejusdem munera sunt, delere peccata, nos Deo conjungere, ejus amicos ac filios adoptivos constituere, animam nostram reddere habitationem Spiritus Sancti, ac Spiritalem vitam eidem conferre. Haec autem omnia caritas praestat. Ac primum: peccati maculas abstergit: *universa enim delicta operit caritas* (Prov. X. 12.), tum ejusdem virtute anima nostra unitur Deo: etenim *Deus caritas est, et qui manet in caritate, in Deo manet, et Deus in eo* (I. Joan. IV. 16.), unde etiam consequitur, ut homo justus sanctusque fiat, tantamque induat excellentiam, ut objectum reddatur Divini amoris, docente Christo Domino: *Qui habet mandata mea et servat ea, ille est, qui diligit me: qui autem diligit me, diligitur a Patre meo, et ego diligam eum* (Joan. XIV. 21.). Ex caritate non minus fit, ut adoptiva in homine filiatio euascatur. *Videte*, ajebat Joannes (I. Joan. III. 1.) *qualem caritatem dedit nobis Pater, ut filii Dei nominemur, et simus: ubi ipsa est, ibi et Spiritus Sanctus inhabitat: unde Paulus ad Romanos scribebat* (V. 5.): *caritas Dei diffusa est in cordibus nostris per Spiritum Sanctum, qui datus est nobis: ipsa non minus spiritalem vitam animae confert, quandoquidem: nos scimus, quoniam translati sumus de morte ad vitam, quoniam diligimus fratres; qui non diligit manet in morte* (I. Joan. III. 14.). His adde, caritatem esse, Jacobo teste, salutis aeternae causam.

(1. 12.), *quum probatus fuerit, accipiet coronam vitae, quam reponisit Deus diligentibus se.* Unde fit manifestum, quod ad explanandam gratiae sanctificantis naturam, ut ad ignotam creatam qualitatem, aut ad ens accidentale Aristotelicum recurras, haud oportet. Pancis sanctificantem gratiam ita describimus: *Est caritas per Spiritum Sanctum diffusa in cordibus eorum, qui justificantur, ipsisque inhaerens, per quam signati Spiritu promissionis Sancto efficiuntur Divinae naturae consortes.*

*SCHOLION. Quam dedimus gratiae sanctificantis descriptionem, ea consona est Tridentinis Patribus Sess. VI. Cap. VII. Nec quidquam efficit illud Apostoli 2. ad Corinth. XIII. 13. *Gratia Domini nostri Jesu Christi, et caritas Dei*, unde non pauci deducunt Apostolum gratiam a caritate distinxisse; etenim particula *et* non semper realis distinctionis est signum; certe idem Paulus II. ad Corinth. I. 3. inquit: *Benedictus Deus et Pater Domini nostri Jesu Christi, Pater misericordiarum et Deus totius consolationis*, nec tamen inferre potes, Deum Benedictum alium esse a Patre Christi Domini, aut misericordiarum Patrem a Deo consolationis distinguere: immo in eodem objecto loco subditur, *et communicatio Sancti Spiritus*, an vero inferre quis poterit, S. Spiritus communicationem a gratia et caritate esse distinguendam? Minime gentium: nec itaque gratiam a caritate distinctam voluit Apostolus. Confer Berti *de Theol. discip. lib. 19. C. 1.* et celebrem Augustinianum Theologum Fulgentium Bellelli lib. I. *mentis Augustini cap. VII.* et dissertat. Homoboni de Bonis Mediolani 1755. *de natura Divinae gratiae.*

§. CCCLXVII.

Jamvero ad nomen, indolemque ipsam justificationis explanandam veniamus. Vox ista non uno in casu? Quid justificationis sensu a sacris scriptoribus accipitur. I. Pro externa justitiae declaratione, quemadmodum in forensibus judiciis usovenit; ita Isaias (V. 23.) inquebat: *Qui justificatis impium pro muneribus; et justitiam justi aufertis ab eo.* II. Pro lege Divina proponen-

te nobis justitiae praecepta: *Unam*, in Psalmis legimus (Ps. CXVIII. 6.), *dirigantur viae meae ad custodiendas justificationes tuas*. III. Pro ipso animae orpato et decore, quo sancti iustique constituimur, quemadmodum Paulus ad Romanos scribebat (II. 5.): *qui enim mortuus est*, nempe cum Christo per baptismi Sacramentum, *justificatus est a peccato*. IV. Pro ejusdem justitiae incremento, quo sensu habetur in Apocalypsi (XXII. 11.): *qui justus est, justificetur adhuc*. Justificatio, quam ordine tertiam descripsimus, ea est, de qua contentioni finem cum heterodoxis ducimus, iis arbitrantibus, nos haud veram inhaerentemque justitiam acquirere, ac peccata minime deleri; sed Deum, quemadmodum in forensibus judiciis fieri solet, animae maculas tantum tegere ac condonare. (*) Age vero, gentium Doctore facem nobis praehente, rem ipsam explicemus: *Gratias agentes*, inquit (Ad Coloss. I. 12.), *Deo Patri, qui dignos nos fecit in partem sortis Sanctorum in lumine, qui eripuit nos de potestate tenebrarum, et transtulit in regnum filii dilectionis suae, in quo habemus redemptionem per sanguinem ejus remissionem peccatorum*. Hisce in verbis, uti bene ac sapienter Tridentini Patres doceat (Sess. VI. c. IV.), *justificationis impii descriptio insinuat, ut sit translatio ab eo statu, in quo homo nascitur filius primi Adae, in statum gratiae et adoptionis filiorum Dei per secundum Adam Salvatorem nostrum*. Quam post Evangelium promulgatum sine baptismo, aut ejus voto evenire non posse recte ex Joanne (III. 5.) inferunt: immo ut uberiores justificationis habere queamus notionem, addunt (Sess. VI. c. 8.), *non esse solam peccatorum remissionem, sed et sanctificationem, et Renovationem interioris hominis per voluntariam susceptionem gratiae et donorum*.

(*) SCHOLION. Ajunt illi, justificationem idem esse ac graecum *δικαίωσις*, et Hebraicum *קָדַשׁ* et hinc accipiendam eam esse in forensi significatione, secundum quam iudex accusatum criminis absolvit sive ille reus, sive innocens sit, multaque exempla huic in finem congressit Meisnerus *phil. sobr.* p. 2.

sect. 1. q. 28. ; consentit etiam Bullus *harm. Apost. dissert. I. cap. 1. §. 2.* Ernestus tamen Grabius in annot. ad laudatum Bulli locum, asserit, eum non pro solita adcuratore dictione forensem verbi δικαιῶν significationem in sacris litteris maxime obviam et familiarem esse ; atque ex ipsis tum veteris tum novi foederis libris plura testimonia profert, unde contrarium evincitur : ejusdem etiam mentis est Grotius Equidem non ignoro adversarios, ut nomen justificationis ex forensi judicio desumptum probent, inniti quam maxime Apostolo ad Rom. V. 8. ubi verbum *justificare*, opponitur verbo *accusare* et *condemnare*. At neque uos diffitemur eo sensu nonnunquam accipi ; quod volumus, est, pro ipsa nobis adhaerente justitia simul esse accipiendum, quae veritas adeo perspicua est, ut Protestantes non pauci, uti Beza in Tit. III. 7. *Synop. pur. Theol. disp. 33. th. 3.* Forbesius de *justif. lib. 3. c. 4. n. 2.* aliique hac in significatione coacti sint accipere verba haec ad Rom. VIII. 30. *quos praedestinavit, hos et vocavit, quos vocavit, hos et justificavit, quos justificavit, illos et glorificavit*, atque ad Titum III. 7. *ut justificati gratia ipsius haeredes simus, secundum spem vitae aeternae.* Vid. Wallenburchicos de *justif. c. V.* Accedit his, quod etsi daremus justificationis nomen ex forensi judicio acceptum fuisse, perperam tamen ad solam, quam ibi obinet, significationem adversarii restringerent. Nam dicant ii nobis, ubinam gentium, sententiam absolventis judicis quisque applicare sibi per fidem debeat? Quo fit, ut Acatolici ipsi insigne forensem inter ac Christianam justificationem statuere discrimen debeant. At ad eorum systema facilius noscendum advertas, duplicem Acatolicos plures statuere hac in parte Divinam gratiam : una est, qua Deus peccatorem declarat absolutum, sed eum non immutat ; tegit, sed non delet peccata ; atque id justificationis munus esse contendunt. Altera gratia est renovatio interior per Spiritum Sanctum, atque hanc regenerationem vocant, et sanctificationem. Has inanes subtilitates haud agnoscit Catholica Ecclesia, atque quotquot justificantur, eos simul inhaerente gratia donari ex

sacris litteris et traditione compertum habet. Confer Bossuet *refut. du Cath. du sieur Ferry* Sect. II. ch. 3.

Vigentem in Ecclesia doctrinam de justificatione luctuosi Schismatis causam praetexuerunt Lutherus in cap. 2. *ad Gal.* Melancthon in *epit. renov. doctrinae* tom. 2. Calvinus in *Antid.* Sess. VII. p. 291. quibus adstipulati sunt Centuriatores cent. 2. c. 4. Paraeus adversus Bellarminum lib. 2. *de justif.* Vid. Cochlaeum in *confut. Articulorum Lutheri*. Verum quam parum solida fuerint horum motiva, qui magis ingenni sunt inter Aetholicos ipsi agnovere; Gentiletus in primis in *exam. Conc. Trid. ad Can.* Sess. VI., inquit: *Haud multum refert solam fidem, quae ut ante dictum est, a caritate sejungi non potest, nostrae justificationis causam esse dicamus: an etiam caritatem cooperantem esse dicamus. Nam cum una sine altera esse nequeat, ambas conjunctim causas instrumentales dicere possumus.* Crocius *de justif.* cap. 3. n. 2. justam separationis causam non agnoscit, quod Catholici aliter sentirent de justificatione, quam Calviniani. Apologia Remonstrantium meram logioam pugnam esse ait; Forbesius *de justif.* p. 61. omnibus rite expensis libratisque controversiam hanc forte verbalem et notionalen magis, quam realem esse affirmat; Grotius *annot. ad consult. Cassandri Art. 4. pag. 14. de justif.* logomachiam vocat. Immo Bullus in *Harm.* cap. 4. quod sola fides justificet, gravem errorem esse pronuntiat. Praestat audire Cardinalem Richelium in *sua methodo* lib. 3. edit. II. p. 383. inquit ille, quod licet adversarii diverticula quaerant, in magnam viam, ubi nos sumus, recidunt. Asserimus nos, quod fides ac bona opera ad justificationem disponant; affirmant illi, dispositionem hanc ad fidem solam pertinere; sed hanc fidem vivam intelligunt, quae secum fert fidem, spem, dilectionem, ex quo datur intelligi, etsi ii alio ac nos modo loquantur, idem tamen nobiscum tenere. Nos dicimus hominem justificatum non solum a peccato absolutum esse, verum etiam indutum gratia ac sanctitate. Et quamvis praetensi reformati inquirunt, justificationem nil

aliud producere, quam simplicem peccati absolutionem, qua Deus peccata nobis non imputat, contententibus tamen illis, quod fides justificans nempe fides viva obtinet vitae renovationem ac gratuitam reconciliationem; ad id deveniunt, quod nos profitemur, quum ipsorum renovatio vitae sit sanctificatio, quam nos dicimus (ordinarie loquendo) a peccati absolutione sejungi non posse. Confer Le Fevre ch. II. §. I. et Wallemburgicos *de justif.* cap. 75. n. 16. Berti Lib. 19. cap. 4.

§. CCCLXVIII.

Non eam profecto mentem unquam habuit Catholica Ecclesia, quod fides adultos ad justificationem haud disponat, immo Spiritus Sancti oraculis instructa cum Paulo (Ad Hebr. XI.) docet, *sine fide impossibile esse placere Deo*. Scit jussisse Christum, erudiendos primo in fide populos, postea sacro baptismatis fonte esse renovandos (Matt. XXVIII. 19.); item rem habet exploratissimam, eum, qui non credit jam esse judicatum (Marci XVI. 16.). Quid? quod Augustino teste (Lib. de pecc. Orig. cap. XXIV.), absque fide in Christum *nec antiquos justos, ut justii essent, a peccatis potuisse mundari, et Dei gratia justificari, veritas Christiana non dubitat*. Hinc Tridentini Patres inquirunt (Sess. VI. c. 8.), dixisse Apostolum, per fidem homines justificari, eo quod ipsa est secundum perpetuum Ecclesiae consensum, *Humanae salutis initium, fundamentum et radix*. *Initium* est, quoniam Deus salvos nos reddere volens, unigenitum primum Filium suum proponit nobis, cujus gratia salutem nostram sperare ac adipisci debemus: *est fundamentum*, eo quod stabilitate sua magnum justificationis nostrae aedificium sustinet: *radix* non minus est, virtutem suam undique diffundens, cujus efficacia caetera, quae nos justificant, dona consequimur. Sapienter Augustinus (*De praedest. Sanctorum* cap. 7.): *Ex fide autem ideo (dicit Apostolus) justificari hominem, non ex operibus, quia ipsa prima datur, ex qua impetrantur caetera, quae proprie opera nuncupantur, in quibus juste vivitur*.

Ad hanc quidem fides disponit.

SCHOLIUM. De adulterorum justificatione agimus tantum; nam si de parvulis sermo sit, ii etsi ad fidem excitandam nondum sint idonei, ex universae tamen Ecclesiae traditione in peccatorum remissionem baptizantur (§. CCXXX. CCXLI.), quorum etiam exemplo constat, quantum hallucinentur A catholici, qui justificationem omnem soli fidei, quam ipsi usu rationis carentes nequeunt habere, attribuunt.

§. CCCLXIX.

Sed sola non
sufficit.

At vero etsi Sacrorum librorum oraculis, et Ecclesiae inhaerentes doctrinae fidem debitis ornativimus encomiis, atque justificationis nostrae initium, fundamentum, radicem diximus (§. praec.), eam solam ad assequendam justitiam sufficere jure meritoque negamus. Nam multa sunt, quae ad hanc consequendam peccatorein disponunt; quippe qui excitari primo ac adjuvari Dei gratia debeat; cum fidem ex auditu concipere, ac simul credere vera, quaecunque nobis sunt revelata, et praecipue Deum esse, qui per gratiam suam, per redemptionem, quae est in Christo Jesu, impium justificat. Hinc fit, quod ipse miserum tristemque statum suum considerans, justitiae Divinae timore percellitur, ac, quanta sit Divina misericordia serio recogitans, in spem erigitur fuditque Deum ob merita Christi futurum fore sibi propitium; unde enim tamquam omnis justitiae fontem diligere incipit; ac propterea adversus peccata odio movetur, detestaturque; suorum item scelerum poenitentiam agit, novam inchoare vitam, et singula Dei mandata observare serio proponit. Quae a Patribus Tridentinis sancita (Sess. VI. cap. 6), sacrarum Scripturarum oraculis prorsus consentanea sunt. Ac primum: quidquid boni habemus, ipsae piae cogitationes a Divina gratia, quae nos praevenit, adjuvatque, repeti debent (§. CLXXVI. seq.). Paulus docet (ad Hebr. XI. 6.), *accedenti ad Deum oportet credere, quia est, et quod inquirentibus se remunerator sit*; atque in homines haud credentes ab ipso Salvatore certa damnationis sententia fertur (§. CCXVI.): timori, spei, caritati salutem nostram sacri libri attribuunt (§. CCCLV. Sch.); quod

poenitentiam agere debeamus; odio habere, ac detestari peccata, novamque inchoare vitam frequenter utriusque foederis oracula inculcant (§. CCXC. CCXCIX.): Divina mandata sancte custodienda esse, Christus Dominus jussit (Matth. XIX. 17.), regenerationem vero nostram, justitiam, sanctificationem, peccatorum remissionem, vel baptismatis Sacramento, vel poenitentiae debemus (§. CCXLII. CCXCIV.). Quid! nonne Doctor gentium eam insinuat fidem, quae per dilectionem operatur? (ad Gal. V. 6.) Annon inquit, quod si quis tanta praeditus esset fide, quanta montes ipsos transferre posset, tamen absque caritate nihil ei prodesset (I. ad Coriuth. XIII. 2.)? An fidem, quam in Abraham commendavit plurimum, ab operibus separatam esse voluit? Minime gentium; sed illam, qua insigne obedientiae exemplum dedit cum unigeniti Filii sua oblatione conjunctam (ad Hebr. XI. 17.), qua de causa Jacobus de Abrahamo ipso scribebat (cap. II. v. 21. 22.), quod *fides cooperabatur operibus illius, et ex operibus fides consummata est*; addebat etiam, fidem sine operibus salvare non posse, atque uti mortuam fore reputandam (Ib. v. 14. et 26.). Hallucinantur itaque, quotquot asserunt, justificationem nostram soli fidei esse tribuendam.

SCHOLION. Heterodoxorum pars maxima, fidem qua justificationem se obtinere dicit, habere etiam comites virtutes alias, poenitentiam scilicet, fidem, caritatem affirmat. Conf. Wallemburgicos *de justif. cap. 75. §. II.* Nihilominus haec bona opera non pauci fidei quidem *praesentia* esse dicunt, at, quum in ipsorum sententia nihil plane ad justificationem conferant, veluti *absentia* spectari posse contendunt. Vid. Buddaeum lib. IV. cap. 4. §. 10. Ipsi adhuc fidem, ut opus nostrum non considerant, nec ajunt propter ipsius virtutis dignitatem nos justificari, sed quia Christi merita apprehendit. Attamen inter Anglos contrariam sententiam tenuerunt Bullus in *Harm. Apost. ac in dissert.* cui titulum fecit: *Doctrina Jacobi de Justificatione ex operibus explanatur, ac defenditur*: tum in altero: *Consen-*

sus Pauli cum Jacobo liquido demonstratur atque aliis in scriptis Apologeticis, Caveus antiq. Apostol. in vita Pauli Cap. IX. §. 7. Grabijs, Millius, Tillotsonus, alii.

§. CCCLXX.

Solam fidem justificandi vim habere congestis non paucis sacrorum librorum testimonis probare adnuntur adversarii. Ajunt, Apostolum ad Romanos (III. 24.) scribere, nos *gratis, Dei gratia justificari*, quo fit ut opera omnia ipse excluserit, quumque duo sint in homine, quae hic in censum venire queant, opera, et fides; atque eadem in Epistola (XI. 6.), opera omnino excludat, sola fides tantum relinquitur, unde homines justificari valeant. Idem Doctor gentium insinuat Galatis (c. III. 11.), *quoniam in lege nemo justificatur, manifestum est: quia justus ex fide vivit*: unde si nec per legem, et opera justitiam adipiscimus, consequens est, ut id soli fidei attribatur. Omnium Prophetarum hanc esse doctrinam fidem facit in Actis Apostolicis Petrus (X. 43.), ajens: *Huic omnes Prophetae testimonium perhibent, remissionem peccatorum accipere per nomen ejus omnes, qui credunt in eum*. At rem plane conficit Paulus docens (*Ad Rom. III. 28.*): *Arbitramur justificari hominem per fidem sine operibus legis*.

SCHOLION. Praecipua haec sunt Buddaei argumenta lib. IV. C. IV. §. XI. sch.

§. CCCLXXI.

Enodantur.

Quae tamen difficultates simplici, apertaue catholicae fidei expositione penitus evanescunt. Credimus enim, ac constanter tenemus, aeternum Patrem ob unigeniti Filii sui merita nos in gratiam recipere, et peccata nobis condonare. Ipse est, qui prior dilexit nos; ipse nos elegit, ipse per infinitam misericordiam suam prius nos quaerit, quam per fidem ad illum accedamus; ipse omnis boni animi motus, virtutum omnium auctor est atque largitor. Hac de causa, dum justitiae Divinae amore concutimur ad Dei confugimus misericordiam, in nobis

spes enascitur, quoniam confidimus Deum nobis per Christi merita futurum fore propitium (§. CCCLXIX.). Quapropter justificationis nostrae causa efficiens est Deus misericors, qui gratuito nos abluit. . . meritoria autem dilectissimus unigenitus suus Dominus noster Jesus Christus, qui cum inimici essemus, propter nimiam caritatem, qua dilexit nos, sua sanctissima passione, in ligno crucis justificationem meruit, et pro nobis Deo Patri satisfecit (Conc. Trid. Sess. VI. cap. VII.). Hinc etsi Ecclesia doceat, oportere, ut fide, operibusque bonis ad justitiam assequendam disponamur, (quomodo enim Deus eos in gratiam reciperet, qui nec credunt, nec diligere ipsum incipiunt? Quomodo iis remitteret peccata, qui vitia sua odio non habent nec detestantur?) nihilominus gratis adhuc nos justificari tenet, eo quod nihil eorum, quae justificationem praecedunt, sive fides, sive opera, ipsam justificationis gratiam promeretur. Si enim gratia est, jam non ex operibus: alioquin, ut idem Apostolus inquit, gratia jam non est gratia. (Ib. cap. VIII.) Hinc apparet, bona opera in adultis conditionem esse, sine qua justificationem Deus haud tribuit, at eandem nulla ratione eos posse promereri. Age vero Apostoli mentem nunc penitus inspiciamus. Justificationem ipse attribuit fidei, non quasi sola sufficeret; sed quia justitiae nostrae initium est, fundamentum, et radix (§. CCCLXVIII.). Et quidem sicuti Gentium Doctor ait nos justificari per fidem; ita per eandem ait nos salutem consequi (Ad Rom. X. 9.), item Christum Dominum in vobis habitare (Ad Eph. III. 17.), atque justum vivere (Ad Heb. X. 38.). Sed dicant quaeso adversarii, an nos per fidem solum exclusis operibus bonis aeternam salutem adipiscamur? At quonam loco habituri erunt Christi Domini sententiam, eos ad vitam aeternam fore vocandos, qui misericordiae opera exercuerint (Matth. XXV. 34.)? Soliusne virtute fidei in nobis habitat Christus? Minime: cum ipse Paulus id caritati praesertim attribuat (Ad Rom. V. 5.), spiritalem non minus vitam fidei mandatorum custodit (Matth. XIX. 17.), caritati (Lucae X. 27.

28.), Salvator ipse adscribit; ac dilectus ejus discipulus absque verborum involucri affirmat, quod, *qui non diligit, manet in morte* (Joan. I. III. 14.). Concludamus itaque oportet, quemadmodum laudatis jam locis fidem commendans Apostolus, virtutes alias non excludit, ita neque in admirando justificationis opere. Verum clamant heterodoxi: Nonne opera excludit Paulus? Utique: sed opera viribus arbitrii elicit sine gratia, ac fide; sed opera legis Mosaicae, quae non pauci instaurata cupiebant, atque ad salutem adhuc necessaria esse effutiebant.

SCHOLION. Optime observatum est a Cl. Wallemburgiis de *just.* c. 75. §. 1. fidem accipi in sacris litteris etiam *pro lege fidei*: haec autem, lex ipsa est Evangelica, quae caritatem complectitur, ac caetera, quae Christus nobis praecipit. Consona Paulo est ad Rom. III. 26. haec expositio: *Ubi est ergo gloria tua? Exclusa est. Per quam legem? factorum? non, sed per legem fidei.* Hujus autem nomine intelligit, quod docuerat cap. II. 28. *Non enim qui in manifesto Judaeus est: neque quae in manifesto in carne est circumcisio, sed qui in abscondito Judaeus est, et circumcisio cordis in spiritu non littera, cujus laus non ex hominibus, sed ex Deo est, atque cap. VIII. 2. Lex enim spiritus vitae in Christo Jesu liberavit me a lege peccati et mortis.* Jam vero quem lex fidei, lex spiritus, circumcisio cordis idem sint, bene inferitur, legem fidei includere universam Evangelicam legem: atque hoc sensu justificari hominem per fidem absque operibus legis verissimum est, ac doctrina Apostolica. Quam explanationem probat etiam A catholicus scriptor Encyclopaediae Iverdon *art. foy*. Hinc etiam conciliantur facile, quae prima fronte pugnant videntur Pauli ac Jacobi sententiae. Unde Augustinus *lib. 83. quaest. q. 16.* scribit: *Qui putant istam Jacobi Apostoli sententiam contrariam esse illi Apostoli Pauli sententiae, possunt arbitrari etiam ipsum Paulum sibi esse contrarium, quia dicit alio loco: Non enim auditores legis justi sunt apud Deum, sed factores legis justificabuntur, et alio loco: Sed fides, quae per dilectionem operatur. Et iterum.*

Si enim secundum carnem vixeritis, moriemini. Advertas tamen velim, justificationem nostram in initio ac progressu considerari posse: initium gratuitum prorsus est: at quoniam augendo in nobis caritatem, sanctificationis quoque donum in nobis augetur; hinc justificationis augmentum bonis operibus tribuitur; attamen cum bona opera nostra sint etiam Dei donum, hanc ob causam gratuitum dici non minus potest sanctificationis nostrae augmentum. Confer Bossuet ch. 8.

§. CCCLXXII.

Gravis adhuc nos inter ac Heterodoxos controversia exoritur, quid fidei ad justificationem disponentis nominis intelligere oporteat. Triplicem ii statuunt fidem: *historicam*, qua fidei creduntur dogmata: *miraculorum*, unde patrandi signa potestas acquiritur: *Divinarum promissionum*, qua Christi se apprehendere merita, ejusdemque justitiam sibi propriam facere dicunt (Buddaeus lib. IV. c. IV. §. 10.); atque postrema hac tantum fide justificationis nostrae negotium omne persolvi autumant. Verumtamen eos in errore versari inde conficitur, quod sacrae litterae justificationis nostrae exordium ex fide, qua revelatas veritates credimus, repetunt. Et quidem Salvator discipulis suis jubeat (*Marci ult. 15.*): *Praedicate Evangelium omni creaturae: qui crediderit, et baptizatus fuerit, salvus erit.* Joannes autem (*Joan. XX. 31.*): *Haec scripta sunt, ut credatis, quia Jesus est Christus filius Dei, et ut credentes vitam aeternam habeatis.* Paulus non minus (*Ad Rom. X. 9.*): *Si confitearis in ore tuo Dominum Jesum, et in corde tuo credideris, quod Deus suscitavit a mortuis, salvus eris.* Hanc porro descriptam fidem, eam esse, qua revelatis articulis assentimur, patet per se. Quid? quod vetustissima Ecclesiae consuetudine firmatum est, ut Catechumenis traderetur symbolum, in quo praecipua fidei capita credenda continentur; illud autem memoriter discere, ac recitare teneatur. Porro ipsis mandatum fuisse, ut ad gratiam remissionis peccatorum obtinendam, consequendamque justitiam, veluti solum medium fidem Divinarum pro-

Quid fidei nomine hic intelligi oporteat.

missionum excitarent, qua Christi justitiam suam facerent, minime legimus; fateantur itaque adversarii oportet, Doctrinam suam antiquae ac primitivae Ecclesiae ignotam fuisse.

§. CCCLXXIII.

Argumenta adversariorum.

Nec sibi desunt, qui catholicam oppugnant veritatem. Nonne, asserunt, Salvator paralytico dixit: *Confide fili, remittuntur tibi peccata tua* (Matth. IX. 2.)? fides itaque unde peccatorum remissio obtineatur, firma est in Divinas promissiones fiducia. Nonne Jacobus (cap. I. 6.)? Christi fidelem edocet, ut *postulet in fide nihil haesitans*? Et quid aliud sibi volunt haec de Abrahae justificatione Pauli verba (Ad Rom. IV. 16.), *Ideo ex fide, ut secundum gratiam firma sit promissio. . . in repromissione Dei non haesitavit diffidentia, sed confortatus est fide, dans gloriam Deo, plenissime sciens, quia quaecumque promisit potens est facere, ideo et reputatum est illi ad justitiam, nisi quod ex promissionum fide justitiam homines assequantur?*

§. CCCLXXIV.

Solvuntur.

Non ii profecto sumus, qui arbitremur, fiduciam in divinam misericordiam, ejusque promissiones eliminandam esse; hanc enim ex eodem, quod nobis opponitur Paralytici facto necessariam dispositionem esse ad justitiam adipiscendam jam ostenderant Tridentini Patres (Sess. VI. c. VI.). At fiducia haec ad spem pertinet, enasciturque ex fide, quemadmodum docet Paulus (Ad Eph. III. 12.), *In quo habemus fiduciam et accessum in confidentia per fidem ejus*. Perperam itaque fiduciam cum ipsa fide confundunt A catholici; perperam ejus virtute sola nos justos fieri autumant. Paralyticus autem Divina collustratus gratia, fidei, qua in Christum promissum Liberatorem credebat, sincero peccatorum suorum dolori, caritati suae justificationis initium debuit: unde etiam oriebatur fiducia, quod Salvator cum valetudine corporis peccatorum remissionem sibi vellet impertiri. Quod si de justificatione sua certitudinem habuit, inde repeti debet, quod Christus cordis intima perspicuens, ac Divina autoritate

pollens hanc ei fuerat elargitus. Jacobum, quomodo opponere nobis queant, non video, ipse enim est totus, ut ostendat, justificationem in adultis sine operibus bonis haud contingere, neque fiduciam solam, sed orationi unitam proponit nobis. Quas vero ad Deum dirigimus preces, hae fieri debent ut oportet; hunc autem in finem fides historica, aliaeque bonae dispositiones requiruntur. Causam tamen Paulo iudice se vicisse adversarii jactitant. Age vero, an res ita se habeat, inspiciamus. Doctor Gentium edopere voluit, ex carnis generatione justitiam haud esse repetendam; unde gloriari minime posse Judaeos, quod semen sint Abrahae. Quandoquidem ad Christi haereditatem Gentiles etiam vocati fuere, qui per fidem filii Abrahae censentur, ac una sunt promissionum participes, quas Deus eidem fecit. Unde omnibus, qui salutem consequi volunt, jubet, ut Abrahae imitentur fidem, quam tamen otiosam haud fuisse, nec ab operibus sejunctam Paulus ipse, ac Jacobus demonstrant (§. CCCLXIX.), Abrahae autem fides non in eo reponitur, uti confingunt Heterodoxi, quod quis merita Christi apprehendat, credatque certo remissa sibi esse peccata, sed quod ille noscens Deum summe veracem ac esse omnipotentem, eidem pollicitanti crediderit, effoeta jam sua et uxoris aetate, adhuc futurum fore multarum gentium Patrem. Nec ibi de initio justificationis Abrahae fit sermo, sed de ejus incremento: quandoquidem jam pridem vir justus erat ac sanctus, quicum Deus benigne alloquebatur. (*Gen. XII. et XIII.*).

§. CCCLXXV.

Porro justificationem nostram ab externa justitiae Christi imputatione haud esse repetendam, sed gratia eo caritate per Spiritum Sanctum in cordibus nostris diffusa perfici cum Tridentinis Patribus (*Sess. VI. Can. XI.*), constanter profitemur. Quam catholicam doctrinam tradiderat non uno in loco Apostolus Paulus: *Caritas Dei*, inquit (*Ad Rom. V. 5.*), *diffusa est in cordibus nostris per Spiritum sanctum, qui datus est nobis.* Addit (*VIII. 15.*): *Accepistis spiritum adoptionis, in quo clu-*

Justificatio
non fit imputa-
tione externa
justitiae Chri-
sti.

namus Abba Pater, tum ad Titum scribens haec in rem nostram egregia habet (III. 5. seq.): *Salvos nos fecit per lavacrum regenerationis, et renovationis Spiritus sancti, quem effudit in nos abunde per Jesum Christum Salvatorem nostrum, ut justificati gratia ipsius, haeredes simus secundum spem vitae aeternae.* Unde fit manifestum, justitiam, quam peccator consequitur, minime esse actum judicis peccatorum remissionem annuntiantis, ac nobis externae imputantis Christi justitiam; sed actionem esse omnipotentis creatoris, qui nos regenerat, renovat, sanctificatque. Rem autem penitus conficit comparatio praeclara, quam Adamum inter ac Christum Doctor gentium instituit (ad Rom. V.), ubi parentem primum culpae, et Salvatorem auctorem gratiae constituit. Jamvero, quemadmodum originalis noxa macula est animae nostrae inhaerens, non imputatum nobis ipsum Adae delictum; ita, dum justificamur, inhaerentem nobis justitiam ac sanctitatem recipimus; non vero extrinsecus tantum Christi justitia nobis imputatur. Praeclare Augustinus (Lib. I. de pecc. mer. c. X.); *Legimus in Christo justificari, qui credunt in eum propter oculam communicationem, et inspirationem gratiae spiritualis.*

SCHOLION. Calviniiani Leue multi per imputationem extrinsecam justitiae Christi nos justificari contendunt, quorum tamen non pauci inhaerentem etiam in nobis gratiam admittunt, quam tamen a justificatione ipsa sejunctam volunt (§. CCCLXVII. Sch.), redarguuntque Catholicam Ecclesiam, quae alterius est doctrinae: ita Moulinius in Clypeo fidei, Ferry, alique, quibus praeter alios ex Lutheri asseclis concinit Buddaeus lib. IV. cap. 4. §. II. et XVI. Sch. Verum distinctio haec justificationem inter et sanctificationem post Lutherum, ac Augustanam confessionem nata est, ut ostendit Bossuet lib. III. *variationum*. Praetermitto Osiandrum asserentem justificationem nostram, esse illam ipsam justitiam, qua Deus *essentialiter* justus est: id enim ut delirium insanum confutavit Calvinus ipse lib. 3. instit. cap. II. §. 5.

§. CCCLXXVI.

Qui ex sola imputatione justitiæ Christi autumant nos justificari, Paulum sibi suffragari confidenter asserunt; ipse enim ad Corinthios scribens de Christo Domino, inquit (I. Epist. cap. I. 30-), *Qui factus est nobis sapientia a Deo, et justitia et sanctificatio, et redemptio*, immo subdit (II. epist. V. 21.), *eum qui non noverat peccatum, pro nobis peccatum fecit, ut nos efficeremur justitia Dei in ipso*: quo fit, ut sicuti ipse sola extrinseca peccatorum nostrorum imputatione peccatum fecit; ita et sola externa ejusdem Salvatoris imputatione nos justii constituamur. Quod verbis non ambiguis docet Augustinus (*In Ench. cap. 41.*): *Ipe ergo peccatum, ut nos justitia, nec nostra, sed Dei, nec in nobis, sed in ipso; sicut ergo peccatum non suum, sed nostrum; nec in se, sed in nobis constitutum, similitudine carnis peccati, in quo crucifixus est, demonstravit.*

Quardam difficultates.

§. CCCLXXVII.

At non ea Doctoris Gentium mens fuit. Asserit enim Christum Dominum factum a Deo nobis justitiam ac sanctificationem nostram; propterea quod passione sua ac morte hæc nobis promeritus est, atque gratia sua in nobis producit, efficitque; quidquid enim post Adæ lapsum habemus boni, ac salutaris, id totum intuitu Salvatoris, ejusdemque largitate recipimus (§. CLIX.). Itaque factus est Christus justitia ac sanctificatio nostra, quoniam de plenitudine ejus omnes accipimus (Jo. I. 16.), ejusdem gratia renovamur, justitiam sanctitatemque nobis inhaerentem obtinemus. Quod, ut adhuc percipiatur clarius, considerandum diligenter est, Apostolum scribere, Christum ita factum esse nobis justitiam, quemadmodum sapientiam, ac sanctificationem. An sapientia nostra imputata est nobis ipsius Christi sapientia? Perperam: an nostram sanctificationem censere debemus imputatam nobis ipsius Christi sanctificationem? Nequaquam: A catholicorum enim pars maxima justificationem a sanctificatione secernens (§. CCCLXVII. Sch.), hæc per inhaerentem gratiam nos recipere judicat. Nec

Enodantur.

in alio Apostoli loco praesidium sibi quaerant adversarii. Nam hoc unum ipse contendit: scilicet Salvatorem factum esse peccatum, sive victimam ac sacrificium pro delictis nostris, ut nos pretioso ejus redempti sanguine, ac Deo reconciliati (§. LII. CV.) non virtute Mosaicae legis, non ex nostris meritis, sed passione sua, ac per spiritum S. in nobis inhabitantem, justitiam ac sanctitatem consequeremur. Augustini autem comparatio in eo consistit omnis, quod sicuti peccata nostra, mortis Christi causa fuerunt, ipse enim innocens erat, impollutus, sanctissimus; ita justitia Dei et Salvatoris nostri meritoria sit, ac efficiens causa nostrae justificationis. At putavitne Augustinus ex imputata Christi justitia nos fieri justos? Apage: nam per occultam communicationem et inspirationem gratiae id contingere affirmavit (§. CCCLXXV.). Clarius adhuc expressit mentem suam scribens (*De spir. et lit.* n. 18. *Vid. Serm.* 131. n. 9.), *Quae ideo justitia Dei dicitur, quod impertiendo eam justos facit, sicuti Domini est salus (Ps. III. 9.), quae salvos facit.*

§. CCCLXXVIII.

Nec sola extrinseca peccatorum remissione justificatione absolvitur.

Ex recensitis sacrorum librorum oraculis (§. CCCLXXV.) etsi sponte jam fluit, extrinseca peccatorum remissione justificationem nostram minime absolvi; tamen ut ne victi esse videantur heterodoxi, ea congerunt Scripturarum loca, quibus peccata nostra a Deo tegi, cooperiri, non imputari asseritur (*Psal. XXXI. 1. et 2. Ps. LXXXIV. 2. Ezech. XXXIII. 16. II. ad Corinth. V. 19.*), indeque peccatorum remissionem extrinsecam penitus esse, concludunt. Nihilominus animadvertere satius fuisset, magnum justificationis nostrae opus, meritis unigeniti Filii sui comparatum nobis, ut mentibus nostris haereret firmius, non uno tantum sub aspectu, a Deo voluisse describi. Prudentis itaque viri est, ac in sacris litteris exercitati, diversos hosce dicendi modos inter se comparare, ut amplitudo, ac dignitas tanti beneficii facilius percipi queat. Jam vero Deus ipse Isaiae loquens ore inquit (*XLIII. 25.*): *Ego sum, qui deleo iniquitates*

tuas propter me. Micheas vero afflante sancto Spiritu scribebat (VII. 18. 19.): *Quis Deus similis tui, qui aufers iniquitatem, et transis peccatum reliquiarum hereditatis tuae. . . . proficis in profundum maris omnia peccata nostra.* Regius Propheta jam dixerat (Ps. CII. 12. Confer et Ps. L.): *Quantum distat ortus ab occidente, longe fecit a nobis iniquitates nostras.* Annon Joannes de Christo Domino inquit (Apocal. I. 5.): *Lavit nos a peccatis nostris in sanguine suo?* Nonne Paulus eos alloquens, qui gravissimis sceleribus contaminati erant, ait (I. ad Corint. VI. 11.): *Et haec quidem fuistis, sed abluti estis, sed sanctificati estis, sed justificati estis in nomine Domini nostri Jesu Christi, et in Spiritu Dei nostri?* Quae quisquis cum iis, quibus se tuentur adversarii, sacrae Scripturae conferat, luce meridiana clarius percipiet, quoniam animae maculas tegere, ac operire, eo quod delendo eas, efficit, ut amplius non appareant; non imputare, quoniam lavat, mundatque. Sane quis sapiens in animum inducat, ut credat, id quod longe a nobis fecit, adhuc permanere? quod delet, in nobis esse? maculas, quas unigeniti Filii sui pretioso sanguine abluit, emundavitque, tectas tantum esse, non ablatas (Vid. Bossuet *confut. du Catech. de Ferry* ch. VI.)? Ecclesiae Patres hujus catholicae veritatis testes sunt disertissimi. Cyprianus vocat baptismum (Ep. II.) *mortem criminum*, Chrysostomus (In Ps. L.) docet Divinam gratiam sordes peccati perfecte abstergere, ac nivis candorem conciliare. Theodoretus (In Ps. III.) asserit, Deum ita peccata remittere, ut obliteret, nullumque eorumdem appareat vestigium. Augustinus quemdam refellens Pelagianum, qui ex Catholicorum sententia consequi aiebat, baptismam peccata radere, non tollere, scribit (Lib. 1. *contra duas Ep. Pelag.* cap. 13.): *Quis hoc nisi infidelis affirmat? Dicimus autem baptismam dare omnium indulgentiam peccatorum, et auferre crimina, non radere.* Quamobrem merito Tridentini Patres diris eos devoverunt (Sess. V. Can. V.), qui radi, et non tolli peccati originalis maculam affirmabant.

SCHOLIUM. Perperam itaque Acatolici ex Ecclesiae de justificatione doctrina imminui, ac obscurari Christi merita affirmant; immo splendent magis, coruscantque. Ut enim loquar cum magno Bossueto ch. VII. ajunt Acatolici peccata nobis haud imputari, id est, Deum ob Christi merita ea non punire; nos vero propter ejusdem Salvatoris merita ea in nobis non adesse affirmamus: volunt ii Christi merita adeo magna esse, ut ad tegenda crimina nostra sufficiant: contendimus nos, ea sufficere ad maculas nostras penitus delendas: contendunt, justitiam unigeniti Filii Dei promereri, ut fideles censeantur, quasi justii essent; nostra doctrina est, tanti esse meriti, ut revera sint justii. Advertendum tamen est, inter Heterodoxos reperiri non paucos asserentes peccata nostra eo sensu non auferri, quod in viris etiam sanctissimis maneat adhuc concupiscentia, quae ab agendo bono impedit, inclinatque ad malum; fateri tamen peccata gratia Christi omnino deleri: hi, si nolint, concupiscentiam in nobis permanentem esse verum peccatum, parum aut nihil a Catholico dogmate recedunt; sicut ii, qui nec culpa nec poenae reatum in nobis esse contendunt; peccatum autem eo sensu manere dicunt, in quantum e vero semper dici potest, hominem, cui remissa sunt peccata, fuisse aliquando peccatorem. Quam postremam sententiam suam fecit Molanus apud Bossuet *Oeuvr. post.* p. 53.

Nec veritati stabilitae illud Isaiae derogat: *Facti sumus, ut immundi omnes, quasi pannus menstruatæ universae justitiae nostrae;* aut quod *Ps. 142.* legitur: *Et non intres in judicium cum sero tuo, quia non justificabitur in conspectu tuo omnis vivens.* Isaías namque futura praenuntians ad legales purificationes abrogata jam Mosaica lege respicit; has vero veluti justitias reputabant Judaei; etsi hoc tempore rerum immundarum ad instar habendae essent. Quod si de Judaeis sui temporis loquuntur fuisse Prophetam asseras, nec omnino repugnabo: sed legales ritus, quod ipsi, veluti justitiam elargirentur, considerabant, hanc conferre sua virtute non valebant (§. CCCLVI.): unde, qui in ipsis absque fide venturi Reparatoris confidebant, contaminati

potius, quam sancti reputandi erant. Psalmista de
 selis culpis levioribus loquitur, in quas viri etiam
 justi cadunt, quo fit, ut et ipsi Divina Clementia
 opus habeant: probos tamen viros sanctitate, ac
 justitia exornatos existimasse, inde patet; quod
 scribat Ps. XVII. 21. *Et retribuet mihi Dominus
 secundum justitiam meam.* Nec juvat adversarios
 illud ad Rom. VII. 20. *Jam non operor ego illud,
 sed quod habitat in me peccatum.* Ibi enim pec-
 cati nomen ampliori significato accipitur, scilicet
 pro concupiscentia, quae etsi vera culpa non est,
 ex peccato tamen nascitur, ac ad illud inclinat.
 Vid. PP. Tridentinos Sess. V. Can. V.

§. CCCLXXIX.

Absurdam judicant, quam de justificatione pro-
 posuimus doctrinam, A catholici. Vos, ajunt, as-
 seritis, Deum, quum impium justificat, auferre
 penitus, ac delere peccata: sed non minus arbi-
 tramini, qui peccator non sit, hominem esse ne-
 minem. Non id est Andabatarum more secummet
 turpiter pugnare? At pace eorum dicam, quam car-
 punt Ecclesiae doctrinam, eos non satis assequi.
 Quandoquidem peccata alia sunt gravia, alia levia,
 ac venialia; illa delentur penitus in anima justi,
 (I. ad Cor. VI. 11.) ista cum justitia, ac sancti-
 tate consistere possunt. Hoc porro discrimen venia-
 lia inter, ac mortalia peccata, et quidem natura
 sua, ac independenter a Divina misericordia gra-
 vissimis Scripturarum oraculis fulcitum esse, du-
 bium non est. Paulus de iis, qui gravibus inqui-
 nantur culpis asserit, quod regnum Dei non possi-
 debunt (Ibid. 9. et 10.), at Joannes ad viros justos
 sanctosque respiciens inquit (I. Epist. I. 8.): *Si
 dixerimus, quoniam peccatum non habemus, ipsi
 nos seducimus et veritas in nobis non est;* consonat
 Jacobus scribens (III. 2.): *In multis offendimus
 omnes.* Unde consequitur, peccata quaedam natura
 sua tantam habere gravitatem, atque malitiam, ut
 ad aeternas poenas nos trahant; alia vero natura
 sua levia, in quae justi ipsi saepe labantur, nec
 eorum cum Deo amicitia dissolvatur. Sane, quis
 persuadere sibi serio unquam poterit, Christum Do-

Quorum alia
 mortalia sunt,
 alia venialia.

minum, qui jugum suave, ac onus leve nobis imposuit (Math. XI. 30.), seclusa ejus misericordia cruciatibus aeternis puniturum fore illum, qui vel preces cum nonnulla distractione recitaverit, aut officiosum mendacium, aut otiosa quaedam verba protulerit? Quae enim ea justitia foret, si ob culpam levissimam vir justus, sanctusque a gratia Divina non minus excideret, quam qui in gravia scelera labuntur? Quam habemus Divinorum attributorum genuinam ideam, existimare nos non sinit, eos qui leviter omnino delinquant, aeternis fore suppliciis torquendos. Hujus procul dubio sententiae Augustinus fuit, scribens (*Lib. XIV. de civ. Dei c. IX. n. 4.*): *Nunc vero satis bene vivitur, si sine crimine; sine peccato autem qui se vivere existimat, non id agit, ut peccatum non habeat, sed ut veniam non accipiat; ac alio in loco (De perfect. just. cap. IX. n. 20.): Ingredi sine macula non absurde etiam ille dicitur, non qui jam perfectus est, sed qui ad ipsam perfectionem irreprehensibiliter currit carens criminibus damnabilibus, atque ipsa peccata venialia non negligens mundare elemosynis.* Magno doctore jam praeluserant Hieronymus (*Lib. II. contra Jovinian.*), Chrysostomus (*Hom. XVI. in Matth.*), Ambrosius (*Lib. II. de poenit. cap. X.*) aliique praeclarissimi Ecclesiae Patres.

SCHOLION. Calviniani peccata quaedam esse natura sua venialia pervicaciter negant, divina tamen misericordia, praedestinati ac fidelibus hominibus haud imputari affirmant; nec alterius mentis videtur fuisse Lutherus *art. praesertim 32.* Buddaeus etiam *lib. 8. cap. 2. §. 33. Schol.* affirmat, peccatum in se spectatum nullum esse, quod temporalem, ac aeternam mortem non mereatur, adeoque omnia peccata esse natura sua mortalia; ex Calvinianis tamen non pauci ab hac doctrina recesserunt. Confer Hug. Grotium in *discus. Rivetiani apologet. ac in notis ad consultationem Cussandri.* Philosophi Stoici omnia peccata inter se fecerunt paria, ut scribit, Cicero in *Paradoxis*; unde Horatius *lib. I. sat. 3.* aiebat:

*Quæ paria esse placet peccata, laborant,
Cum ventum ad verum est, sensus moresque repugnant;
Atque ipsa utilitas justî prope mater et æqui.*

Quod paradoxum Joviniano etiam arriserat, quem uberrime confutavit S. Hieronymus. Peccatum ab Augustino definitur, *factum, vel dictum, vel concupitum contra legem æternam*, sub qua definitione non solæ actiones, verum etiam omissiones rerum, quæ præceptæ sunt, continentur. Peccatum mortale est aversio a Deo tamquam ab ultimo fine, et conversio ad creaturas; id vero contingit, quum homo creaturis, quibus uti debebat, fruitur. Veniale autem est, inordinatus ad creaturas affectus servato ordine ultimi finis, quum nempe homo non ita creatoris adhaeret, ut a Deo ultimo suo fine avertatur. Lege Augustinum *lib. I. de doctr. Christ.* Discrimen vero, quod mortale inter ac veniale peccatum adest, ex objecto, fine, agendi modo, ac circumstantiis dimetiri oportet.

§. CCCLXXX.

Ad elevandum, quod statuimus, peccatorum discrimen, multa proferri solent; præcipue sunt: adversariorum. Argumenta
Paulus (Ad Rom. V. 23.), generatim ait: mortem esse *stipendium peccati*. Jacobus addit (cap. II. 10.): *Quicumque totam legem servaverit, offendat autem in uno, factus est omnium reus*. Salvator docuit (Matth. V. 19.): *Qui ergo solverit unum de mandatis istis minimis, et docuerit sic homines, minimus vocabitur in regno caelorum*. Haec tamen nihil nos conturbant. Doctor gentium de iis sermonem instituit, in quibus peccatum aliquando regnaverat, concupiscentiis ejus morem gesserant, qui membra sua iniquitatis arma exhibuerant, ac servi facti erant peccati: hos vero graviõribus culpis contaminatos fuisse, dubium non est, atque hujus peccati stipendium mortem esse, ex se patet. Immo quum eodem capite peccatoribus justos opponat, qui tamen in leves culpas non raro cadunt (§. præc.), apparet, ad venialia peccata Paulum objecto in loco haud respexisse. Quantum attinet ad Jacobum, ipse confutat errorem, qui apud Phariseos, eo-

rumque sectatores invaluerat, hominem censendum esse iustum, si maximam legis partem observasset, etsi in quibusdam nullam ejusdem habuisset rationem: quasi in statera ponderanda essent bona ac mala hominum merita, iique salutem essent consequuturi, quorum bona opera malis praeponderassent. Itaque contendit Apostolus legem penitus adimplendam esse, atque quisquis in grave scelus, veluti adulterium est, ac homicidium, labatur (Apost. Jac. cap. II. 11.), eum censendum fore quasi omnium reum, eo quod violavit caritatem, ex qua lex pendet, et Prophetæ. Tum quia ob unicum tantum scelus aeternam mortem promeritus est. Verba Salvatoris nostri ad sensa Phariseorum alludunt, qui peccata ceteroquin in se gravia, veluti mulierem aspicere ad concupiscendam eam, ira percitum esse, odio habere inimicos, putabant esse minima. Unde Salvator vult, ut qui hæc patraverit, excludendus sit a regno coelorum. Quamquam si rem bene assequor, adducta argumenta, in sensu ab adversariis intento accepta, nec ex Divina misericordia peccata venialia dari ostenderent.

SCHOLIUM. Solent etiam opponere Basilium, qui in regulis brevioribus peccatum nullum appellari posse leve asserit, eo quod legis transgressione quis Deum inhonorat. Nihilominus videtur ejus fuisse mentis, peccatum tunc debitum Deo honorem tollere, ac mortis stimulum esse, quando cum legis contemptu conjungitur. Subdit enim: *Nihil omnino tamquam minutum contemni debet. Qui enim rem contemnit, contemnetur ab ea.* Porro quod addit, hand reperire in novo foedere discrimen leve inter, ac grave peccatum, id secundum ejus scopum accipi debet, quandoquidem loquitur de correctione fraterna, cujus nobis debitum non tantum pro gravibus delictis, sed etiam pro culpis levibus incumbit. Nec moror difficultatem ex his Augustini verbis *Lib. IX. Conf. cap. 13.* proponi consuetam: *Vae etiam laudabili hominum vitæ, si remota misericordia discutias eam.* Contendit enim, cuncta, quæ a nobis fiunt bona, a beneficio redemptionis, divina misericordia, et gratia repetenda esse; quo

fit, ut vita hominis, etsi laudabilis videatur, divina bonitate exclusa habeat, ut timere sibi debeat. Quae discrimen inter peccata, quod Augustinus adeo loculenter expressit, praedicavitque (§. praec.), minime tollunt.

§. CCCLXXXI.

Ex errore enascitur error: Heterodoxi arbitrati ex Divinarum promissionum fide homines justos fieri, deduxerunt, quemlibet de sua justificatione certum securumque esse posse, ac debere. Nos vero certitudinem discernendam esse duplicem asserimus, *fidei* nempe, ac *spei*; illa Divinae revelationi innixa assensum firmissimum haesitatione exclusam omni a nobis extorquet; alteram habere tunc queas, quam nullius tibi conscius criminis pacatam conscientiam geras, bonisque intentus operibus, aeternae felicitatis, quam adpromisit Deus, adipiscendae fiduciam tenes. Spes ista, non solis Dei promissionibus innotuit, sed etiam diligentiae nostrae, eo quod Deus mandata sua diligenter observantibus, ac perseverantibus usque in finem coronam gloriae adpromisit; quo fit, ut ob infirmitatem humanae naturae haec spes sollicitudinem conjunctam habeat, ac salutarem timorem. Certitudinem hanc profitetur Catholica Ecclesia; quam autem A catholici induxerunt, repudiant ipsae sacrae litterae. Et sane in *Proverbiis* (XX. 9.), legimus: *Quis potest dicere, mundum est cor meum, purus sum a peccato?* tum (XXVIII. 14.): *Beatus vir, qui semper est pavidus.* Paulus vero vir sanctissimus, ac vas electionis de seipso agebat (I. ad Corinth. IV. 4.): *Nihil mihi conscius sum, sed non in hoc justificatus sum: διδκτάμεται δικάσθαι*, quod est interius purgari, animumque a vitis mundum habere (*). Ignorabat itaque Paulus, quempiam Divina revelatione seclusa posse fide certissima credere, se penitus mundum esse, justum, ac sanctum. Ad quem locum Chrysostomus respiciens, scribebat: *Non Corinthios tantum, sed seipsum privat hoc iudicio.* Hieronymus

Nemo de sua justificatione sine familiari revelatione certus est.

(*) Quo sensu accipitur Isai. LIII. 11. Act. XIII. 38, ad Rom. VI. 7. aliisque in locis.

non minus sit (*Lib. II. contra Pelag.*): *Temperabat sententiam ne forte per ignorantiam deliquisset, quanta abyssus sit, audite.* Basilius autem (*Constit. Monast. cap. II.*): *Multa peccantes, plurima non intelligimus. Quapropter dicit Apostolus, Nihil mihi conscius sum, sed non in hoc justificatus sum: hoc est multa pecco, et non intelligo.* Augustinus (*De Perfect. just. cap. XV.*): *Quantalibet justitia sit praeditus homo, cogitare debet, ne aliquid in illo, quod ipse non videt, inveniatur esse culpandum.* Quapropter merito definiverunt Tridentini Paires (*Sess. VI. Can. XII.*): *Si quis dixerit omni homini ad remissionem peccatorum assequendam necessarium esse, ut credat certo, et absque ulla haesitatione propriae infirmitatis, et indispositionis peccata sibi esse remissa, anathema sit.*

SCHOLION. Lutherus, Calvinus, Dordracena Synodus, existimarunt, quemlibet, sicuti de aliis fidei articulis, ita et de justificatione sua certissimum esse posse. Calvinus in *antid. conc. Trid. ad Sess. VI.* temperare, vel immutare visus est sententiam suam; inquit enim: *Non certitudinem aliquam imaginamur, quae nulla dubitatione tangatur, quae nulla inquietudine sollicitetur, quin potius dicimus, perpetuum esse fidelibus certamen cum sua ipsorum diffidentia.* Hinc est, quod le Blanc in *Thesibus Sedamensibus* sententiam hanc a suis non defendi scribat; quem tamen non paucis Calvinistarum adductis testimoniis, confutavit Arnaldus in opere: *le renversement de la morale de J. Christ par les erreurs des Calvinistes touchant la justification.* Attamen, ut dicam, quod sentio, hanc communem esse omnium Calvinistarum doctrinam non arbitror; quod etiam ostendit idem le Blanc in postrema suarum Thesium editione testimoniis Perchinsii, Davenantii, Amesii, Mestrezatii, du Moëlinii, Valaei, ac Witichii. Vid. le Fevre ch. II. §. II. Observes, velim, doctrinam esse Lutheri, posse nos certos esse de fide nostra, neminem vero de sua poenitentia securum esse; immo neminem tutum reddi posse; quia in melioribus operibus suis ob latens amoris proprii vitium graviter non peccet.

Confer Bossuet *hist. de var. lib. I. n. 9. seq.* Jam vero dubium non est, Deum sincere poenitentibus tantum, peccatorum remissionem dare; ut sexcentis in locis fidem faciunt Sacrae Litterae; ac Lutherani ipsi conversionem cordis necessariam conditionem ad justificationem esse admittunt (§. CCCLXIX. Schol.). Quapropter, quum in Lutheri principiis, an vere compunctus, et contritus sit, certus esse possit nemo, nam posset illusio nobis irrepere, aut amoris proprii praejudicium, sit, ut neque quis certitudine fidei credere valeat, se obtinuisse peccatorum remissionem. Haud ignoro, confessionem Augustanam *cap. de justificat.* asserere, fidem cum mortali peccato minime posse consistere. Unde ita argumentatur: *fidem habeo, itaque peccatum mortale habere nequeo.* Quod argumentum in adversarios Bossuetus retorquet *lib. 3. var. n. 38.* Fides cum peccato mortali consistere nequit; est Lutheranorum propositio; at ex doctrina Lutheri nemo certus est, an in melioribus operibus suis graviter non peccet, an ducatur amore proprio; nemo itaque certus est, an vivam fidem habeat; proindeque nemo est de sua justificatione securus.

§. CCCLXXXII.

Sed audiamus jam, quae pro doctrina sua proferant Protestantes. Paulus, ajunt, Corinthios (*II. ad Corint. XIII. 5.*) his verbis monet: *Vosmet ipsos tentate, si estis in fide, ipsi vos probate; annon cognoscitis vosmetipsos, quia Christus Jesus in vobis est? nisi forte reprobi estis.* Quis non videat, cuilibet compertum esse, an in fide sit, ac Christum in se inhabitantem habeat? Confirmat id ad Romanos scribens (V. 1.): *Justificati ergo ex fide pacem habeamus ad Deum.* Quomodo autem tranquillum habebimus, pacatumque animum, si certissime haud pateat, nos esse justos? Jam dixerat (IV. 16.), *Ideo ex fide, ut secundum gratiam promissio sit omni credenti;* immo addit (VIII. 16.): *Ipse enim Spiritus testimonium reddit spiritui nostro, quod sumus filii Dei: testimonium autem Spiritus Sancti errori obnoxium non est.*

Heterodoxorum
sophisma-
ta.

§. CCCLXXXIII.

Solvuntur.

Verum laudata Pauli testimonia Adversarii non recte exponunt. Ac primum: vult ipse, ut se probeant, an in fide sint, Christusque in ipsis inhabitet; non erant itaque, qui justi erant, hujus rei certi ac securi. Sed neque re bene ponderata, ac discussa, fidei certitudinem de eorum sanctitate, ac justitia, quam nec semetipsum habuisse fidem facit (§. CCCLXXXI.), sed moralem tantum inducere voluit. Saue, quisnam mortalium seclusa Dei revelatione, tantam se habere, quantam Deus jubet, caritatem, ac singula Dei mandata ad amissim observasse compertum penitus habet? ut puto, nemo unum. (*) Qui vero sancti sunt, ac justi, hos pace interna frui, ac tranquillitate fateamur; at ad hanc obtinendam sufficere certitudinem moralem constanter tenemus; nam eodem Doctore gentium teste cum metu, ac tremore salutem nostram operari debemus (*Ad Philip. II. 12.*): nec moror, quod dicitur, secundum gratiam firmam esse promissionem omni credenti. Promissionis enim firmitatem in eo reponit Paulus, quod ad Evangelium non ii soli, qui ex semine Abrahæ sunt, sed Gentiles etiam vocantur: at quid hæc ad justificationis certitudinem? An omnes, qui credunt, justi sunt, ac sancti? Optanda quidem res esset, sed cum experientia pugnat. (**) Testimonium Spiritus sancti errori minime obnoxium esse, ex sese patet; verumtamen, nisi adsit pecu-

(*) Reperire tamen est doctissimos viros, affirmantes Paulum non de gratia habituali, sed de præsentia Christi secundum imperandi potestatem, ac de annuntiata jam fide loquutum fuisse: cui expositioni non officiant hæc verba, nisi forte reprobi estis; etenim reproborum nomine non rejectos a Deo hic voluit Paulus designare, sed viles factos, ac degeneres. Vide *Estium*, et *Calmet* in hunc locum.

(**) Nec valet argumentum *Petri martyris* aieutis, ex promissionibus universali propositione contentis, singulares conficere licet; at Christus promisit *Joan. VI. 20. Hæc est voluntas Patris, ut omnis, qui videt Filium, et credit in eum, habeat vitam æternam*; licebit ergo inferre; ego credo in filium Dei, habeo ergo jam, et habebo, quod adpromissit. Nihilominus promissio vitæ æternæ conditionem habet adnexam, nempe si veram habeat quis contritionem cordis, Deique mandata servet. Nemo autem est, qui fidei

liaris revelatio, illud nobis clare non proponitur, hinc etiam est, quod multi a veritate aberrantes, se tamen justos, ac sanctos esse praesumant. Quamobrem testimonium Spiritus Sancti, quod simus filii Dei, in eo reponi debet, quod fideles credunt, Spiritum Sanctum esse, qui regenerat, ac sanctificat, quod ipse in solis piis, justisque habitat, quod sola vera Christi religio sit, quae justificat, eundemque S. Spiritum tribuit. Unde Buddaeus ipse, (*Lib. IV. c. IV. §. 13.*) eos saltem, qui tentationibus adfliguntur, dubitare posse, an justii sint, affirmat.

§. CCCLXXXIV.

Non immerito gravissimi quique viri hanc Calvinistarum doctrinam, nefandis scilicet sceleribus justitiam ac sanctitatem haud amitti, horrorem incutere dixerunt, atque moralis Christianae fundamenta subvertere. Quippe, quae salutarem fidelibus timorem eripit, vitiisque omnibus habenas laxat. Commentum istud sacri libri impugnant, confodiuntque. In Psalmis enim legimus (*Ps. II. 12.*): *Apprehendite disciplinam, nequando irascatur Dominus, et pereatis de via justa*; atque apud Ezechielem (*XVIII. 26.*): *Cum autem averterit se justus a justitia sua, et fecerit iniquitatem, morietur in eis*. Paulus vero ad Corinthios scribebat (*I. ep. IX. 17.*): *Castigo corpus meum ac in servitutem redigo, ne forte, cum aliis praedicaverim, ipse reprobos efficiar*; iisdemque saluberrimum hoc monitum dat (*X. 12.*): *Itaque, qui se existimat stare, videat, ne cadat*. Cumque peccata graviora recensisset, absque personarum discrimine ait; quod, quotquot iis contaminantur, *regnum Dei non possidebunt* (*VI. 9. seq.*). Ecclesiae Patres ejusdem semper fuisse mentis, prudens nemo addubitabit. Hie-

Ac potest justitia ac gratia sanctificans rursus amitti.

certitudinem habeat, se haec omnia, ut oportet praestitisset; adeoque ex Dei promissionibus minime evincitur justificationis nostrae certitudo. Sane Calvinus ipse *lib. III. instit. cap. II. §. X.* scribit: *Tot vanitatis recessus habet, tot mendacii latebris scatet cor humanum, tam fraudulenta hypocrisis tectum est, ut saepe . . . fallatur.*

Theol. Dogm. Pars IV.

ronymus Jovinianum, a quo errorem suum Calvinus mutuatus est, solide confutavit. Augustinus non tantum hanc veritatem saepe propugnat, verum etiam justorum exemplo, qui in peccatum misere prolapsi sunt, demonstrat (*Lib. II. de Doctr. Christ. n. 33.*). Sapienter itaque Tridentini Patres definiverunt (*Sess. VI. Can. XXIII.*): *Si quis hominem semel justificatum dixerit amplius peccare non posse, neque gratiam amittere; atque ideo eum qui labitur, et peccat, numquam vere fuisse justificatum. . . . anathema sit.*

SCHOLION. Calvinus arbitratus fide sola hominem fieri justum, eumque nedum de sua justitia, sed etiam de sua praedestinatione securum esse, voluit non minus, dum in atrocia scelera labitur, ex Divina bonitate haec praedestinato homini haud imputari; proindeque adeptam justitiam penitus nunquam amittere. Hinc etiam quod mortale inter, ac veniale peccatum reperitur discrimen, repetit totum: praedestinato omnia dicit venialia; mortalia hominibus caeteris. Quam Calvinistarum mentem esse, probandum assumpsit Arnaldus in libro, *Le renversement de la morale de J. Ch.*, ubi plura eorum, qui se reformatos dicunt, clara testimonia profert, ipsiusque synodi Dordracenae: in qua tamen, an detestandum hoc dogma definitum fuerit, adeo perspicuum non est. Id iusticias it Le Fèvre ch. II. §. III. innuiturque ejusdem Synodi Canoni octavo; tum iudicio Theologorum, qui ab Anglia delegati erant, et Embdanorum. Cl. Wallemburgici cap. 87. de justif. num. 5. ajunt: *Hic nota primo in Synodo Dordracena posse videri, non esse definitam eam quaestionem, an fideles numquam totaliter, et penitus excutiant Spiritum S.* Quod etiam inter A catholicos affirmat Blondellus, *Actes autentiques* p. 12. Longam etiam laudatus Le Fèvre Calvinianorum seriem contexit, qui justitiam, ac sanctitatem amitti posse judicant; tamen ex iis non pauci fidei, et justitiae residuum in gravibus peccatoribus inesse putant; non quidem *actu*, sed *potentia*, ut inquit Vossius; vel *habitu*, ut contendit Forbesius. Qua in re misere decipiuntur: quo-

modo enim justitiae, ac sanctitatis *residuum* in iis adesse potest, qui in statu degunt damnationis, et mortis? Caeterum sententiam de justitiae inamissibilitate perniciosum errorem vocarunt Bullus in *apol. pro harmonia*, et Grotius in *animadv. ad Consult. Cassandri not. de discrim. peccati mortalis, et venialis*. Casaubonus in *epistola ad Petrum Bertium* scripta an. 1611. scribit: *Video nostros contraria docere antiquis Patribus. Ridicule faciunt, qui hoc* (nempe justitiae inamissibilitatem) *negant*. Alardus autem Voekus in *tract. de uniendis Christianorum animis in fide illibata*, hominem posse excidere gratia demonstrat primorum parentum, ac Davidis exemplo; addit conceptissimis verbis id docere Paulum *ad Rom. II. 20.* ac Augustinum *epist. 121. ad Probam*. Unde concludimus hujus Calvinianae doctrinae absurditatem cogitam fuisse, ac reprobata a non paucis eorum, qui se reformatos vocant.

§. CCCLXXXV.

Praeconceptam absurdam sententiam, ut tueantur Calviniani, his veluti fulcris innituntur. Propheta Calviniano-
rum objecta.
Regius inquit de homine justo (*Ps. XXXVI. 24.*): *Cum ceciderit non collidetur*. Paulus (*I. ad Corinth. XIII. 8.*), *Caritas numquam excidit*; itaque ille, qui caritate donatus est, illa numquam carebit. Clarius adhuc Joannes (*I. Epist. III. 9.*): *Omnis, qui est ex Deo, peccatum non facit, quoniam semen ipsius in eo manet, et non potest peccare, quia ex Deo natus est*: addit (*V. 18.*): *Scimus, quia omnis, qui natus est ex Deo, non peccat, sed generatio Dei conservat eum*. Salvator ipse nos docet (*Matth. VII. 18.*): *Non potest arbor bona malos fructus facere, neque arbor mala bonos fructus facere*. Quamobrem compertum cuilibet esse debet, semel justos a sanctitate amplius non posse excidere.

§. CCCLXXXVI.

Contorta at nimium sunt ista, et a nativo sensu Enodantur.
prorsus aliena. David ad justorum tribulationes respicit, quae Deo auxilium praebente eos nunquam

opprimant. Nam quidquid infausti eveniat eis, si in Domino suo confidant, gratiam ejus implorent, superno ejus patrocínio numquam destituentur. (Vid. Augustinum *enar. in ps. XXXVI. serm. II. n. 17.*) Merito Doctor gentium asserit, caritatem nunquam excidere, fides enim ac spes in altera vita non erit; caritas autem permanebit, augebitur, ac penitus perfecta evadet; at justum dum hac in mortali vita degit, a caritate deficere non posse, nulla ratione asserit. Jam venio ad Joannem, qui hoc unum contendit, statum nempe filiorum Dei, cum peccati statu haud posse consociari; non vero personam filiorum Dei nunquam posse in grave peccatum labi. Itaque docet, justum, dum ut adoptivus Dei filius vivit, regenerationem, ac spiritalem nativitatem, quam ex Deo habuit, conservat, haud gravibus se delictis contaminare; hunc tamen in finem oportet, ut Divina mandata custodiat (*I. Joan. III. 24.*) ac fratres suos diligat (*Ibid. v. 14. et 15.*). Quamobrem sicuti contingit non raro justum concupiscentiae rebellis motibus obsecundare, ac a Fratrum dilectione desistere, mandata Divina negligere; ita secundum Joannis mentem a sanctitate eum deficere posse, dubium non est. Ita dicere solemus pudicam mulierem fidem marito datam conservare inviolatam, Judicem integrum nec muneribus, nec gratia corrumpi: haec vero secundum dotes, quae ipsos exornant, dicta sunt; quamvis et pudicae mulieres nonnumquam lapsae sint, ac integri Judices ad Magnatum captandam gratiam a justitia administranda defecerint. Sed quid multa? Dilectus Christi discipulus totus est, ut fideles a peccato perpetrando absterreat, doceatque fidem operibus bonis esse conjungendam. Quorsum autem hae admonitiones, si, qui semel in baptismo gratiam est consecutus, ab ea amplius excidere non potest? Hinc etiam patet, quoniam modo arbor bona malos fructus gignere nequeat. Arbor bona caritas est, ac bona voluntas, quam Deus nobis inspirat, quamobrem, quamdiu homo justus secundum bonam a Deo datam voluntatem agat, fructus malos producat nunquam: verumtamen, quum in justo homine adsit adhuc concupiscentia, quae ex

peccato est, ac ad peccatum inclinat, si hinc obsecundet, a primævo statu deficere potest, ac in arborem malam evadere, ex qua pessimi fructus enascantur.

CAPUT II.

De Merito.

§. ECCLXXXVII.

HUMANA opera, si legibus, ac divinae voluntati cohaerent, bona sunt; ab hac regula si deflectant, mala. Nonnulla quidem sunt, quæ nec jubentur, nec vetantur; quæ si generatim consideres, ac quantum ad objectum suum, nec bona erunt nec mala: at si hæc ipsa in particulari consideres, ac secundum omnes operis circumstantias, bonitatem induent, vel malitiam. Fieri etiam potest, ut opus spectato objecto suo bonum sit, quamvis si circumstantias ponderes, ac finem præsertim, quo ad operandum induceris, ab æquitatis regula deflectat. Unde agebat Augustinus (*Contra Julian. lib. II. n. 21.*): *Noveris non officiis, sed finibus discernendas esse virtutes. Officium est autem, quod faciendum, finis vero, propter quod faciendum est.* Finis vero vel proximus est, vel ultimus. Porro, ut opus undequaque sit bonum, finem utrumque, ultimum præsertim animo contuearis, oportet. Quæ de causa Paulus Corinthiis mandabat (I. ad Corinth. X. 31. Vid. ad Colos. III. 17.): *Sive ergo manducatis, sive bibitis, sive aliud quid facitis, omnia in Dei gloriam facite*: immo et addebat: *Omnia vestra in caritate fiant* (I. ad Corinth. XVI. 14.). Quo fit, ut opus undequaque bonum censendum sit, quo æquitatis regulam servamus, fruimur Deo, utimurque creatoris (*). Opera autem vel moraliter bona dicuntur, vel sub eo respectu considerantur, quo ad salutem nos disponunt, aut ducunt. Primi generis opera ut bene agas, Theologi multi haud necessariam gratiam judicant, eamque titulo creationis, conservationis, redemptionis, cuique incumbat debitum opera sua

in Deum ultimum finem referendi; ii hinc existimant moralium virtutum opera a seipsis, ac per relationem sibi intrinsecam in Deum referri. Placet tamen Augustinianis Theologis, quibus multi assentiuntur, moralia haec opera ex motivo saltem inchoatae charitatis in Deum esse referenda, ad quod praestandum necessaria est Dei gratia. At vero bona opera, si eo sub respectu considerentur, quo salutaria sunt, ad eorum initium, progressum, ac consummationem Divinum adjutorium necessarium esse fides catholica docet (§. CLXXVI.). Quandoquidem Christifidelis nec in se confidere, neo gloriari potest; sed in Domino, qui eum adjuvat, roboratque. Unde est, quod opera cuncta, quae ex Dei gratia non procedunt, ad finem nostrum adipiscendum, vitam scilicet aeternam, inutilia prorsus sunt. Jam vero opera haec Divinae gratiae auxilio bona, si ante justificationem consideres, ad eam quidem disponunt; at illam non promerentur, quum justificemur gratis per redemptionem, quae est in Christo Jesu (§. CCCLXIX. CCCLXXI.). Si vero quantum ad ipsam justificationis augmentum, ea in censum veniant, dubium non est, fide sincera, spe, ac caritate virtutes augeri, ac justificationis augmentum promereri.

(*) SCHOLIUM. Multa etiam fiunt ab ipsis impiis, ac infidelibus, quae honestate operum iuspecta, ac virtutum officiis, non solum vituperare non possumus, verum etiam merito, recteque laudamus: quamquam, si discutiantur, quo fine fiant, vix inveniantur, quae justitiae debitam laudem defensionemque mereantur, ait Augustinus de Spir. et litt. cap. 27. *Hinc non est vera virtus, nisi quae ad eum finem tendit, ubi est bonum hominis, quo melius non est*: inquit idem S. Doctor de Civ. Dei lib. V. cap. XII. Quapropter opus est Christiano, ut agat, quod bonum est, eo fine, ut Deo suo obsecundet, eique placeat; quo pacto a sapientibus mundi, ac Philosophis discernitur: isti actiones suas considerant, quatenus cum legibus civilibus, ac felicitate humani generis conveniunt; tum virtutis pulchritudinem, ac utilitatem considerant. Christi-

fidelis vero practer haec, excellentius longe, ac fortius motivum habet, quo moveatur ad bene agendum; ipse consecratur virtutes, in operibus civitati, ac humano generi utilibus se exercet; eo quod noscit, Deum suum id ab eo postulare, unde propter ipsius amorem bonum operatur, ac quae agit cuncta, virtute saltem in ipsum veluti ultimum finem suum refert.

§. CCCLXXXVIII.

Opera bona dari adeo certum est, ut humanae Adultis opera bona.
mentis delirium esse arbitrer, veritatem hanc ipso sanae rationis lumine notam, ac sacrarum litterarum auctoritate suffultam inficias ire velle. Quae enim opera legibus, ac Divinae voluntati conformia sunt, quae ad finem ultimum referuntur, ac gratiae Divinae auxilio patrantur, ea sunt undequaque bona (§. praec.). Nihil vero in rem nostram opportunius facto Magdalenae, quae ad Salvatoris pedes provoluta, lacrymis irrigans, ac pretioso balsamo inungens; ipso Christo Domino docente, *bonum opus operata est* (Matth. XXVI. 10.). Paulus Corinthios monet (II. Epist. III. 8.), *ut abundant in omne opus bonum*. Idem Doctor gentium servidas ad Deum preces fundebat pro Colossensibus, ut in omni opere bono fructificarent (I. 10.); atque jubet Tito, adhortari suos, *ut curent bonis operibus praeesse. Haec sunt bona, et utilia hominibus* (III. 8.). Jacobus autem fidem ipsam sine operibus mortuam esse dicit (CCCLXIX.). Tempus inutiliter tereret, si quis uberioribus argumentis id demonstrandum assumeret.

SCOLION. Graviter lapsi sunt Lutherus asserens art. 33. justum in omni bono opere peccare; atque Calvinus autumans lib. 3. instit. opera omnia, si in se existimentur, sordes esse, ac inquinamenta. Quandoquidem saepe justi Divina gratia exornati opera omni ex parte bona efficiunt. Atque licet Jacobus asserat, *In multis offendimus omnes*; non tamen ait, quod in cunctis operibus peccemus. Falsum etiam est, ab innata concupiscentia omnia justorum opera vitiari; enimvero ad superandam contrariam

cupiditatem Dei gratia nobis confertur, unde, quod a Deo praecipitur, nos delectat, sanctoque amore facimus (§. CCLI. CLV.). Neque sordes inde contrahunt justī, eo quod tanto fervore, ac dilectione non operantur, quanta jam erit in coelis, nam minor iste fervor culpa non est: *Neque enim*, inquit Augustinus *de Spir. et litt. cap. ultimo*, *si esse nondum posset tanta dilectio Dei, quanta illi cognitione plena, perfectaue debetur, jam culpae deputandum est.*

§. CCCLXXXIX.

Necessaria Haec vero bona opera ad salutem aeternam con-
sunt ad salu- sequendam esse necessaria, clare nitideque probatur.
tem. Notum est, Christum Dominum non tantum Redemptorem esse nostrum, verum etiam legislatorem (§. LXXXIII.), cujus mandatis obtemperemus necesse est, si ad aeternam vitam ingredi volumus; ipse in gloria Patris sui venturus est Iudex: *et tunc reddet unicuique secundum opera ejus* (Matth. XVI. 27.): ipse tunc temporis dicet iis, qui misericordiae exercuerunt opera: *Venite benedicti Patris mei, possideite paratum vobis regnum a constitutione mundi* (Ibid. XXV. 34. seq.). Qua itaque fronte A catholicorum non pauci ausi sunt dicere, opera ad salutem haud esse necessaria, si docente veritatis Magistro aeternam vitam consequetur nemo, qui bonis operibus non insudaverit? Quid? nonne ad opera bona respiciebat Paulus scribeus (II. ad Timoth. IV. 7.): *Bonum certamen certavi, cursum consummavi, fidem servavi; in reliquo reposita est mihi corona justitiae, quam reddet mihi Dominus in illa die justus Iudex.* Et quid aliud innuere voluit Joannes inquitens (Apocal. VII. 14. 15.): *Hi sunt, qui venerunt de tribulatione magna..... ideo dicit s̄tro, sunt ante thronum Dei*; nisi quod opera bona causa sint, cur in ordine exequutivo (§. CXCIV.), elargiatur Deus vitam aeternam? Ecclesiae Patres, quum populum admonuerint serio, ut in via justitiae incedat, bonis operibus navet operam, si patriam coelestem obtinere cupit, hanc veritatem docuisse semper, exploratum est.

SCHOLION. Dubium est nullum, pravam esse, tum incuriae, ac sceleribus aditum aperire eorum sententiam, qui bona opera ad salutem necessaria non esse docent. Id opinati fuere Simon Magus, Gnostici, Carpocratiani, Aetius, Eunomius, Beguardi, et Beguinae. His adjungendi sunt Flacciani sic dicti a Flaccio, sive Jenenses, qui omnia opera perniciose esse contendebant. Lutherani recentiores, etsi opera per modum causae ad salutem minime necessaria esse existiment, iique hanc formulam: *bona opera sunt necessaria ad salutem*, ita comparatam esse censeant, ut rectius, ac sapientius faciant, qui ab ea sibi temperant: non tamen approbant illorum doctrinam, qui nimio fervore in alterum prolapsi, bona opera ad salutem perniciose esse dixerunt, ita Buddaeus *lib. IV. Cap. V. §. 23.* Schol. Nihilominus alio sub aspectu ea necessaria esse voluit, eo quod ex ipsis vera fides cognoscitur; tum quia vitae sanctitas diligenter ac constanter tenenda est, sine qua Deum nemo visurus sit. Calvinianorum pars maxima opera necessaria ad salutem iudicant; quo factum fuit, ut Gherardus *loc. Theol. tom. IV. de bonis operibus cap. 9.* et Jo. Himmeli in suo *Calvini Papismo* scripserint. Calvinistas hac in parte sentire nobiscum. Confer Wallemburgicos *de j. st. cap. 92.* Nec officit, quod vita aeterna gratia et misericordia vocetur *Ps. CII. ad Rom. VI. 23.* Nam gratia est simul et merces; gratia et misericordia ob praedestinationem gratuitam (§. CXCIV.), atque ob gratiam Dei praevenientem, ac subsequentem, unde bona opera efficiunt (§. CLXII.), merces ob liberam hominis obedientiam. Audiamus Augustinum *de corrept. et grat. c. 13.* Quia et ipsa vita aeterna, quam certum est bonis operibus debita reddi, a tanto Apostolo gratia Dei dicitur, cum gratia non operibus reddatur, sed gratis detur, sine dubitatione confutandum est, ideo gratiam vitam aeternam vocari, quia his meritis redditur, quae gratia contulit homini.

§. CCCXC.

Spei nomine, quamvis tum apud sacros, tum Actus spei.

apud profanos scriptores rerum adversarum expectatio nonnumquam intelligatur, tamen significationis hujus nullam habituri sumus rationem, quum ea, uti suscipimus considerandam, circa res bonas ac futuras tota versetur. Si generatim illam consideres: *Animi nostri motus est, quo tendit in bonum absens, arduum, apprehensum ut possibile: at spes Theologica, de qua disserimus, definiri solet: Virtus divinitus infusa, per quam certa cum fiducia nostrae salutis, et aeternae vitae bona expectantur.* Objectum spei nostrae princeps, Deus ipse est animorum nostrorum vita, beatitudo ac ultimus finis. Cetera, quae sive in hac, sive in altera vita a Deo expectamus bona, ut remissio peccatorum, sanctitas, immortalitas, in ordine ad Deum speramus singula, in quo desiderium omne nostrum conquirere debet: spes secum fert desiderium, ac fiduciam; quae enim nobis haud placent, nec amamus, ea neque sperare solemus. Fiduciam autem habemus nos ea obtenturos, quae speramus, non quidem fidei certitudine; ut Aetholici volunt; sed ea tantum; quae licet Divinae misericordiae innixa sit, omnem tamen salutarem timorem a nobis haud depellit (§. CCCLXXXI.). Nostrae autem spei fundamentum est Dei misericordia, ejus promissiones, Christi Domini merita, ejusdemque victrix ac effioax gratia; motiva vero sunt Divina omnipotentia, ejus beneficentia summa, nec non quod ut in ipso speremus, jubeat. Spes vel est *habitualis*, in nostra justificatione a Deo infusa, vel *actualis*, quando nempe spei actum elicimus. Dividitur haec praeterea in spem perfectam ac vivam, quae cum habituali caritate conjuncta est, et in imperfectam, qualis in homine peccatore occurrit; quae tamen absque aliquo Dei amore persistere nequit, quemadmodum Augustinus docet (Enchir. Cap. VIII.): *Spes sine amore esse non potest.*

§. CCCXCI.

Boni sunt ac commendandi etiam in hominibus perfecta caritate instructis.

Perperam Pseudomystici sub majoris sanctitatis specie in eo collocandam cupiebant operam omnem, ut, qui ad perfectionis apicem adspirant, ii celestis praemii spem deponere teneantur. Enimvero ho-

minibus justis quantavis caritate exornatis aeterna vita proponenda est veluti incitamentum, ut in omni bono opere abundant, constanterque permaneant; nec enim eorum labor futurus est inanis in Domino (Ad Heb. VI. 10.), nec injustus est Deus, ut operis ac dilectionis, quem in ipsius nomine ostenderunt, obliviscatur, unde nec debent confidentiam suam amittere, quae magnam habet remunerationem (Ibid. X. 35. Confer PP. Tridentinos Sess. VI. cap. 16.). Quid plura? Nonne Deus Abrahamae dixit: *Ego protector tuus, et merces tua magna nimis* (Gen. XV. 1.)? Nonne Moyses aspiciebat in remunerationem (Ad Heb. XI. 26.)? Immo Regius Propheta aiebat (Ps. CXVIII. 112.): *Inclinavi cor meum ad faciendas justificationes tuas propter retributionem*. Adeone inconsiderati fuere hi Pseudomystici, ut non animadverterent, Salvatorem ipsum voluisse, ut orando petamus: *Adveniat regnum tuum* (Math. VI. 10.), immo et jussisse discipulis suis, ut quaererent *primum regnum Dei* (Ib. v. 33.)? Porro, caritate instructi erant perfecta Abraham, Moyses, David, ac Christi Domini discipuli, quos etiam de perfectionis via edocebat. Accedit ex caritatis natura deprompta ratio. *Caritas*, aiebat Augustinus (*De Doct. Christ.* lib. III. cap. X.), *est motus animi ad fruendum Deo propter seipsum, et se et proximo propter Deum*. Unde discimus, caritatem ardens in nobis excitare desiderium possidendi Deum; atque quo ipsa major est, eo intensius ac efficacius desiderium, ac expectationem fruendi Deo summo bono, ac fine ultimo, propter quem conditi sumus, gignere in nobis debere. In hoc autem desiderio, ac expectatione spei Theologicae natura reposita est (§. praec.). Quapropter spei actus in hominibus etiam perfecta caritate instructis boni sunt, ac commendandi.

SCHOLION. Michael de Molinos, eorum, qui Pseudomystici, ac *Quietistae* vocantur facile Princeps, inter alias propositiones ab Innocentio XI. proscriptas asserebat, anhelantem animum ad perfectionem debere tum ad aeterna supplicia, tum ad sempiternam felicitatem esse indifferentem, atque expecta-

tionem aeternae vitae minime posse cum perfectione Divini amoris persistere. Huic accessit Malavallus Massiliensis, ac nobilis foemina de Gujon, quae a P. La Combe fanaticis his principiis imbuta, eadem propagare satagebat in libro: *Moyen courte, et facile pour faire l'oraison*. At quod magis mirandum, eo inclinabat etiam doctissimus Fenelonius, qui haec principia instillabat in opere: *L'explication des maximes des saints*; cujus occasione litteraria certamina ipsum inter ac magnum Bossuetum exarsere. Causa tamen ad Innocentium XII. delata, post accuratum examen Fenelonii liber proscriptus fuit; qui raro humilitatis ac obedientiae insignis exemplo Bullam Pontificis ipsemet promulgavit, erroresque revocavit. Vid. Racine *abregé de l'Hist. Eccl. vol. XIII. art. 34.*

§. CCCXCII.

Quietistarum
argumenta.

Praecipuum Quietistae invenisse assertionum suarum pondus sibi visi fuerunt in hiis Christi Domini verbis (Matth. XVI. 24.): *Si quis vult venire post me, abneget semetipsum . . . Si quis* (Lucae XIV. 26.), *venit ad me, et non odit patrem suum, aut matrem . . . adhuc et animam suam; non potest meus esse discipulus*. Porro ajunt, abnegare semetipsum, et animam suam odió habere, nihil aliud innuit, quam salutis suae spem abjicere omnem. Apostolus (ad Rom. IX. 3.), pro salute fratrum suorum anathema esse cupiebat, alienus nempe a vita aeterna; quanto magis ob amorem Dei perfectum id existimandum est licitum? Docet insuper Doctor gentium (I. ad Cor. XIII. 5.), quod *caritas non quaerit, quae sua sunt*; itaque qui perfecta caritate praeditus est, propriam felicitatem non quaeret. His addendum, veram caritatem amorem esse prorsus gratuitum; at qui Deum amat, ut bonum sibi, amorem ille habet concupiscentiae, qui vitium nonnullum secum fert.

§. CCCXCIII.

Refelluntur.

Quam parum adducta argumenta Pseudomysticis faveant, qui rem profundius rimetur, facile iudicabit. Christus Dominus, ut ob sui amorem in ter-

renis fluxisque rebus fiduciam non apponamus, jubet; unde nec mundo, nec concupiscentiis ejus servire debemus; abnegemus etiam nostram voluntatem opus est, immo et odio habendi sunt Parentes, si ipsi impedimentum ponant, ne Deo serviamus (*). At firmiorem inde habere debemus coelestium bonorum expectationem, nam Salvator veniet in gloria, *ut unicuique reddat secundum opera sua* (Matth. XVI. 27.), atque quisquis domum, fratres, sorores, patrem et matrem ob ejus amorem dimiserit, spondetur illi, *quod vitam aeternam possidebit* (Ib. XIX. 29.). Paulus, ut vehemens, quo flagrabat, salutis Judaeorum desiderium exprimeret, asserit, quod si fieri posset, optaret pro ipsis anathema esse. Quamobrem in hypothesi haud possibili loquutum fuisse arbitror; quemadmodum dum scribebat ad Galatas (I. 8.): *Sed licet nos aut Angelus de Caelo evangelizet vobis, praeterquam quod evangelizavimus vobis, anathema sit.* Quis autem ignoret, Angelum de coelo haud posse contraria iis, quae Christus praecepit, annuntiare? Quantum ad alterum Apostoli locum hanc habeas responsionem: illos nempe quaerere, quae sua sunt, qui aliorum salute neglecta, propria ac terrena commoda quaerunt. Quo sensu ad Philippenses scribebat (II. 21.): *Omnes, quae sua sunt, quaerunt, non quae Jesu Christi.* Ceterum, qui Deum amat, ut illo fruatur, majori ac intensiori caritate ei in Patria adhaereat, non quaerit ipse ad Pauli mentem, quae sua sunt. Jam venio ad postremum: Duplex in caritate voluntatis motus considerandus est, *amicitiae et concupiscentiae*: per amicitiae motum Deo soli placere quaerimus, ipsius gloriam solam in votis habentes, altero Deum videre, ac possidere cupimus; attamen hic concupiscentiae amor habebit vitium, si ad propriam tantum utilitatem respicimus, verum si ad aeternam vitam propter Deum ipsum auhelemus, ut ardentiori nempe amore illum semper magis prosequamur, amor iste rectum servans ordi-

(*) Hinc ajebat Christus Dominus apud Matthaeum X. 37. *Qui amat patrem aut matrem, plus quam me, non est me dignus.*

nem castus est, immo et necessarius, eo quod gratuitus amor sine boni incommutabilis desiderio aut fruitione esse non potest (Vid. *Augustinum* in Ps. LXXII.) (*).

§. CCCXCIV.

Notio operis
meritorii.

Meritum in amplissima significatione est opus praemio vel supplicio dignum: sensu autem magis proprio acceptum, illud definimus: *bonorum operum, quae sunt ex gratia, quaedam dignitas ac praestantia, ob quam illis sive ex decentia, sive ex iustitia rependitur aliquod praemium pertinens ad vitam aeternam.* Rem tamen ex Patrum Tridentinorum doctrina clarius, ac uberius explanemus: docent illi (Sess. VI. cap. 16.), proponendam esse aeternam vitam, et tamquam gratiam filiis Dei per Christum Jesum misericorditer promissam, et tamquam mercedem ex ipsius Dei promissione bonis ipsorum operibus et meritis fideliter reddendam. Verum dignitatem horum et excellentiam inde judicant esse repetendam, quod ipse Christus Jesus tamquam caput in membra et tamquam vitis in palmites, in ipsos justificatos jugiter virtutem influat: quae virtus bona eorum opera semper antecedit, et comitatur, et subsequitur, et sine qua nullo pacto Deo grata, et meritoria esse possent. Quis autem haec serio recogitans, inficias ire possit, opera haec, quae ex inhabitante in vobis Spiritu Sancto, et ex Christi Domini passione, influxu, et gratia virtutem omnem suam nanciscuntur, Deo grata esse ac accepta? Quis jure neget, ea esse aeternae vitae meritoria? Sed praestat adhuc audire Tridentinos Patres: Neque vero, addunt, illud omittendum est, quod licet bonis operibus in sacris litteris usque adeo tribuatur, ut etiam qui uni ex minimis suis potum aquae frigidae dederit, promittat Christus, eum non esse sua mercede cariturum; et Apostolus testetur, id quod in praesenti est momentaneum et leve tribulationis nostrae, supra modum in sublimitate aeternum gloriae pondus operari in nobis; absit tamen ut Christianus homo in seipso vel confidat,

(*) Confer Bossueti opera adversus Quietistas.

vel gloriatur, et non in Domino, cujus tanta est erga omnes homines bonitas, ut eorum velit esse merita, quae sunt ipsius dona. Quid? Dicant, quæso, A catholicis, quid hac in doctrina invenire queunt quod nos vel inflatos aut tumentes reddat, aut quod Christi merita obfuscare queat, si omnia merita nostra beneficentissimum sunt ipsius Salvatoris donum?

SCHOLION. Ecclesia, quae ex Christi gratia comparamus merita, ex tota antiquitate agnovit, prae-dicavitque. Ignatius Martyr *epist. ad Rom.* scribebat: *Sinite ut bestiarum esca sim, per quam possim Deum promereri.* Cyprianus de *praecept. Eccl.* aiebat: *Præceptis obtemperandum est, ut accipiant merita nostra mercedem.* Ambrosius *lib. I. de off. Meritorum præmia remanent post mortem.* Sed mirum in modum illustrat, firmatque catholicam veritatem Pelagii factum. Quum ipse viribus arbitrii omnia bona opera tribueret, Ecclesia quidem superbum huius haeretici meritum proscripsit; at, quod ex gratia descendit, magis magisque constabilivit. Hinc Augustinus *epist. 105. ad Xystum* inquebat: *Quae igitur sua merita jactaturus est Liberatus, cui si digna meritis redderentur, non esset nisi damnatus? Nullane sunt igitur merita justorum? Sunt plane, quia justi sunt, sed ut justi fierent, merita non fuerunt.* Concilium etiam Aransicanum II. Uuiversae Ecclesiae consensu approbatum *Can. XVIII.* decernebat: debetur merces bonis operibus, si fiant; sed gratia, quae non debetur, praecedat, ut fiant. Ipsi sacri libri dogma catholicum disertissime probant. *Eccl. XVI. 15.* legimus: *Omnis misericordia faciet locum unicuique secundum meritum operum suorum, Matth. V. 12.* habetur: *Gaudete et exultate, quoniam merces vestra copiosa est in coelis.* Jam vero quum merces a merendo sit dicta, patet, aeternam vitam meritis rependi. Quapropter palam fit, quantis in tenebris versatus fuerit Calvinus, qui *lib. 3. instit. cap. 3.* affirmavit, meriti nomen ab aliquo Sophista rabula invectum fuisse.

Quae doctrina
catholica de me-
rito justorum,
et quae Theo-
logorum opi-
niones.

Quoniam heterodoxorum non pauci hac in con-
troversia quorundam *scholasticorum* placita, veluti
ea essent catholicae Ecclesiae dogmata, impugna-
runt, e re visum fuit, quae fides nostra docet, ab
his, quae libere in catholicis scholis agitantur, se-
cernere. Quapropter credere oportet. I. Opera ho-
minis iusti meritoria, quoniam ab habituali caritate
excellentiā sortiuntur suam, atque ab actuali Dei
gratia derivant, esse dona Dei. II. Hanc merendi
virtutem ex Dei misericordia descendere, qui cum
jure Domini sui opera a nobis bona potuisset exi-
gere, nihilominus iis mercedem promittere voluit. III.
Hominis iusti opera, quam habent merendi virtu-
tem, hanc ex Christi meritis descendere; quod fit,
ut ex Catholicorum doctrina Christi Domini merita
commendentur, tantum abest, ut iis derogetur. IV.
Hominem in gratia sanctificante constitutum ex ope-
ribus Dei gratia patris, ex ejus misericordia, et
Christi meritis augmentum sanctificantis gratiae pro-
mereri, ac vitam aeternam. Caeterum primo etsi Theo-
logi meritum distinguant duplex, *de congruo*, sci-
licet ac *de condigno*, ac primum inesse dicant ope-
ribus ante justificationem ex gratia elicitis, alterum
tribuunt bonis operibus ab homine iusto patris;
tamen ad catholicam fidem minime pertinet, dari
meritum vel *de congruo*, vel *de condigno*. II. Nec
hujusmodi merita esse potius ex iustitia, quam ex
fidelitate Divinae promissionis. III. Neque ea hujus-
modi esse, ut ex iustitiae rigore iis debeatur mer-
ces. IV. Nec definitum fuit, omnia bona opera ius-
torum esse vitae aeternae meritoria, si caritatem
excipias. atque ex ea descendente contritionem per-
fectam. V. Neque iustum posse pro aliis mereri,
aut peccatoris conversionem, aut aliam gratiam: his
enim de rebus Tridentini Patres nihil decreverunt,
variumque est Theologorum iudicium.

SCHOLIUM. Meritum *de congruo* dicitur: *Opus bo-
num dignum divina retributione ex decentia et gra-
tuita liberalitate*: Meritum *de condigno*, vel in ri-
gido verborum sensu accipitur, atque opus est bo-
num, cui merces debetur ex perfecto rigore iusti-

tiae: meritum hoc soli Christo Domino convenit; vel insensu communi sumitur, atque opus est, cui ex iustitia merces debetur: hoc meritum *de condigno* a Theologis generatim receptum est, atque videtur ipsis sacris litteris consentaneum; nam *Apo-cal. III. ii*, qui inquinati non sunt, dicuntur *digni* ut cum agno in albis ambulent. Vid. Aibrum, cui titulus: *Secretio eorum, quae sunt de fide, ab iis, quae non sunt de fide*, excerptum ex regula fidei Francisci Veronii Viennae 1734. Confer. Bel-larminum *lib. V. de Justif. cap. 16.* seq. Wallem-burgicos *lib. de meritis cap. 3.* seq.

§. CCCXCVI.

Communis est Catholicorum omnium doctrina ad opus meritorium nonnullas condiciones requiri. Omnes vero in eo conveniunt I. operis bonitatem esse necessariam. Et quidem Deus ipse Cainum increpans ajebat (*Gen. IV. 7.*): *Nonne si bene egeris, recipies; sin autem male, statim in foribus peccatum aderit?* hinc Paulus scribebat (*ad Rom. II. 6. 7.*): *Qui reddet unicuique secundum opera ejus, iis quidem, qui secundum patientiam boni operis gloriam et honorem, et incorruptionem quaerunt, vitam aeternam.* II. Exigi statum viae: nam apud Ecclesiasticum legimus (*XIV. 17.*): *Ante obitum tuum operare justitiam, quoniam non est apud inferos invenire cibum;* cui consonat Joannes ajens (*IX. 4.* Confer. *August. tract. 44. in Joan.*): *Venit nox, quando nemo operari potest.* III. Libertate opus esse; quam conditionem a Luthero ejusque asseclis aliquando repudiatam, omnino praerequisitam esse his evincitur (*Ecccl. XXXI. 10.*): *Qui potuit transgredi, et non est transgressus, facere mala, et non fecit; ideo stabilita sunt bona illius in Domino:* tum ubi libertas non est, ibi nec merces dari potest, nec corona (§. CCI.). IV. Requiri gratiam Christi actualem, quae ad initium, progressum, consummationem cujuslibet operis salutaris necessaria est. V. Tum gratiam sanctificantem, et habitualement; quandoquidem Christus nos docuit (*Joan. XV. 4.*): *Manete in me, et ego in vobis, sicut palmes non potest fructum ferre a semetipso, nisi manserit in vi-*

Quae condi-
tiones operis
meritorii.

te, sic nec vos, nisi in me manseritis. Qua de causa Tridentini Patres meritum bonorum operum inde repetebant, quod Christus sicut caput in membra, sicut vitis in palmites virtutem suam influit (§. CCCXCIV.). Praeter hasce conditiones ab omnibus admissas, duas adhuc, quas etsi nonnulli Theologi respuunt, veluti ipsis sacris litteris consentaneas admittimus: nempe ad opus meritorium requiri adhuc promissionem divinam; enimvero Jacobus inquit (I. 12.): *Beatus vir, qui suffert tentationem, quoniam cum probatus fuerit, accipiet coronam vitae, quam repromisit Deus diligentibus se;* atque Tridentini Patres vitam aeternam iustis tamquam gratiam misericorditer promissam esse proponendam docebant (§. CCCXCIV.); necessarium insuper esse influxum ejus caritatis, quae virtus specialis est, agente Salvatore (Joan. XIV. 21.): *Qui diligit me, diligetur a Patre meo, et ego diligam eum, et manifestabo ei meipsum.* Unde et Augustinus scribebat (*De spir. et litt. cap. X.*): *Non enim fructus est bonus, qui de caritatis radice non surgit.*

SCHOLIUM. Heterodoxorum non pauci, ut statutam catholicam doctrinam convellant, ad promerendam aeternam vitam has conditiones statuunt. Primo, volunt opera esse undequaque perfecta, non tantum ratione partium, ut nempe omittamus numquam, quod facere debemus; sed etiam ratione graduum, scilicet, ut cum illa caritatis perfectione, quam Lex evangelica jubet, semper agamus. Conditio tamen ista a veritate aliena est. Ad meritum enim haud requiritur, quod in venialia peccata numquam cadamus; sed satis est, ut gratiae actualis auxilio, et per Spiritum Sanctum in nobis habitantem opera bona tantam dignitatem acquirant, ut sint *fons aquae salientis in vitam aeternam.* Joan. IV. 14. Unde opera nostra eam habere debent perfectionem, quae praesentis vitae statui apta, ac idonea sit. Hinc Paulus ad Philip. III. 12. scribebat: *Non quod jam acceperim, aut jam perfectus sim; sequor autem, si quo modo comprehendam:* nihilominus II. ad Timoth. IV. 8. coronam justitiae a Christo iusto Judice expectabat. Altera, quam exigunt, conditio est,

opus meritorium esse debere prorsus indebitum: nituntur autem in Christi Domini verbis, *Lucæ XVII. 10. Cum feceritis omnia, quæ praecepta sunt vobis, dicite, quia servi inutiles sumus.* Sed neque hac in parte rem acu tetigerunt. Nam et servus de Domino, et filius de Patre, quum mandata custodiunt, et cum amore faciunt, optime merentur. Quo fit, ut causa, cur mereamur, non sit opus quod debetur, sed libera ejusdem exequutio; secus nec Christus Dominus promeritus fuisset, qui Patris praecepta servare tenebatur. Servi autem iustiles a Christo Domino dicimur, quum ea fecerimus, quæ nobis sunt justa; quoniam utilitas nulla ex iis in Deum redundat, tum quia merita nostra sunt ipsius dona; unde in viribus nostris nec confidere, nec gloriari possumus, aut debemus. Servus etiam inutilis hoc loco non minus, quam *Matthæi XXV. 30.* idem est, ac servus cessator, ut ex Syro evincitur; quapropter jubet Christus, ne cessemus ab obedientia, et custodia Divinorum mandatorum, sed in iis usque in finem perseveremus: quod si præstabimus, a Salvatore audiemus: *Euge serve bone et fidelis intra in gaudium Domini tui. Matth. XXV. 21.* Tertiam statuunt conditionem, quod opera, ut sint meritoria, nostra esse debeant, non illius, a quo expectamus mercedem: hallucinantur; enimvero, quamvis bona opera ex Dei gratia in nos derivent; sunt tamen etiam et nostra, quod patet ex verbis Christi apud Joannem XV. 5. *Qui manet in me, et ego in eo, hic fert fructum multum, quia sine me nihil potestis facere.* Unde nil aliud evincit adversarii, nisi quod absque Dei pacto, ac promissione opera nostra haud promereantur gloriam, ad quam Divina misericordia destinantur. Contendunt postremo requiri proportionem, et aequalitatem inter opera, ac mercedem. Sed inquit non esse quidem aequalitatis proportionem opus inter ac mercedem, si ipsius operis substantiam inspiciamus; adesse tamen, si perpendamus sanctificantem gratiam, et Spiritum sanctum in nobis habitantem, qui operibus nostris sua liberalitate dignitatem, ac excellentiam attribuit. Ipse enim *Spiritus testimonium reddit spiritui nostro, quod sumus filii Dei;*

et haeredes quidem Dei, cohaeredes autem Christi, si tamen compatimur, ut et conglorificemur, ad Rom. VIII. 16. 17.

§. CCCXCVII.

Quid mereri
possimus.

Dubium est nullum, quemadmodum adversus Pelagianorum errores docet Ecclesia, gratiam quae fidem praevenit, ita esse gratuitam, ut ratione nulla quis promereri eam possit (§. CLXVIII.); sanctificantem non minus gratiam, quae ex peccatoribus iusti reddimur de condigno sive ex iustitia non promeremur, quum iustificemur gratis per redemptionem, quae est in Christo Jesu (§. CCCLXIX.). Nec iustus vere mereri potest, ut in accepta iustitia permaneat, quum ad id praestandum victrix Dei gratia necessaria sit, quae cur uni detur, denegetur alteri, ad impenetrabiles Dei vias recurrit Augustinus (§. CXCVI.); id tamen de congruo sive ex decencia merebitur, si propriam noscens infirmitatem ad Deum confugiat, ac in ipso spem suam reponat. Unde etiam consequitur, neminem posse perseverantiam finalem, quae praestantissimum Dei donum est, promereri (§. CLXXXII.); at si orationibus instemus, eam merito, quod de congruo vocare solemus, possumus obtinere (*). Qui a iustitia recesserit, gravique inquinatur peccato, ex iustitia reparationem suam promereri nequit. Quid itaque vere possumus promereri? Doceant nos Tridentini Patres: *Si quis dixerit, ajunt (Sess. VI. can. 32.), hominis iustificati bona opera ita esse dona Dei, ut non sint etiam bona ipsius iustificati merita, aut ipsum iustificatum bonis operibus. . . non vere mereri augmentum gratiae, vitam aeternam, et ipsius vitae aeternae consequutionem, atque etiam gloriae augmentum, anathema sit.*

SCHOLION. Homo iustus haud potest alteri gratiam sive actualem, sive habitualem de condigno promereri: nulla enim adest promissio, qua Deus propter alterius hominis meritum, se alteri gratiam

(*) Augustinus de dono persever. cap. 6, inquit: *Eam suppliciter emereri possumus.*

conferre obstruxerit. Sola enim Christi Domini merita omnem gratiam ob operantis personae infinitam dignitatem nobis promerentur. De congruo tamen ex aliorum precibus Deus permovetur, ut peccatori gratiam largiatur. Ita Augustinus precibus sanctae matris Monicae suam obtinuit a Deo conversionem; eodem decentiae merito potest quis sibi aliisque bonae temporalia promereri, quas ad suam, aliorumque salutem ordinata sunt. Caeterum his fluxis bonis non est inhaerendum; ad Deum, qui nostra merces est, ac beatitudo, mentem ac animum convertamus, oportet. Qui justus est, perpendat, quanta sit dignitas, ut filius Dei nominetur, et sit; caveat tamen, ne in se, aut viribus suis confidat, aut gloriatur, Deumque enixe exoret, ut tanta gratia eum suffulciat, quanta opus habet, ut in accepta justitia, ac sanctitate constanter perenniterque permaneat: nam *qui perseveraverit usque in finem, hic salvus erit. Matth. X. 22.*

DE
FRUITIONE SALUTIS
PER CHRISTUM PARTAE
POST VITAE HUMANAЕ EXITUM.

CAPUT I.

De mutationibus antecedentibus particularibus.

§. CCCXCVIII.

* Lex moriendi
pro omnibus
lata.

QUAMVIS saeculo praesertim nostro ; quo opinandi , ac sentiendi libertas ad summum fere gradum pertigisse videtur , invenias facile , qui revelatis veritatibus singulis bellum moveant : tamen qui legem moriendi pro omnibus latam fuisse neget , inventus est nemo unus ; tristi haud dubie experientia docente , mortem aequo pulsare pedē tabernas pauperum ; Regumque turres. Nil itaque certius veriusque illa Pauli (ad Hebr. IX. 27.) sententia : *Statutum est omnibus hominibus semel mori.*

SCHOLION. De iis tamen , quos dies adventus supremi Iudicis vivos reperiet , ane hi etiam morituri sint , et subito ad vitam revocandi ; an in vivis degentes ad Iudicium sistendi sint ? res non est admodum perspicua. Nihilominus , quoniam sacrae litterae a lege moriendi excipiunt neminem (Ps. LXXXVIII. 49. Job XXX. 23. ad Rom. V. 12.) inducor , ut credam , hos etiam fore obituros. Vid. Augustinum lib. XX. *de civ. Dei* cap. XX. Confer. Gotti *de fine mundi* quaest. IV. Esauum lib. IV. dist. 43. §. VII.

§. CCCXCIX.

In poenam peccati.

Hominis corpus ita faisse ex sua constitutione comparatum , ut ad dissolutionem tendere posset , non eo inficias ; tamen si in rectitudinis , quo com-

diti fuerant statu, permansissent Parentes priini, atque Dei mandato obtemperassent, nunquam procul dubio morituri fuissent. Plantaverat quippe Deus in Paradisi medio arborem vitae (Gen. III. 22.), cujus fructibus virtutem indiderat, corporis vires reficere, vitamque hominis conservare, ne vel infirmitatibus, vel tempore deficeret, rueretque (Vid. Augustinum *de Civ. Dei* lib. XIII. cap. 20. et *de Gen. ad litt.* VII. cap. 4, 5.): a caeteris nominus, quae ingruere potuissent, periculis, singularis Dei providentia ipsos reddidisset immaues. Quapropter si humanum genus universum legi mortis subditum intuemur, in peccati poenam id contigisse dicendum est. Res omnino perspicua est. Nam Deus Adamum alloquens agebat (Gen. II. 17.): *De ligno autem scientiae boni, et mali ne comedas, in quacumque die comederis ex eo morte morieris.* Hebraeus fons habet מוֹתָהּ מוֹתָהּ: moriendo morieris, scilicet evitare amplius non poteris (*). Violavit incautus, ac tumidus homo Divinum praeceptum, audivitque punientis iudicis vocem: *Pulvis es, et in pulverem reverteris* (Gen. III. 19.). Lucem huic veritati affundunt verba auctoris Libri Sapientiae (II. 23.): *Creavit Deus hominem inexterminabilem, et ad imaginem similitudinis suae fecit illum: invidia autem diaboli mors intravit in orbem terrarum.* Quid plura desideramus? Quum Apostolus dicat per peccatum mortem in mundum hunc intrasse (ad Rom. V. 12.), atque corpus mortuum esse propter peccatum (Ibid. VII. 10.)? Quae perpendens Augustinus scribebat (Lib. II. *de pecc. mer.* cap. IV.): *Corpus mortuum est non propter fragilitatem terrenam, quia de terrae pulvere factum est, sed propter peccatum. Quid amplius quaerimus? Compertum itaque est, in peccati poenam moriendi pro omnibus legem a Deo latam fuisse.*

SCHOLION. Pelagiani, quorum errores e cineribus suscitavit Sociniani, arbitrantur, mortem condi-

(*) Rem bene exprimit versio Arabica: *Num in die comestionis tuae ex ea mereberis mori*, atque Symmachus, et S. Hieronymus legunt: *mortalis eris.*

tionem esse prorsus naturalem; ita ut si primi Parentes non peccassent, adhuc tamen morituri essent; quorum errorem laudata Ss. Litterarum oracula abunde revincunt. Nihilominus, ut rem melius percipiamus, animadvertere oportet, immortalitatem esse aliam, quae spiritualibus substantiis convenit; alteram quae purum est Omnipotentis Creatoris beneficium: quare natura illa, quae ex sua constitutione ad interitum tenderet, ne deficiat, conservatur. Atque postremum hoc immortalitatis genus hominibus si non peccassent tribuimus. Observandum non minus est, inter *mortale*, et *moriturum*, non exiguum adesse discrimen. Mortale illud est, cuius si inspicias naturam, mori potest. *Moriturum* vero, id, quod revera mori debet. Quamobrem primorum Parentum corpus in se consideratum mori potuisset ante peccatum (nec enim immortalitas erat naturae proprietas), sed ob gratiae Divinae beneficium numquam fuisset moriturum (Vid. Berti de *Theol. discip.* lib. XII. cap. 13.): ex quibus difficile non erit Socinianorum ac incredulorum non pauca argumenta refutare. Nec urget multum, quod Euremondus affirmat, *examen de la Religion* ch. VIII. §. 8., terram haud fuisse suffecturam, si hominum nemo mortuus fuisset; enimvero post diuturnum felicitis in hac terra vitae spatium ad instar Enoch, et Eliae transferri potuissent viventes in coelum.

§. CCCC.

Manent animae ab hominibus morte superstites.

Mors commercium tantum, ac unionem, quae animam inter ac corpus adest, solvit. Corpus ex elementis ad dissolutionem tendentibus compositum in tenuissimas pedetentim partes abit; anima, quia spiritualis est, nec partibus composita, sed simplex, dissolvi nequit; unde post mortem superstes esse debet. Jam vero humanam mentem spirituales esse, inde patet, quod ipsa percipiat, cogitet, judicet, ratiocinetur. Quae proprietates, si ex ideis, quas habemus, philosophari velimus, tribui nequeunt materiae, in qua extensionem, soliditatem, divisionem; quietem, et motum advertimus. Haec singula materiae attributa quocumque modo ordines, dividas, subdividas, moveas, uti sensu intimo, ac

experientia quisque percipiet, numquam idonea erunt ut cogitatio, iudicium, ratiocinium prodeat. Alterius itaque a corpore ordinis humanus animus esse debet, naturae scilicet spiritualis; cumque corporis natura sit composita, et divisibilis, animus toto coelo a materia discrepans simplex etiam est, et indivisibilis. Quo fit, ut soluto corpore anima, cuius natura est cogitare, ac ratiocinari, his proprietatibus ornata, huc debeat esse, ac post hominis mortem superstes. Sacri libri hanc veritatem in toto suo lumine ponunt. Ecclesiastes monet homines, ut creatoris sui reminiscantur; antequam revertatur pulvis in terram suam, et spiritus redeat ad Dominum, qui dedit illum (XII. 7.); Salvator autem discipulos suos edocebat, *Nolite timere eos, qui occidunt corpus, animam autem non possunt occidere; sed potius timete eum, qui potest animam et corpus perdere in gehennam* (Matth. X. 28.). Porro, quod animi maneant post mortem superstites, Ethnici ipsi veteresque Philosophi, Historici, Poetae tradiderunt.

SCHOLIUM. Qui ad occultas materiae proprietates confugiunt, ut inde cogitationem eliciant, ac ratiocinium, timet, si in rebus physicis ad occultas qualitates aliquem confugientem audirent, risu, ac cachinnis exciperent. Non negaverim, omnes plane materiae proprietates nobis haud esse perspectas; nihilominus fidenter assero, eas quoque, quae adhuc ignotae sunt, cum extensione, soliditate, impenetrabilitate, figura, mobilitate convenire prorsus debere. Hinc post exantlatos a doctissimis viris immensos labores, peractis jam tot experimentis, quidquid in materia repertum fuit, cum his essentialibus proprietatibus, necessariam relationem habet. Porro, quis ferat delirium auctoris *du système de la nature*, qui ad efformanda ratiocinia profundissima, ac carmina elegantissima materiae quasdam particulas, *moleculas* vocat, quibus cerebrum nostrum compositum est, sufficere autumat? At quomodo? En admirandam problematis solutionem. Concipies, ait, Virgilii caput veluti urnam, aut tubum, aut potius fritilli ad instar repleti his mate-

riae moleculis diversissimo modo elaboratis: exagitur fritillus, materiae moleculae combinantur ita, ut foris prodeant sublimnes cogitationes, ratiocinia, poemata. Dicam cum Paulo ad Rom. I. 21. *Evanuerunt in cogitationibus suis; et obscuratum est insipiens cor eorum!*

Cudworthus in *syst. intellect.* cap. I. §. 22. antiquissimos Philosophos mentes corpore vacuas adseruisse demonstrat. Confer Grotium in *de verit. Relig. Christ.* lib. I. §. XXII. Francescati *principia Relig. nat. et rev. tom. II. sect. 3. c. 4. et sect. 4. c. 3.* A catholicorum nonnemo arbitratur, non paucos Ecclesiae Patres existimasse humanam animam a corporea concretionem non omnino liberam esse. At ii, si Tertullianum excipias, vel id statuunt, ut ostendant humanum spiritum differre quam plurimum ab excellentia, et nobilitate Dei, vel quia Platonem sequebantur, qui homini tres partes tribuebat, mentem, animam, ac corpus, ac primam omnino simplicem, ac spirituales, alteram corpoream dicebat, ex subtili quadam aerea, ac lucida substantia formatam. Unde cum mens, sive animus a crassiori corporea substantia solutus esset, ipsi adhuc quaedam humana forma post mortem ex aerea substantia superesse putabatur. Vid. Calmet disert. *de nat. animae.*

§. CCCCI.

Dictionarii Philosophici *ca-* Materialis, quae nobis ignota non est, inquit Vol-tairius, nonnullis gaudet proprietatibus, quae nec
villatio refelli-
tur.

materialis sunt, nec divisibiles. Nam haec gravitationem habet versus centrum, gravitas autem nec partes habet, nec est divisibilis. Vis corporum motrix, corporum organicorum vegetatio, vita, instinctus partibus carent, nec dividi possunt. Fieri itaque potest, ut materia cogitet. Verum nihil solidi dixit: Gravitas, ut ajunt Philosophi, cum materiae quantitate habet proportionem; ita ut si quantitatem augeas, minuas, vel divides, materiae gravitas augeatur, minuat, dividatur. Nemini enim incomptum est, sex librarum pondus in tres, ac tres dividi: unde gravitatio ejus divisibilis est, quum diviso pondere divisa gravitatio habeat.

tur. Vim corporum motricem, si in prima causa nempe rerum omnium formatore Deo consideres, partibus minime componi certum est; nihilominus, si de illa vi loquaris, qua corpus unum pellit aliud, movetque, corpus movens tantum de sua vi perdere, quantum alteri communicat, oculis ipsis intueri queas; quo apparet vim hanc esse partibilem. Idem quantum ad corporum vegetationem dicas, oportet. Quippe abscindatur a vite surculus, si ille plantetur, germinare incipit, nec a vegetatione sua desinit vitis, unde in surculi amputatione succi nutritii, quo vitis alitur, vegetaturque, pars intercipiebatur, ac proinde vegetationis pars fuit abscissa. Vita autem, ac instinctus non sunt quidem composita partibus; modi tamen ac proprietates sunt corporum partibus compositorum, immo affectiones illae ad motum commode referri possunt. Instinctus enim canis quantum ad corpus organicum, ac materiam, de qua Voltairius loquitur, aliud non est, quam constans ac non interruptus ordo operationum, ac motuum, secundum leges a Deo constitutas. Eorundem corporum organicorum vita in motu aequabili, ac perenni fluidorum, et solidorum consistit. Quamobrem cum motus suam quantitatem habeat, suas mensuras, suas partes, ac dividi possit, et revera dividatur; explorata res est, partes illas ad materiae naturam pertinere, ac proprietates esse divisibiles, sicuti materia est, cui inhaerent. Cogitatio autem nec materiae pars est, neque proprietas; immo a materiae qualitatibus toto, ut ajunt, caelo discrepat.

SCOLION. Vid. Valsecchi *de fundamentis Religionis* lib. I. c. IV. Bergier *refutation des principes articles du dictionnaire philos. art. Ame.*

§. CCCCII.

Humanus animus spiritualis est, unum quid simplex, et indivisibile (§. CCCC.), quo fit, ut nec secerni, nec dividi, nec discerni, nec distrahi possit: nec interire igitur: est enim interitus quasi discessus, et secretio, ac direptio earum partium, quae ante interitum junctione aliqua tenebantur:

inquit eleganter Tullius (*Libr. I. Tuscul. quaest. a. 29.*). Porro, quod interire nequit, illud merito dicitur immortale. Quam doctrinam vetusti populi agnoscebant, ac praedicabant: Chaldaei, Magique Persarum (Teste Pausania in Messeniacis c. 32.), Ægyptii (Vid. Herodotum lib. II. c. 123. Diodorum biblioth. hist. lib. I. Diogenem Laertium prooem. segm. II.), Indorum Brachmanes (Confer Strabonem lib. XV.) tum Graeci, ac Romani, quum veritate ac honestate ad sapientiam investigandam perducebant. Ex plurimis autem sacrorum librorum oraculis haec duo sufficiant, quibus fides immortalitatis animorum elare demonstratur: *Iustorum animae in manu Dei sunt, et non tanget illos tormentum mortis* (Sap. III. 1.); atque Christo Domino docente, *Qui odit animam suam in hoc mundo, in vitam aeternam custodit eam* (Joan. XII. 44.).

SCHOLIUM. Warburton *Divina legatio Moysis vol. II. libr. II. §. I.* veteres graecos Poetas, qui de nationis suae moribus, ac reliquorum populorum scripserunt, hanc de animorum immortalitate fidem, ubique depraedicasse affirmat. Hanc etiam doctrinam tradiderunt Graeci Philosophi: Socrates apud Platonem in *Phaedone* animae immortalitatem ex antiqua traditione agnoscere videtur. Plato ipse ep. VII. ex sacris, antiquisque traditionibus id repetit. Aristoteles a Plutarcho laudatus in *Consol. ad Apoll.* de hominum post hanc vitam felicitate, uti de opinione vetustissima loquitur, cujus nec auctorem, nec originem noscere possumus. Verum nam Aristoteles ipse animas agnoverit immortales eruditi disputant. Benedictus Pererius *de communibus rerum nat. princ. et affect. lib. VI.* Augustinus Oregius, alique plures affirmant. Cudworthus uilul certi de Aristotelis mente statui posse iudicat; at veritatem hanc negasse pluribus ostendit Mosheim *ad tom. I. Cudworthi pag. 88. seq.* At certe hanc antiquam traditionem obscurare conati sunt Democritus, Cynici, Cyrenaici, Epicuræi. Non pauci etiam ex Peripateticis Stobaeo teste *Eclog. Phys. p. 116.* animam ut simplicem qualitatem considera-

bant, similem harmoniae-musici instrumenti, quae moriente corpore prorsus evanesceret. Litteratorum Sinensium sectam eodem in ipso fixisse pedem tradunt Navarretus, et Longobardi. Nec omnes, qui arbitrantur animos esse post mortem superstites, animae immortalitatem agnovere. Clare de Stoicis id asserit Cicero *lib. 1. Tusc. quaest. Ajunt, animos manere, quum excesserint, sed non semper.* Confer Plutarchum de *placitis Philosophorum lib. IV. c. 7.* Laetium *lib. VII.* Numenium apud Eusebium *Praep. Evang. lib. XV. cap. 20.* Sane Stoici quasdam agnoscebant saeculorum periodos, quibus evolutis perire omnia, solo summo Jove excepto, affirmabant. Vid. Plutarchum *adversus Stoicos.* Ex hac ipsa Philosophorum secta legantur Epictetus *dissert. lib. III. cap. 13.* Seneca *de consol. ad Marciam.*

§. CCCIII.

Supremus rerum omnium formator Deus humano generi leges dedit, quas creationis, conservationis, ac redemptionis titulo custodire tenentur. Sunt, qui Divinis mandatis obtemperant; plures invenire est, qui ea negligunt, violantque. Deus, quia Sanctus est, virtutem diligere, ac vitium non nisi adversari potest; ipse natura sua justus cuique secundum opera sua retribuere debet. Porro quum animi maneant a morte superstites (§. CCC.), ac bonis hac in vita praemia, malis supplicia non semper rependantur, consequitur, Deum qui Judex sapientissimus est, integerrimus, inexorabilis, in aditu aeternitatis, sive in vitae exitu quemlibet fore pro meritis judicaturum. Hinc et in sacris libris legimus (*Eccl. II. 28.*): *Facile est coram Deo in die obitus retribuere unicuique secundum vias suas. . . . et in fine hominis denudatio operum illius.* Id agnoverunt Cyprianus (*Lib. de mortal.*), Chrysostomus (*Hom. XIII. in Matth.*), Augustinus, qui etiam scribit: *Nam illud, quod rectissime, et salubriter (de quodam juvene loquitur) judicari animas cum de corporibus exierint, antequam veniant ad illud judicium, quo oportet jam redditis corporibus judicari. . . . hocne tandem ipse nesciebat?*

Subsequitur
judicium particulare in aditu
aeternitatis,

Quod etiam solidissimis argumentis futurum fore demonstrat (*De anima et ejus orig. lib. II. n. 8.*).

§. CCCCIY.

Inde mox aut
praemiis ani-
mae afficiun-
tur, aut sup-
plicia.

Errabant sive ii, qui animas a corporis concre-
tione separatas de futuro praemii, aut poenarum
statu incertas fluctuare affirmabant, sive illi, qui
eas alto veluti sopore pressas ad diem usque uni-
versalis judicii quiescere contendebant. Enimvero
animus corpori superstes, ac immortalis (§. CCCCI.)
proprietatibus, quae ad naturam suam attinent, uti
est cogitare, percipere, judicare, carere nequit
(§. CCCC.). Ipse non minus ex sui constitutione ad
gaudium, vel ad dolorem aptus, ac idoneus est:
quo fit, ut lata in vitae exitu pro cujusque homi-
nis merito a supremo Judice sententia (§. praec.)
praemium illico recipere debeat, aut poenam. Quod
inficias ire nequit, qui perpendat, impium Divitem
vita functum in inferno sepultum fuisse, ac cru-
ciatum; justum autem Lazarum in Abrahae sinu
quietam, tranquillamque in consolationibus vitam
degisse (*Lucae XVI. 22. seq.*); tum Salvatorem
ipsum contrito, pioque Latroni dixisse: *Hodie me-
cum eris in paradiso* (*Ibid. XXII. 43.*). Fides haec
ex primaeva traditione derivata apud Ethnicos ipsos
altas radices fixerat, quamvis fabellis haec sicuti et
alia suae Theologiae capita plurimum obfusa es-
set, ac inquinata. Hinc Æacus, Minos, Rhada-
mantus, qui animabus piis Elysios campos, scele-
stis gravia supplicia decernerent.

SCHOLIUM. Vetustus fuit Millenariorum error,
animas usque ad diem universalis judicii haerere
incertas. Errarunt non minus Sociniani putantes ani-
mas post corporis obitum nihil cogitare, ac veluti
sopore obrutas esse. Turpius adhuc hallucinabantur
Tatianus *orat. contra Graecos*, ac Arabici, de
quibus Augustinus haer. 83. qui eas cum corpore
interire, atque resuscitandas esse in die judicii af-
firmarunt.

Dogma de poenis ac praemiis post hanc vitam
futuris civitatis bono utilissimum esse, addubitabit
sapiens nemo. *Quam multos*, ait Cicero, *de legibus*

lib. II. c. 7. *Divini supplicii metus a scelere revocavit?* Unde praeclare monebat Polybius lib. VI. cap. 54. seq. errasse in sana Politica magistratus, qui dogma de vita futura non conservarunt in populo. Hinc etiam corruptionis causam in Graeciae moribus reponit. Epicuri doctrinam, quum apud Romanos invalescere coepit, eorum corda, ac spiritum corrupisse bene observat Montesquieu *Grandeur, et decadence des Romains* Ch. X. Immo Hume *essais philosophiques* asserit, eos qui populum a fide praemiorum, et poenarum post mortem avocare curant, haud considerandos esse ut bonos cives; sed nec bonos esse politicos, eo quod fraenum ad reprimendas passiones idoneum frangunt, ac liberam magis reddunt infractionem legum: Quorsum haec? nempe ut quisque intelligat, quantum sibi cavendum sit ab iis libris, quos nostra aetas magna in copia peperit, ubi adversus Sanctissimae Religionis nostrae dogmata, ac ipsam animae immortalitatem perfricta fronte pugnatur.

§. CCCCV.

Quas in vitae exitu Deus animas judicavit, eae pro meritis, aut praemio aut poena afficiuntur (§. praec.): at vero praemium, quod morte sua fidelibus pie viventibus peperit Christus, regnum coelorum est, ac vita aeterna (*Joan. III. 5. 16. 36.*); itaque justorum animae, quibus nil purgandum superest, sempiterna felicitate nec ad tempus minimum fraudantur. Hinc agebat Apostolus (*II. ad Corinth. V. I. seq.*): *Scimus, quoniam si terrestris domus nostra hujus habitationis dissolvitur, quod aedificationem ex Deo habemus, domum non manufactam, aeternam in coelis. . . . bonam voluntatem habemus magis peregrinari a corpore, et praesentes esse ad Dominum: item (Ad Philipp. I. 23. 21.): Cupio dissolvi, et esse cum Christo: mihi vivere Christus est, et mori lucrum.* Porro si animae a corporibus divulsae, penitusque jam mundae aeterna felicitate haud statim fruenterentur, possiderentne, terrena soluta, aeternam habitationem in coelis? Essentne praesentes ad Donnum? Quod habent ardens cum Christo degni desiderium sa-

Justorum animae, quibus nil luendum superest ad gloriam sine diuclati mittuntur.

tiaretur? Lucrumne haberent ex morte? Minime gentium. Dicamus itaque oportet, Pauli doctrinam esse, animas plene purgatas ad coelestem patriam sine dilatione mitti. Veniamus ad Traditionem. Clemens Romanus (*Epist. ad Corint.*): Accipiamus, inquit, *prae oculis bonos Apostolos: Petrus: . . . multos sustinuit labores, atque ita Martyr effectus discessit ad debitum gloriae locum: Paulus patientiae praemium obtinuit.* S. Ignatius (*Epist. ad Rom.*): *Sinite, sivebat, me ferarum escam fieri, per quam licet Deum adipisci. . . sinite purum lumen haurire, meus amor crucifixus est. . . et loquens in me, Veni ad Patrem.* Hermas (*Simil. III.*) scribit, omnes, qui pie obeunt, poenitentibus exceptis, in coelis coronari. Accedunt Polycarpus B. Joannis Apostoli discipulus (*Epist. ad Philipp. apud Eusebium lib. III. hist. c. 36.*), Ecclesia Smyrnenensis, dum de eodem S. Polycarpo jam martyre sermonem instituit (*Epist. n. 11.*), vetustissimus, ac coaevus auctor actorum S. Symphorosae, et filiorum ejus (circa an. 120.), Athenagoras (*Apol. pro Christ.*), Clemens Alexandrinus (*Libr. V. Strom.*), Origenes (*Prol. in Cantica*), Cyprianus (*Exhort. ad Mar.*), Athanasius (*De vita Antonii*), Ephrem Syrus (*Opus. III.*), Basilii (*Epist. LXXIV. ad Occident.*), Gregorius Nazianzenus (*Orat. LI.*), Nyssenius (*Orat. fun. in Pulcheriam*), Chrysostomus (*Orat. de S. Philogono*), Cyrillus Alexandrinus (*Ad Reginas*) alii-que plures. Hinc merito a PP. Florentinis (*In defin. fidei.*) ac Tridentinis (*Sess. XXV. de invoc. SS.*) haec fidei veritas definita fuit.

SCHOLION. Vigilantius, ut ex Libro S. Hieronymi adversus hunc conscripto apparet, animas Sanctorum ante resurrectionem corporum admittendas esse ad visionem Dei ivit inficias: consentiunt recentiores Graeci Schismatici, ut videre est apud Renaudotium *observ. in lit. Syr.* p. 106. tum Calvinus *lib. 3. instit. cap. 25. n. 6.* atque praesertim Thomas Burnetus libro *de statu mortuorum*. Hujus erroris Architectus fuit Papias Hieropolitans Episcopus, ob cujus sanctitatis opinionem adstipulati

sunt Justinus, Irenaeus, Tertullianus, Nepos, Lactantius, quamvis tamen ex his nonnemo Martyribus aeternam gloriam a morte concedit. Caeterum horum hac in re auctoritas, si cum auctoritate, et numero laudatorum jam Patrum conferatur, ponderis longe minoris esse videbitur. Equidem scio, nonnullos esse, qui autument hac in eadem de dilatione usque ad extremum judicii diem sententia fuisse Ambrosium, ac Augustinum: at perperam. Enimvero, etsi Ambrosius lib. *de bono mortis* quaedam animarum *promptuaria*, ubi usque ad diem universalis judicii degunt, adstruat; atque Augustinus in abditis quibusdam receptaculis retineri scribat; tamen ille per haec *promptuaria* diversas coeli mansiones secundum Christi verba *Joan. XIV. 2.* intellexit; atque cum ait, eos remunerationem expectare, de corporum resurrectione, et gloria accipi debet. Augustinus vero abdita, quantum ad cognitionem nostram, receptacula animarum vocat; quum post universale judicium, locum, sortem, mercedem, quam cuique justissimus iudex distribuet, intueri licebit; atque etsi de loco addubitasset, non tamen de felicitate. Nam lib. *IX. conf. cap. III.* de Nebridio amico suo scribit: *Jam non ponit aurem ad os meum, sed spiritale os ad fontem suum, et bibit quantum potest sapientiam pro aviditate sua sine fine felix*: unde apparet, cui aliquando adhaeserat Millenariorum sententiae nuncium misisse, ac revocasse. Hilarius etiam, et Bernardus de plena, completa, et perfecta beatitudine animae non minus, quam corporis loquuntur. De Joanne XXII. gravis est inter Eruditos controversia. Certum est morti proximum hoc fidei suae testimonium dedisse. *Fatemur, et credimus, quod animae separatae a corporibus sunt in coelo, et vident Deum facie ad faciem, ac clare, in quantum status; ac conditio compatitur animae separatae.* Confer Estium lib. *IV. dist. 46. §. VI.* Berti, L'Herminier, Witasse, et Cl. Gazzaniga.

§. CCCCVI.

Veritati jam firmatae nihil ponderis inde detrahitur, quod Christus primum in die universalis judicii.
Theol. Dogm. Pars IV.

Quaedam difficultates solvuntur.

dicii dicturus sit : *Venite benedicti patris mei , percipite regnum* (*Math. XXV. 34.*), sive quod in Evangelica parabola (*Ib. XX. 8.*) paterfamilias ad vesperam , nempe , ut multi volunt , ad mundi exitum singulis operariis mercedem rependendam velit : aut quod Paulus de Sanctis dicat (*Ad Hebr. XI. 26.*) : *Nunc autem meliorem appetunt patriam , id est coelestem* : vel quod Joannes (*Apoc. VI. 19.*) animas Martyrum sub altare viderit ; iisque sanguinis sui exposcentibus vindictam dixerit : *Sustinete modicum tempus , donec impleatur numerus fratrum vestrorum*. Salvator enim commemoratam sententiam non animabus a corporum concrezione secretis , quae penitus mundaе , jam in coelis beatae degunt (§. praec.) proferet , sed hominibus jam ad vitam revocatis. Vesperam autem de fine vitae cujuslibet hominis accipere debemus : quod si ad mundi exitum quis amet referre , de beatitudine completa animae et corporis intelligat , oportet. Verba Pauli haud praesentem animarum statum , sed id , quod Pharaoni Jacob dixerat , *dies peregrinationis meae* , respiciunt : hinc particula *nunc* illativae conjunctionis vim habet , atque significat : *at vero , itaque*. (*) Unde sensus Pauli est : Patriarchae se hospites fatebantur , ac peregrinos super terram : non quatenus a patria , in qua lucem aspexerunt , dissiati erant : nam si hanc exoptassent , ad eam utique reversi fuissent ; *nunc autem* , id est , *itaque* meliorem Patriam appetebant , id est , coelestem. Joannes , qui sub Altari Martyrum animas viderat , eas postea (*VII. 13. seq.*) *amictas stolis albis* ante Dei Thronum intuetur. Completum vero electorum numerum expectare iussae sunt ; ut resurrectionem corporis , atque stolam alteram , eorundem scilicet corporum immortalitatem ac gloriam una cum ipsis obtineant.

§. CCCCVII.

De veteribus justis in sinu Abrahamae quiescentibus. Par tamen fuisse non videtur veterum justorum , ac eorum , qui post Christi adventum vixerunt sta-

(*) Vid. Estium lib. IV. dist. XLV. §. V.

tus, ac conditio; isti ob Salvatoris triumphum, gloriosamque in coelis ascensionem apertis, quae ob Adae delictum obseratae erant, coeli januis aeterna felicitate, ac Dei visione fruuntur (§. CCCV.), illi vero remoto quodam in loco, qui *sinus Abrahae* dicitur in spe venturi Liberatoris detinebantur (§. LXI.), ubi a poenis omnique animi perturbatione liberi, solamen quidem, ac quietem obtinebant, nihilominus beatifica visione, ut communis Theologorum sententia tenet, necdum donabantur. Huc pertinere videntur verba Pauli (Ad Hebr. IX. 15.): *Novi testamenti mediator est (Christus), ut morte intercedente in redemptione earum praeparationum, quae erant sub priori testamento, re promissionem accipiant, qui vocati sunt, aeternae haereditatis*; tum ista de veteribus justis pronunciata (Ib. XI. 13. 49.): *Juxta fidem defuncti sunt omnes isti non acceptis re promissionibus, sed a longe aspicientes, et salutes. . . . Deo pro nobis melius aliquid providente, ut non sine nobis consummaretur.* Caeterum, quoniam Scripturarum oracula, quae ad propositam doctrinam firmandam proponi solent, non admodum perspicua sunt, ac quae de Sanctorum ab inferis liberatione dicuntur, de animabus in purgatorio degentibus accipi queunt, neque explorata est, ac clara traditio; hinc nec desunt praestantes viri, qui animabus Patriarcharum, ac veterum justorum plene purgatis beatificam Dei visionem statim a morte concedant. Habent et ii gravia momenta, quibus sententiam suffulciant suam; atque auctoritate Augustini, Chrysostomi, Hilarii rem se confecisse judicant.

SCHOLIUM. Joannes Cadonici canonicus Cremonensis postremam hanc sententiam propugnavit in libro cui titulus: *Vindiciae Augustinianae ab imputatione Regni Millenarii*, aliisque in operibus apologeticis: hanc in Ephemeridibus litterariis non sine encomio recensuit doctissimus Lami, calculumque adjecit suum Italiae lumen Muratorius; pugnavit etiam pro ea e Scholarum piarum ordine Cl. P. Feltri: Cadonici tamen doctrinam non pauci oppugnamdam susceperunt; ac praesertim Cl. Mamachius

e Praedic. Ordine in libro *de animabus justorum in sinu Abrahæ ante Christi mortem expertibus Beatæ Visionis Dei.*

§. CCCVIII.

De infantibus
sine baptismo
mortuis.

Pelagianorum error fuit, parvulos sacro fonte non regenitos, quum originali noxa eos obstrictos negarent, æterna donandos esse vita, quam tamen a Regno coelorum secernebant. Quam pravam doctrinam etsi Catholicorum quilibet refugit, nihilominus reperias facile multos, qui infantibus istis post universalis saltem judicii diem beatitudinem quamdam naturalem attribuant (*); quorum tamen pace dixerim, nec in sacris libris, nec in traditione ullum sententiæ hujus reperiri vestigium; quin eam etiam cum invicto Pelagianorum debellatore Augustino directa fronte pugnare: *Baptizatis, inquit (De anima, et ejus orig. c. IX.), parvulis nemo promittat inter damnationem, regnumque coelorum quietis, vel felicitatis cujuslibet, atque ubilibet quasi medium locum. Hoc enim eis etiam hæresis Pelagiana promisit.* Porro quum infantes isti ex Christi sententia (Ad Eph. II. 3.), visione Dei ac coelorum regno privandi sint; hinc dolore aliquo afficiendos esse rem exploratissimam habebat, atque adversus Pelagianos demonstrabat Augustinus (**). Quod si ad sacras litteras, Augustini, alio-

(*) Catharinus, Albertus Pighius, Sfondratus, alique post diem universalis judicii naturalem beatitudinem non renatis infantibus attribuebant. Richardus, Lyraus, Lessius; Suarez aiebant jucundiorē, ac feliciorē ducturos vitam, quam cujuslibet mortalis sit in hoc seculo. Vid. Henricum a S. Ignatio lib. 3. *de pecc. orig. ejusque effect.* Res est dignissima, ut animadvertatur, Cl. Theologos Esqium, Petavium, Norisium, Habert, l' Herminier, Piette, Berti existimasse, a Pelagianis ipsis solam naturalem felicitatem hæc infantibus adscriptam fuisse. Quod ostenditur ipsa auctoritate Augustini scribentis de *Praedest. SS. c. 13.* Pelagianos quaerere *parvulis extra Regnum Dei nescio cujus suæ felicitatis locum: maxime quando convincuntur, non eos habere vitam æternam.*

(**) S. Doctor in *Euchir. c. 122.* hæc habet: *Perire a regno Dei, exulare a civitate Dei, alienari a vita Dei, carere tam magna dulcedine domus Dei. . . . tam grandis est poena, ut nulla ei possint tormenta, quæ novimus*

rumque Patrum auctoritatem serio animum reflecto, inducor, ut credam, infantes non-regenitos, sensus poena, licet in adultorum comparatione ea levissima sit; fore plectendos. Ii enim *filii irae* sunt, *vasa apta in interitum* (Ad Rom. IX. 22.); unde cur mitissima sensus poena puniri nequeant, plane non video. At graviora proferamus. Universalis Iudicii formam describens Matthaeus ait (Matth. XXV. 32. seq.): *Congregabuntur ante eum omnes gentes* (neminem hic videas exceptum), *et separabit eos ad invicem, sicut pastor segregat oves ab haedis, et statuet oves quidem a dextris, haedos autem a sinistris. . . . tunc dicet his, qui a sinistris erunt: Discedite a me maledicti in ignem aeternum.* Claritate pari id docuerat in *Apocalypsi* Joannes (XX. 12. 15.). *Et vidi mortuos magnos, et pusillos* (enim infantes), *stantes in conspectu throni, et libri aperti sunt, et alius liber apertus est, qui est vitae. . . . et qui non inventus est in libro vitae, missus est in stagnum ignis.* Parvulos absque baptismo decedentes oves esse a dextris statuendas, vel esse in libro vitae conscriptos, prudens nemo affirmabit: erunt itaque collocandi in sinistris, ac in ignem aeternum mittendi. Vidit id perspicax Augustini ingenium (De verbis Apost. serm. XIV. c. 3. Confer lib. V. contra Jul. n. 44. lib. III. oper. imperf. n. 199.): *Nullus relictus est medius locus, in quo ponere queas infantes: qui non in dextra, procul dubio in sinistra: qui non in regno, procul dubio in ignem aeternum.* Ejusdem mentis sunt Byzacenae Synodi Episcopi (Epist. synod.), Fulgentius (De fide ad Petrum), S. Gelasius (Epist. ad Episc. per Picaenum constitutos), Hieronymus (In fine 3. Dial. adv. Pelag.), Avitus Episcopus Viennensis, Gregorius Magnus (Lib. IX. mor. c. 12.), Isidorus Hispalensis (Lib. I. sent.), Prudentius (Lib. de Praedest. o. XVI.), alique. Quo fit, ut non im-

comparari. Concilium Florentinum in decreto docet: *Illorum autem animas, qui in mortali peccato, vel solo originali decedunt, mox in infernum descendere, poenis tamen disparibus puniendas.* Quae adversus hanc sententiam proponi solent, dissolverunt Norisius, Bertii, Gervasio.

merito Eminentissimus Norisius (*In vind. August. c. III. §. V.*), ex manca historiae Pelagianae notitia, ac neglecto Patrum studio repetat, cur anno ducentesimo supra millesimum de horum infantum poenis obscurata a scholasticis doctrina fuerit.

§. CCCGIX.

Purgatorium
admittendum.

Quae ex hac vita in iustitiae statu decedunt animae, haud omnes mundae penitus sunt, ac purgatae, nec singulae, quas debebant iustitiae Divinae temporales poenas luerunt. Cadit enim saepe in culpas leves ipse justus (§. CCCLXXIX.), quae cum offensae Dei sint licet minimae, nonnullam tamen poenam praeferuntur. Atque si Divinae iustitiae ordinem in sacris libris apertum nobis attentamente lustramus, dubium non est, consuevisse Deum remissa jam gravi culpa, poenas adhuc ad tempus repetere (§. CCCVII.), ad quas redimendas primitiva Ecclesia Apostolorum instructa magisterio, graves diuturnasque satisfactorias poenas imponere solebat (§. CCCVIII.). At enim ignorat nemo, e vita plures decedere, qui sive levibus adhuc culpis inquinati sunt, sive pro gravibus jam remissis commeritam temporalem poenam minime luerant. Itaque quum in coelorum regno nihil, quod coinquinatum ac immundum sit, ingredi queat (Apoc. XX. 27.), locus esse debet inter gehennam, ac Regnum coelorum medius, ubi puniri, ac purgari ad tempus debeant illorum animae, quae ad coelestem Patriam aptae necdum, ad idoneae reperiuntur. Locum hunc nuncupamus *Purgatorium*.

SCHOLIUM. Ecclesia tamen nihil definiit de Purgatorii loco, an in caliginoso aere sit, vel sub terra, aut ubi cruciantur damnati, neque ad fidem catholicam attinet, in purgatorio verum ignem esse, an tantum caliginem, ac moerorem, vel alium, quem Deus infligere potest, cruciatum; tempus etiam, quo in poenis detineantur, incertum est, novitque solus Deus. Unde his, quae nos inter, et heterodoxos fervet, est, an detur defunctorum status, in quo animae nondum penitus mundatae purgentur; ac pro his tum sublevandis, tum liberandis

fideliū preces prosint: istud Catholici asserunt; negant adversarii. Primus qui Purgatorii existentiam inficias iverit, Aërius fuisse videtur, qui pro defunctis sacrificium offerendum non esse blaterabat, uti docent Epiphanius *haer.* 75. et Augustinus *haer.* 53. Hujus vestigia calcarunt Petrobrasiani, Apostolici, Albigeuses. Apertius Purgatorio bellum indixerunt Waldenses, tum Calvinistae, ac Lutherani.

§. CCCCX.

At vero Purgatorium esse, fides catholica docet; Quod docent
sacra litterae. veterisque, ac novi foederis oracula ostendunt. Il-
lustre est, ac in rem nostram longe opportunum factum Judae Machabaei (II. Mach. XII. 43.), qui *collatione facta duodecim millia drachmas argenti misit Jerosolymam offerre pro peccatis mortuorum sacrificium, bene, et religiose de resurrectione cogitans*; nempe de animae immortalitate, cujus fides, cum doctrina de corporum resurrectione penitus connexa est. Quod Divino Spiritu afflatus scriptor magnis encomiis ornat inquit: *Sancta ergo et salubris est cogitatio pro defunctis exorare, ut a peccatis solvantur*. Porro pro iis, qui aeternae damnationis sententiam audire, preces juvare minime possunt: sed neque ii, qui coelesti iam beatitudine fruuntur Ecclesiae orationibus egent, eo saltem sensu, quod a peccatis, sive a poenis solvantur: proindeque dicere debemus pro iis suas preces, qui decesserunt quidem in gratia, sed nondum penitus purgati debitum aliquod Divinae justitiae rependere adhuc tenebantur (*). Quid? Quod Salvator ipse nos docet peccata adesse, quae non remittuntur. *neque in hoc saeculo, neque in futuro* (Matth. XII. 33.). Quorsum autem haec, si nulla peccata essent, quae in altera vita condonarentur?

(*) Inde etiam apparet Judam Machabaeum ex sacerdotali genere nonnisi id jussisse, quod antiqua majorum traditione fieri consuetum erat. Quam praxim vigere adhuc apud Judaeos evincitur ex Bibliotheca Rabbinica Bartolocci-
tana. 2. et ex synagoga Buxtorffii. Immo apud ipsos in more positum est, ut infans per annum integrum orationem, quam nuncupant *Kadis* pro anima patris sui defuncti ab eam a Purgatorio cripiendam recitet.

Quam sapienter Augustinus (Lib. XXI. *de civ. Dei* cap. 24. Vid. Gregorium Magnum lib. IV. *Dial.* c. 39.): *Neque enim de quibusdam veraciter diceretur, quod non eis remittatur, neque in hoc saeculo, neque in futuro, nisi essent, quibus, etsi non in isto, tamen remitteretur in futuro.*

§. CCCCXI.

Et traditio. Ea inter, quae Ecclesiarum omnium traditione constabilita sunt, defunctorum ad Sanctum Altare memoria annumerari certe debet, cujus pervetusti Ecclesiae Patres meminerunt (*), ac antiquissima omnium gentium officia, Gotthica scilicet, Mozarabica, Gallicana, Ambrosiana, Graeca non minus, ac Orientalia. Preces vero ubique ad Deum diriguntur, ut fidelium defunctorum animas *quiescere jubeat in sinu Abrahae, Israel, et Jacob: inter Patriarchas, Prophetas et Martyres, inter Choros Sanctorum suorum in Paradiso voluptatis et deliciarum, unde fugit dolor, et gemitus.* Hinc evincitur, Ecclesias omnes semper credidisse fidelium defunctorum animas purgatione indigere; necnon precibus ac sacrosancto praesertim Missae sacrificio divinam justitiam flecti, ut eorundem poenas levet, ac ad coelestem beatitudinem advocet. Unde apparet preces pro defunctis cum purgatorii doctrina tam arte connexas esse, ut unum sine altero persistere nequeat. At vero de purgatorio ipso sermonem instituunt Origenes (*Hom. XII. in Hier. hom. XXVIII. in Num.*), Gregorius Nyssenus (*Orat. pro mortuis*), Hieronymus (*Lib. I. contra Pelag.*),

(*) Tertullianus *de corona* cap. 3. inquit: *Oblationes pro defunctis. . . annua die facimus: cap. 4. addit: Harum et hujusmodi aliarum disciplinarum, si legem expostules, traditio tibi praetendetur auctrix, consuetudo confirmatrix, fides observatrix.* In eandem conspirant sententiam Cyprianus *epist. 66.* Cyrillus Hierosol. *Catech. myst. V.* Epiphanius qui confutavit errores Aecii, Chrysostomus, *hom. 41. in epist. I. ad Corinth. et hom. 21. in Acta*, Ambrosius *orat. de obitu Satyri fratris sui*, Augustinus *lib. 9. conf. cap. 12.* Concilium III. Carthaginense *can. 29. et IV. can. 79.* Gregorius Magnus *lib. 2. dial. c. 13.* Plura dabant Patrum testimonia Bellarminus *de Purgatorio*, Natalis Alexander *saec. IV. diss. 45.*

Basilius (In cap. IX. Isai.), Gregorius Nazianzenus (Orat. XL.), Theodoretus (In I. ad Corinth. III.), Gregorius Magnus (Lib. IV. Dial. c. 39.). Quorum agmen claudat Magnus Augustinus de baptizato infante scribens (Lib. XXI. de Civ. Dei c. 16.): *Non tantum poenis non praeparatur aeternis, sed nec ulla post mortem purgatoria tormenta patietur*; de adultis vero decedentibus cum levibus culpis ait (lb. cap. 24.): *Tales constat ante iudicii diem per poenas temporales, quos eorundem Spiritus patitur, purgatos aeterni ignis supplicii non tradendos.*

SCHOLION. Quamvis Graeci Schismatici medium locum non agnoscant, atque contendunt perperam, animas eorum, qui in gravi delicto obierunt, vel etiam in infidelitate, ab inferis liberari posse, quod statuebat etiam Dositheus Patriarcha Hierosolymitanus fabellis innixus Falconillae et Trajani, nihilominus admittunt animas, quae in iustitia decesserunt, nec poenitus sunt purgatae, satisfacere Divinae iustitiae, ac cruciari in quantum poena dignae sunt, et in quantum Dei misericordia voluerit, ut scribit Gabriel Piladelphiensis apud Allatum de consens. Varia etiam agnoscunt expurgationis genera pro iis, qui coeptae iustitiae dignos fructus vel incuria vel morte praeventi non fecerint: hos ad infernum detrudi ajunt, atque ibi non ignis suppliciiis torqueri, sed obscuro carcere detineri; conscientiae stimulis, exilio a Divina gloria, et obscuritate futuri purificari. Qua de re plura dabit Marcus Ephesius latinis insensissimus in orationibus duabus, quas Ferrariae in Synodo habuit. Arbitrantur insuper ipsi nobiscum, sacrificia, orationes, vigiliis, elemosynas, atque similia pietatis officia defunctis multum juvare, vel eos a poenis omnino liberare. Immo ut Syropulus testatur Sect. V. auditis a Cardinale Juliano quae de Purgatorio igne Latini tenent, ipse M. Ephesius exiguum nos inter ac ipsos discrimen esse dixit. Vid. le Quien dissert. Damasc. V. orat. de iis, qui in fide dormierunt, et de Purgatorio secundum orient. Ecclesiae sensum, Renaudotium observ. in litt. Syri, et Perp. fidei tom. V. lib. VIII. cap. 5. ubi observat ad illud

tempus, quo Latini Constantinopoli dominabantur, initium habuisse, quae de Purgatorio inter utram, quae Ecclesiam vigent controversiae, nec Grecos umquam hac de re exposulasse, etsi Latinorum doctrinam ex Gregorii Magni dialogis lib. (V. c. 39.), quos in propriam linguam conversos magno habebant in pretio, compertam optime haberent.

§. CCCCXII.

Encyclopaediae Quam Catholici Theologi tuentur de Purgatorio argumenta. doctrinam, ea Philosophis Platonicis originem suam debet, ejusque in gentilium libris nonnulla vestigia reperiuntur. Ab anno tantum 1439. in fidei evasit articulum Concilii Florentini tempore. Cujus decretum, ut ajunt Patres Tridentini, in usu fundendi pro defunctis praefundamentum suum habet, quod tamen in Scriptura non jubetur, ac ratio et revelatio simul condemnant. Accedit his, nec nomen, nec rem Purgatorii in sacris libris adinveniri; nam secundus Machabaeorum liber, ubi de precibus pro defunctis sermo occurrit, apocryphus est. Immo Romana Ecclesia nonnullis Scripturae textibus (Matt. V. 26. I. ad Corinth. III. 12. seq.), ut systema suum verbo Divino coloret, vim facere debet. Quid? quod facile esset, plura Scripturarum argumenta producere, quae necessaria illatione Purgatorium destruunt. Saepe enim legimus: *Nihil damnationis esse iis, qui sunt in Christo Jesu; quod beati sunt, qui in Domino moriuntur, opera enim illorum sequuntur illos.* Exemplum Lazari, qui post mortem in Abrahae sinu delatus est; Latronis, cui Christus dixit, *hodie mecum eris in Paradiso*: tertium hunc locum penitus explodit. Ad haec: quatenam doctrina est illa, quae animae corporis attribuit proprietates, contenditque eam per ignem purificari, sicuti ab heterogeneis particulis purificantur metalla? verum quidem est, co inquinatum nihil intrare posse in regnum coelorum; at justi omnes jam mundi sunt ac purgati sanguine Christi. Nec antiquiores Patres quidpiam de Purgatorio crediderunt. Anima absque sensibili materia, id est, absque corpore juxta Tertullianum pati nequit. Augustinus, qui nobis opponitur, de amico suo Nebridio recentior defuncto

scripsit, quod vivit felix in sinu Abrahae. Gregorius I. persuasus est, quod nobis Salvatoris gratia redemptis post mortem locus aeternae felicitatis apertus est.

§. CCCCXIII.

Purgationis post vitam futurae notionem aliquam habuisse Platonem (*In Phaedone*), Virgilium, nonnullosque alios Scriptores Ethnicos non eo inficias; at hac in sententia versati semper Judaei fuerunt (§. CCCCX. in Not.); unde persuadeor, profanos Philosophos, ac Poetas, vel ex naturali lumine, vel potius ex priscis, ipsique mundo ferme coaevis traditionibus hujus dogmatis notitiam habuisse; tantum abest, ut Catholici eam a Platoniciis hauserint. Concilii Florentini tempore in fidei dogma Purgatorium primo erectum fuisse, res oppido falsa est. Epiphanius enim, et Augustinus reliquos inter errores Aerii recensent, non esse pro defunctis orandum: credebatur itaque Ecclesia animarum esse haud penitus purgatarum statum, quae fidelium precibus, ac incensento vel maxime sacrificio egerent ac levarentur. Hae autem sunt, quas in purgatorio torqueri diximus (§. CCCCIX. CCCCX.). Patres Tridentini cum Catholica Ecclesia, et sacris litteris, ac antiqua Patrum traditione Purgatorii existentiam probari asserunt; consuetudo autem pro defunctis exorandi cum Purgatorio ita connexa est, ut unum ex altero fluat (§. CCCCXI.): hujus vero cum initium assignare nequeas, ac Tertullianus eam jam ex traditione repeteret (§. CCCCXI. in Not.) evidens est, hanc descendisse ab Apostolis, hos vero ab ipso Salvatore accepisse. Quamobrem etsi gratis daremus, hac de re nihil in sacris libris legi, firmissimum semper esset, ac Verbo Divino tradito innixum Ecclesiae Catholicae argumentum. Machabaeorum libros, omnibus rite libratiss, canonicos esse definiit Ecclesia Catholica. Heterodoxi tamen eam saltem hisce libris fidem exhibere debent, qualem Philoni, ac Josepho Historico tribunt. Jam vero inde patet loculentissime, Sacerdotes, ac Judaicum populum preces ac sacrificia pro defunctis obtulisse, atque usum hunc uti Sanctum habuisse, ac saluberrimum. Neque verbo Divino Ecclesia Romana vim inferre cogitur, ut

Refutantur.

Purgatorii fidem sacris litteris consonam esse demonstret; nam veritatem hanc Machabaeorum libri, ac quae Christus Dominus de peccatis, quae in altera vita dimittuntur, asserit, in toto suo lumine ponunt (§. CCCCX.); quae autem ex Matthaei V. et Paulo I. ad Corint. III. nonnulli Theologi pro Purgatorii existentia proferunt, argumento ineluctabili Purgatorii existentiam non probare, praeclarissimi Catholici Doctores ipsimet asserunt (Nat. Alexander *sacc. IV. dissert. 45.* et non pauci alii id asserunt.). Hallucinatus turpiter fuit adversarius ajens, multa esse sacrorum librorum testimonia, quae Purgatorii fidem elevent. Nam Apostolus scribens (*Ad Rom. VIII. 1.*) nihil damnationis esse iis, qui sunt in Christo Jesu, de iis, qui per baptismum peccata omnia, iisque debitam poenam deleverunt, sermonem habet; qui si postea non secundum carnem ambulent, ac ea tantum, quae Spiritus sunt, sapiant, profecto justi erunt, ac plene purgati; iis vero aeterna gloria a morte rependitur (§. CCCCXV.). Locum alter ex Apocalypsi (XIV. 13.) depromptus eadem ratione explanandus est. Quandoquidem legimus: *hic patientia Sanctorum est, qui custodiunt mandata Dei et fidem Jesu: et audiivi vocem de coelo dicentem mihi: Beati, qui in Domino moriuntur.* (*) Lazari et Latronis exemplum adversarium non juvat: primus enim perfecte justus, ac plene patienti calamitatum tolerantia purgatus in Abrahae sinum delatus est: alter ferventi in Deum caritate, ac praeclara fidei confessione eo ipso tempore, quo Salvator contumeliis, ac morte ipsa afficiebatur, culpa ac poenae omnis remissionem promeritus est. Quod urget

(*) Beza Calvinianus Scriptor legit: *Beati mortui qui propter Dominum moriuntur*, nempe de Martyribus explicat, quibus a morte coelestis gloria rependitur. Ex Protestantibus non pauci, immo et nonnulli ex Calvinianis, quos recenset le Fevre *addition. §. 3.* licitum judicant orare pro mortuis, quibus addo Rhegium, ac Sylvestrum Crabium in *appendice Apologetica* ad Rhegii libellum: *de formulis caute loquendi*; immo inter Lutheranos nonnemo est, qui medium quemdam statum, ac Purgatorium post hanc vitam admittat, licet tamen in satisfactionem Divinae justitiae, ut nos contendimus, id contingere negent, ut scribit Buddacus lib. 2. c. 3. §. 20. Sch.

alterum, Catholicum dogma non impetit; nullibi enim definitum est ignem nostro similem in purgatorio adesse. Haec est tamen generalis Theologorum doctrina, quam non impetit inepta metalli ab heterogeneis partibus in ignem purgati comparatio. Etenim ignis ille non ad corporis, quo carent tunc animae, maculas eluendas, sed tantum est ad poenam, quam remissa culpa solet adhuc exposcere Deus (§. CCCCVII.), proindeque illi, qui a labe ac inquinamento peccati nondum penitus mundi sunt, gravium ex igne perpeffione poenarum, debitum, quod cum Divina iustitia contraxerant, solvere debent, quo peracto ad Patriam coelestem felices evolabunt. Pretioso Christi Sanguine nos purificari; fides Catholica eo sensu docet, quod ejus virtute peccata omnia, ac poenae iis debitae in baptismo remittantur; tum quia media singula, unde animam nostram mundare possimus, ex solius passionis Christi merito obtinemus. At quisquis post adepta tam insignia beneficia lapsus est, ac contristare Spiritum Sanctum non erubuit, ad manifestandam magis peccati gravitatem, ordo Divinae iustitiae postulat, poenas adhuc ad tempus ab iis repetere, quibus aeterna remissa fuit; quae si hac in vita dignis poenitentiae fructibus persolutae non fuerint, in altera Inere quisque debet. Verum terret jam nos Adversarius, cum Patrum praesidio nos exuere, confidenter asserit. Audiamus: Tertullianus ait, animam absque corpore dolori obnoxiam non esse. Fatearis, repono, itaque oportet, Tertullianum judicasse animas altera in vita pati, quas corpore nonnullo donatas affirmabat. (*) Augustinus Purgatorii dogma verbis clarissimis propugnavit (§. CCCCXI.); Nebridium vero amicum suum ab omni labe purgatum judicabat, unde et

(*) Tertullianus ait animam dimensionibus constare, habere effigiem, ac totam animarum redundantiam aliud non esse quam ex unius hominis ex animali semine distillationem, item ex traduce eas propagari contendit. Vid. *Apolo-*
log. c. 48. de anim. c. 5. et seq. de Resur. carnis c. 17.
lib. 5. contra Marc. c. 10. Unde merito Augustinus scri-
bebat ad Quodvultideum: Tertullianus, sicut ejus scripta
inducunt, animam dicit immortalem quidem, sed eam ef-
figiatum corpus esse contendit.

coelesti gloria jam frui arbitrabatur. Eadem plaus est Gregorii meus, cuius si dialogorum libros Encyclopaediae scriptor perlegisset, pro sua sententia eum proferre nunquam ausus fuisset. Quamobrem non Sacerdotum avaritiae, sed scripturis et traditioni Purgatorii dogma debetur.

CAPUT II.

De Mutationibus Praecedentibus Universalibus.

§. CCCCXIV.

CERTIUS nihil, si sacrarum litterarum oracula consulas, quam aspectabilem hunc mundum habiturum fore aliquando finem. Rei hujus admonerat Salvator (Matth. XIV. 35.) ut nos vigiles redderet, mentem nostram a fluxis, caducisque hujus vitae bonis advocaret, atque ad coelestium desiderium erigeret. *Caelum, aiebat, et terra transibunt, verba autem mea non praeteribunt.* Unde dilectus quoque discipulus se vidisse coelum novum ac terram novam asserbat: *primum enim coelum, et prima terra abiit* (Apo. XXI. 1.). Ex ipsis scriptoribus Ethnicis non pauci hujus erant veritatis persuasi, quamvis nec defuerunt, qui mundum aeternum fore judicarunt. At si de tempore quo contingere haec debent, sermo sit, adiuvnes quidem nonnullos, qui arcana Dei penetrare sibi visi sunt, atque ex astrorum dispositione, aut ex vaticiniis, sive ex inanibus conjecturis annum et diem definire, at irrita conata, tentarunt. Quandoquidem expressa est Christi Domini sententia: *De illa die et hora nemo scit, neque Angeli coelorum, nisi solus Pater* (Matth. XXIV. 36.): qui et discipulis suis sollicitis hac re interrogantibus respondebat (Act I. 7. Vid. Augustinum Epist. 199. ad Hesichium de fine saeculi): *Non est vestrum noscere tempora, vel momenta, quae Pater posuit in sua potestate.*

SCHOLION. Democritus et Anaximander mundum factum esse aiebant, et certo tempore interitum *γενέσθαι καὶ φθαρῶν*: de his consulendus Laertius lib. IX. segm. 44. Lucretius vero:

*Una dies dabit exitium , multosque per annos
Sustentata ruet moles et machina mundi.*

Ovidius metam. Lib. I.

*Esse quoque in satis reminiscitur affore tempus ,
Quo mare , quo tellus , correptaque Regia caeli ,
Ardeat , et mundi moles operosa laboret.*

Stoici exustionem mundi admittebant , sed eundem
infinitis vicibus instauratum , et renovatum placebat.
His adstipulatus est Origenes lib. 3. c. V. de prin-
cipiis.

Inter Stoicos ipsos Boethus , Possidonius , Panae-
tius mundum incorruptibilem esse affirmabant , teste
Philone lib. de mundo incorruptibili. Aristoteles ac
Peripateticorum plerique nec originem nec finem mun-
do tribuebant. Vid. Gassendum phys. Sect. I. lib. I.
c. VI.; nihilominus Aristoteles lib. I. Meteorol. huic
vel alteri mundi parti exitium manere non denega-
bat , totum tamen integrum manere opinabatur. Pli-
nius Secundus lib. II. c. I. Mundum haud interiu-
rum diserte affirmabat , quae fuit etiam mens Pro-
cli , Porphyrii , aliorumque. Hinc Manilius in A-
stronom. lib. I. inter diversas Philosophorum de
mundo opiniones , hanc ordine primam recensebat :

Quem sive ex nullis repetentem semina rebus ,

Natali quoque egere placet , semperque fuisse ,

Et fore principiq; pariter , fatoque carentem.

Ex hodiernis incredulis non pauci hanc doctrinam
amant. Confer Cudworthi syst. Intel. cap. III. §.
33. cum notis.

Nonnulli Astronomi ac Philosophi opinantur mun-
dum habiturum finem magno anno vertente , quo
nempe sol , luna , ac sydera ad eundem coeli locum ,
unde discesserunt , redeunt. Quem annorum circulum
alii magis , alii minus extendunt , qua de re agit
Censorinus de die Natali. Judaeorum autem opinio
fuit mundum sex mille annorum spatio circumscri-
bendum , quam opinionem Filiae cuidam Rabbino ,
quem perperam Thesbitem vocant , debent. Alii Ju-
daeorum doctores , quos Cabalistas vocant , has ad-
dunt conjecturas , Deum sex diebus mundum creas-
se , ac quum coram Deo mille anni sint veluti una
dies , ita mundum sex annorum millibus perdura-
turum , tum quia prima littera Alphabeti Hebraici

Aleph ; quae mille significat , occurrit sexies in primo Geneseos versu. At nugae sunt istae. Haec sententia de duratione mundi per sex mille annos nonnullis etiam Ecclesiae Patribus arrisit. Vid. Calmet dissert. *de fine et mundi statu post iudicium art. 3.*

§. CCCCXV.

De signis illum praecedentibus.

Verumtamen antequam mundo interitus veniat, quaedam praecedent signa , quae faciem ferentibus sacris litteris , designanda paucis assumimus. Evangelium primo per universum terrarum orbem annuntiari debet. *Praedicabitur*, inquit Christus Dominus (Matth. XXIV. 14.), *Evangelium Regni in universa orbe in testimonium omnibus gentibus , et tunc veniet consummatio.* Quae num ita sint accipienda , ut communis fert sententia , gentes omnes Christo nomen daturas , ita ut unum ovile fiat , et unus pastor ; aut ita intelligi debeant , ut alii opinantur , nullum futurum fore populum , ad quem Evangelii lumen non perveniat , penitus non est exploratum. Arbitror non minus ante mundi exitum , Divinae gratiam de obcaecatione Iudaeorum fore triumphaturam ; quod innuit Paulus ad Romanos scribens (*Ad Rom. II. 25.*): *Nolo enim vos ignorare fratres mysterium hoc , ut non sitis vobis ipsis sapientes , quia caecitas ex parte contigit in Israel , donec plenitudo gentium intraret , et sic omnis Israel salvus fieret.* Edocet adhuc nos Apostolus finem mundi non futurum (II. 3. seq.) *nisi venerit discessio primum , et revelatus fuerit homo peccati filius perditionis , qui adversatur , et extollitur supra omne , quod dicitur Deus et tunc revelabitur ille iniquus , quem Dominus Jesus interficiet Spiritu oris sui , et destruet illustratione adventus sui eum :* quae vividis coloribus Antichristum pingunt , eumque hominem quemdam singularem esse demonstrant , declaratque etiam articulus in graeco praepositus his vocibus : *homo peccati , filius perditionis.* Recensitis signis adnumerandus est Enoch , et Eliae adventus , quos in vita singulari Dei providentia conservari , ut adversus Antichristi impietatem pugnent , proprioque sanguine Christianae Religionis veritatem signent , est Patrum Graecorum et Latinorum sen-

tentia ; evincuntque quantum ad Eliam hæc Malachiae verba (IV. 5.): *Ecce ego mittam vobis Eliam Prophetam , antequam veniat dies Domini magnus , et horribilis. Et convertet cor patrum ad filios , et cor filiorum ad Patres. Signum postremum Salvator ipse describit (Matth. XXIV. 20. Vid. Lucæ XXI. 25.): Statim autem post tribulationem dierum illorum sol obscurabitur , et luna non dabit lumen suum , et stellae cadent de caelo , et virtutes caelorum commovebuntur.* Hæc tamen , quæ de hisce signis proponimus , ob varias Patrum interpretationes tantam haud habent perspicuitatem , ut omnem plane obscuritatem nobis eripiant.

SCHOLION. De Antichristi origine , patria , moribus aetate , fortuna , multa a pluribus scripta invenies , et subtiliter excogitata ; at si ab iis recedas , quæ in sacris paginis leguntur , eorum , qui scripsere , auctoritati innixa sunt. Vid. quæ docte scripsit Bossuet *Abregé de l'Apocalypse , avertiss. aux Prot. sur leur prétendu accomplissement des prophéties* , Estium *lib. V. dist. 41. §. VI. seq.* Calmet *diss. de Antichristo* , Bellarminum , ac Gotti.

Eliam ante mundi exitum fore venturum diserte tradunt Augustinus *lib. XX. de civ. Dei. c. 29.* Victor super *Apoc. XI.* Lactantius *lib. VII. c. 17.* Hilarius *Can. XX. in Matth. XVII.* Ambrosius *lib. I. de virgin.* Hieronymus in *Matth. XVII.* Auctor *de promissionibus* , Primasius in *Apoc. XI.* Gregorius Magnus *lib. IX. Mor. c. 4.* Ex Graecis Hypopolitus *lib. de Antich. et extr. Judicio* , Origenes in *c. XVII. Matth.* Gregorius Nyssenus *lib. contra Judæos* , Chrysostomus *hom. IV. in II. ad Thessal.* Theodoretus *super Malac. ultimo* , Caesarius *dial. 3.* Teophylactus , Euthymius , Araetas , alii. De adventu Enoch tam explorata traditio non est , meminerunt tamen Hyppolitus , Augustinus , Gregorius Magnus , Damascenus , ac nonnulli alii. Fuerunt , qui his duobus adjungerent S. Joannem Evangelistam : innitebantur autem maxime , quod Christus dixisset juxta Graecum fontem de Joanne : *Si eum volo manere donec veniam , quid ad te ?* Unde judicabant eum in vivis usque ad finem mundi fore

conservandum : cui tamen opinioni celebriores Theologi semper refragati sunt : et merito ; nam ipsam Ephesi mortuum fuisse Polycarpus ejus discipulus , et Polycrates ambo Ephesiorum Episcopi memoriae prodiderunt. Confer Tillemontium in *not. ad S. Jo. Evang.* Calmet. *dissert. de obitu S. Joannis.*

Quae de obtenebratione solis , ac lunae in sacris litteris dicta sunt , modo non uno solent explanari. Chrysostomus , et qui ejus sequuntur vestigia , ac Hieronymus nihil luminis iis fore detrahendum udicant : atque ideo haec dicta fuisse opinantur , quod a splendore advenientis Christi , solis , lunaeque lumen adeo superabitur , ut obtenebrati prorsus videantur. Interpretes perpauci haec censent dicta esse figurate , quoniam tanta hominum conturbatio erit , ac si haec omnia praenuntiata advenirent : qua de re videas Driedonem *lib. III. de scrip. eccl. et dogm. tract. 3.* Melius sentire videntur ii , qui ad tempus modicum , quemadmodum in passione Domini contigit , solem , lunam , ac sidera suo lumine privanda arbitrantur. Quod praenuntiatum fuit , stellas e coelo casuras , figurate dictum videtur , aut de cadentibus igneis vaporibus , stellarum ad instar , debet intelligi. Unde Augustinus *lib. XX. de Civ. Dei c. 24.* *Cum vel tropica sit locutio , quod est credibilius : vel in isto imo caelo futurum sit , utique mirabilius , quam nunc fit ; unde et illa Virgiliana stella facem ducens , multa cum luce cucurrit , et Iduca se condidit sylvae.*

§. CCCCXVI.

De universali
corporum re-
surrectione.

Resurrectio a Graecis *ἀνάστασις* nuncupata , in eo reponitur , quod humanum cujuslibet corpus jam vita functum , vel in cineres resolutum , Dei jussu animae , quae superstes fuit , uniatur , ut idem homo supremo judici sistatur ad aeternam vocandus vitam , aut ad conmerita supplicia damnandus. Modum , quo cujuslibet hominis corpus a diuturno corruptum tempore , vel in minutissimas partes redactum restituendum sit , ratione sola duce percipere minime possumus , quemadmodum in ipsis naturalibus rebus occurrunt multa , cujus rationem , ac causas penetrare haud valemus ; quae tamen , si quis , eo quod non

percipit, negare vellet, ridendum certe se omnibus praeberet. Jam propius ad rem: si fieri minime posset, ut corpora jam resoluta restituantur, ac reviviscant, id repetendum inde esset, aut quia Deus nolle, aut non posset. Non primum: Enimvero quisquis perpendat corpora animorum instrumenta esse, ac una sive ad bonum, sive ad malum influere, immo in ipsa vitiorum, ac virtutum exercitatione saepe contingere, ut majores fuerint corporis pravae oblectationes, ac voluptates, vel graviores in corpore, quam animo ad servandam inviolatam Divinam legem incommoda ac poenae; judicare etiam debeat, Divinae justitiae consensaneum esse, ut corpora revocentur ad vitam, ut mercedem accipiant, vel debitas poenas. Non alterum: nam dementissimae temeritatis sit, oportet, qui Divinam virtutem, ac potentiam ex propria dimittendo, Deum corpora jam soluta restituere, ac restaurare haud posse, audent asserere: magisque mihi delirus videtur illo, qui diceret, eo quod decem librarum pondus formica ferre non valet, ita nec posse elephantem. At quotquot de Divina hac in re potentia dubitant, attollant ad coelum oculos, universum spectabilem hunc mundum lustrent, videantque, an ei, qui horum omnium sapientissimus artifex est, humana corpora e pulveribus restaurare difficile sit?

SCHOLIUM. Quum Paulus Athenis mortuorum resurrectionem annuntiaret, ridebant eum. Act. XVII. 18. seq. Epicurei; ac Stoici rem putabant haud possibilem, rejiciebant etiam Pythagorici, ac Platonici. Celsus apud Origenem lib. V. doctrinam insectis dignam vocabat, ac rem abominandam. Nihilominus temporis progressu iidem Platonici, ac Pythagorici asseriebant, animam a sordibus hac in vita contractis mandatum assumere, subtile, splendidum, ac Divinum corpus. Vid. Winby in I. ad Corinth. XV. vers. 44. Sunt tamen, qui autumant, apud veteres Persas vestigium aliquod resurrectionis corporum apparere; uti videre est apud Laertium de vitis Philosophorum in prooemio. Hinc eruditissimus Le Lande noxae demonst. Evang. tom. IV.

fieri posse judicat, dogma de corporum resurrectione, quod cum animae immortalitate connexum est, ex pristinis traditionibus ad primam mundi aetatem revocandis descendere; atque ex ejusdem depravatione factum fuisse, ut apud plerasque vetustas nationes, nostrisque adhuc temporibus apud non paucos Asiae, ac Americae populos consuetudo viguerit, quod viro moriente uxor etiam ejus occideretur, ac vita functo Rege foeminae ipsius, ministri, ac mancipia mactarentur, ut ei alia in vita possent inservire. Id ipsum observavit Auctor *des recherches Philosophiques sur les Américains* tom. 2. p. 219. ac Montesquieu *l'esprit des Loix* lib. XXIV. ch. XIX. qui postremus sapienter asserit, Christianam Religionem, hanc veritatem in sua puritate propouendo, omnibus hisce abusibus obviasse. E Judaeis mortuorum resurrectionem denegarunt Sadducaei, ex primis Christianis Hymenaeus, et Philletus, quos sequuti sunt alii haeretici, uti Simoniani, Carpocratitae, Valentiniani, Marcionitae, Cajani, Basilides, et Apelles. E recentioribus inficias iverunt Quackeri, et Fanatici, quam notam, etsi Robertus Barclajus a suis amovere studeat in *Concl. Apologiae vere Christianae*; hujus tamen doctrinae fuisse, patet ex Georgio Keitho, qui hanc ob causam a Quackeris recessit, ut tradit Cruësius in *hist. Quackerorum*; nec aliter res esse poterat, quia ipsi omnia, quae in sacris litteris occurrunt, mystice et spiritualiter explicanda esse volunt: Cudworthus etiam a non paucis violati hujus dogmatis accusatur.

§. CCCCXVII.

Ostenditur futura ex SS. litteris.

Veritas resurrectionis tot Scripturarum oraculis constabilita est, ut ea nihil certius haberi queat (Dan. XII. 3.): *Et multi* (sacrarum litterarum consuetudine non raro pro omnibus accipitur) *de his, qui dormiunt in terrae pulvere evigilabunt, alii in vitam aeternam, et alii in opprobrium, ut videant semper.* Christus Dominus Sadducaeorum eoarguens incertiam aiebat (Matth. XXII. 31.): *De resurrectione mortuorum non legistis, quod dictum est a Deo dicente vobis: Ego sum Deus Abraham, et Deus Isaac, et Deus Jacob: non est*

Deus mortuorum, sed viventium. Clarissime id ipsum docet apud Joannem (V. 25.): *Nolite mirari hoc, quia venit hora; in qua omnes, qui in monumentis sunt, audient vocem filii Dei, et procedent, qui bona fecerunt, in resurrectionem vitae, qui vero mala egerunt, in resurrectionem judicii.* Paulus vero hanc rem tanti faciebat, ut si ea concideret, fundamentum labasceret, cui fidei nostrae aedificium innititur. Si mortui non resurgunt, neque Christus resurrexit: quod si Christus non resurrexit, vana est fides vestra (I. ad Cor. XV. 16.). Unde Christiani fidem resurrectionis semper in symbolo professi sunt, profitenturque.

SCHOLION. Celeber est etiam pro corporum resurrectione locus Jobi XIX. 25: *Scio enim, quod Redemptor meus vivit, et in novissimo die de terra surrecturus sum, et rursum circumdabor pelle mea, et in carne mea videbo Deum meum.* Qui tamen locus Vossio, Clerico, Colomesio demonstrativus non videtur: eo quod juxta hebraeum fontem legi debeat = ego novi Redemptorem meum vivum, et novissime super pulverem staturum, et postquam pellem meam contriverint hanc, et de carne mea videbo Deum = quae de imminente carnis suae tunc corrosae restitutione intelligenda esse contendunt. At hos hallucinari inde patet, quod LXX. interpretes in lingua hebraea versatissimi hunc locum de ipsa resurrectione intelligunt, atque Hieronymus ad Pantmachium apertissimum hujus dogmatis testimonium esse affirmabat. Jobus ipse ajens: *Quis mihi tribuat, ut scribantur sermones mei, quis mihi det, ut exarentur in libro stylo ferreo, de re maximi momenti sermonem habere sit palam; at si de salutis suae restitutione fuisset loquutus, quod commune saepe est, designasset: cumque asserat se visurum fore Deum oculis suis, haec de Christo Deo simul et homine vaticinatus fuit, quem post resurrectionem suam se conspiciaturum firmiter tenebat.* Vid. Duguet de l'explication du texte de Job. Ex A catholicis Buddaens lib. 2. cap. 3. c. XXI. Turretinus loc. XX. de Novissimis q. 1. Schmidius, Fridericus Spanhemius, et Critici sacri.

Objectio solvitur.

Hominem quemlibet in proprio corpore ad vitam revocandum, inanis fabella est, res absurda, ac cum sana ratione pugnans. Et quonam modo fieri posset; propria corpora singulis hominibus fore restituenda; si partes cujuslibet humani corporis, per totam, qua late patet, naturam confusae, ac dissipatae sunt? immo eadem fortassis centenorum, vel millenorum corporum, plantarum scilicet, animalium, hominum partes effectae sunt. Ignotum est nemini, fuisse, qui humanis corporibus vescerentur; ac simile exemplum Cannibales in America adhuc nobis suppeditant. Porro, quum humanum corpus in ejus, qui devoravit substantiam, transierit, quis in resurrectione illud recipiet, devoratus, an qui devoravit? Argumentum hoc magno verborum apparatu gestientes, ac ovantes increduli proponunt (*). Verumtamen Divinae omnipotentiae tanta virtus est, ac efficacia, ut partes quaslibet disiectas, ac dissipatas e quibuslibet locis revocare facile queat. *Absit*, ajebat Augustinus (**), *ut sinus ullus, secretumque naturae ita recipiat aliquod subtractum sensibus nostris, ut omnium Creatoris aut lateat cognitionem, aut effugiat potestatem*. Mortalium autem nemini omnes illae, quas prius habuit, substantiae partes restituendae sunt, quae a primo vitae instanti ad mortem usque habuit, homines enim resurgent, non riuoustra. Quamobrem si ad calculos revoces substantiam tum eorum, qui ab Antropophagis devorati sunt, tum Antropophagorum ipsorum, satis erit, ut omnium restitutioni sufficiat. Nec id in dubium vertere potest, qui perpendat, rem esse a Sanctorio experimentis confirmatam, quinque partes de quotidiano cibo a nobis abscedere sola sensibili transpiratione; atque si recte omnia computentur, quin-

(*) Proponit hoc argumentum prae caeteris Simon Tissot de Patot, sub e mentito nomine Jacques Massé in libro *Voyages et aventures*.

(**) Lib. XXII de civ. Dei cap. 20. Conferas Athenagoram de mortuorum resurrectione, Justinum Apol. I. Tatianum orat. I. contra Graecos, Minutium Felicem in Octavio.

quagesimam tantum nutrimenti partem in corpore manere, ac in nostram substantiam transire. In itaque in iis ipsis, qui ab Antropophagis devorati sunt, maximam adhuc eorum substantiae partem manere, unde in resurrectione ipsorum corpora restaurari queant.

SCHOLIUM. Sententia est non paucorum, quod licet caro in pulverem redacta sit, flammis exusta, vel etiam ab hominibus, vel feris devorata, remanere tamen, quasdam particulas, tamquam semina, quae destrui minime possint. Ude divina virtute corpus innovari, ac restaurari possit. Hinc Paulinus de obitu Celsi canebat:

*Nam licet in tenuem redigantur et ossa fuicillam,
Corporis integri semina pulvis habet.*

*Sed licet e membris in humum transmissa ferinis,
Membra hominum vivo semine salva manent.*

Nec multum abluat ab hac sententia Clarke de l'existence, et des attributs de Dieu tom. 3. Grotius lib. II. de ver. Rel. Christ. §. XI. asserit posse Deum humanis corporibus singulari quadam cura ita prospicere, ut quod inde ad aliorum hominum escam pervenit, non magis in substantiam eorum vertatur, quam solent venena, et medicamenta. Bonnetus quandam machinulam ex tenuissima materia (ignem vitae vocat) compactam admittit, quae in corpore calloso (nota quaedam cerebri pars) veluti in capsula includatur, quae cum perire nequeat, evolvendam judicat in die resurrectionis, ac corpus humanum ex ea restituendum: at his hypothesebus ad corporum resurrectionem viudicandam non indigemus. Vid. Calmet de universali corporum resurrectione, Estium lib. 4. dist. 44. ex A catholicis Less. Wahrheit bet Christ. Religion. §. 40.

§. CCCCXIX.

Peracta in rerum omnium exitu mortuorum resurrectione, commota, ac perturbata universa natura apparet Christus Dominus gloria, ac maiestate conspicuus, ac Angelorum corona circumdatus. Cum autem venerit filius hominis in maiestate sua, et omnes Angeli cum eo, tunc sedebit super sedem mai-

Adveniet Christus Dominus
gloria, ac maiestate conspicuus
ad universale
Judicium.

jestatis suae (Matth. XXV. 3.). Veniet autem quem-
admodum in symbolo profiteamur, ut vivos judi-
cet ac mortuos. Fidem hanc pluribus Scripturarum
oraculis munitam habemus. Nam Christus ipse ob-
caecatis Judaeis aiebat, se omnium Judicem fuisse
a Patre constitutum (Joan. V. 22, 27.). Paulus
Athenis in Areopago annuntiabat, a Deo statutum
diem, in quo judicaturus sit orbem in aequitate,
in viro, in quo statuit, fidem praebens omnibus,
suscitans eum a mortuis (Act. XVII. 31.). B. Ju-
das (Epist. Cath. v. 14.) vetustissimum Enoch va-
ticipium proferebat, ubi haec veritas aperte manife-
stat: Ecce venit Dominus, in sanctis millibus suis
facere Judicium contra omnes, et arguere omnes
impios de omnibus operibus impietatis eorum. Quam-
obrem Augustinus scribebat (Lib. XX. de Civ.
Dei. c. 30.): Nullus igitur vel negat, vel dubitat
per Jesum Christum tale, quale istis sacris litteris
praenuntiatur, futurum esse novissimum judicium,
nisi qui eisdem litteris, nescio qua incredibili ani-
mositate, seu caecitate non credit. Eum tamen in
finem praeter particulare in aeternitatis aditu judi-
cium (§. CCCIII.), futurum est universale, ut
Divina providentia, ac justitia coram universo orbe
splendeat. Etenim quum impii hac in vita non raro
honoribus, potentia, divitiis, omnibusque vitae
commodis abundant, florentque; probi contra pre-
manent non raro, ac affligantur, necessarium erat
universale Judicium, in quo palam justis aeterna
felicitas, pessimis hominibus poenae commeritae re-
pendantur. Justum est, aiebat Paulus (II. ad Thess.
I. 16.) Apud Deum retribuere tribulationem iis;
qui vos tribulant; et vobis, qui tribulamini, re-
quiem nobiscum in revelatione Domini Jesu de caelo
cum Angelis virtutis ejus.

SCHOLION. Signum filii hominis in coelo eo tem-
 pore appariturum, fidem facit Matthaeus XXIV.
 30.; hoc vero Domini crucem esse, non eam qui-
 dem in qua fuit affixus, sed ejusdem fulgidissimam
 imaginem, etsi A catholici negant, Ecclesia in suis
 precibus canit: *Hoc signum crucis erit in coelo,*
cum Dominus ad judicandum venerit, ac docuerunt

praeclari Ecclesiae Patres Hieronymus, Chrysostomus, Augustinus, Prudentius, Theophylactus, ac alii. Judicium universale haud futurum affirmarunt Borboritae, Gnostici, Hermianitae, Manichaei. Quibus adstipulatus est David Georgius, qui hunc errorem in Hollandia an. 1501. spargere satagebat.

§. CCCCXX.

Christus itaque in ea, quam assumpsit, humana natura conspicuus ad multorum terrorem, ad electorum solamen iudicium severissimum exercebit: ad cuius exercitationem utraque simul, Divina ac humana natura concurret. Quoniam Deus est, omniscientia sua cordium secreta omnino penetrabit; atque uti homo, ornatus gloria pro tribunali sedebit, ac irrevocabilem secundum cuiusque meritum sententiam feret. In hoc Iudicio Angeli non minus quam homines comparebunt: Angeli praesertim mali, quos in iudicium magni diei vinculis aeternis sub caligine reservavit (*Epist. Cath. Judae V. 6.*); homines vero absque ullo status, aut conditionis discrimine, boni, ac mali, parvuli, ac magni. Omnes enim nos manifestari oportet ante tribunal Iudicis (*II. ad Corinth. V. 10. Apoc. XX. 12.*). Fiet etiam honorum a malis separatio; boni a dextris statuendi erunt, a sinistris improbi (*Matth. XXV. 32.*). Omnia vero ad accuratum examen revocabuntur: ac primum opera: unusquisque enim referet propria corporis prout gessit, sive bonum, sive malum (*II. ad Corint. V. 10.*): Verba: nam de quolibet etiam otioso verbo homines rationem reddere debent (*Matth. XII. 36.*): Cogitationes; quandoquidem Dominus manifestabit consilia cordium (*I. ad Corint. IV. 5.*). Iudicii vero forma, cognitionem causae, sententiam, ejusque exequutionem complectitur. Causae cognitio facillima erit, tum propter Divini Iudicis omniscientiam (nam omnia nuda sunt et aperta oculis ejus (*Ad Heb. IV. 13.*), tum quod cujuslibet conscientia Deo sic jubente omnia statim ante cuiusque oculos ponet. Sapienter more suo Augustinus (*Lib. XX. de Civ. Dei C. XIV.*): Quaedam igitur vis est intelligenda Divina, qua fiet, ut cuique opera sua vel bona,

vel mala cuncta in memoriam revocentur, et mentis intuitu mira celeritate cernantur; ut accuset, vel excuset scientia conscientiam; atque ita simul, et omnes et singuli judicentur. Causa cognita iudicis sententia sequetur: iustis dicturus est: Venite benedicti Patris mei, percipite regnum paratum vobis a constitutione mundi: impiis: Discedite a me maledicti in ignem aeternum (Matth. XXV. 34. seq.). Nec mora: quandoquidem electi una cum corporibus suis ad Patriam coelestem in aevum beati avolabunt: caeteri vero ad aeternas, ingentesque calamitates iuviti trahentur.

SCHOÏON. Quantum ad locum, quo ad Iudicium venturus est Christus, nihil habemus fide credendum: nec multum cognoscere refert. Nihilominus multi iudicantur Christi thronum collocandum in nubibus sublimem supra vallem Josaphat, quae constituta esse videtur inter montem Oliveti, ac urbem Hierusalem; unde putant iudicandorum turbam circa illa loca per ingens terrae spatium fore explicandam. Hanc sententiam valde probabilem reddit, quod apud *Joel III. 2.* legitur: *Congregabo omnes gentes, et deducam eas in vallem Josaphat, et disceptabo cum eis ibi.* Confer etiam *V. 12.* Attamen, quum verba Prophetæ de imminente belli calamitate Syriis et Sydoniis ob vexatos Judaeos infligenda intelligi possint, inconcussum non est, quod inde depromitur, argumentum. His adde: vallem Josaphat significare *Judicium Dei*; hinc non pauci nobiles interpretes arbitrantur, ejus nomine indigitari quemcumque locum, ubi ad iudicandum Christus Dominus adveniet. Maximi momenti est, ac ad advocandos animos a vitiis opportuna recordatio iudicii: hæc in adversis solari nos debet, hæc torporem nostrum excutere, atque ad virtutes consecandas nos excitare. Enimvero, ut Chrysostomus observat in *I. ad Thess. IV.* *Nemo poterit iudicis istius potestatem effugere, sapientiam fallere, aequitatem flectere, iudicium retractare.* Unde talis esse debet vitæ nostræ methodus, qualem in iudicio ultimo optaremus. Itaque secundum eum, qui *vocavit vos, sanctum, et ipsi in omni conversatio-*

ne sancti sitis : quoniam scriptum est , sancti eritis ; quoniam ego sanctus sum ; et si Patrem invocatis eum , qui sine acceptione personarum judicat secundum uniuscujusque opus , in timore tempore incolatus vestri conversamini . I. Petri I. 15. seq.

§. CCCCXXI.

Putidum commentum est , ait incredulorum non-
nemo , quidquid de judicio universali in vulgus spar-
glitur ; globi enim terraquei superficies tota minime
sufficeret , ut singulos , qui a mundi exordio usque
ad ejus exitum vixere homines , stando tantum ad
judicis sententiam audiendam contineat. Rebus ta-
men haud bene libratis , nec ad calcenos aequos re-
vocatis , sciolis , qui extremis tantum , ut dici so-
let , digitis res attingunt , imponere facile est. At
quam misere illi decipiantur , jam nonnulli viri ern-
diti demonstrarunt. Et verò , hypothesi facta , quod
in fine anni sexti Millenarii mortuorum resurrectio
eveniret , eo tempore centum circiter octuaginta
mille milliones hominum lucem aspexissent : sit lo-
cus pro quolibet ad standum bipedalis tetragonus
Rhenanus , summa spatii tota hunc in finem neces-
sarii novem mille Anglicana Milliaris tetragona com-
plecteretur. Jamverò secundum accuratos calculos ,
quos Templemannus instituit (*Voyages , et aven-
tures de Jacques Masse*) , globi terraquei superficies
excedit novem milliones , et ducenta milia millia-
rium tetragonorum. Quo fit , ut ex certis hisce , ac
minime dubiis computis , vix centesima , ac quin-
quagesima Europae pars requiratur , ut centum
octuaginta milia millionum humanorum corporum
contineantur ; atque globus noster terraqueus , ante-
quam haud idoneus foret , ad justum spatium tri-
buendum hominibus , ut stent ad universale judi-
cium ultra septem et viginti milliones annorum per-
durare deberet. (*) Quibus addere possumus , justos
gloriosos jam corporibus donatos rapiendos fore cum

Difficultas
solvitur.

(*) Calculos ac computos , quibus hae assertiones de-
monstrantur , reperiis in libro D. Suissmilchs , cui titulus :
Ordo Dei in vita , et morte hominum parte 2. Videas Got-
tfridum Less in memorato jam opere.

Christo Domino in superiori aeris parte, ibique iudicii tempore permansuros, quemadmodum innuere videtur ad Thessalonicenses scribens Doctor gentium Paulus (1. IV. 15. 16.).

§. CCCCXXII.

Millenario-
rum regnum
fabulis accen-
sendum.

Ab ipso jam Ecclesiae exordio eorum grassabatur error, qui Beatos corpore reassumpto per mille annos cum Christo regnatos in terris fore autumabant, quamquam tamen in huius regni proprietatibus assignandis non omnes ejusdem mentis essent. Cerinthus restaurandam splendidissime Jerusalem, ac renovandos ritus mosaicos contendebat; cunctamque huius temporis felicitatem in carnis voluptatibus obscoenus homo constituebat (*Apud Eusebium lib. III. hist. eccl. c. XXVIII.*). At Papias politiam Mosaicam omnem eliminabat, terrenumque Christi regnum spiritus delictis affluens esse volebat (*Ibid. Cap. ultimo*). Utriusque opinionis adsertores, etsi postremi longe minus alii, hallucinabantur. Cerinthus insaniam refellere haud difficile est. Salvator abrogata mosaica oeconomia ab huius legis iugo ac servitute nos immunes reddidit (§. LXXXI.). Fieri itaque minime potest, ut Christus novum instituat in terris Regnum, ubi ritus illi abrogati restaurarentur. In conviviis vero, et carnis illecebris Beatorum felicitatem constituere, fatuum est, ac absurdum. *Non est enim*, ut ait Apostolus (ad Rom. XIV. 17.) *Regnum Dei esca et potus*; atque ut nos docet Salvator ipse (Matth. XXII. 30.), *in resurrectione neque nubent, neque nubentur, sed erunt sicut Angeli Dei*. Nec altera, quam Papias confinxit, sententia, defendi potest. Etenim sacri libri unius tantum omnibusque cum bonis tum malis hominibus communis resurrectionis meminerunt (§. CCCCXVII.), item duplicem tantum Christi in forma visibili adventum commemorant: unum humilem ad nos redimendos; in gloria alterum ad omnes omnino homines judicandos (Act. III. 21. 1. ad Thes. IV. 15.). Adde, quam Christus proposuit, persecutionem patientibus mercedem, hanc non in terreno regno, sed in coelis repositam esse (Matth. V. 12.), atque Paulum nos docere, ut

quaeramus, quae sursum sunt, ubi Christus sedet ad dexteram Patris (Ad Colos. III. 1.). Unde apparet, millenariorum regnum fabellis anilibus esse accensendum.

SCHOLIUM. Chiliastarum errorem Anabaptistae renovabant, atque illum tuebantur inter Lutheranos Petersenius pluribus hac de re editis libris, inter Calvinianos Piscator in cap. XX. Apoc. Alstedius, Joseph Medus, et nonnulli alii.

§. CCCCXXIII.

Chiliastae opinionem suam hisce argumentis suffulcire conabantur. Salvator ipse illis qui hujus vitae bona propter suum nomen dimiserint, centuplum in altera promittit, ac vitam aeternam (Matth. XIX. 29.). Item dicebat Apostolis (Luc. XXII. 29.): *Ego dispono vobis, sicut disposuit mihi Pater meus regnum, ut edatis, et bibatis super mensam meam in regno meo.* Sed utramque paginam facit celeberrimus Joannis locus (Apoc. XX.); legitur primo: Daemonem ad annos mille fore ligandum, tum solvendum tempore modico, Justorum judicium describitur, diciturque: *Et vixerunt, et regnaverunt cum Christo mille annis*, reliquos hoc decurrente tempore miuime vixisse asseritur. Haec vero resurrectio prima vocatur, in qua ii, qui partem habuerunt, sacerdotes Dei erunt ac Christi: elapso mille annorum tempore generalis resurrectio describitur, quae nuncupatur secunda; subsequetur universale judicium; justis aeterna in coelis praemia, malis sempiterna supplicia decernentur. Ea millenariorum regnum vividis depictum coloribus.

Millenariorum argumenta.

§. CCCCXXIV.

Quibus ordine reponimus: Christum Dominum Solvantur. iis, qui hujus mundi bona pro sui amore relinquunt, nunc, in hoc tempore, uti Marcus et Lucas exponunt (Matth. X. 29. Lucae XVIII. 30.), perdurante scilicet hujus vitae statu, spiritualis gaudii ac laetitiae tantum recipiunt, ut in earum comparatione rerum, quas suis sectatoribus mundus distribuit, pro centuplo aestimari et haberi debeant. Perperam

itaque ad res hujus mundi fluxas, quae hominis animum explere nequeunt, veluti bonorum operum in vita altera mercedem Chiliastae mentem convertunt. Quid? quod nuptiae post resurrectionem non erunt (§. CCCCXXII.): itaque nec uxores; immo ut sapienter observavit Hieronymus (Lib. III. in Matth.), si quis pro una centum reciperet, turpitudine hac in re appareret. Jam vero regnum Dei non esse escam et potum certos nos reddit Apostolus (§. CCCCXXII.), atque cum sacrae litterae convivii nomine suavitatem ac gaudium designare soleant (Apoc. XIX. 9. Ps. XXXV. 9.), atque magno apud principem in honore habeantur, qui ejusdem utuntur mensa; hinc sub convivii allegoria felicitatem, ac dignitatem, quam in coelesti Regno habituri sunt Beati, Christus describit. Obscurum ac prima fronte difficile Joannis testimonium est; placam tamen explanationem habet, si animadvertamus, ob gloriosam Christi Domini a mortuis resurrectionem Satanam devictum, eundemque hujus mundi Principem foris ejectum fuisse (Joan. XII. 31. 32.), atque ob eversum Evangelii praedicatione idolorum cultum Daemonis potestatem compressam fuisse, eundemque censi ligatum, quod per mille annorum spatium contingere dicitur, quoniam sacrorum librorum phrasi anni mille temporis designant plenitudinem (Ps. CIV. 8. Deut. VII. 9. Paral. XVI. 15.). Dicitur autem Satanam per modicum tempus fore solvendum; quibus saevissima innuitur, quam Antichristus adversus Ecclesiam exercebit, persecutio. Beatorum autem judicium nil aliud insinuat, quam eos inventos fuisse absque macula, ac declaratos aeterna beatitudinis dignos; prima vero resurrectio beatam coelestis regni possessionem denotat. Et revera Joannes inquit: *vidi animas decollatorum*, non autem ait eos ad vitam jam cum corpore revocatos aspexisse; atque eos non revixisse, sed tantum vixisse affirmat: vitam nempe beatam in coelis; secus ac opinabantur atrocissimi Ecclesiae hostes, qui eos infeliciter periisse autumabant: quam ob rem mille annis, id est ad mundi usque exitum dicuntur cum Christo regnare, eo quod beatifica Dei perfruuntur visione; ac Dei

et Christi sacerdotes nuncupantur, quoniam laudis ac gratiarum actionis assiduum sacrificium persolvunt. Ad haec: mortuorum universalis resurrectio futura est (§. CCCCXVII.), ac justi ad gloriam, improbi ad aeternas poenas vocabuntur.

§. CCCCXXV.

Ad extremi judicii tempora praenunciata a Salvatore consummatio saeculi adveniet (Matth. XIII. 39. 40. 49. Matth. XXVI. 3.). Quandoquidem, quae ad hujus vitae statum pertinent, habebunt finem, ac aeternitati aditum praebebunt. Consummationem hanc per ignis conflagrationem esse faciendam, fidem facit S. Petrus (II. Epist. III. 7. seq.), docens, quod, quemadmodum mundus tempore Noe aquarum gurgitibus periiit, *Ita coeli, qui nunc sunt, et terra, et eodem verbo repositi sunt igni, reservati in diem judicii et perditionis impiorum hominum. . . adveniet autem dies Domini ut fur, in quo coeli magno impetu transient, elementa vero calore solventur, terra autem, et quae in ipsa sunt opera, exurentur.* Ad haec respiciens Augustinus (*De civ. Dei* lib. XX. c. XVI.), scribit: *Judicatis quippe his, qui scripti non sunt in libro vitae, et in aeternum ignem missis. . . tunc figura hujus mundi mundanorum ignium conflagratione peribit: sicut factum est mundanarum aquarum inundatione diluvium.* Attamen non unum est Theologorum de saeculi consummatione judicium. Opinantur nonnulli coelum et terram fore in nihilum redigendam, censent alii ita immutandam, ut renovetur. In hanc sententiam descendit Augustinus (Ib. c. IV.): *Peracto, inquit, judicio tunc esse desinet hoc coelum, et haec terra, quando incipiet esse coelum novum, et terra nova; mutatione namque rerum, non omnimodo interitu transibit mundus. Unde et Apostolus ait: Praeterit enim figura hujus mundi, volo vos sine sollicitudine esse; quod etiam solidis argumentis tuetur S. Hieronymus (In Cap. XV. Is.).*

Consummatio
saeculi.

SCHOLION. Hanc mundi conflagrationem non pauci e Gentilibus Philosophis agnovere (§. CCCCXIV.

Soh.). Quantum vero ad modum attinet , Burnetus in *telluris Theoria sacra* lib. 3. id a montibus ignem efficientibus repetit , Wislthonus a Cometis extra suam orbitam ad terram impulsis : at hæc inanes sunt conjecturae. Legetur Augustinus in egregio de Civitate Dei opere , ubi de iis , quæ ad mundi finem , signis illum præcedentibus , ac iudicium universale spectant , egregie disserit.

CAPUT III.

De vita æterna.

§. CCCCXXVI.

Beatitas iustorum ex parte animi : Deum videbunt.

Qui felix , beatusque esse nolit , invenias neminem. Desiderium hoc ab auctore naturæ animis nostris insitum , voluntatem nostram ita sollicitat , attrahit , rapitque , ut illo carere minime possit (§. CC.). Nihilominus in natura beatitudinis investiganda omnes fere , qui revelationis lumine destituebantur , misere hallucinati sunt. Quandoquidem plures hac in mortali vita , ubi plena esse nequit , eam quaerebant ; atque , prout quisque affectus erat , sive in corporis voluptate , sive in fortunæ bonis , vel in fama aut gloria , et virtute collocabat. Jamvero quum beatitas , *bonorum omnium sit , secretis omnibus malis , cumulata complexio* , aut , uti sivebat Augustinus (Lib. X. de Civ. Dei c. I.) , *Rerum optandarum cumulata plenitudo* : atque voluptas animi pestis sit , tristesque exitus non raro secum ferat , mundanae res omnes fluxae sint , caducae , nec non nobis invito eripi possint ; virtus ipsa nonnumquam opprimatur : quisquis cumulata bonorum omnium complexionem secretis omnibus malis hac in vita quaerit , insipiens sit , oportet. Restat igitur , ut nostram beatitatem a Deo , qui solus desiderium nostrum satiare penitus valet , proficisci asseramus. Porro , quum Deus sit cuique redditor secundum opera sua ; ac iis , *Qui secundum patientiam boni operis gloriam et honorem , et incorruptionem quaerunt , vitam æternam* (Ad Rom. 11. 6. 7.) , hinc beatorum ex parte animi felicitas in eo repo-

nenda est, quod Deum videbunt. Id quod jam Salvator justis in praemium adpromiserat (Matth. V. 8): *Beati mundo corde, quoniam ipsi Deum videbunt.*

SCHOLION. Aristippus ejusque sectatores hominis beatitatem in corporis voluptate reponebant. Verum Hegesiaci ex eadem Cyrenaicorum secta propria experientia edocti, quam parum verae felicitati adipiscendae bona corporis conferant, teste Laertio lib. 11. *de gestis philos. segm. 95.* aiebant: *Esse impossibile cumulate beatam vitam consequi, beatam vitam obtineri non posse.* Quantum ad Epicurum, num ipse felicitatem in corporis voluptatibus posuerit, non adeo exploratum est: sane Laertius hujus sectae philosophus, non corporis, sed animi voluptates felicem hominis vitam reddere affirmabat. Vid. *Batteux morale de Epicure.* Fuere, qui divitiis fere omnia comparari prospicientes, in iisdem beatitudinem collocabant. Unde aiebat Horatius lib. II. *Sat. 3.*

*Omnes enim res,
Virtus, fama, decus, Divina humanaque
pulchris
Divitiis parent; quas qui construxerit, ille
Clarus erit, fortis, justus, sapiens etiam,
et Rex,
Et quidquid volet.*

Quam pravam doctrinam solide, ac nervose confutant Cyprianus *epist. II. ad Donatum*, et Augustinus in *Ps. 109.* A veritate non minus aberrarunt, qui beatitudinem in fama aut gloria repositam esse judicabant. Haec enim inanibus saepe vulgi rumoribus, ac praepudicatis opinionibus reguntur: saltem invidia ac livore adversariorum aliquando obscurantur, quumque nullius nomen apud omnes mundi nationes pervagatum sit, apud plurimos ille inglorius habeatur, necesse est. In virtute Stoici summum hominis bonum agnoscebant. At fieri ne potest hominem sapientem, et virtute praeditum, conflictatum miseriis, obnoxium doloribus, in Phalaridis tauro esse bestum? Animus tamen non est philosophorum de Beatitudine opiniones referre singulas. Nani Augustino teste *de Civ. Dei lib. XIX. C.*

Theol. Dogm. Pars IV.

I. M. Varro in libro de philosophia tam multam dogmatum varietatem diligenter, et subtiliter scrutatus advertit, ut ad ducentas octoginta octo sectas, non quae jam essent, sed, quae esse possent, adhibens quasdam differentias, facillime perveniret. Confer Ciceronem de finibus bonorum, et malorum, Huctium Alnet. quaest. lib. III. c. II.

§. CCCCXVII.

Et quidem intuitive.

At enim Dei visio duplex est, *abstractiva*, et *intuitiva*: illa hac in vita potitur, dum ex universi contemplatione ad Dei cognitionem assurgimus; alteram habituri sumus in patria, quum ipsam Dei naturam clare videbimus. Neve quis fieri posse autumet, ipsam Dei essentiam, quae spiritualis est, corporeis oculis fore videndam; advertat, quod sapienter observabat Augustinus (Epist. 147. c. 9.): *Visus, quamvis ad corpus proprie pertineat, ad mentem quoque refertur: animo quippe res non minus, quam oculis cernere dicimur*. Iusti itaque, quorum beatitas est videre Deum (§. praec.), ipsum non abstractiva, sed intuitiva visione conspiciunt. Nam Salvator de Angelis, quorum par est cum beatis conditio, agebat (Math. XVIII. 10.), *semper vident faciem Patris mei, qui in coelis est*. Paulus vero Corinthiis scribebat (1. Epist. XIII. 12.): *Videmus nunc per speculum in aenigmate: tunc autem facie ad faciem*; atque Joannes docebat (1. Epist. III. 2.): *Carissimi, nunc filii Dei sumus, et nondum apparuit, quid erimus. Scimus, quoniam cum apparuerit, similes ei erimus, quoniam videbimus eum, sicuti est*. Cujus doctrinae testes sunt praeclarissimi Ecclesiae Patres, Irenaeus (Lib. IV. c. 37.), Clemens Alexandrinus (Lib. V. Strom.), Gregorius Nazianzenus (Orat. XX.), Augustinus (Ep. 112.), aliique plures. Unde haec veritas in Florentino Concilio (In decreto unionis), merito definita fuit.

SCHOLION. Deum corporeis oculis intueri non posse, perspicuum est. Huc Origenes lib. VII. Celsum confutabat opponentem Christianis, quod arbitrentur, divinam naturam oculis corporeis posse

intueri ; Augustinus vero aiebat *Epist.* 92. *Hoc autem oculus videre corporis neque nunc potest, neque tunc poterit*, atque in finem ejusdem epistolae contrariam sententiam vocat *dementiam*. Attamen, quum Episcopus quidam gravem sibi ab Augustino illatam injuriam fuisse conquereretur ; ac affirmaret, se judicasse, Deum ideo fore oculis conspiciendum, quoniam ii post resurrectionem spiritales evadent ; Augustinus pacis amantissimus, ac singulari caritate flagrans in *Epist.* 148. ad *Fortun.* veniam humiliter petit ; sed simul corporeis oculis, Deum, qui spiritus est, intueri minime posse iterum monet inculcatque. Num vero oculi post resurrectionem futuri sint spiritales, ob turbatum jam Episcopum pronuntiare haud opportunum existimavit. Ceterum si diligenter ea perlegantur, quae *Epist.* 147. et *lib.* XXII. de *Civ. Dei* cap. 29. scribit, hanc sententiam nequaquam ei arrisisse apparebit. Unde evincitur, judicium, quod de Augustino Petavius *lib.* VII. *Theol. dogm.* protulit, haud fuisse libratum. Vid. Berti de *Theol. disc.* lib. III. c. 5.

§. CCCCXXVIII.

Attamen gravissime hallucinabantur, quotquot a creato intellectu Deum solis nativis viribus intuitive videri posse delirabant (*). Quandoquidem naturae finitae vires tantae non sunt, ut objectum infinitum, uti Deus est, attingere valeant. Quo pacto Apostolus (I. ad Timot. I. 17.), Deum invisibilem esse affirmabat, nec ab aliquo homine aut visum fuisse, aut videri posse fidem faciebat (Ibid. VI. 16.). Corroborari itaque debet divina potentia mens nostra, ut nativam imbecillitatem deponat, atque ad Deum usque contemplantum assurgat. Auxilium hoc Be-

Adjoti lumine gloriae.

(*) Vana haec fuit, et insana Aetianorum, ac Eunomianorum jactantia, qui se naturali virtute, tam clare videre Deum, ac alios quoslibet homines effutiebant. Errorem hunc a Beguardis, et Beguinis saec. XIV. e cineribus suscitatum Concilium Viennense merito ad tenebras damnavit. Errabant ex opposito Armeni, ac Palamitae contententes Deum ipsum a Beatis haud posse intueri, sed splendorem dumtaxat a divinitate diffusum, ac ab ea realiter distinctum, qui vel ipsis corporeis oculis conspiceretur.

tis in patria a Deo subministratum *lumen gloriae* appellare Theologi consueverunt; nec immerito. Regius enim Propheta agebat (Ps. XXV. 10.), *Apud te est fons vitae, et in lumine tuo videbimus lumen*, cui Joannes concinit scribens (Apoc. XXII. 5.), *Non egebunt lumine lucernae, neque lumine solis, quoniam Dominus Deus illuminabit illos*. Scholastici, dum hujus luminis naturam investigare conantur, mirum in modum inter se dissident. In tanta rerum caligine, si dicere velim, quod magis probabile mihi videtur, arbitrarer, lumen istud non esse entitatem aliquam peripateticam; sed Deum intinie praesentem, moventem, irradiantem ac permanenter opitulantem Beatorum animas, ut clare ipsum intueri valeant. Hinc Augustinus inquit (Ep. 6.): *Lux illa Deus ipse est, quoniam Deus lux est, tenebrae in eo non sunt ullae, sed lux mentium purgatarum, non istorum corporis oculorum*.

§. CCCCXXIX.

Non tamen comprehendent. Beati *gloriae lumine* corroborati Deum quidem intuitively vident (§. CCCCXXVII.), at eundem comprehendere minime poterunt. *Aliud est enim videre, aliud est, totum videndo comprehendere: quandoquidem id videtur, quod praesens utcumque sentitur; totum autem comprehenditur videndo, quod ita videtur, ut nihil ejus lateat videntem*; inquit Augustinus (Epist. 112. n. 9.). Hinc patet comprehensionem secum ferre plenissimam rei cognitionem, unde ejus magnitudinem assequamur totam et exaequamur. Quamobrem ad Deum comprehendendum opus foret, ut non tantum ejus videremus naturam; verum etiam assequeremur cuncta, quae sapientia ipsius infinita nescit, ac omnipotens ejusdem virtus producere potest. Haec vero singula, ut complecteretur Beatorum mens, infinita esse deberet: nam tunc Deum infinitum exhaureret; porro cum ipsorum vires finitae ac limitatae necessario permaneant, fieri non potest, ut creata res aliqua, quantumvis praecellens sit, Deum comprehendat. Sapienter Augustinus (Serm. 117. n. 5.): *Si enim comprehendis, non est Deus; sit pia confessio ignorantiae magis, quam temeraria professio scientiae; adtingere ali-*

quantum mente Deum, magna beatitudo est, comprehendere autem omnino impossibile. Huc pertinent illae sacrorum librorum phrases, ubi dicitur Deus: Magnus consilio, et incomprehensibilis cogitatu (Jer. XXXII. 19.), sive quod ille faciat, Magna et incomprehensilia (Job. IX. 10. ad Rom. XI. 33.).

SCHOLIUM. Quum Paulus I. ad Corint. IX. 24. agebat: *Sic currite, ut comprehendatis*; ac de semetipso ad Philip. III. 12. *Sequor autem, si quomodo comprehendam*: verbum *comprehendere*, uti contextus docet, accepit, quatenus significat aliquid consequi, aut adipisci; non vero pro perfectissima, quam descripsimus, Dei cognitione. Jam vero, quum sacri libri Deum invisibilem esse ajunt, ac nonnulli Ecclesiae Patres, ut Chrysostomus, Theodoretus affirmant neque ab Angelis, et Archangelis Deum posse intueri; vel negant visionem Dei oculis corporeis, vel solis naturae viribus, aut de comprehensiva visione loquebantur. Petrus vero Ep. I. c. I. 12. scribens, *in quem desiderant Angeli prospicere*: de rei nondum possessae desiderio haud sermonem instituit; sed de illo, quod rei possessione semper accenditur. Attamen eo quod Graeca, ac Syriaca exemplaria habent: *In quae desiderant*; hinc Calmetio, Estio, aliisque Theologis placet, Apostolorum principem ad fidei Sacramenta respexisse; atque hunc esse sensum, in quae salutis, ac redemptionis jam vobis annuntiata mysteria, etsi prius jam illa noverunt Angeli, penitus tamen introspicere desiderant, ac fidei Christianae incrementum, ac propagationem videre.

§. CCCCXXX.

Ea est voluntatis nostrae indoles, ut ex sua naturalis constitutione in bonum, quod naturale ejus objectum est, feratur, atque a malo, quod boni defectus est, refugiat, illudque aversetur (§. CC.). Quumque, quo plus novimus quod bonum est, magis illud optemus, eoque delectemur ardentius (§. CLXI. Sch.); ac Beati in Patria ipsum summum bonum, cujus comparatione caetera evanescent, possideant, clare videant, ac contemplantur, eorum-

Sed summo in Deum amore ferentur.

dem voluntas delectationem tantam concipere debet, ut altrahatur, ac rapiatur tota, et sponte quidem, sed necessario Deum amore summo, ac intensissimo prosequatur. Hinc Apostolus caritatis elogium contexens, virtutibus, ac donis caeteris praefert; atque de ipsa, quod numquam excidet, asserit (I. ad Corinuth. XIII.). Nam prophetiae, ac linguarum dona cessabunt, hujus vitae scientia evanescet: fides ipsa, et spes non permanebunt, haec scilicet in fruitione, illa in Dei visione immutabitur. At caritas, quae hac in vita coepit, augebitur, perficieturque. Nihilominus hujus, quo Beati flagrabunt, amoris dignitatem, amplitudinem, perfectionem nec mente assequi, nec verbis penitus exprimere possumus. Animus quippe noster corpore gravatus, ac praepeditus, nec gloriae lumine collustratus, quantum bonum Deus sit, percipere minime potest. Vos, vos Cherubim, vos Seraphim, vos Beati, quanto amore Deus in coelis diligatur, soli edicere, ac explicare valetis. O amor, iuteusissimus amor! O caritas, perfectissima caritas! O gaudium purum, ineffabile, aeternum! *Ubi Deus sine fine videbitur, sine fastidio amabitur, sine fatigatione laudabitur* (Augustinus de Civ. Dei lib. XXII. c. ult.).

§. CCCCXXXI.

Inde mirifica Felices justorum animae summi boni possessione cum Deo Ju- ita alliciuntur, replentur, satiantur, ut ab eo distorum consen- velli nec possint, nec velint, atque sicuti adeptam sio, et unio, felicitatem, ita virtutem, pietatem, sanctitatem amittere nequeant. *Erit ergo illius civitatis, et una in omnibus, et inseparabilis in singulis voluntas libera ab omni malo liberata, et impleta omni bono, fruens indeficienter aeternorum jucunditate gaudiorum, oblita culparum, oblita paenarum, nec tamen suae liberationis oblita, ut liberatori suo non sit grata, uti praeclare Augustinus docet (De civ. Dei lib. XXII. c. ult.).* Quapropter Beati vel ipsa peccati umbra, quod unicum a Deo dissociari nos potest, carentes, atque intensissima caritate Deo adhaerentes, tantam habebunt cum illo consensu, ut Dei voluntas, ipsorum voluntas sit, ac nihil optent, nihil agant, nihil cogitent, quod ab illo non de-

riaverit, ac in ejusdem gloriam non referatur. Unde beneficentissimo tot bonorum largitori assiduas gratias agent, ipsorumque laudibus universum coelum resonabit. Tanta autem justorum erit cum Deo unio, ut in ipsum quodammodo transformandi videantur. Ea ratione, qua, si a creatis rebus similitudinem deprōmere liceat, in pareliis contingit. Sol enim oppositam sibi nubem nonnumquam radiis suis adeo investit, illustratque, ut ipsa sol alter videatur (*); ita Beati divino lumine collustrati, similitudinem fere induent divinae naturae: *Similes ei erimus, quoniam videbimus eum sicuti est* (I. Joān. III. 12.), atque ibi impletum videbimus, quod pro electis a patre Salvator postulabat: *Ut omnes unum sint, sicut tu Pater in me, et ego in te, ut et ipsi in nobis unum sint.... ego in eis, et tu in me, ut sint consummati in unum* (Joān. XVII. 21. seq.). At mortalis homo, quanta futura sit ex parte animi Justorum felicitas, leviter tantum adumbrare potest. Etenim Paulo teste (I. ad Corinth. II. 9.), *oculus non vidit, nec auris audivit, nec in cor hominis ascendit, quae praeparavit Deus iis, qui diligunt illum.*

§. CCCCXXXII.

Peccati stipendium mors est; et qui a Deo conditi eramus, ut gratiae ipsius beneficio, immortalitate donaremur, ob violatū a parentibus primis divinum mandatum, moriendi legi subditi facti sumus omnes (§. CCCXCIX.). At beati Deo incommutabiliter adhaerentes, ac in gratia confirmati meliorem naturam induent, nec corruptioni, aut dissolutioni amplius obnoxii erunt. Unde doctor Gentium agebat (I. ad Corint. XV. 53.): *Oportet enim corruptibile hoc induere incorruptionem, et mortale hoc induere immortalitatem: tunc fiet sermo, qui scriptus est, absorpta est mors victoria tua.* Eodem pertinet, quod Joannes scribit, mortem et infernum missos esse in stagnum ignis; item, quod

Beatis ex parte corporis nec morti.

(*) Confer Newtoni *opticam lib. I. par. II. prop. 9.* Cartesii *meteoras in op. philos. Iugenum. in transact. physcis.*

mors ultra non erit (Apoc. XX. 14. XXI. 4.); atque quod de justis Salvator docebat (Lucæ XX. 36.). *Ultra mori non potuerunt: æquales enim Angelis sunt.* Porro quum beatus non sit, qui timet, ne amittat, quod possidet (*August. de Vita beata* n. XI.), hinc Iusti felicitatibus cumulati magnum inde gaudium percipient, quod noscant se corpore immortales esse, ac beatitudine coelesti perpetuo se fore decorandos.

SCHOLION. Haec Beatorum immortalitas ab illa, quam Deus habet, plurimum distat. Etenim *I. ad Timoth. VI. 16.* solus immortalitatem habere dicitur; eo quod ex natura sua immortalis ita est, ut nulla vi, nulla potentia ab ipso eripi valeat, ac non possit non esse immortalis. Secernitur non minus ab Angelorum, ac animarum immortalitate; quia hi tum ob creatoris gratiam, tum ob naturam spiritalem, quae simplex est, nec potest dissolvi (§. CCCC.), sunt immortales: corpora autem Beatorum singulari Dei beneficio in melius reformata, morti amplius subijci non poterunt. Unde discriminiatur etiam ab immortalitate, quam Adam habuisset: ut enim observat Augustinus *de Civ. Dei* lib. XX. c. ult. n. 3. *Prima immortalitas fuit, quam peccando Adam perdidit, posse non mori: novissima erit non posse mori.* Distinguitur postremo a damnatorum immortalitate. Nam isti immortalitatem habent ad poenam: Sancti ad gloriam.

§. CCCCXXXII.

Nec caeteris
corporis molestiis
erunt obnoxii.

Beatitudo honorum omnium est, secretis omnibus malis cumulata complexio (§. CCCXXVI.); hinc fit, ut quemadmodum iusti in coelis morti non erunt obnoxii; ita nec caeteris, quibus hac in vita premimur, corporis molestiis, ac calamitatibus. Paucis id Joannes complexus est (Apoc. VII. 16. 17. XXI. 4.): *Non esurient, neque sitient amplius, nec cadet super illos Sol, neque ullus æstus: item: Et absterget Deus omnem lacrymam ab oculis eorum, et mors ultra non erit, neque clamor, neque dolor erit ultra, quia prima abierunt.* Concinit Doctor gentium de corpore scribens; *Se-*

minatur in corruptione, surget in incorruptione . . . Seminatur in infirmitate, surget in virtute (I. ad Corinth. XV. 42.). Quo datur intelligi, cum immunitate a corporis molestiis omnis boni plenitudinem uniuersam fore. *Nam hic desideratur, ibi capitur; hic suspiratur, ibi gaudetur; hic oratur, ibi laudatur; hic gemitur, ibi exultatur.* Sapienter more suo Augustinus (in Ps. LXXXIII. n. 6.). *Ibi vera gloria erit, verus honor, vera pax, ubi Deus erit omnia in omnibus* (I. ad Corinth. XV. 28.).

SCHOLION. Ad maiorem felicitatis beatorum in corpore ideam nobis ingenerandam, eam Deus sub imagine rerum, quae plurimum ab hominibus fieri solent, nobis adumbrat. Et vero quoniam oculis nostris pergrata est lux, ideo sub lucis imagine exhibetur Is. LX. 1. Apoc. XXI. 23. Quia nil hoc in mundo pace, ac tranquillitate optabilius, in coelesti Patria pace, et quiete nos fruituros dicitur ad Rom. XIV. 17. Quum nihil festiuius magis sit ac hilare, quam nuptiale convivium, ideo per Agni immaculati nuptias Apoc. XIX. 7. ac convivium filii Regis nuptiale, aeternum gaudium delineatur Matth. XXII. 2. Eo quod nihil augustius Corona, ac Throno, sub his figuris sempiterna felicitas describitur Apoc. III. 21. Jac. I. 12. Quoniam nil splendidius Regno, nil magis venerandum, quam Sacerdotium, Beati Reges erunt, ac Sacerdotes I. Petri II. 5. Quamobrem nihil est tam illustre, excellens, magnificum, splendidum, utile, suave, iucundum, quod in coelorum Regno laud reperiatur.

§. CCCCXXXIV.

Quam infelix est post Adae lapsum hominis conditio! Nascitur irae filius, infectusque concupiscentia, quae ad res commutabiles fluxasque eum allicit, trahitque; animam inter ac corpus bellum intestinum experitur; ac quasi divisus est, sibi contrarius. *Corpus enim quod corrumpitur aggravat animam, et terrena inhabitatio deprimit sensum multa cogitantem* (Sap. IX. 15.). Et vero

Mirifica etiam corpus inter et animam vincit et animam vi-
gebit consensio.

sana et recta ratio ad Deum vocat, sed corporis pondus ad terrena nos retrahit. Animus noster pulchritudine, praestantia, sanctitate Divinae legis delectatur; at habemus aliam in membris legem, quae mentis legi repugnat. *Condelector*, aiebat Paulus (ad Rom. VII. 22.), *legi Det secundum interioremem hominem: video autem aliam legem in membris meis repugnantem legi mentis meae; et captivantem in lege peccati*. Atrox haec, ac intima pugna in Beatis haud locum habebit. Nam effraenis; ac lacertosa cupiditas in ipsis erit nulla; affectus inordinati tunc penitus cessabunt; animus Principatum geret, lubenterque corpus obtemperabit; ac tantus ad invicem concentus erit, et harmonia, ut major exprimi nequeat. Quam mirificam consensionem Doctor Gentium iusiuuabat adserens (I. ad Corinth. XV. 44.), *seminatur corpus animale, surgit corpus spiritale*. Etenim, uti Augustinus observat (de Fide et Sym. c. 6.): *Non enim ita dictum est, quasi corpus vertatur in spiritum, et spiritus fiat, quia et nunc corpus nostrum, quod animale dicitur, non in animam versum est, et anima factum sed spiritale corpus intelligitur; quod ita spiritui subditum est, ut coelesti habitationi conveniat omni fragilitate, ac labe terrena in coelestem puritatem, et stabilitatem mutata, atque conversa*. Quapropter, etsi corporis natura maneat eadem, ab inutili tamen carnis pondere corpus liberatum erit; hinc agilitate ac pervicacitate summa donatum, atque ob maximum qui animam inter et corpus viget concentum ibi corpus erit, ubi animus voluerit: nec volet aliquid spiritus, quod nec spiritum possit decere, nec corpus (August. de civ. Dei lib. XXII. c. ult.). Praeclaram hanc corporis Beatorum praerogativam Isaias jam praenuntiaverat (XL. 31.).

² SCHOLION. Erravit Eutychius Patriarcha Constantinopolitanus, qui in resurrectione corpora alterius generis fore autumabat, cui errori obviam ivit Gregorius Magnus lib. XVI. mor. num. 72. ac tantam sibi dedit operam, ut Eutychius errorem suum tandem revocaverit. Hallucinantur non minus Soci-

niani adserentes corpora carne et sanguine, cute et ossibus, ac partibus organicis fore destituenda. Nec eos juvat, quod Matth. XXII. 30. Beati futuri dicantur sicut Angeli Dei: nam istud non de corporis substantia; sed tantum de dotibus ac proprietatibus dicta sunt; eo quod nec cibo, vel potu, aut somno amplius indigebunt, nec morti, nec caeteris hujus vitae miseriis (§. CCCCXXVII. seq.) amplius subjecti erunt. Augustinus vero lib. de Civ. Dei XIII. c. XVI. nonnullos Platonicos Philosophos confutaverat, qui perfectam beatitudinem in anima ab omni corporis concretione penitus soluta reponebant.

§. CCCCXXXV.

Attamen iis haud solis, quae jam commemoravimus (§. CCCCXXXII. seq.) egregiis dotibus corpora Beatorum condecorata erunt; verum etiam claritate ac splendore summo, qui affluentis uberissime in anima gaudii signum erit non ambiguum, mirum in modum coruscabunt. Disertis verbis id Salvator docuit (Matth. XIII. 43.): *Justi fulgebunt sicut Sol in regno Patris eorum.* Paulus nos certos reddit, quod Christus *reformabit corpus humilitatis nostrae configuratum corpori claritatis suae* (ad Philipp. III. 21.), item, quod *seminatur in ignobilitate, resurget in gloria* (I. ad Corint. XV. 43.). Hujus splendoris specimen in Moyse exhibent sacri libri, cujus facies ex colloquio cum Deo tantum lucis contraxit, ut in eam filii Israel oculos intendere minime possent (Ex. XXXIV.); atque praecellentius exemplum aliud in Christi Domini transfiguratione (Matt. XVII. 2.); nam *facies ejus resplenduit sicut Sol, vestimenta autem ejus alba facta sunt sicut nix.*

SCHOLIUM. Tantus erit in Beatorum corporibus splendor, ut humanus oculus, quemadmodum modo configuratus est, vix illum substinere valeret; at in resurrectione Beatorum visus adeo perficietur, ut maximus corporis Christi fulgor, ac Sanctorum eius, oculis sit futurus jucundissimus.

Ac miram etiam claritatem et splendorem corpora fulgebunt.

§. CCCXXXVI.

Eorumque felicitas ex Beatorum et Angelorum consortio:

Quam suavis sit, quae virtuti amicitia innititur, virosque probos pari voluntate, morumque similitudine jungit, nemo est qui ignoret: nam de ejus utilitate consentiunt omnes, atque in humanis rebus nihil est tam naturae aptum, tam conveniens ad res vel secundas, vel adversas. Nihilominus, quum omnium paria non sint studia, non iidem affectus, ac non pauci utilitate potius sua, quam honestate res dimentiantur, fit ut haec inter paucos adinveniatur, atque non raro ipsamet sive nostra sive aliorum imbecillitate, claudicet, et vacillet. Pace ac animi tranquillitate nihil est haec in vita dulcius, tamen, etsi eam exoptat quilibet, frui raro nobis est concessum. Quod si ita est, quis digne percipere possit, quanta in coelis futura sit externa felicitas, ubi Deus sanctissimos illos cives reget, ac mutuo amore, ac perfecta caritate singulos copulabit? Quale Regnum! Quales Cives! Qualis fortunatissima ac jucundissima societas! Ibi Angelorum nobilissimi Chori; ibi Beatorum felicissima multitudo; ibi pax ac tranquillitas nullis unquam fluctibus turbanda; ibi livoris, odii, zelotypiae, inalesanae cupiditatis nomen ignotum est; ibi omnes veluti unius Patris concordēs filii communem honorum cunctorum, aeternamque haereditatem obtinebunt; ibi par voluntas, paria studia, unus finis Deo placendi, amandi, ac summis laudibus celebrandi. Inde exurgere necessario debet mutus beatorum consensus, ac arctissima vitae necessitudo, in qua Divinam Providentiam, ac admiranda naturae et gratiae opera admirabuntur, dignisque laudibus extolent. O Amor! o Pax! o Gaudium! o Beatitudo!

SCHOLION. Quisquis haec serio recogitet; ad honores, divitias, humanasque delicias, quae umbrasunt, ac fumus inanis, cor suum minime apponet; sed mente ad coelum elevata illa ardentem desiderabit gaudia summa, quae Deus diligentibus se praeparavit.

§. CCCXXXVII.

Beatitas juratorum gradus Deus aequissimus iudex est, cuique secundum operum mercedem rependens (§. CCCXX.). Jam ve-

ro, quum alij alijs intensius ipsum amaverint et habebit promercoluerint; alijs alii plus in Ecclesia adlaboraverint; ritorum diversitate. ac non pauci etiam fuerint, qui proprium sanguinem pro Dei gloria ac Evangelii propagatione libenti animo fuderint; hinc Divinae justitiae exposcit ordo, ut in ipsa Justorum beatitate gradus adsint, uberioremque gloriam obtineant ii, qui Divinae gratiae auxilio suffulti majus sibi meritum compararunt. Quam veritatem a nonnullis denegatam fuisse miror, adeo perspicue illam tradunt sacrarum litterarum oracula. Chritus Dominus inquit (*Joan. XIV. 2.*): *In domo Patris mei mansiones multae sunt.* Paulus (*I. ad Corint. III. 8.*): *Unusquisque propriam mercedem recipiet secundum suum laborem*; item (*ib. XV. 41.*): *Alia claritas Solis, alia claritas Lunae, alia claritas Stellarum*; *Stella enim differt a stella in claritate; sic et resurrectio mortuorum.* (*II. ad Cor. IX. 6.*): *Qui parce seminatur, parce et metet.* Quantum ad Patres attinet, de eorumdem consensione nullum dubium est; id enim persuasum fuit Polycarpo (*in actis passionis suae.*), Iraeneo (*lib. IV. cap. 13.*), Tertulliano (*in Scorp. c. VI.*), Cypriano (*De habitu Virg.*), Hilario (*Enarr. ps. 64.*), Chrysostomo (*Hom. 41. in I. ad Corint.*), Ambrosio (*de bono Mortis c. X.*), Nazianzeno (*Orat. 34.*), Augustino (*Tract. 67. in Joan.*), Fulgentio (*de fide ad Petrum.*), Gregorio magno (*Lib. 4. Mor. c. 31.*). Quamobrem merito definiverunt Patres Florentini (*in decreto unionis*) Sanctorum animas mox in coelum recipi, et intueri clare ipsum Deum Trinum, et Unum pro meritorum diversitate alium alio perfectius.

SCHOLION. Jovinianus, sicuti in meritis discrimen agnoscebat nullum, ita parem in omnibus beatitatis gradum esse decernebat, ut videre est apud S. Hieronymum *lib. I. adversus eundem.* Lutherani, quemadmodum affirmat Buddaeus *lib. II. c. III. §. XI.* operibus nostris nos promereri posse certum gloriae gradum negant; beatitatem, quatenus in Dei visione, ac fruitione consistit aequalem in omnibus statuunt; at quantum ad corporis claritatem, ac dona, quae vocari solent *accidentalibus*, inaequalem es-

se admittunt. Eadem mihi esse videtur Turretini Calviniani sententia *Loc. XX. quaest. X.* quamquam tamen non paucos esse affirmet, qui neque quantum ad ipsa *accidentalìa*, graduum diversitatem in beatitudine admittere velint. Catholici vero Theologi sicuti inaequalia merita, ita inaequale praemium in ipsa Dei visione ac fruitione constituunt. Etenim, quamvis Beati omnes Deum intuitive videant, amentque, nihilominus Deo per lumen gloriae illorum mentes magis vel minus suffulciente, sit, ut ii, qui excellentioribus meritis insigniti sunt, majori intelligentiae vi Dei naturam contemplantur, ac majori caritatis gradu eundem diligant. Caeterum Beati omnes satiantur penitus, quia Deum vident, eoque fruuntur secundum mensuram, quam acceperunt. Ita luminaria singula in ordine suo perfecta suat, et tamen alia aliis magis splendent, coruscantque I. ad Cor. XV. 41. ; ita, quae inaequalis magnitudinis sunt vasa, omnia quidem adimplentur, sed majora plus recipiunt, minora minus.

§. CCCCXXXVIII.

Difficultas
solvitur.

Qui ad vineam Domini excolendam, uti habet Parabola Evangelica (*Matt. XX.*) conducti erant, sive multum, sive parum adlaboraverint, aequalem singuli mercedem receperunt. Jamvero, quum Christus Dominus ea sub figura praemium, quod in coelis obuiabunt iusti, designare voluerit; manifestum est, justorum beatitudinem futuram esse in omnibus parem. Cui difficultati reponimus: in parabolis haud omnia esse anxie perscrutanda, non enim cum rebus, quas significant, perfecte semper congruunt. Quod de hac ipsa procul dubio dicendum est: secus in coelorum Regno murmura, ac invidiam, quod absit, quaerere oporteret (*ib. ver. 11. seq.*). Nihilominus asserimus, in hac parabola voluisse nos Christum edocere, parem fore in omnibus mercedem, quantum ad ipsam aeternam vitam, non vero quantum ad gaudii intensionem; quemadmodum praeclarissimi Ecclesiae Patres exponunt. (*) Verum

(*) S. Ambrosius *lib. 7. in Lucam ait: Nam et undecima conducti hora et aequalem dignaria mercedem solveret, mercedem*

cum Gregorio Nazianzeno respondere etiam possumus (*Orat.* 40.), quod si, eadem quantum ad gradus ipsos beatitas fuit ibi praesignata, ii, qui serius ad Deum se converterunt, minusque quam alii, quantum ad tempus laboraverint, doloris magnitudine, diligentia, ac ardentiori caritate aliorum meritum adaequaverint.

§. CCCCXXXIX.

Beatissimum justorum statum deploranda sequitur, Damnatorum
poenae aeternae.
nec coloribus sat tetris pingenda illorum conditio, qui ob proprias gravesque culpas Iudice aequissimo ad aeternas poenas damnati sunt (§. CCCCXX.). Verum ipso in aditu importuna contradicentium turba nobis se offert, quae accitis undique armis veritatem hanc se facile prosternere posse, gloriatur. Quorum tamen conatum impetumque Divina sacrorum librorum auctoritate reprimere, arduum non est. Ac primum: Nonne Paulus de iis, qui Evangelio non credunt, asserit quod poenas (II. ad Thes. 1. 9.) dabunt in interitu aeternas? Nonne S. Judas (*Epist. Cath.* 7. et 13.) malis Angelis vincula aeterna, ac impiis hominibus procellam tenebrarum in aeternum manere fidem facit? Huc etiam pertinet, quod Christus Dominus paleas, sub quarum imagine reprobi designantur, comburet igne inextinguibili (*Lucae* III. 17.); item, quod damnatorum vermis non morietur; et ignis eorum non extinguetur (*Is.* LXVI. *Marc.* IX. 43. 45. 47.). Illorum autem effugium, qui has Scripturarum sententias, puras putasque comminationes continere dicunt, Salvator ipse praecludit, de impiis, peracto universali iudicio, ajens: et ibunt hi in supplicium aeternum (*Matth.* XXV. 46.). Quid plura? fumus tormentorum ascendere dicitur (*Apoc.* XIV. 11.) iis diversis diversis in saecula saeculorum, tum reprobi cruciandi,

vitalis non gloriae. Hieronymus lib. II. adversus Jovin. Unus denarius non unum est praemium, sed una vita, et una de gehenna liberatio. Augustinus tract. 67. in Joan. Denario, ait, vita significatur aeterna, ubi alio amplius nemo videt, quoniam vivendi non est diversa in aeternitate mensura: sed multae mansiones diversae meritorum in una vita aeterna significant dignitates.

sunt (ib. XX. 10.) *ἡς τοὺς αἰῶνες τῶν αἰῶνων* in saecula saeculorum; qua phrasi, quum sacrae litterae Dei aeternitatem, quae finem habere nequit, nobis non raro describant, dubium manere potest nullum, quod Damnatorum poenae sine carebunt.

SCOLION. Poenarum aeternitatem inficias ivit Origenes, qui omnium Apocatastasim, sive restitutionem defendebat. Laterem autem lavandum suscepisse, qui eum ab hoc errore purgare conati sunt ostendit Puetius in *Origen*. lib. II. c. II. Errorem hunc Joanna Leadia restauravit in opere, cui titulus: *Evangelium aeternum*, cujus sententiae patrocinium suscepit Petersenius pluribus hac de re editis libellis, eique adstipulati sunt alii Protestantes, uti Seebachius, Siegvolchius, sive ut verum ejus nomen est, Klein-Nicolai, Langius, ac praecipue Ludovicus Gerhardus, qui omnes ingenii sui vires in id intendit, ut hanc omnium sive Daemonum, sive impiorum hominum restitutionem in melius probaret, vindicaretque. Totam rei gestae seriem, nomina, ac opera illorum, qui hosce confutandi onus inter ipsos Lutheranos sibi assumpserunt, recenset Walchius *Bibl. Theol.* tom. II. c. V. sect. XVII. §. I. seq. Origenistis adhaeserunt adhuc Burnetus *de statu mort. et resur.* Clericus *Parrhas.* tom. I. Tillotsquus Cantuariensis Archiepiscopus, Kingius, alique. Sociniani poenarum aeternitatem denegantes alia incedunt via; nam judicant infelices damnatos in nihilum redigendos esse: ita Crellius, Wolzogenius, alique hujus sectae Doctores, quibus ex Academia Altdorfina adstipulabatur Ernestus Sonerus, atque ex Anglis celeberrimus Lockius in *Christiana Religione rationi consona*. Poenarum aeternitatem aggressi sunt Baelius *dans la reponse aux question d'un Provincial* tom. III. c. 144. et 178. tum Hobbesius, Spinoza, Collinsius, Tolandus, Wisthonus, Tindalius, Marchio de Argento in *litteris judaicis*, Voltairius art. *inferne*, Auctor *du systeme de la nature* not. p. 276.; ac generatim omnes ii, qui spiritus fortes se vocari amant. Rousseau, etsi eo etiam inclinet, in suo tamen *Emilio* tom. 3. rem penitus definire ausus non

est; immo in quodam opusculo ad Genevenses suos, qui a dogmate de poenarum aeternitate jam recedere videntur, eosdem facete perstringit. Ex Purgatorii doctrina, ait, vos occasionem inde arripuistis, ut vos ab Ecclesia Romana sejungeretis; itaque si poenas aeternas negatis, ac ad tempus tantum statuitis, in Purgatorii dogma reciditis.

§. CCCCXL.

Asserant licet sacrae litterae impiorum poenas futuras esse aeternas, leve tamen est, ac infirmum, quod inde depromebatur argumentum: quisquis enim in his vel parumper tinctus est, haud ignorat, *aeternitatem* pro diuturna tantum accipi temporis duratione. Ita Deus Hebraeis promittebat, se iis daturum terram Chanaan, qua a diuturno tempore carent, *in possessionem aeternam* (Gen. XVII. 8.); ta ceremoniae legales dicuntur in aeternum duratione (Ex. XII. 14. 24. XXVIII. 29. ac alibi saepe); quas tamen jam abrogatas esse, Christianorum ambigit nemo. II. Poenam inter, et culpam proportio esse debet, quae profecto esset nulla, si peccato, quod temporis momento patrat, aeternae poenae rependerentur. Et vero legimus (Apoc. XVIII. 7.): *Quantum glorificavit se, et in deliciis fuit, tantum date illi tormentum et luctum*. III. Pauli doctrina poenarum aeternitati repugnat. Inquit enim (I. ad Corint. XV. 12. seq.) quod, *Sicut in Adam omnes moriuntur, ita in Christo omnes vivificabuntur*. Christi itaque meritis ad vitam meliorem omnes revocandi sunt. Addit: *Novissima autem inimica destruetur mors*: quibus secundam mortem designavit, quae damnatorum propria est, ignisque poenam denotat (Apoc. XX. 6. 14.); haec vero enim in finem futura docet, *ut sit Deus omnia in omnibus*. Unde ostenditur tam magnam esse Dei misericordiam, ut ejusdem omnes omnino esse participes aliquando debeant. Quid plura? Apocatastasim, sive restitutionem omnium in statum meliorem docuit Petrus (Act. III. 21.) de Christo Domino scribens: *Oportet quidem coelum suscipere usque in tempora restitutionis omnium ἀποκαταστάσις τῶν πάντων*.

Argumenta
adversariorum
ex S. Litteris.

Solvuntur.

*Æternitatis vocem in veteris testamenti libris pro diuturna temporis duratione non raro accipi fateor. Verumtamen quandonam sensu minus proprio intelligi debeat, ipsi sacri libri nobis aperiunt. Nempe, si quod uno loco æternum dicitur, in altero habuisse finem legamus; aut saltem finem aliquando habiturum fore prænuntietur, ampliori tunc significatione æternitatis nomen intelligendum est. Jamvero Judæos ex terra Chauaan expulsos fuisse ipsi sacri libri nos edocent, ac legis Mosæicæ ceremonias abrogandas fore Prophetæ annuntiarunt (§. CCCCI.). At quum de æternis impiorum poenis sermo instituitur, tantum abest, ut earundem prænuntietur finis, ut potius iis circummyestiantur adjunctis; quibus ipsa Dei æternitas nobis in sacris litteris exhibetur (§. CCCXXXIX.). Proportio autem, quæ peccatum inter et poenam adesse debet, temporis haud respicit diuturnitatem; sed inter magnitudinem peccati, ac poenæ tota versatur. Ita secundum civiles leges, qui graviter, licet temporis momento, in Civitatem deliquit, ejusdem societatis vel morte, vel perpetuo exilio privatur. Accedit his: offensam dignitati personæ offensæ commensurari; porro, quum peccatum Dei infiniti offensæ sit, æterna poena delicti proportionem minime excedit. Huc etiam pertinet, quod gravi delicto quis ab ultimo fine prorsus recedit, ac in creatis rebus constituit; itaque legibus æquitatis consentaneum est, ut qui a Deo recessit penitus, eodem in perpetuum careat; id vel eo magis, quod damnati voluntatem habent in malo obfirmatam, et odio perenni erga Deum exardescunt. Qua de causa in *Psalmis* legimus (Ps. LXXIII. 23.) *superbia eorum, qui te oderunt, ascendit semper*; atque alibi (Apoc. XVI.), quod ii, in quos justa Dei ira se manifestat, nomen Domini sint blasphematuri; hinc mirum non est, quod a Deo in æternum puniri mereantur. Pauli frustra praesidium quaerunt Origenis asceclæ. Quandoquidem de sola justorum vivificatione sermonem habet: de illa scilicet, in*

qua Salvator locum Principem obtinet, sive ut Doctor gentium ait: *primitiae Christus*: de illa, in qua claritas, ac resurgentium gloria resplendet: de illa, in qua Christo *secundo homini caelesti* similes erimus: de illa quae ad eos pertinet: *qui sunt Christi, qui in adventu ejus crediderunt* (I. ad Corinth. XV. 23. et seq.). At vero impii Christi non erunt. Nam teste eodem Apostolo: *Si quis spiritum Christi non habet, hic non est ejus* (ad Rom. VIII. 9.). Itaque vivificatio, de qua Paulus loquitur, ad omnes ac solos justos attinet. Mors etiam secunda, quantum ad solos justos destruetur; ii namque in gratia confirmati, a summo bono excidere amplius nequeunt, nec mortis secundae miseriam conditionem experiri (Vid. Augustinum *Lib. VI. op. imp.*). Post universalem autem corporum resurrectionem, Deus erit omnia in electis omnibus, eo quod bonis omnibus ac felicitate perpetua eos replebit, cumulabitque (Lib. XXII. de Civ. Dei cap. XXIX.). Apocatastasis tandem, sive omnium restitatio, quam Petrus commemorat, universalem resurrectionem designat, post quam Christus visibilis in forma secundo adveniet judicaturus vivos et mortuos; at tantum abest, quod eo tempore reprobi omnes in gratiam recipiendi sint; quin immo audient sententiam: *Discedite a me maledicti in ignem aeternum.*

SCHOLIUM. Unde apparet hallucinatum fuisse Baesium asserentem, impios in inferno momento quolibet posse ad Deum converti. Nam praeter adducta jam argumenta, quibus assertionis hujus falsitas ostenditur, certum est, neminem tantas habere vires, ut sine auxilio Divinae gratiae sinceram suorum delictorum poenitentiam agat. Hac vero procul dubio impii carebunt; quandoquidem, si Deus hac adhuc in vita execratos ac obduratos peccatores nonnumquam deserit (§. CCIX.), quanto magis affirmandum est in altera vita, in qua non misericordiae, sed justitiae tempus est, Deum eos, qui eum deseruerunt, penitus deserere? Perfecto ipse Salvator Joann. III. 36. super incredulum iram Dei manere, fidem facit, manente autem indigna-

tione Divina, damnatio maneat necesse est; immo cum magnum Chaos justos inter damnatosque firmatum sit, ita ut ab uno in alterum locum quis amplius pertransire nequeat *Lucae XVI. 26.* apparet reproborum in melius restitutionem futuram fore nullam.

§. CCCCXLII.

Lockius refutatur.

Lockius magni nominis Philosophus Apocatastasi omnium sive Daemonum, sive impiorum hominum nullo satis solido argumento defendi posse probe intelligens, Socinianorum doctrinae adhaesit (§. CCCCXXXIX. Sch.), eamque illustrare conatus est. Praecipuum suae sententiae robur ex iis depromebat saeculorum librorum testimoniis, quibus Damnatorum poenae nomine *mortis* (Apoc. XXI. 8.), *interitus* (ad Rom. IX. 22.), *perditionis* (Joan. XVII. 12.), designari solent. Jamvero, aiebat, quod moritur, interit, perit, illud finem habeat, ac in nihilum redigatur, necesse est. Verumtamen, si vir clarissimus perpauca haec ac subobscura testimonia, cum iis perspicuis, quae poenarum aeternitatem statuunt, comparasset, quam parum ponderis illa habeant, ipsemet perspexisset: at de objectis locis nonnulla dicamus. Mors secunda, de qua in Apocalypsi fit sermo, vitae finem non denotat, sed ingentes significat, quas infelices illi patientur, miseras ac calamitates. Sit Joannes suus ipsius interpret: *Pars, inquit, illorum erit in stagno ardenti, igne, et sulphure, haec est mors secunda.* Quid autem nomine *interitus* Doctor gentium significare voluerit, ipsemet explanat aiens (II. ad Thess. I. 9.): *poenas dabunt in interitu aeternas.* Quamobrem si poenae aeternae impiis manent, et quidem in *flamma ignis* ut paulo ante exposuerat (ib. ver. 8.): non erunt itaque damnati destruendi, ac in nihilum redigendi. Jamvero, cur mortis ac interitus vocibus impiorum poenas sacri libri describant, aperit nobis sapientissimus Augustinus (Serm. 306. de Diversis). *In cruciatibus, in tormentis, in ignibus sempiternis noluit appellare vitam, ut ipsum nomen vitae laudis sit, non maeoris. . . . Nam in tormentis esse semper, aeterna*

mors est, non aliqua vita. Multo minus nos urget vox *perditionis*; enimvero Scripturarum consuetudine dicitur Deus nationem integram perdere, quum severam de ea ultionem sumit: atque quotidiano usu affirmare solemus, virum moribus dissolutum se perdere, aut periisse. Immo Tiberius Imperator ad *Senatum* scribens, Tacito auctore, inquebat: *ita me Di Deaque pejus perdant, quem perire quotidie sentio.* Quibus graves, unde afflictabatur, angores innuere volebat. Itaque mortis, interitus, ac perditionis nomine sacri libri impios in nihilum fore aliquando redigendos, haud significant.

SCHOLION. Si rem bene accipias, nomen mortis haud iunuit, subjectum, cui illa competit, in nihilum redactum fuisse. In ipsa enim naturali hominis morte corpus quidem vivere cessat, et dissolvitur; at in nihilum non redigitur.

§. CCCCXLIII.

Poenarum aeternitatem agnoverunt, praedicaruntque celeberrimi Ecclesiae Patres. Quorum agmen ducat Iustinus martyr, quem nonnulli Origenistis praelusisse, perperam dixerunt. *Cum omnium, inquit (Apol. II.) etiam qui umquam extitero mortalium corpora excitabit, atque dignos quidem inducet natura corruptibilitatis experte, injustos autem in perpetuo sensu una cum malis genis in ignem mittet sempiternum.* Consonant Theophilus (ad Autolyicum lib. I.), Irenaeus (lib. IV. c. 47.), Tertullianus (Apol. c. 45.), Cyprianus (lib. de mort. ad Demet.), Ambrosius (De bono mortis c. 2.), Chrysostomus (Hom. I. A. in I. ad Cor.), Hilarius (C. V. in Matt.), Cyrillus Hierosolymitanus (Cate. 18.), Basilius (Serm. de fut. Judi.), Augustinus, qui hanc de orationum in melius restitutione doctrinam, *vanissimam impietatem* (lib. de Haer. ad Quodvult. vocat. Hieronymus plura habet, quae veritatem hanc confirmant: Prudens, ait (in c. 25. Matt.) *lector adverte, quod et supplicia aeterna sint, et vita perpetua metum deinceps non habet minarum*: item (in c. III. Iouae), *quia hoc* (nempe futuram omnium sive Daemonum,

Aeternitas poenarum ostenditur traditione.

sive impiorum apocatastasim) *Sancta Scriptura non dicit, et evertit penitus timorem Dei, dum facile homines labuntur ad vitia putantes etiam Diabolum, qui auctor malorum est. . . . acta poenitentia posse salvari, de nostris mentibus abjiciamus, et sciamus peccatores mitti in ignem aeternum, qui praeparatus est Diabolo et Angelis ejus, et de his dici, vermis eorum non morietur, et ignis eorum non exstinguetur. . . . Alioquin si omnes rationabiles creaturae aequales sunt. . . . atque longo post circuitu, atque infinitis saeculis omnium rerum restitutio fiet. . . . quae distantia erit inter virginem, et Postribulam? . . . Idemne erit Gabriel, et Daemones? idem Prophetae, et Pseudoprophetae? idem Martyres, et Persecutores? Finge quodlibet, annos et tempora duplica, et infinitas aetates congere cruciatibus, si finis omnium similis est, praeteritum omne pro nihilo est, quia non quaerimus, quid aliquando fuerimus, sed quid semper futuri simus. Concludit S. Doctor contrariam sententiam esse dogma perversum, et *ὀυμπαρὰ διαβολικὴν*. Accedit his, Origenianam doctriam damnatam fuisse a Theophylo Patriarcha in Synodo congregata ex Provinciis Aegypti, Lybiae, et Pentapolis (Vid. Vallarsium ed. op. S. Hier. coll. 537.), tum in quinta Generali Synodo (Vid. Nicephorum lib. 17. *hist.*), quod septima oecumenica laudavit, confirmavitque (*).*

Scholion. Ex his manifestum fit, S. Hieronymum poenarum aeternitatem in omnibus damnatis agnovisse, atque si nonnulla habet in suis operibus, quae huic dogmati videntur contraria, id ex eo repetendum esse, quod ipse nonnumquam haereticorum recensent dogmata, quin ea refellat, ut ex *Comment. in epist. ad Ephesios, et ex apologia adversus Rufinum* innotescit. Augustinus vero in

(*) *Act. I. Sanctae venerabilis*, ajunt, quintae Synodi, quae Constantinopolim congregata est, communi, et universali submissi sunt anathemati Origenes et Theodorus Mopsuestiae, et ea quae ab Evagrio, et Didymo dicta sunt, de eo videlicet, quod de restitutione in statu priusnum futebantur.

Ench. ad Laurentium c. 212. verba Ps. 76. Non obliviscetur misereri Deus, aut continebit in ira misericordias suas, ad electos pertinere affirmat. Quod si quis ad omnes referre velit: Etiam sic quippe intelligi potest, manere in illis ira Dei, hoc est ipsa damnatio. . . . Hoc est manente ira sua, non tamen contineat miserationes suas; non aeterno supplicio finem dando, sed levamen adhibendo, vel interponendo cruciatibus. Quod ipsum versans de Civ. Dei lib. XXI. c. 24. n. 3. postea concludit: Quod quidem non ideo confirmo, quia non resisto. Confer L' Herminier de peccatis, Patuzzi de futuro impiorum statu lib. 3. Gervasio de poenarum aeternitate.

§. CCCCXLIV.

In dubium prudens ac sapiens nemo vertere potest, esse Deum omnipotentem, id enim admiranda creationis opera aperte demonstrant, tum infinite sapientem ac justum; certum non minus, humanam animam spiritalem esse, liberam, ac immortalem (§. CCCC. CCCCH. CC.). Jam vero justarum animarum felicitas, si aeterna non esset, haud censeretur perfecta: immo nec Deo dignum esse videretur, ut animas immortales, quae ipsum ardentem diligunt, ac sunt ipsius amore dignae, destrueret, ac in nihilum redigeret. Sed nec melius concepimus, quod Deus illorum animas, quae voluntarie ac libere Divinam legem violarunt, debeat destruere, quoniam hae non minus sunt ex sua constitutione immortales. Immortales, criminibus oppletæ, odio Divino dignae, quatenam erit earum in aeternitate sors, nisi perpetuo infelix? Sed neque satis ratio nostra percipere valet, Deum judicem aequissimum absque vero ac sincero criminum patratorem dolore parcere velle. At enim poenitentia sincera in vita altera possibilis non videtur, quum ob poenarum magnitudinem, impii jam in malo obfirmati, in earundem auctorem odio potius semper ferentur. Itaque aequissimus iudex haud criminibus parcat, quae nec reparata sunt, nec possunt reparari. Quod si ad Religionis Christianae principia mentem convertamus, assertionis nostrae veritas elucescet pra-

Nec est contraria rationi.

gis. Quod eum ipsa proponit nobis, ad infinitum tendit. In Verbi incarnatione, quod Unigenitus Dei filius, factus est Legislator noster, sapientia resplendet, ac Misericordia infinita, in satisfactione, quam ipse pro peccatis nostris in cruce dedit, admiramur justitiam infinitam, noscimusque quanta esse debeat peccati gravitas (§. LX), si ad illud expiandum opus fuit pretio infinito. Religio nostra in cultu habet objectum infinitum, ipsum scilicet Deum; atque innititur tota infinitis meritis Christi. Virtutis, ac bonorum operum præmium Deus est ipse intuitive visus (§. CCCXXVII.), nec Beatorum felicitas finem umquam habitura est (§. CCCXXXII.). Quis itaque amplius mirabitur, si etiam impiorum poenae erunt quantum ad durationem infinitae? Nam si Religio haec sanctissima ostendit nobis Deum in sua sapientia, bonitate, in gratiis, ac praemiis infinitum; cur ipsa aequè infinitum non annuntiabit in sua severitate ac justitia? Itaque Christiana Religio proponendo nobis incarnationis mysterium, ejusdemque consecraria, nos edocet, ut Deum adoremus, qui pro salute nostra factus est homo; sed una movet, ut tremamus coram Deo, cujus justitia est necessario infinita, uti ipsius amor.

SCHOLION. Haec argumenta fusius pertractata sunt in encyclopaedia art. *peine*. Primum magis urget eos, qui *Spiritus fortes* vocantur; alterum egregie premit, quotquot e Christianis poenarum aeternitatem denegarunt. His adde, quod dogma hoc nostrum apud nationes omnes longe lateque pervagatum fuit. Nam Hebraei, Aegyptii, Persae, Graeci, Tartari, hanc veritatem agnoverunt. Vid. Huetium de *conc. fid. et rat.* lib. II. c. 24. nec hac notione caruerunt Brasiliæ, Caraibae, Mexicani, Peruviani, Virginienses, Siamenses aliique barbari populi. Confer Francescati *princ. Relig. nat. et rev.* tom. 2. c. 6. §. IV.

§. CCCXLV.

Difficultates
nonnullae sol-
vuntur.

Quam habemus de Deo notionem, ea infinite bonum, ac misericordem nobis eundem exhibet. An bonitatem infinitam ac misericordiam ostenderet, si

pro culpa gravi poenis atrocibus, ac finem numquam habituris hominem puniret? immo crudelis potius Tyrannus esset, qui partem hominum maximam damnaret, et exquisitis suppliciis torqueret. Hinc etiam necessario consequeretur, quod plus ab illo timere, quam sperare deberemus; unus enim salvatur, mille autem pereunt: si lusus esset, in quo unicum adesset praemium, poenae autem essent mille, quis nisi stultus ludere vellet (*)? Poenarum itaque aeternitas cum sanae rationis principiis consistere minime potest. Attamen his etsi prima fronte gravissimis argumentis, necdum causam Spiritus fortes evicerunt. Quamobrem, quod attente ponderandum est, peccant in eo gravissime Increduli, quia attributum unum Dei ab aliis separant; quum tamen sejungi nec possint, nec debeant. Rem diligenter examinemus. Bonitas ac misericordia divina, est voluntas infinita bene faciendi, uti esse potest, ac debet in illo, qui eodem tempore infinite sapiens est, justus, ac sanctus. Quo fit, ut divina bene aliis faciendi voluntas a sapientia dirigi debeat, secus imbecillitas potius, quam bonitas esset: justitiam insuper habere debet comitem; alias pura putaque esset inordinationum omnium, ac vitiorum tolerantia; cum sanctitate est non minus unienda, cujus proprium objectum est, virtutem amare, vitiumque odio habere, et aversari. Jam vero Dei erga humanum genus bonitas ac misericordia quantum non fulget coruscatque! In creationis beneficio splendet illa, ac in variis pulcherrimisque naturae bonis unde nos cumulavit, splendet in sublimi fine, ad quem nos ordinavit, ac in mediis liberaliter concessis, unde illum consequi facile valemus: splendet quam maxime in dono Unigeniti filii sui, qui factus est legislator noster (§. LXXXIII.), Sponsor (§. LXVI.), Redemptor (§. LI.), splendet in luminibus, instructionibus, uberrimisque gratiis, quibus aperitur, ac sternitur nobis ad salutem via: splendet hac in vita, dum patientia summa nostra crimina sustinet, dum nos monet,

(*) In libello cui titulus, *militaris Philosophus cui concinnant increduli reliqui.*

ac ad poenitentiam invitat: splendet postremo in aeterno praemio, quod justis praeparavit, summaque liberalitate largitur. Sed, dicant increduli, debebitne adhuc in universali omnis inordinationis cunctarum abominationum ac scelerum tolerantia perpetuo fulgere? cordatus ac sapiens vir asseret nemo. Dei itaque bonitas ergo hominem se insiuite procul dubio manifestat; at si homo libertate donatus divina misericordia abutatur, eam negligat, spernatque; quis amplius mirabitur, si Deus justitiae suae, quae non minus, quam ipsius bonitas, infinita est, impium relinquat? Ex his percipiet facile quilibet, quantum hallucinentur ii, qui statutis aeternis poenis Deum crudelem tyrannum appellare audent. Et vero Tyrannus est, qui absque culpa punit, Deus vero aeternis poenis addicit neminem, qui gravi culpa obnoxius non sit, nec ipse vindictae spiritus, vel animi impotentis levitate, sed aequitate ac justitia poenas aeternas sancivit. Lusus autem, quem confingunt sucreduli, pro iis tantum est, qui fato cuncta regi dicunt, qui Dei providentiam, animae immortalitatem, revelatam Religionem denegant: pro iis, qui legem divinam non curant, spernuntque: sed pro illis ludi exemplum non valet, qui Deum amant, venerantur, ac credunt, quod potens sit salutis nostrae depositum usque in finem conservare (Vid. II. ad Tim. I. 12.), non pro illis, qui Christi Domini promissionibus inhaerentes, vitam aeternam, quam rogantibus promisit, postulant; non pro illis, qui compertum habentes Christum pro nostra salute esse mortuum, in meritis ejusdem infinitis spem suam omnem reponunt: Inferni poenae haud dubie pro iis constitutae non sunt, qui Deum proponunt adiutorem sibi, qui suam legem pro norma ac regula, suam omnipotentem manum pro fulcro assumunt. Quamobrem ii soli plus timere habent, quam sperare, qui sua sponte, ac propria incuria in eo se collocant statu, quo suam aeternam salutem amittant.

§. CCCCXLVI.

Poenae, quas aeternas futuras fore diximus (§. Tom damni,
CCCCXXXIX.), duplicis generis erunt, *damni sci-* tum sensus.
licet et sensus. Prima, quae in summi boni priva-
tione perpetua, ac bonorum omnium quae in coelis
sunt, carentia consistit, clarissimis sacrorum libro-
rum oraculis constabatur. Salvator in die iudicii
reprobis omnibus dicturus est: *Discedite a me ma-*
ledicti in ignem aeternum (§. CCCCXX.): item
discedite a me omnes operarii iniquitatis..... cum
videritis Abraham et Isaac, et Jacob, et omnes
Prophetas in Regno Dei, vos autem expelli foras
(Luc. XIII. 27.) Paulus Corinthios monet (1. ad
Cor. VI. 9.), *quia iniqui regnum Dei non possi-*
debunt. Hujus poenae gravitas tanta est, ut nulla
ei possint, quemadmodum docet Augustinus (Ench.
c. 112.), tormenta comparari; concinit Chryso-
stomus scribens (Hom. XXIII. in Matth. et XLVII.
ad pop. Antioch.): *Novi, quia plurimi pertime-*
scunt gehennam. Ego tamen illius gloriae amissio-
nem multo amarior dico esse, quam ipsius gehennae
supplicium. Augebitur autem non parum ex maxi-
mae Beatorum gloriae conspectu (Sap. V. 2. seq.),
atque ex bonorum ac voluptatum, quibus hac in
vita anhelabant, carentia. At huic gravissimae poe-
nae alteram nempe sensus consociandam esse, du-
bium non est. Enimvero non tantum a Deo, An-
gelis, Beatisque separandi dicuntur, verum etiam
in ignem aeternum mittendi, ubi vermis rodens
erit (Marci IX. 43.), fletus et stridor dentium
(Matt. XIII. 50.), tribulatio, et (ad Rom. II. 9.)
luctus, clamor, dolor, angustia, cruciatus, qui-
bus poenae omnes, unde animus, ac corpus cru-
ciantur, graphice describuntur.

SCHOLION. Quamobrem errarunt Jaquelotus *de*
convenientia fidei et rationis p. 217. et Franciscus
de Roehes defense du Christ. epist. 37. et 38. qui
solum forte boni aeterni privationem omnes damna-
torum poenas absolvere dixerunt, aut saltem sensus
poenam pro iis tantum, qui impietatis et crudeli-
tatis monstra fuerunt, esse constitutam.

Quod si catholica fides tam acerbis, aeternasque poenas nobis annuntiat, dum tempus est, operemur bonum, torporem ac socordiam nostram aliquando excutiamus; recogitemus serio, quo malesana cupiditas ac noxiarum voluptatum amor certo nos trahet, si vitam divinis praeceptis haud consonam ducamus: perpendamus quam grave malum sit in manus Dei viventis, punientisque incidere. Hinc si in manu nostra electionem Deus posuit, ut ad gaudia aeterna vel tormenta perveniamus, quid amplius haesitamus? Quid in faciendo delectu haeremus? Deum O. M. exixe deprecemur, ut poenitentiae tempus nobis concedat, verum dolorem tribuat, gratia sua ita nos suffulciat, ut in bonis sanctisque operibus perseverando ad ipsum Deum facie ad faciem contemplandum, amandum, fruendum pervenire valeamus: ubi cum Angelis ac Beatis perpetuum ei laudis ac gratiarum actionis Sacrificium offeramus.

S. D. H. E. G.

**FRANCISCUS
VERONIUS**

DE REGULA

FIDEI CATHOLICÆ

SEU

DE FIDE CATHOLICA.



PRÆFATIO
AD
LECTOREM

(Quae praefigitur Editioni Lovaniensi, an. 1702.)

EN Opusculum de Fidei regula, primo ab eximio Viro Francisco Veronio editum, ac à Reverendissimis DD. Walemburgicis tanto postea in pretio habitum, ut hi in Fidei controversiis tam exercitati, hoc sibi deligere et adoptare maluerint, quam novum concinnare.

Sane fatendum est hanc regulam eruditam admodum esse et accuratam, in qua et singulari diligentia et exactissima cura discernuntur ea, quae Fide Catholica tenenda sunt ab iis, quae tantam in Ecclesia auctoritatem nondum meruerunt.

Ea itaque utere, Lector benevole, et ex illa disce Ecclesiae Fidem, quam contra haereticos propugnare debes. Disce pariter, quae sint dogmata, quae

hactenus non definivit Ecclesia. Sic haereticis viam sternes, ut ad Ecclesiae gremium redeant. Sic quoque componendis Filiorum Ecclesiae dissidiis utilem impendes operam, cum non tuae prudentiae inniteris, sed Ecclesiae Fidem praedicabis, ejusque in praedicanda Fide prudentiam zelumque aemulaberis, sequens vetus illud ac vulgare dictum : *In necessariis unitas, in dubiis libertas, in omnibus charitas.*

FRANCISCUS VERONIUS

DE REGULA

FIDEI CATHOLICÆ

SEU

DE FIDE CATHOLICA.

CAPUT PRIMUM.

§. 1.

Regula fidei.

ILLUD omne et solum est de fide Catholica quod est revelatum in Verbo Dei, et propositum omnibus ab Ecclesia Catholica, Fide divina credendum. Neque refert, an illa propositio emanet ex Concilio aliquo universali, ex ejus decreto, et definitione; an ex sensu fidelium omnium.

Completitur hæc Regula Verbum Dei: nam *fides ex auditu, auditus autem per Verbum Christi*. Completitur et Ecclesiam docente in Concilio Catholico. hoc est universali, expresse aliquid de
Theol. Dogm. Pars IV.

fluientem, aut enunciantem; vel ex sensu omnium tum Pastorum, tum fidelium velut practice eloquentem.

Et quidem *Fidei Catholicae* nomen utrumque hoc sonat. *Fides enim divina est, credere propter auctoritatem Dei revelantis*: in quam solam auctoritatem tota resolvitur. *Propositio sit per Pastores a Christo constitutos, in Concilio universali congregatos, vel ex manifestato fidelium omnium sensu*: nec enim aliter fieri potest, ut talibus credendis singuli fideles stringantur.

Catholicam Fidem diximus: quia saepius Theologi inter se, *an hoc vel illud sit Fide divina credendum*, illis affirmantibus, illis negantibus, digladiantur. Quo ipso consentiunt omnes, illi etiam, qui *Fide divina illud esse credendum dicunt, non esse Fide divina Catholica credendum, nec proinde haereticos, et ab Altari seu Ecclesiae communionem amovendos, qui talia Fide credere respuerent*: de hac autem *Fide divina*, quae sit etiam *Catholica*, loquimur in praesenti, cum sola sit, de qua Rom. 10. 10. Paulus: *Corde creditur ad justitiam; ore autem confessio fit ad salutem*. Sola, qua in sinu suo Ecclesia nos contineat, cuius solius professione devios in complexum admittat, denique tales solum articulos proponat ipsamet in sua professione *Fidei*, quam omnes, tum Catholici, tum reduces, *corde teneant*, et propalam ore pronuntient, exclusis a dicta professione doctrinis omnibus, de quibus decertent inter se Theologi, illis *Fide credendas* dicentibus, aliis negantibus.

Consentiunt omnes Synodi, Patres, Theologi in hac Regula statuenda: et semper habiti, et habentur haeretici (nec alii), qui contra sensum totius Ecclesiae, seu definitionem Concilii ejus universalis aliquid sentiunt in doctrina salutis: propriae nimirum electionis iudicio adversus universitatem sese elevante, condemnati.

§. 2.

Declaratio Regulae

Duo debent conjunctim adesse, quo doctrina aliqua sit Fidei Catholicae. Alterum, ut sit revelata a Deo, per Prophetas, Apostolos, seu Auctores Canonicos. Alterum, ut sit proposita ab Ecclesia. Si utrumque adsit alicui doctrinae, illa Fide divina Catholica est credenda: si alterum desit, seu revelatio, seu propositio Ecclesiae, non est Fide divina Catholica credenda. Sed secundum adesse non potest, quin primum reperitur: quia cum Christus Ecclesiae promiserit assistentiam Spiritus Sancti qui doceat eam, ducatque in omnem veritatem; haec nunquam, stante Dei promissione, quae semper obtinet, docet aliquid esse revelatum, quod non sit revelatum. Potest tamen aliquid esse revelatum a Deo, etiam in verbo suo, obscure scilicet, quod nondum sit propositum ab Ecclesia: quia revelatum quidem est in Verbo Divino, sed quod interprete egeat, et necdum Ecclesia sensum Verbi Dei seu scripti, seu traditi, aperuerit, sicque nondum definierit, et proinde nondum proposuerit hoc, vel illud esse Fide credendum. Hinc novae saepe factae sunt in Conciliis, etiam universalibus, definitiones: v. g. Baptismum extra Ecclesiam collatum esse validum, nec iterandum: de quo S. Augustinus, lib. 1. contra Crescon. cap. 32. » Cum inter Episcopos » anterioris aetatis ista quaestio fluctuaret, et varias » haberet inter se collegarum, salva unitate, sententias, hoc per universam Catholicam (Nicœnum intelligit Concilium, can. 8.) quae toto » orbe diffunditur, observari placuit, quod tenemus ».

§. 3.

Deducta ex Regula declarata:

Cum nihil sit de Fide Catholica, nisi revelatum per Prophetas, Apostolos, et Auctores Canonicos,

sequitur: *Nihil esse de Fide Divina eorum omnium, quae novimus ex revelationibus factis post tempora Apostolorum, quibusvis etiam Sanctis, Ambrosio, Cypriano, seu aliis, antiquis illis, aut recentioribus, quarum myriades sunt in vitis Sanctorum, Catharinae Senensis, Birgittae, etc. etiamsi approbatae forent tales visiones a quibusdam Conciliis etiam universalibus, quales aliquae referuntur in 2. Nicœno, etc. Quia ista non sunt revelata Prophetis et Apostolis. Fides proinde, quae haberi potest ex iis humana est, quae penes auctores referentes est: nutans, probabilis; certa, aut improbabilis, pro qualitate referentium, et circumstantiis aliorum revelationum, pleraque vel nutant, vel falsae sunt. Sed si credimus Fide humana Dioni., Suetonio et aliis profanis Historicis; cur parem saltem, vel majorem gravioribus Auctoribus non deferemus Fidem?*

Sequitur insuper: *Nihil Fide divina credi ex ullo miraculo facto post tempora Apostolorum in confirmationem cujusvis doctrinae, nullumque horum miraculorum Fide divina esse necessario credendum, etiamsi talia miracula referantur ab Augustino, Gregorio, et aliis, etiam ut visa ab ipsis, qualia pleraque refert Augustinus, lib. 22. de civit. Dei cap. 8. aut etsi contineantur in Bullis Summorum Pontificum Romaeque canonizationis Sanctorum, quarum plenae sunt dictae Bullae; aut etiamsi referantur in Conciliis universalibus, aut etiam approbentur, ut pleraque relata fuere in 2. Nicœna Synodo. Ratio eadem, quae superioris illationis; quia cum haec miracula facta non sint a Prophetis et Apostolis, proinde non sunt fundamentum de quo loquimur. Horum miraculorum plenae sunt vitae Sanctorum; quorum aliqua sunt falso relata, alia valde nutant: prioris generis multa sunt in vitis conscriptis a Voragine et Metaphraste, praesertim in vitis Georgii, Ursulae, etc. ut bene notat Bellarminus de Scriptor. Eccles. in Metaphraste, pag. 266. Baronius in Martyrologio ad eorum festa, et alii. Maxima pars, et fere omnia verissima sunt: et si historiis Suetonii fidem aliquam adhibemus, nec revocamus in dubium praelia varia, et*

alia facta ab eo descripta, temerariusque censeretur, qui sine ratione haec negaret, majoris sane temeritatis arguendus foret, qui praedicta omnia miracula, relata a sanctissimis et gravissimis testibus, etiam ea, quibus interfuerunt, referentibus, ut plerumque refert Augustinus, negaret. Fides tamen horum omnium non excedit humanam: nec eis Fides Catholica, tanquam fundamento, innitur, nullaque doctrina tanquam Catholica creditur, ex ullo horum miraculorum. Confirmatur nihilominus his miraculis, quinimo revelationem aliquam continent. Cum initium salus, seu Evangelium accepisset enarrari per Dominum, ab eis, qui audierunt, in nos confirmata est, contestante Deo signis et portentis, et variis virtutibus, et Spiritus Sancti distributionibus secundum suam voluntatem. Et: illi autem profecti praedicaverunt ubique Domino cooperante, et sermonem confirmante sequentibus signis. Omne ergo miraculum, verbum quoddam Dei est: impossibile autem est verbo ullo mentiri Deum. Eadem itaque certitudine aut probabilitate, qua novimus miraculum, novimus hinc dogma; quae notitia varia est, certa, probabilis, aut aliquando improbabilis, pro varietate Auctorum referentium, et modo visa, modo audita, qualiter referunt Augustinus, Gregorius, et alii. Doctrina fidei v. g. *Reliquias Sanctorum venerandas*, confirmatur certissime miraculis factis ad reliquias S. Stephani, relatis a S. Augustino, de civit. Dei, lib. 22. cap. 8. teste oculato: confirmatur solum probabiliter, eodem, et Gregorio audita ab aliis narrantibus. Improbabilia sunt pleraque quae refert Metaphrastes et de Voragine: talia nonnisi improbabilissime citantur ad firmandam Fidem. « Extant » acta Georgii (inquit censor iustus Baronius in Martyr. 23. Aprilis) a Metaphraste edita: sed in » iis displicent, quae de Anathanasio Mago feruntur. Vidi ea etiam, quae Jacobus de Voragine » habet in legend. Sanct. quae non mediocri indigent castigatione, etc. » Et Bellarminus de Scriptor. Eccl. anno 850. « A Metaphraste scriptae » sunt historiae de vitis Sanctorum multis additis » ex proprio ingenio. Addit miracula plurima et

Hebr. 2. 3.

Mart. 16. 20.

Hebr. 6. 18.

» maxima in eversione templorum et idolorum, et
 » in occisione persecutorum, quorum nulla est
 » mentio apud veteres Historicos. » Sed qualem-
 cumque habeant haec miracula certitudinem, nul-
 lam Fidei doctrinam fundare possunt, quia non sunt
revelationes factae Prophetis et Apostolis; adde,
 quod nec ut plurimum proponuntur ab Ecclesia
 universali, cui soli promissa est assistentia Spiritus
 Sancti, ne erret. Fidem ergo solam humanam, seu
 assensum solum humanum merentur, ob qualitatem
 referentium, quae fallibilis, et pure humana est;
 longe itaque abest, ut talis assensus sit Fidei Divi-
 nae Catholicae, de qua sola loquimur.

An vero assensus hi, ob revelationes privatas,
 extra revelationes factas Prophetis et Apostolis con-
 tentas in Verbo Dei, et propositas ab Ecclesia uni-
 versali, sint assensus supernaturales et divini, et
 Fidei divinae, quia videntur fieri ob auctoritatem
 divinam revelantem, licet non constantem per Ver-
 bum Dei scriptum aut traditum, nec per auctori-
 tatem Ecclesiae universalis proponentis, sed per
 scripta humana; et ex propositione hominum fal-
 libilium referentium; alio est quaestio problematica
 inter Theologos, et proinde longe a doctrina Fidei,
 de qua loquimur. Probabilius censemus, talem as-
 sensum non esse divinum, sed pure humanum;
 quia resolvitur in pure humanam auctoritatem par-
 ticularem horum, vel illorum Historicorum, quae
 omnia sunt humana: proinde talis fides non est
 Theologica, et longe longius non est Catholica.

Tertio sequitur. *Nullam Doctrinam fundatam in
 Verbo Dei, seu Scriptura diversimode exposita a
 Sanctis Patribus, aut Doctoribus nostris, esse do-
 ctrinam Fidei.* Idque ex duplici defectu. Primo,
 quia non constat esse revelatam: omnis autem actus
 Fidei debet esse certus ex revelatione. Secundo,
 nec proponitur talis expositio, seu sensus ille Scri-
 pturae, ab universali Ecclesia, hoc ipso quod va-
 rie a variis exponatur. Ubi tamen observandum,
 quod quando sancti Patres explicant, varia loca
 Scripturae, et eandem veritatem alii ex illo sacrae
 Scripturae textu eruunt, alii ex alio; ipsorum con-
 sensum non tantum unanimum esse acceptandum
 Ecclesiae; sed etiam ut fundatum in Scriptura, licet

non ut fundatum in hoc, vel illo particulari loco Scripturae.

Quarto sequitur: *Nullam consequentiam certo licet, et evidenter deductam ex Propositione aliqua Fidei, et alia evidenti lumine naturae, per formam Logices evidentem, sufficientem esse fundato Fidei Catholicae articulo; seu nullam doctrinam, quae constet soluta tali consequentia, esse doctrinam Fidei Catholicae.* Idque ex duplici etiam defectu. Primo, quia non est revelata; *Fides* autem est ex auditu, *auditus per Verbum Dei*: Nec addente. *Et per consequentiam deductam evidenter ex Verbo Dei.* Cumque consequens optineatur virtualiter in praemissis, non erit doctrina nisi virtualiter de Fide, neutiquam formaliter: id est, solum ejus principium erit doctrina Fidei, ex quo humanus intellectus doctrinam aliquam consequentem deducet et formabit, cui assentietur. Certa quidem et evidens erit consequentia, sed huminis multis concurrentibus, forma argumenti, propositione Philosophica saepe mixta: nec tamen conclusio deducitur ex illis, nisi junctis; immo illa non nisi juncta influunt; quare nihil sequitur ex separatis. Causa igitur, qua tota, humana est; quoniam ergo longe abest, ut doctrina elicit sit divina! *Conclusionem* vocamus in Scholis *Theologicam*, si praemissae sint certae: aut *doctrinam aliquam problematicam*, si aliqua sit incerta, quod saepius in subseclis videre est Theologicis: *falsa*, si aliqua propositio, vel argumenti forma falsa sit, quod uero raro contigit, respectu tot placitorum, in quibus Theologi digladiantur. Sed quod notandum diligentissime est: certum est, varias esse sententias tum Doctorum Catholicorum, tum Protestantium: *An quod sic sequitur ex Scriptura sit de Fide?* Catholicorum Doctorum alii asserunt, Vega, Canus; alii negant, etiam referente Daillaeo. Distinguunt alii docentque; Si ex duabus propositionibus Scripturae deducatur consequentia, illam esse de Fide, neutiquam si ex una, et alia evidenti lumine naturae. Alio modo distinguit Vasquez, assensum conclusionis illius, qua deducitur ex praemissis, non esse Fidei, qui tamen medio discursu, velut instrumento, aut potius proponente, splendet doctrina

In Fidei fundata, cap. 13. pag. 68. 1. p. d. 12. a. 3. c. 2.

divina virtualiter contenta in praemissis, esse assensum Fidei. Sic inter nostrates *certum est, problematicum solum esse, an quod sequitur de Fide, sit de Fide*. Consecutiunt ergo omnes, *non esse de Fide Catholica*, id est, non esse talem doctrinam, cui omnes sub poena haereseos teneantur assentiri tanquam de Fide; et si quis contrarium diceret, Novator ipse valde culpandus foret, novum dogma ingerens, et oppositum sentientes damnans in hoc ipso ipsemet temeritatis in re gravissima damnandus, et censura Ecclesiastica percellendus. *Constans itaque est, doctrinam talem neutiquam esse doctrinam Fidei Catholicae*, de qua loquimur. Protestantium pariter, alii negant, quod sequitur per consequentiam evidentem deductam ex Scriptura esse de Fide; Osiander, Kemnitius, et nobiliores Lutherani, etiam referente Vedelio, in suo *Rationali Theologico*. Sed Vedelius affirmat, et quidem pugnacissime: quia totum suum Rationale in eo solo versatur; et post ipsum seu ex ipso Dailaeus: licet alii Reformati cum Lutheranis et Catholicis faciant. Verum nullum hac de re verbum in ipsorum confessione habetur, proinde haec ipsa doctrina censi nequit doctrina partis Calvinisticae. Adde, quod Lutheranos contrarium tenentes in fratres cooptarunt: quomodo ergo doctrinam hanc, ut fundamentalem omnium controversiarum ponunt? Sane fundamento hoc nutante, quam infirma aut nutans debet esse eorum doctrina de controversiis omnibus! Alter defectus est. 2. Quod proposita non sit illa doctrina Ecclesiae universali, uti apud Catholicos constat: quia neque invenitur in Scriptura expressa, neque in Generalibus Conciliis; et ideo Doctores libere diversum tenent: quousque enim veritas non auctoritative proponitur, non est obligatio acceptandi eam velut divina auctoritate revelatam. Nec etiam auctoritas publica, sive Protestantium in communi, sive Reformatorum, illam quaestionem, quam nonnulli volunt fundamentalem, in ulla Confessione, juxta dicta, determinavit. Concludamus ergo, doctrinam talem *non esse doctrinam Fidei Catholicae*.

In Fide fundat. part. 1. pag. 28.

§. 4.

Connexa ex defectu propositionis, et quandoque simul revelationis, secluduntur.

I. Sequitur: *Decretum Gratiani*, seu ejus auctoritatem longe longius abesse, quod possit fundare articulum Fidei: sed nihil esse de Fide, qua continetur in illo decreto. Quod notandum contra calumnias frequentes Molinaei; *Contenta in illo decreto, doctrinam esse Ecclesiae Catholicae*, ingentis; quo materiam nos impugnandi aucupetur. Sed nunquid Religiosus ille tota est Ecclesia universalis? Nec Gregorius XIII, aut alius Papa, multo minus Concilium ullum universale ita Decretum probavit, quasi contenta in illo forent totius Ecclesiae definitiones. Immo non levis in illo lapsus facile deprehendere est in citatione falsa auctorum, etc. Quin ipsemet Gratianus initio Decreti, Dist. 1. cap. 2. producit *Isidorum in libris Etymologiarum*: Tituli ipsi, Dist. 1. cap. 8. 10. habent, *Quid sit Jus Civile, Quid militare, Quid leges Tribunitiae*? Nunquid ista sunt doctrinae Fidei? Glossarum quam multae erant ridiculae? Proinde succisae. Quid ergo Gregorius XIII. jussit, *Jus Canonicum expurgatum*, ut fuit ipsius jussu, non imprimi sic expurgatum, et prout Romae impressum fuit; nec alibi imprimi ad decennium, etc.

II. Sequitur: *Nullae Decretales Romanorum Pontificum contentae in corpore Juris Canonici*, sive in sex libris Decretalium, sive in Clementinis, sive in Extravagantibus, nullae Bullae posteriorum, qui in sede Petri sederunt, sufficientes sunt fundando articulo Fidei Catholicae: seu nulla doctrina est de Fide, quae continetur in istis Decretalibus aut diplomatibus. Probatur, quia Papa quocumque modo loquens, etiam ex Cathedra, non est universalis Ecclesia; ergo quod ab eo proponitur, non proponitur ab Ecclesia universali; ergo non est doctrina Fidei Catholicae. Addo, Conclusionem hanc tam certam esse inter Doctores omnes, ut si quis contrarium doceret; Novator ipse foret, et Censura percellendus, quippe novi dogmatis inventor. Patet ex ipso

Bellarmino, qui lib. 4. de Pontifice Rom. cap. 2. ubi tres inter Catholicos opiniones refert. « 1. Opinio est, inquit, Pontificem etiam ut Pontificem » posse esse haereticum, et docere haeresim, si » absque generali Concilio definiat, et de facto aliquando accidisse. Hanc opinionem secuti sunt » aliquot Parisienses, ut Gerson et Almain in libris » de Potest. Eccl. necnon Alphonsus de Castro, » lib. 1. cap. 2. contra haeresees, et Adrianus VI. » Papa in quaestione de Confirmatione; qui omnes » non in Pontifice, sed in Ecclesia, sive in Concilio Generali tantum, constituent infallibilitatem » iudicii in rebus Fidei. 2. Opinio est in alio extremo; Pontificem non posse ullo modo esse haereticum, nec docere publice haeresim, etiamsi » solus rem aliquam definiat. Ita Pighius, lib. 4. » Hierar. cap. 8. 3. Opinio est quodammodo in medio; Pontificem, sive haereticus esse possit » sive non, non posse ullo modo definire aliquid » haereticum a tota Ecclesia credendum. Haec est » communissima opinio fere omnium Catholicorum, » B. Thomae, Cajetani, etc. 1. Opinio non est » proprie haeretica (nam adhuc videmus ab Ecclesia tolerari, qui illam sententiam sequuntur) » tamen videtur omnino erronea et haeresi proxima. » 2. Probabilis est, non tamen certa. 3. Certissima » est, et asserenda. » Haec Bellarminus, quem fuisse sic citavimus, quo calumnias elueremus, quae nonnulli viri traducuntur, quod dicant: *quae definita forent a Pontifice, etiam ex cathedra, extra Concilium generale, non esse Fidei Catholicae.* Et iterum illud ita asseritur, ut statuatur illud esse certum ex omnium Doctorum, Bellarmini etiam, et aliorum sententia. Constat enim ex Bellarmino, primam opinionem non esse haeticam. Non assentimur Bellarmino dicenti; *videri erroneam, et haeresi proximam*; quamquam hoc ipsum non nisi mutans dicit termino illo *videtur*. Non enim omnibus id videtur; quibus Gersonem, Almainum, et Adrianum erroneae, et haeresi proxime opinionis insimulare temerarium potius videtur. Sed ex Bellarmino ipsomet constat, non esse definitum ab Ecclesia, Pontificem esse infallibilem, extra Concilium uni-

versale, et quae proponeret credenda, fore Fidei Catholicae. Consentiant itaque ex ipsomet Bellarmino Doctores omnes, *doctrinam illam non esse Fidei Catholicae*; quod solum dixi, et certissimum est: quod non advertunt praecipiti iudicio calumniatores. Quam ex iis tribus primis opinionibus sequeremur, extra rem nostram fuisset, et foret pronunciare (libenter tamen tertiae adhaeremus, sed absque censura primae), qui devios ad Fidem Catholicam, semota omni alia doctrina, reducere contendimus. Non itaque dicimus, *hic definita non esse de Fide*, quod putant adversi, sed solum dicimus, et repetimus, *non esse de Fide Catholica*, seu non esse doctrinam; quam omnes, quo sint Catholici, tenere debeant, *tanquam de Fide, cuiusque contrarium sit haereticum*, et removens a gremio Ecclesiae. Omnes nihilominus concedunt, gravis esse auctoritatis, quod a Pontifice tantae Sedis docetur, etiam cum solo concilio privato, et privatim solum rescribente aliquot Episcopis; gravioris; quod cum concilio Provinciali: gravissimae, quod ex cathedra, toti Ecclesiae illud proponendo, sive cum concilio privato, sive in concilio Provinciali, temerariumque est, a sic pronunciatis discedere. Maturius ergo procedant hi censores; quorum censura censuram meretur, quippe inductiva novi dogmatis, tanquam Fide Catholica credendi, quod nemo hucusque statuit, scilicet, *quod a Pontifice foret; etiam ex cathedra definitum, extra Concilium universale esse de Fide Catholica*, seu tale definitum esse Fide Catholica, et sub peccato haereseos ab omnibus credendum. Hallucinati sunt, et caecutiendo in errorem prolapsi; quamquam non tam error quam hallucinatio vocanda sit praiceps haec censura: putarunt multos dixisse, quod nec somniarunt.

Sed ad rem, seu ad *Decretales Juris Canonici*, propius. Sane nec ipse Bellarminus, et erroris aliquot Decretales arguere veretur. Nam in lib. 4. de Pontifice Rom. cap. 12. cum retulisset *Magdeburgenses, Cent. 8. cap. 10. in vita Gregorii III.* cum accusantes: « Quod in Epistola ad Bonifacium, » permiserit viro ducere aliam uxorem, si propter » morbum aliquem uxor ei debitum conjugale red-

» dere non valeat, quod est expresse contra Evan-
 » gelium, ut etiam annotavit Gratianus 32. q. 7.
 » canone, *quod proposuisti*, respondet; posset e-
 » tiam dici, Pontificem ex ignorantia lapsum esse:
 » quod posse Pontificibus accidere, non negamus,
 » cum non definiunt aliquid tanquam de Fide, sed
 » solum opinionem suam aliis declarant, ut hoc
 » loco videtur Gregorius fecisse. » Quae solutio ap-
 » plicata variis decretalibus, longe illas a vj fundan-
 » di articulum Fidei abducit, scilicet respondendo
 » passim, si premamur talibus, *Pontificem non de-
 » finivisse illa tanquam de Fide, sed solum opinio-
 » nem suam aliis declarasse*, quod sine dubio insuf-
 »iciens est fundandae doctrinae Fidei, multo minus
 » fundandae Fidei Catholicae. Placet adhuc propius
 » Decretales illas evolvere. Maxima earum pars ver-
 » satur in regulandis Officialis seu Judicis in Episco-
 » pali Tribunali sedentis judiciis: varia in collatione
 » Beneficiorum observanda praescribunt, ex quibus
 » Officiales debent lites terminare. Quid haec ad ar-
 » ticulos Fidei? Non sunt haec materia propria Fi-
 » dei. Pleraque etiam, et fere omnes, responsa sunt
 » particularibus data, non toti Ecclesiae, in quibus
 » responsionibus particularibus concedunt omnes, Pa-
 » pam posse errare, nec talia responsa fundandae do-
 » ctrinae Fidei, multo minus Catholicae esse suffi-
 » cientia. Sed ut tot responsa decretalium seu Ponti-
 » ficum Romanorum lites multiplicent, ita responsum
 » nostrum generale multiplices sopit controversias,
 » quas agglomerant Adversarii modo ex Gratiano,
 » et modo ex Decretalibus, Bullisque Pontificum,
 » seu Jure Canonico, varias consarcinando, et saepe
 » easdem falso glossantes; quae obtrudunt nobis tan-
 » quam doctrinam nostrae Fidei Catholicae, et im-
 » pugnant; compingunt inde libros suos: Nostrates
 » etiam saepe suos his defendendis. Compendiosior via,
 » et regia, reducere ad castra Catholica devii est,
 » propalam inelamare, *nihil horum esse de fide Ca-
 » tholica*; proinde nihil horum esse in professione
 » Fidei nostrae, quam subscribendam solum reducen-
 » dis devii proponimus.

III. Sequitur: *Non est de Fide Catholica, quod
 definitum foret in ullo Concilio Provinciali, etiam*

Papa ei praesidente per se, vel per legatos. Ratio est; quia tale Concilium non est Ecclesia universalis, quare quod ab eo proponitur ab Ecclesia universalis; non est ergo de *Fide Catholica*: nisi aliunde sensus totius Ecclesiae constaret, sicut constat de multis pronunciatis contra Pelagium et alios in Conciliis Regionariis, ut vocat Augustinus, v. q. in Concilio Milevitano Numidiae sub Innocentio Papa, tomo 1. Concil. pag. 630. 753: etc. 2. Probatur ex illo Bellarmini jam relato, referente tres opiniones inter Catholicos, quarum 1. est: « Pontificem, inquit, etiam ut Pontificem posse esse haereticum, et docere haeresim, si absque Concilio Generali definiat, et de facto aliquando accidisse. Hanc opinionem secuti sunt aliquot Parisienses, ut Gerson, Almain, necnon Castro et Adrianus, qui omnes non in Pontifice, sed in Ecclesia, sive in Concilio Generali tantum constituant infallibilitatem iudicii de rebus Fidei. » Vide jam supra dicta. Magna tamen veneratione suscipienda sunt, quae a tantae auctoritatis Decretis seu Romani Pontificis, seu talium Conciliorum, manant. Item ea quae miraculis, aut praedictis revelationibus, fidis tamen, nituntur seu confirmantur.

IV. *Non omnes praxes Ecclesiae, etiam universales, sunt sufficientes fundando articulo Fidei Catholicae.* Probatur ex defectu 2. conditionis: quia praxes hae non sunt propositiones faciae ab Ecclesia veritatis alicujus credendae, sed rei faciendae: Regula autem praxeos bonae, potest esse opinio probabilis, et non indubitata; unde fit etiam, ut praxes has posset mutare Ecclesia. quippe quae regulari possunt ex opinione probabili, quam sequi, vel contrariam etiam probabilem, licitum est. 2. Probatur ex Vasquez, 3. part. disp. 227. cap. 3. ubi cum docuisset et probasset: « Sacramentum Musae suapte natura, institutione divina seu Christi, pro non baptizatis offerri non posse, nec unquam potuisse, sive illi Catechumeni sint, sive omnino infideles, pagani, aut Judaei, tametsi publicae orationes pro eis fieri possint, prout Ecclesia permiserit, objeceritque

» sibi, aliquando id factum in Ecclesia, sacrificium
 » pro ipsis Catechumenis offerri consuevisse » probassetque ex libro qui dicitur, Ordo Romanus, c.
 20. post primum suam responsionem objectioni ad-
 dit: « Caeterum respondere quis posset. Quod at-
 » tinet ad essentiali et substantiam Sacramentorum,
 » Ecclesiam semper eam doctrinam dictis et factis
 » probasse, quæ certa et indubitata est: at vero
 » quod attinet ad alia accidentaria, non omnino
 » indubitata sed probabilem opinionem aliquando
 » in praxi secutam, aliquid fecisse, tametsi non
 » tanquam certum dogma Fidei declaraverit; et
 » hæc de causa tunc ex præscripto Romani Ponti-
 » ficis, Missam pro Catechumenis obtulisse, nunc
 » autem eam non offerre; cum neque publica ora-
 » tio ulla pro illis permanserit, nisi in die Para-
 » sceves, quando nullum in Ecclesia sacrificium
 » offertur. Et paulo post: Quid igitur mirum si
 » antiquitus Ecclesia secuta probabilem opinionem
 » de oblatione hujus sacrificii pro Catechumenis,
 » pro illis Missam celebraverit, nunc autem nul-
 » lam offerre? Adde his: Decreta Conciliorum,
 » ipse beatus Bellarm. lib. 2. de Conciliis, cap.
 » 17. non indigent approbatione populi, cum ab
 » eo non accipiant auctoritatem, Decreta vero de
 » moribus si non recipiantur, et Pontifex conni-
 » veat, tandem consuetudine abrogantur, quia De-
 » creta morum mutabilia sunt, et cum Pontifex
 » videt longo tempore ea non servari, et tacet,
 » censetur ipse abrogare. At Decreta de Fide im-
 » mutabilia sunt, nec possunt ullo modo abrogari,
 » posteaquam semel statuta sunt. Verissimum qui-
 » dem est illud Augustini Ep. 118. Si quod tota
 » per orbem frequentat Ecclesia, hinc quin ita fa-
 » ciendum sit disputare, insolentissimæ insaniae
 » est: » Sed non inde sequitur, Ecclesiam per ta-
 » lem praxim proponere tanquam credendum de Fide
 » Catholica aliquod dogma: sufficit praxim esse bo-
 » nam, cui bonitati satis est, quod fundetur in opi-
 » nione probabili; hinc, ut jam notatum, tot praxes
 » suas etiam universales Ecclesia mutare potest, Pra-
 » xes enim sunt variabiles, utpote præcepta, nullo

autem modo dogmata Fidei variari possunt, quippe veritas invariabilis est.

V. « Ea, inquit bene Vasquez, 1. 2. disput. 200. cap. 6. quae tradit Concilium in capitibus, esse » Fidem Catholicam necessario credendam, colligitur ex fine cujusque sessionis, antequam Canones ponantur. Et 3. part. disput. 207. cap. 3. Quidquid in capitibus traditur ante Canones a Concilio pertinens ad doctrinam, est Catholica fides; constat ex Trid. Sess. 13. cap. 8. in fine, immediate post capita, et ante Canones, ubi dicitur: Quoniam autem non est satis veritatem dicere, nisi detegantur et refellantur errores, placuit sanctae Synodo hos Canones subjungere, ut omnes jam agnita Catholica doctrina (nempe illuc usque tradita) intelligant quoque, quae ab illis haereses caveri vitarique debeant. Et Sess. sexta similiter post capita et ante Canones: Post hanc Catholicam de justificatione doctrinam, placuit sanctae Synodo hos Canones subjungere, ut omnes sciant, non solum quid tenere et sequi, sed etiam quid vitare et fugere debeant. » Ratio hujus rei est, quia tam in capitibus, quam in canonibus, propositiones Ecclesiae, quid credendum, quid damnandum, continetur. Addit ibidem Vasquez: « Quamvis interdum Ecclesia prohibere soleat » disputationem de aliqua re, quam nondum tantumquam dogma Fidei definivit, ut quod quis damnet, aut aliquo modo notet propositionem aliquam, vel e contrario dicat esse probabilem, tamen nunquam hactenus damnavit sub excommunicationis poena eos, qui aliquid pertinaciter et absolute asseruerint, nisi eo id damnet tanquam errorem contra Fidem, et oppositum, ut Catholicam Fidem definiat, ita ut haeticus sit, qui talem errorem pertinaciter asseruerit; pertinaciter autem illud asserere, nihil aliud est, quam post praedictam definitionem id scienter affirmare. Addendum tamen ex eodem, eadem 3. parte, disput. 181. cap. 9. Aliquando Ecclesia suam definitionem confirmat testimoniis, ex quibus aliqua non efficaciter eam probant. » Subjungit nihilominus; et bene: « Tamen quando Patres in Concilio di-

» eunt, ex hoc aut illo loco, habere aut illam ve-
 » ritatem Ecclesiam collegisse et colligere, quis,
 » obsecro, fundamentum illud infirmum et incoer-
 » tum esse dicere audeat? » Ita Vasquez. Unde
 generaliter dicimus, eorum quae continentur in ca-
 pitibus, id solum et totum esse de Fide, quod de-
 finitur, seu (ut loquuntur Juristae) solum dispositi-
 vum arresti seu contenti in capite aut canone est
 de fide, motivum vero arresti, seu ejus probationes,
 non sunt de Fide. Ratio est, quia primum solum
 proponitur credendum, et proprie definitur, non
 autem motivum seu probatio. Hinc plurima conti-
 nentur in Conciliis etiam universalibus, quae non
 sunt de Fide, scilicet, quod in eo est obiter di-
 ctum, multo minus, quod in Sessionibus a variis
 Praelatis dum sententias dicunt, prolatur; multo
 adhuc minus quae a Doctoribus in discussionem rei
 definiendae praemittuntur, aut allegantur. Ratio ge-
 neralis est, quia nihil eorum definitur ab Ecclesia.

VI. Quod proximum huic est, ut sit aliquid de
 Fide, oportet ex Bellar. lib. 2. de Cono. cap. 17.
 adducere: « Concilium rem eam definitivè proprie,
 » ut decretum Fide Catholica tenendum. *Hinc ad-
 » dit:* Non sunt proprie haeretici qui sentiunt Pon-
 » tificem non esse supra omnia Concilia, *licet*
 » *dicat*, Lateranense ultimum Concilium sub Leone
 » X. diserte et ex professo docuit, Pontificem esse
 » supra omnia Concilia, et reprobavit contrarium
 » Decretum editum in Concilio Basiliensi; Quod,
 » *inquit ille*, Concilium Lateranense rem istam non
 » definiverit proprie, ut Decretum Fide Catholica
 » tenendum, dubium est, et ideo non sunt proprie
 » haeretici, qui contrarium sentiunt. » 2. Requirit
 idem Bellarminus cap. 11. esse definitum « conci-
 » liariter, Martinus V. *inquit*, dixit se confirmare
 » tantum ea decreta de Fide, quae facta erant in
 » Concilio Constantiensi conciliariter, id est, more
 » aliorum Conciliorum, re diligenter examinata.
 » Constat autem hoc Decretum » (scilicet Constau-
 tiense, Sess. 4. Concilium Generale habere a Chri-
 sto immediatam auctoritatem, cui omnes obedire
 tenentur, etiam si Papalis dignitatis existat). » sine
 » ullo examine factum a Concilio Constantiensi. Ita:

» que Martinus cum confirmavit Decreta de Fide
» conciliariter conclusa, intelligebat tantum de dam-
» natione haeresum Wicleffi et Huss. »

VII. Idem Bellarminus, tomo 1. lib. 1. de Clericis, cap. 28. cum objecisset sibi, *caput* quamquam, de censib. in 6. « Ubi Bonifacius Papa » VIII. dicit, jure humano et divino liberos esse » Clericos ab exactionibus, *Respondet*, dicendum » fuisse Bonifacium in sententia Canonistarum, et » sententiam illam suam aperuisse, non autem ali- » quid definivisse. Nam non loquitur per modum » definientis rem controversam, sed simpliciter et » obiter id asserit; ait enim; » Cum jure divino sint immunes Clerici, etc. Idem dicere possumus de iis omnibus, quae Concilia etiam universalia dicunt *obiter*, et non per modum definientis.

VIII. Objectum debet esse definibile de Fide v. g. Bellarminus idem, lib. 4. de Rom. Pontifice, cap. 41. concedit errasse *Joannem XXII. in extravaganti, ad conditorem de verbor. significat.* cum docuit, non posse *separari usum a dominio in rebus usu consumptibilibus; sed non in re Fidei*, inquit: haec enim quaestio ad fidem non pertinet. Similiter itaque doctrinae, legum aut Philosophiae studia spectantes, non sunt definibiles de Fide.

IX. Debet esse Decretum universale, propositum toti Ecclesiae. Dicimus, ait Bellarminus, eodem lib. 4. cap. 5. « non posse errare Pontificem (seu » Concilium generale) in iis praeceptis, quae toti » Ecclesiae praescribuntur. Quia in praeceptis, et » judiciis particularibus, non est absurdum, Pon- » tificem (aut Concilium generale) errare. » Et cap. 14. cum sibi objecisset, « Innocentium VIII. » Norvegis permisisse, ut sine vino sacrificium ce- » lebrarent; *solvit sic*, sed facile responderi potest; » nam non condidit ipse Decretum, quo universae » Ecclesiae declaravit licere, siue viuo sacrificium » offerre. » Itaque si erravit, erravit facto, non dogmate. Idem est de Concilio generalibus.

X. Bellarminus idem cap. 12. cum sibi objecisset « Stephauum Papam ordiuatos a *praedecessore* » suo Formoso, jussisse iterum ordinari, promitte » sensisse Sacramentum pendere a virtute ministri, *Teol. Dogm. Pars IV.*

» qui est error in Fide manifestus, *Solvit sic*: Re-
 » spondeo errasse Stephanum, sed in quaestione
 » facti, non juris, et malo exemplo, non falsa
 » doctrina. *Et paulo post*: Respondeo Stephanum
 » non edidisse aliquod decretum, quo decerneret
 » ordinatos ab Episcopo degradato, vel nominatim
 » a Formoso, tanquam degradato esse iterum or-
 » dinandos; sed solum de facto jussisse iterum eos
 » ordinari. Quae jussio non ex ignorantia aut hae-
 » resi, sed ex odio in Formosum procedebat. »
 Idem potest dici de Conciliis, si casus similis con-
 tingeret.

XI. Ex eodem ibidem cap. 5. « Non est erro-
 » neum dicere Pontificem (seu Concilium Generale)
 » posse errare in legibus, quae non versantur in
 » rebus necessariis ad salutem, vel per se bonis
 » aut malis; univium superfluum legem condendo,
 » vel minus discretam, etc. Atque ut rem totam
 » exemplis declaremus, non potest fieri ut Ponti-
 » fex (seu potius Concilium Generale) erret, prae-
 » cipiendo aliquod vitium, ut usuram, vel prohi-
 » bendo virtutem, ut restitutionem, quia haec sunt
 » per se bona vel mala; nec potest fieri ut erret
 » praecipiendo aliquid contra salutem, ut circum-
 » cisionem vel Sabbatum; vel prohibendo aliquid
 » necessarium ad salutem, ut Baptismum et Eu-
 » charistiam, licet haec non sint per se bona aut
 » mala. Ut autem jubeat aliquid, quod non est bo-
 » num utque malum ex se, neque contra salutem,
 » sed tamen est inutile, vel sub poena nimis gravi
 » illud praecipiat, non est absurdum dicere, posse
 » fieri: quamquam non est subditorum de hac re
 » dubitare, sed simpliciter obedire. »

XII. Ex eodem cap. 2. « Conveniunt omnes Ca-
 » tholici posse Pontificem etiam ut Pontificem, et
 » cum suo coetu Consiliariorum, vel cum generali
 » Concilio, errare in controversiis facti particulari-
 » bus, quae ex informatione, testimoniisque homi-
 » num praecipue peudent: » Juxta quod, cap. 11.
 cum objecisset sibi vulgare illud *de Honorio* Papa
 relato inter haereticos » VI. Synodo generali, re-
 spondissetque, *corruptam fuisse VI. Synodum*, ad-
 dit: « Quod si aliquis non possit adduci, ut credat

» corruptam esse VI. Synodum, is accipiat alteram solutionem, quae est Joannis à Turrecrem. lib. 2. de Eccl. cap. 93. qui docet, Patres VI. Synodi damuasse quidem Honorium, sed ex falsa informatione, ac proinde in eo judicio errasse. Quamvis enim generale Concilium legitimum non possit errare, ut neque erravit hoc VI. in dogmatibus Fidei definiendis, tamen errare potest in quaestionibus de facto. Itaque tuto dicere possumus, hos Patres deceptos ex falsis rumoribus, et non intellectis Honorii epistolis, immerito cum haereticis connumerasse Honorium. » Idem ibidem Bellarminus addit. « Patres VII. Synodi secutos esse Synodum VI. et solum repetivisse quod in ea legerant, proinde deceptos fuisse ex VI. Synodo, quae vel corrupta erat, vel per errorem Honorium damnaverat. *Idem addit de Adriano Papa*: Si dicamus acta VI. Synodi esse corrupta, respondendum est, Adrianum deceptum fuisse ex depravatis illis actis VI. Synodi. »

XIII. Addamus et istud ex Suario, Tom. 4. disput. 56 de Indulgentiis, sect. 3. « Quamvis Pontifex expresse declaret in Indulgentiarum dispensatione se moveri propter talem causam, quam reputat sufficientem ad tantam Indulgentiam concedendam, non esset infallibile, vel causam esse talem, vel (quod consequens est) totam Indulgentiam esse validam. Quia talis declaratio Pontificis non est de doctrina ad fidem pertinente, sed de quodam facto particulari, quod ad prudentiam spectat, in qua Pontifex non habet infallibilem assistentiam Spiritus Sancti, sed in his tantum, quae ad doctrinam Fidei, et morum spectant, juxta illud Luc. 22. 32. » *Ego rogavi pro te, Petre, ut non deficiat fides tua (ut nec in dispensatione voti simili voto) quamvis Pontifex existimet aut declaret talem causam subesse, nihilominus decipi potest; quia quoad hoc prudentia et existimatione humana gubernatur; possetque etiam humano affectu moveri.* » Quae ratio probat idem pariter in Concilio generali dicendum esse. Optima sane est haec Suarii regula. Ex qua etiam longe longius abest esse de Fide, hanc

vel illam excommunicationem esse valldam. Addit tamen ibidem Suarez et bene ; « Nunquam tamen » existimo expedire , immo nec posse absque scan- » dalo et imprudentia fieri , ut aliqua Indulgentia » particularis , quam constat esse a Pontifice con- » cessam , publice denunciatur esse nulla aut super- » sua : quia id moraliter loquendo est inutile , et » contra reverentiam Pontifici debitam , etc. » Si- » militer obediendum legibus et praeceptis , etiam sub excommunicatione latis , et qui non obediret , pec- » caret et incurreret excommunicationem , licet io iis ferendis possit errare Pontifex eo modo quo diximus , nec sit proinde de Fide , non errare ; quia alia est regula Fidei , quae *infallibilis* debet esse , et est ; alia regula Legum , ad quas ferendas ut obligent , haec *infallibilitas* non requiritur : sola sufficit au- » thoritas in praecipiente rem quam iudicat esse bonam , etc. Immo probabile ad hoc iudicium sufficit ; juxta ea quae sunt relata ex Vasquez : et generaliter de- » ferendum esse plurimum in omnibus , superiorum tum iudicio , tum voluntati , cuius cordato et pru- » denti constat ratione ipsa naturali hoc dictante , cum primis vero ipsa Scriptura Sacra , Matth. 18. 17. Hebr. 13. 17. etc. Atamen , cum instituti no- » stri sit solum devios a Fide Catholica ad illam re- » ducere , haud nobis est in his enucleandis immo- » randum. Solam secretioem doctrinae Fidei a qua- » vis alia instituimus faciendam.

C A P U T. II.

*Secretio doctrinae Fidei a quavis alia in parti-
cularibus materiis controversis.*

Ex Regulae generales secretionis exactae faciendae doctrinae Fidei Catholicae a Theologia Scholastica et quavis alia doctrina. Jam ex ea secernamus in singulis materiis , *quid sit de Fide* , praesertim *Catholica* ; et quid non sit tali Fide credendum. Quidquid sit , cui sit in singulis materiis inter opi- » niones Scholasticas potius assentiendum , quid etiam certo moraliter tenendum , utpote non utcumque

probabile, sed tanquam ex communi doctrina ratum, aut cui tanquam conclusioni Theologicae sit inhaerendum; nihil enim horum moramur, qui solummodo devium a Fide Catholica ad illam reducere conamur; reliquis omissis, quae miscenda non sunt, ne difficiliorem devio reddamus reditum, tacere de his praestat. Quin et si devius petat de talibus, quod frequenter faciunt, sensum nostrum, satius est illis respondere; Ecclesiam nihil in his quae petit respondisse: magistram illam nos sequi, non praere: nihil horum contineri in Professione Fidei Catholicae, cujus solius assensum et subscriptionem ab eo requirimus; quo illum in Ecclesiae Catholicae membrum cooptemus: Paulum monere, *non plus sapere, quam oportet sapere, sed sapere ad sobrietatem.* Rom. 12. 3. Postquam fuerit cooptatus in Ecclesiam, nos ei, si curiosus Scholasticorum fuerit, sensa varia pansuros: si nolit, nihil horum unquam dicturos, sine quibus et sanctus, et salvus esse potest: interim his non implicet animum, ne multitudine, aut varietate, aut subtilitate implicetur, obruatur: relinquat haec Theologorum subselliis, in quibus aliquot annos sedere, opus est doctrinis his extra fidem enodandis. Ergo ad singula descendamus *ad amussim et regulam praeceptam Fidei expendenda et secernenda.* Deductio haec clara et evidens sufficeret cuilibet materiae applicata: fulcimus tamen applicationem hanc, vel singula de quibus pronuntiabimus, *non esse de Fide*, Doctorum aliquot auctoritate, ne temerarii alicui, qui quae non novit, facile damnat, saltem in aliquibus materiis videamur, aut ne quis carpat, vel aliis insusurret, aut palam blateret.

§. I.

De meritis gratiae et gloriae.

De meritis Concilium Tridentinum habet, sess. 6. can. 32. (» Si quis dixerit hominis justificati bona opera, ita esse dona Dei, ut non sint bona ipsius justificati merita, aut ipsum justificatum bonis operibus, quae ab eo per Dei gratiam, et, Jesu

CHRISTI meritum, cuius vivum membrum est, sunt, non vere mereri augmentum gratiae, vitam aeternam, et ipse vitae aeternae, si tamen in gratia decesserit, consecutionem atque etiam gloriae augmentum, anathema sit. ») *Et can. 26.* (» Si quis dixerit, justos non debere bonis operibus, quae in Deo fuerint facta expectare et sperare aeternam retributionem a Deo per ejus misericordiam, et JESU CHRISTI meritum, si bene agendo, et divina mandata custodiendo usque ad finem perseveraverint, anathema sit. ») En quid cavendum sub poena anathematis, tanquam haereticum. Sed et en, quid ex regula nostra Fide Catholica sit credendum de meritis, scilicet, quia est propositum a Concilio universali omnibus credendum.

Ex qua a contrario sequitur, non esse de Fide Catholica, nec dari meritum de congruo. 2. nec dari de condigno. 3. nec merita esse ex justitia, potius quam ex fidelitate. 4. multo minus dari ex justitiae rigore. Probatur, quia nihil horum est in Concilio Tridentino, nec in ullo Concilio generali propositum. Probatur 2. quia non omnes Doctores hoc tenent, referente ipsomet Bellarmino: (» Quale sit meritum, tres sunt quaestiones, inquit ille. Tom. 3. cont. lib. 5. de Justificat. cap. 16.) ». Una, sitne meritum justorum dicendum ex condigno, an ex congruo. Altera, sitne condignum ratione promissionis tantum, an etiam ratione operis. 3. Num Deus remuneret opera justorum supra condignum, et impiorum citra condignum. Quod attinet ad primam quaestionem, Catholici omnes agnoscunt opera bona justorum esse meritoria vitae aeternae; sed tamen aliqui censent, non esse utendum his verbis, *de condigno et congruo*, sed absolute dicendum, opera bona justorum esse meritoria vitae aeternae ex gratia Dei. Ita docet Thomas Waldensis, etc. Alii volunt opera bona justorum esse de condigno largo modo, ita ut hoc condignum respectu condigni proprie sumpti, possit dici congruum. Ita docent Durandus et Gregorius, etc. Communis autem sententia Theologorum admittit simpliciter meritum de condigno. Durandi sententia, si nihil aliud vellet, nisi merita nostra non esse ex condigno,

sive ex iustitia absolute, sed tantum ex hypothesi, id est, posita liberali Dei promissione, non esset reprobanda. Caeterum videtur omnino velle, merita nostra ex gratia Dei procedentia, et posita promissione, adhuc non esse talia; ut ex iustitia debeantur meriti, sed ex sola Dei liberalitate. *Et cap. 17.* Altera quaestio sequitur; Utrum opera bona sint meritoria ex condigno, ratione pacti tantum, an ratione operis tantum, an ratione utriusque. Non desunt qui censeant, opera bona esse meritoria vitae aeternae ex condigno ratione operis, etiamsi nulla extaret divina conventio. Ita docent Cajetanus, Soto, etc. Alii contra existimant, bona opera ex gratia procedentia non esse meritoria ex condigno ratione operis, sed tantum ratione pacti et acceptationis divinae. Ita docet Scotus et alii, etc. Distat autem haec opinio longissime ab haeresi Lutherianorum; non enim Scotus censet, opera bona non esse vere bona, sed peccata, si ad legem divinam examinentur, ut Lutherani censent. Sed existimat, opera iustorum esse bona vere et proprie, sed non tam excellentia, ut proportionem habeant cum vita aeterna, et ideo acceptari quidem a Deo ad justam et dictam mercedem vitae aeternae, sed ex pacto et promissione, non ex operis dignitate. Nobis media sententia probabilior esse videtur, quae docet, opera bona iustorum meritoria esse vitae aeternae, ex condigno ratione pacti et operis simul; non quidem quod sine pacto vel acceptatione non habeat opus bonum proportionem ad vitam aeternam, sed quia non tenetur Deus acceptare ad illam mercedem opus bonum, quamvis par et aequale mercedi, nisi conventio intercedat, etc. *Et cap. 19.* Postrema restat quaestio. Num Deus bona opera remuneret, ex mera liberalitate supra condignum. Communis enim Theologorum sententia id constanter affirmat, etc. Contrarium docuit Vega. Probatum breviter, Deum remunerare ultra vel supra condignum, etc. Utrum autem operibus malis Deus poenam reddat citra condignum non videtur ita esse certum, etc. *Haec Bellarm. et Vasquez 1. 2. disp. 213. cap. 3.* Tametsi scholastici omnes et Ca-

tholici scribentes contra haereticos hujus temporis, aperte pronuocient, operibus justorum inesse rationem meriti vitae aeternae; nihilominus cum agitur de ratione meriti simpliciter aut meriti condigni vitae aeternae, variant inter se. Et sane B. Thom. *art. 1. quæst. 114.* affirmat nostri apud Deum non esse meritum simpliciter. Ratio vero illius est, quia ubi non est simpliciter justitia, neque simpliciter aequalitas, non potest esse meritum simpliciter; nostri autem ad Deum non est justitia, neque aequalitas simpliciter; ergo neque nostri apud Deum erit meritum simpliciter. In eadem sententia videtur esse Durandus, ubi docet, nostris operibus in gratia factis non inesse rationem meriti simpliciter et proprie. Addit praeterea Durandus, merita nostra apud Deum non esse condigna mercede gloriae, sed ea dumtaxat ratione dici meritoria, quia Deus lege et ordinatione sua postulat opera nostra, ut ipsam gloriam tribuat. Affirmat, id quod redditur ex promissione, non reddi meritis condignis, inter gloriam et opera meritoria justorum non esse aequalitatem condignitatis, adhuc instar illius, quae est inter semen et fructum ejus. Quocirca concludit, merita justorum comparatione vitae aeternae, solum esse merita congrua, tametsi dicat meritum, quod justis habent vitae aeternae, medium esse inter meritum congruum existentis in peccato, et meritum simpliciter condignum, quod est ex justitia, et ita partim dici posse meritum congruum, partim meritum condignum. *Et disp. 214. etiam in titulis capitulum sic habet:* Opera justorum ex se sine pacto et acceptione Dei, condigna non esse vitae aeternae, non pauci Catholici docuerunt: *cap. 1.* opera justorum aliquam ex se dignitatem, magnam autem ex meritis et gratia Christi habere, alii etiam Catholici existimant: *cap. 2.* Opera justorum ex se habere totam dignitatem, rationem tamen meriti in ipsis ex promissione compleri, recentiores alii Theologi autumant, „ (*Et disp. 215.* quid ipse sentit promens), „ Nos, inquit, qui diximus, inter Deum et nos non posse esse justitiam proprie, sed communij quadam ratione, non nos tribuimus Deo obligationem dandi gloriam in remunerationem bo-

norum operum ex iustitia accepti, quasi ipse compensare debeat ex iustitia bona opera quae a nobis accepit; sed dicimus ex solo promissionis verbo, ac proinde ex sola fidelitate debere dare vitam aeternam in remunerationem operum; quare si eam non daret (quod fieri nequit) esset quidem infidelis, quia non servaret veritatem propositionis; non tamen injustus proprie, quia non faceret contra iustitiam proprie, diceretur nihilominus injustus, quatenus fidelitas est iustitia quaedam, nempe pars potestativa iustitiae, et ita infidelitas haec, communicatione iniustitia dici potest. « Haec Vasquez. Nihil ergo supra dictorum, de Fide, sed Scholastica sunt varia placita, et opiniones diversae, cum Doctorum Catholicorum in hac re nutent sensus.

Facile doctrinae Fidei de meritis suscribent Adversi, si haec a Fide semoveamus. Subscripsit Mestrezatius, tract. *de gratia, contra praetensa merita*, p. 25. (,, Agnoscimus, inquit, bona opera esso Deo grata, eaque obtinere vitam aeternam, et solum volumus, quod eam obtinent ex benignitate, gratia, bonitate, et misericordia Dei; et sic nomen meriti et merendi, sensu quem ex latina habet.,) En ergo Mestrezatius Catholicus in doctrina *Fidei de meritis*.

II. Sequitur nec esse de Fide, *omnia bona opera iustorum esse aeternae vitae meritoria; seu quae-
nam in specie opera mereantur gloriam, an opera
temperantiae, spei, fidei, et alia praeter charita-
tem*. Quia Tridentinum non proponit talia opera in specie mereri, ut patet. 2. Probatur, quia in hoc ipso Doctores variant, referentibus iisdem Bellarmino, et aliis. Vasquez, loco citato, *disp. 217. cap. 1.* (,, Inter Scholasticos, inquit, in controversia positum est, utrum sola charitate, et bonis operibus a charitate imperatis, an quocumque opere bono, etiamsi a charitate non imperetur, iusti mereantur aeternam vitam. Prior sententia est, quid per sola bona opera, quae procedunt ex imperio charitatis mereatur homo iustus aeternam vitam. Quam sententiam tradiderunt Scotus, Gabriel, Durandus, etc.) (*Bellarminus ipse hanc sententiam sequitur, lib. 5. de justif. cap. 15.*) (,, mihi vero, inquit *cap. 2.*, semper visum est, quodlibet

opus hominis iusti bonum, et secundum virtutem moralem, meritorium esse vitae aeternae. Hanc sententiam tradit Bonaventura, Capreolus, Sotus. ,,)

Quam longe ergo absumus a Deviorum communi calumnia, Catholicos ponere perfectionem in jejuniis, coelibatu, votis Monasticis, etc. non in charitate; cum nec de Fide sit, prima opera esse meritoria vitae aeternae, nisi a charitate imperentur et quam facile, Scholasticis istis semotis, Fidei nostrae doctrinae subscribent? Mestrezatius ostendit meritum vitae aeternae agnoscere in operibus lib. de grat. ac toto illo libro agnoscit id in omnibus operibus bonis, nullaque eorum distinctione. Credit ergo plus quam oportet credere, quo sit Catholicus.

III. Sequitur, *non esse de Fide, justum posse mereri pro aliis quocumque merito, ne quidem de congruo, nec conversionem peccatoris, nec aliam gratiam.* Probatur 1. quia Tridentinum *meriti pro aliis* non meminit, nec proinde proponit credendum. 2. Quia variant in hac re Doctorum opiniones Catholicorum. Certum quidem istud est: (,, Gratia adoptionis, inquit bene Vasquez, 3. parte, disp. 4. cap. 5., quae nunc communicatur purae creaturae suapte natura solum est principium merendi condigne vitam aeternam, et incrementum sui ipsius habenti illam, nec est principium condigne mereudi alteri primam justificationem ex minimo gradu, nec minimum auxilium gratiae ad illam: ob quam causam Apostoli, nec Beata Virgo, qui habitualement justitiam et gratiam adoptionis in gradu perfecto habuerunt, non fuerunt condigne promeriti alicui minimum auxilium gratiae. Non alia ratio fuit, nisi quia gratia habitualis solum est principium merendi tale genus praemii, nempe gratiae et gloriae, illudque sibi et non aliis, quantumvis augeatur, semper enim manet ejusdem naturae. ,,) Proprium id Christi est. Et Suarez, tom. 4. disp. 48. sect. 2. refert. cum approbatione: (,, Meritum gratiae aut gloriae ita est personale, ut nemo possit alteri suum meritum praestare, ut alteri valeat ad gloriam obtinendam, et sit quasi praemium illius mercedis, sed illud pretium esse debet proprium personale opus, quia per illud solum fit homo dignus vita aeterna. ,,) Hoc certissimum est. (,, Dicamus igitur, conclu-

dit bene Vasquez loco citato, gratiam adoptionis solum esse principium meriti et semen gloriae ei qui illam habet et incrementi sui ipsius, non autem condigne merendi alteri gratiae auxilia aut justificationem. Ac proinde unam puram creaturam non potuisse pro aliis condigne et perfecte satisfacere. „) Solius enim Christi id proprium est, quare *ad eum finem necessarium* fuit Christi Incarnatio. Sed utrum de congruo possit aliquis mereri pro alio, dico, *id non esse de Fide*. Probatur 1. quia Tridentinum id non proponit. Jm dixi, aliquibus Theologis meritum illius dici *de congruo*, ne quidem pro se, multo minus pro alio. 3. Quae dicemus de satisfactione, istud etiam probabunt, quia satisfactio est per modum meriti: et Tridentinum eodem modo loquitur de merito et satisfactione.

Si tamen bene intelligatur, quid nomine *meriti de congruo* significant Doctores, tale meritum non potest rejici nec pro alio, ne quidem a Protestantibus. Quia, („ idem dicimus, docet bene Vasquez, 3. part. q. 94. art. 1. dub. 4.) meritum de congruo, quod impetratorium meritum, quod de congruo dici solet; meritum de congruo illud est, quod impetrat illud cuius est meritum: meritum congruum in sola impetratione consistit. „). At quis ignorat, orationem impetrare a Deo pro se et aliis multa bona, et avertere multa mala? In formula ipsa precum Deviorum nostrorum tempore pestis habetur, tunc exhortandum populum *precari Deum ad impetrandam miserationem*, et cur orarent pro aliis, et pro tot generibus hominum, singulis diebus Dominicis publice ex formula, nisi *impetraturos* se sperarent? en *meritum de congruo*. Sed et satis constat, *bonis operibus* diversis fideles *bona spiritualia et temporalia* pro se et pro aliis *obtinere a Deo*, seu ejus misericordia. Quod ad reliqua, probabilius esse censemus opera mereri de condigno, condignitate orta partim ex opere ipso, partim ex promissione, nec sola opera charitatis, sed et reliqua manantia ab homine justo, esse meritoria vitae aeternae.

§. 2.

De Justificatione.

Tridentinum sic habet, sess. 6. can. 11. (« Si quis dixerit, homines justificari vel sola imputatione justitiae Christi, vel sola peccatorum remissione, exclusa gratia et charitate, quae in cordibus eorum per spiritum Sanctum diffundatur, Rom. 5. 5. atque illis inhaereat: aut etiam gratiam qua justificamur, esse tantum favorem Dei, anathema sit. *Et can. 10.* Si quis dixerit, homines sine Christi justitia, per quam nobis meruit justificari, aut per eam ipsam formaliter justos esse, anathema sit. ») En quid rejiciendum ut haereticum, et proinde quid credendum de Fide, quod etiam fusius explicatur, cap. 7. quia propositum per Concilium universale.

Unde etiam sequitur a contrario, non esse de Fide, justitiam hanc inhaerentem esse habituales, seu quod justitia nobis inhaerens, qua justificamur, ut forma sit habitus aliquis. Probatur 1. quia de hac re nihil habet Tridentinum, nec aliud Concilium universale. Probatur 2. (« In controversia positum est, inquit Vasquez, 1. 2. disp. 203 cap. 2. utrum Ecclesia definiat, vel ad fidem Catholicam pertineat, justitiam qua impii justificantur, esse qualitatem et habitum permanentem in anima, an aequè bene fieri posset justificatio, per affectum dilectionis erga Deum, et contritionis de peccato, et omnia, quae de justitia nostra in Scriptura, et Conciliis, atque a Patribus dicuntur, recte constare possent, si aliquis diceret, justitiam inhaerentem esse affectum dilectionis erga Deum, et contritionem de peccato. In qua controversia Vega, et postea recentiores aliqui existimarunt, jam esse ab Ecclesia definitum homines justificari per qualitatem et habitum permanentem; et ea quae de justitia nostra ab Ecclesia dicuntur, in solam qualitatem permanentem et habitum convenire. Probabilis tamen sententia mihi visa est, inquit cap. 3. hactenus ab Ecclesia definitum non esse ad ultimum extra Sacramentum solo habitu justificari. ») *Et titulus ipse capituli habet;* (« Hactenus definitum non esse, utrum solo habitu justi-

ficentur adulti extra Sacramentum, Scholasticorum auctoritate probatur. *Et paulo post*; Expresse dicitur, definitum hactenus non esse, justitiam nobis inhaerentem habitum esse. Ita Sotus et Canus; atque ideo dicunt Concilium Trid. sess. 6. cap. 7. dum definivit inesse justificatis formalem justitiam ipsis intrinsecam, data opera abstinuisse a nomine habitus, ne de habitu aliquid definiret; ac proinde ejus definitione declaratum solum fuisse, justificari hominem non favore et justitia aliena, tanquam forma, sed justitia inhaerente: huc enim institutum Concilii spectabat, ut contra haereticos ostenderet, homines justificari non extrinseca justitia, ut illi dicebant, sed intrinseca sibi et inhaerente. Et Stapleton dicit, non esse minutissime sibi discutiendum, quid sit illud proprie et praecise quo nobis inhaerente formaliter primum justificamur, vel justi manemus, nempe utrum sint habitus certarum virtutum infusi a Deo, et fixi in nobis manentes; an vero non habitus infusi, sed motiones tantum animae rectae et continuae. Alias etiam quaestiones, quas ibi proponit, discutere non curat; inter quas alia similis est, utrum justitia, qua sumus formaliter justi, sit ipsa observatio legis ex Fide facta, et operatio virtutum; an sit novitas intus operans? Reddit autem rationem, quod sint quaestiones Scholasticae potius, quam hodie controversiae cum haereticis; ac proinde de illis nihil in alteram partem Ecclesia olim, aut nunc demum in Concilio Tridentino definierit. Subdit deinde; nam quod unumquemque suam justitiam in se recipere secundum mensuram, quae etiam singulis inhaeret propter dona infusa, Patres Concilii docent, illud in quacunque praedictarum opinionum sententia aliquo modo verificari potest. *Quin et cap. 6. dicit idem Vasquez*: Ecclesia expresse non declaravit parvulorum justificationem, et eorum, qui virtute Sacramenti, cum sola attritione justificantur, fieri per habitum, sed in universum solum definivit, omnem justificationem fieri per inhaerentem justitiam. *Habet tamen et recte, cap. 2. Communis et vera Theologorum sententia* est homines justificari, non solum creata justitia ipsis inhaerente, verum etiam habita justitiam, et sanctitatem esse qualitatem permanentem in ani-

ma, quam communiter habitum appellamus. *Quin et habet, cap. 6.* Ex definitione Tridentini aperta ratione colligitur, parvulos et adultos, qui virtute Sacramenti remissionem peccatorum consequuntur, solo habitu, et qualitate permanente justificari, ac proinde hanc sententiam ad Fidem Catholicam ita pertinere, ut sive errore negari nequeat, *non tamen sine haeresi, ex nostra Regula. »*).

Ex quibus patet, qui est fructus secretionis hujus nostrae, vix jam esse controversiam de Fide inter nos et Protestantes in hac materia. Et cap. 10. generaliter: (« Secundum communem et veram Scholasticorum sententiam, concedendus est habitus gratiae justificantis in omnibus qui justificantur, licet id de Fide hactenus non sit definitum: concesso autem hoc habitu, multo melius est tribuere ipsi justificationem et emundationem a peccato, quam actui, ut in omnibus eodem modo justificatio fiat: si quidem in parvulis, et in iis qui virtute Sacramenti justificantur, habitus gratiae necessario concedendus est, ut c. 6. probavimus »). Ita Vasquez.

(« Justitia inhaerens, dicit *Mestresatius* libello de gratia, cap. 35. id est, renovatio animarum in sanctitate virtutibus Christianis, locum tenet in salute nostra. Et pag. 42. Justitiam inhaerentem Deus non imputat, sed producit in nobis. Et pag. 37. Quantum ad spiritum novi Adam, derivatur in nos per regenerationem, sicut corruptio habitualis Adami derivatur in nos per generationem naturalem ») Agnoscit ergo justitiam inhaerentem; est ergo Catholicus: quin et agnoscit esse *habitualement*, quod inter nos non est adhuc de Fide. Et manet solum quaestio de nomine (« Si sumatur terminus justificationis, inquit *Molin.* in *Eras.* pag. 49. in sensu, quo adversarii nostri accipiunt, pro regeneratione et sanctificatione; falsum est nos dicere, solum fidem justificare; nam Christianus regeneratur per omnes virtutes Christianas. ») En ergo etiam *Molinaeus* Catholicus. En hallucinationem causam dissidii. En secretionem nostram causam concordiae.

§. 3.

De satisfactione.

I. (« Si quis dixerit, inquit *Concil. Trident. sess. 14. can. 13.* pro peccatis quoad poenam temporalem, minime Deo per Christi merita satisfieri poenis ab eo inflictis, et patienter toleratis, vel a Sacerdote injunctis, neque sponte susceptis, et jeuniis, orationibus, eleemosynis, vel aliis etiam pietatis operibus, anathema sit. *Et can. 14.* Si quis dixerit satisfactiones, quibus poenitentes per Christum Jesum peccata redimunt, non esse cultus Dei, sed traditiones hominum, doctrinam de gratia, et verum Dei cultum, atque ipsum beneficium mortis Christi obscurantes, anathema sit. ») En quod damnant sub anathemate.

II. En proinde doctrina Fide Catholica tenenda, quia, proponitur a Concilio universali.

Sed a contrario sensu 1. *non esse de Fide*, sicut de meritis dictum est; *An satisfactiones sint de congruo, vel de condigno; an ex dignitate sola operis, an ex promissione, an ex utroque; an ex justitia, vel etiam ejus rigore, an ex sola fidelitate Dei?* Probatur 1. Quia Tridentinum nihil de his habet. 2. Quia variant Doctores. *Ledesma et Durandus docent. hominem satisfacere pro paena ex benevolentia Dei acceptantis illam satisfactionem*, referente Vasquez, 3. p. q. 94. art. 1. dub. 3.

III. *Nec hanc fieri per opera, nisi per opera charitatis*, aut jeuniis quidem, orationibus, eleemosynis, etc. sed dummodo a charitate sint imperata. Probatur 1. Quia Tridentinum nihil de hoc habet, sive canone allato, sive alio. 2. Quia mutant opiniones Doctorum. *Henricus significat imperium charitatis esse necessarium*, refert Suarez, de poenit. disp. 37. sect. 3.

IV. *Non est de Fide, justum posse satisfacere pro alio.* Probatur 1. Quia Tridentinum id non proponit seu docet. 2. Suarez, Tom. 4. disp. 48. sect. 2. cujus titulus est. (« Utrum unus possit alteri suffragari pro illo satisfaciendo, seu poenam illi debitam persolvendo. Sententia, inquit, quorundam

modernorum Theologorum est, non posse unum fidelem alteri suffragium ferre pro illo satisfaciendo, et solvendo poenam debitam, sed solum impetrando ac merendo de congruo, ut Deus remittat talem poenam, sive immediate gratis illam condonando propter orationes alterius, sive dando aliquod auxilium, propter easdem orationes, quo bene operetur ad ejusmodi remissionem obtinendam. Fundamentum hujus sententiae est; Quia debitum poenae est debitum personale, quod per actionem vel passionem propriae personae solvendum est, et ideo non potest per alium solvi, quia non potest unus ita donare alteri actionem suam, vel passionem, ut illius propria efficiatur. Propter peccatum fit aliquis dignus poena in seipso, non in alio; ergo contrahit debitum persolvendum per actionem vel passionem propriae personae, non alterius. 2. Quia hoc debitum poenae tale est, ut contrahi non possit per opus alienum, sed per proprium; ergo etiam e contrario solutio hujus debiti non potest fieri per alienum opus, sed per proprium. 3. Aliunde vero omnia, quae adduci solent ex Scriptura, ad summum probant, fideles posse se mutuo juvare orando et impetrando. Atque ex hac sententia inferitur, etiamsi unus justus pro alio offerat opera sua satisfactoria, ut illi obtineat remissionem poenae temporalis, et de facto illam impetret, nihilominus aequè satisfacere illa opera pro peccatis propriis, quia non se privat fructu propriae satisfactionis, cum enim per poenam pro alio non solvat; consequens est, ut pro se solvat. Sicut justus, quando orat pro alio, aut bene operatur, ut alter impetret auxilium gratiae, vel aliud bonum, non minus meretur sibi de condigno vitam aeternam, quam si nihil alteri mereretur de congruo remissionem poenae, nihilominus pro se se aequaliter satisfacit de condigno, ac si nihil alteri impetraret. »)

Tribus his generaliter elucidandis et comprobandis, adde duo singularia in hac materia. Primum ex Vasquez, 3. part. de poenit. q. 94. art. 1. dub. 4. a poena peccatis debita post culpam dimissam, non liberatur nisi per satisfactionem, non per satisfactionem, et illa habet a pud Deum rationem meriti.

Unde infer, *Deus postulat satisfactionem, ut poenam condonet*; haec autem cum sit per modum meriti, nunquam habet effectum nisi sit in homine justo: seu homo existens in peccato mortali; non potest satisfacere pro tali poena: *quare haec opera extra charitatem facta non sunt meritoria, nec satisfactoria*. Secundum est ex Suario, loco supra citato, Disp. 48. sect. 2. (» In huiusmodi praemiis, inquit, vel poenis taxandis, nihil potest ex sola rei natura desumi, sed necessaria est supremi legislatoris institutio, qui potuit unam tantam poenam purgatorii praecise ac definite pro peccato remisso praescribere, et tunc nullus posset in hac vita pro tali poena, etiam per propria opera, satisfacere; tamen etiam potuit non ita definite poenam taxare, sed quasi alternative, vel talem purgatorii poenam vel aliam condignam et moraliter equivalentem huius vitae; atque ita de facto facit ex virtute quam iusti habent ad satisfaciendum pro suis peccatis. Ita ergo nunc dicimus potuisse Deum disjunctionem illam ita extendere, ut debeat homo tantam poenam in purgatorio sustinere, vel in hac vita pro illa satisfacere, aut per se, aut per amicos suos, interveniente ex parte satisfaciuntis voluntaria oblatione suae poenae pro alio; et quantum est ex parte divinae legis sufficienter illi satisficit. ») Haec Suarez generaliter de satisfactione. Qui licet addat de 1. illa sententia relictam: *Hanc sententiam censeo esse falsam, et valde novam in Theologia, ideoque omnino vitandam in materia adeo gravi*; non audet tamen dicere, esse contra Fidem multo minus contra Fidem Catholicam. Imo ingente fatetur, huiusmodi fuisse divinam institutionem (quod unus pro alio satisficiat) non possumus ratione ostendere, cum hoc pendeat ex divina voluntate, nec etiam habemus testimonium Scripturae, quo id sufficienter convincamus: nam quae supra adduximus, de intercessionem per modum impetrationis, et meriti de congruo, possent in rigore declarari. Quin et probabiliter dictae sententiae statuendae, sufficere videtur auctoritas Theologorum illorum modernorum quos allegat idem, sect. 3. (« Difficultas est, an haec satisfactio-nis pro alio, ita sit de iustitia, et de condigno; sicut pro seipso.

1. Sententia est, hanc satisfactionem, non esse de condigno ex iustitia, sed ex libera acceptione ipsius Dei; quae potest etiam fundari in aliqua congruitate ex parte offerentis satisfactionem suam; non tamen propterea acceptatio erit infallibilis, etiamsi a iusto et pro iusto offeratur. Ita Medina et Corduba.

1. Quia nunquam tenetur iudex satisfactionem per alium acceptare, etiamsi alia fortasse aequalis sit, sed jus habet puniendi ipsammet personam. 2. Quia nec Scriptura Sacra, nec traditioe constat, eam legem seu promissionem factam esse, *scilicet accipiendi satisfactionem pro alio*. 3. Quia sicut mereri, ita et satisfacere de condigno pro alio, censetur esse proprium Christi Domini.

V. *Longius etiam abest a doctrina et certitudine Fidei, viventem posse satisfacere pro mortuis, nisi orando, et per modum suffragii*. Patet, quia non habetur in Tridentino, aut alio Conoilio universali.

2. Quia variant in hac parte Doctorum sententiae

1. (« Sententia, inquit Suarez, *sect. 6.* est satisfactionem pro animabus purgatorii solum esse ex misericordiae. Ita tenet Cajetanus, Canus, Soto, etc. Idem a fortiori tenent Medina et Corduba, cum idem dicant: de satisfactione unius viventis pro alio propria et unica ratio esse debet, quia de hoc nulla extat promissio, aut pactum divinum; cuius signum esse potest, quia Ecclesia et Sancti orant Deum, ut acceptet haec suffragia pro defunctis; ergo signum est, non esse opus iustitiae, sed misericordiae. Item colligi potest ex eo, quod animae in purgatorio existentes jam sunt extra forum Ecclesiasticum, et pertinent tantum ad forum Dei. Cum ergo etiam inter vivos incertum sit, an tale pactum vel promissio intercedat, verisimilius est respectu defunctorum nullum esse: maxime, cum nullo sufficienti testimonio, et ratione ostendi possit. *Et infra*: Obi haec causam tam de nostris satisfactionibus, quam de Indulgentiis Ecclesiae solet dici, prodesse animabus purgatorii per modum suffragii, per quam locutionem aliqui putant excludi infallibilem applicationem ad acceptionem ex iustitia. *Et paulo post*: Si est infallibile, necesse est ut intercedat divina lex et promissio, quia in nullo alio potest illa infallibilitas fundari. »)

VI. Sequitur nec esse de Fide, *Thesaurum Ecclesiae*, ut vocant, *satisfactionem sanctorum* (nec proinde, ut dicetur postea, *Indulgentias*, quae dantur vivis seu defunctis) dari *per distributionem hujus Thesauri*. Probatur, quia non est de Fide, ut ostensum est, unum posse satisfacere pro alio quia non habetur in Concilio; in quo nec habetur hujus Thesauri mentio, nec in alio Concilio universali: non est ergo propositus ab Ecclesia credendus de Fide. Verum quidem est, Clementem VI. in Extravaganti *Unigenitus*, de Poen. et Rem. dicere: (« Ad thesauri infiniti, ex sanguine et meritorum Christi cumulum B. Dei genitricis, omniumque electorum a primo iusto usque ad ultimum merita, adminiculum praestare noscuntur. De cujus consumptione seu minutione non est aliquatenus formidandum, tam propter infinita Christi merita, quam pro eo quod quanto plures ex ipsius applicatione trahuntur ad justitiam, tanto magis accrescit ipsorum cumulus meritorum. ») Sed non est ibi mentio *satisfactionis* sanctorum, de qua sola loquimur. 2. Id solum obiter dictum in Extravagant. 3. Quae etiam scripta est Archiepiscopo Tarraconensi, non universae Ecclesiae. 4. Denique Papa, non est Concilium generale. Non itaque sufficit fundando articulo Fidei Catholicae. 5. Suarez, Tom. 4. disp. 51. quae est de isto Thesauri, sect. 2. (« Ex Theologis, inquit, praeter Maironem Durandus ausus est negare Thesaurum Ecclesiae, ut constantem ex meritis vel satisfactionibus aliorum, praeter Christum. Affertque 2. rationes. 1. est eadem cum ratione Maironis. Quia opera justorum sunt condigne remunerata in animabus eorum. 2. Si quae merita sanctorum reponerentur in Thesauri Ecclesiae, maxime illa, quae sanctis superflua sunt; nam quae sunt ipsis necessaria, aliis non applicantur: sed nulla sunt merita ipsis superflua, quia omnia sunt eis utilia et efficacia ad aliquod praemium, quia nullum est vel minimum opus apud Deum, quod careat mercede sua; ergo nulla superflua Sanctorum merita, quae in Thesauri reponantur. Et infra: Dixerunt aliqui, ut supra vidimus, agendo de suffragiis, haec opera, etiam quoad vim satisfaciendi, ita esse propria ipsius

justi operantis seu patientis, ut nullus justus praeter Christum possit alteri donare illa sub hac ratione, seu pro alio solvere, aut satisfacere, juxta quam opinionem consequenter dicendum est, Thesaurum Ecclesiae non constare ex satisfactionibus Sanctorum, neque ex illis applicare aliquid per Indulgentias ad solutionem temporalium reatum. In quo multum accedit illa sententia ad Durandi sensum: differre tamen potest ab illo, dicendo merita Sanctorum, quatenus habent vim impetrandi aliquid, merendo etiam illud de congruo aliis, sub ratione manere reposita in Thesauro Ecclesiae. Nam sub eadem dici possunt superabundantia seu superflua, quia sufficientia sunt ad impetrandum et obtinendum a Deo, ex praedicta ratione meriti, plura beneficia, quam de facto Deus propter illa contulerit justis seu Ecclesiae. Quod videtur satis ad salvanda verba Pontificum. Nam Clemens VI. in Extravaganti citata, non de satisfactione, sed de meritis loquitur. ») Ita Suárez. Quae sufficiunt firmandae nostrae illationi, scilicet, *Thesaurum illum ut constantem ex satisfactionibus sanctorum, non esse de Fide, cum variant in ejus assertionem Doctores.*

Etsi illo solum intelligatur quod actiones sanctorum in hac vita, vim habeant impetrandi a Deo aliquid etiam post mortem, et sub ea ratione manerent in Thesauro Ecclesiae, nequaquam Devii talem Thesaurum Ecclesiae negant, tam clarum in scriptura, Gen. 26. 24. *Ego sum Deus Abraham Patris tui, benedicam tibi et multiplicabo semen tuum propter servum meum Abraham.* Et Psal. 131. 10. *Propter David servum tuum non avertas faciem Christi tui*, id est ut habet Glossa Genevensis: Noli contemnere vel rejicere preces, quas Rex Salomon in generali facit pro omni populo. En Thesaurum Ecclesiae explicatum, ut audivimus, ab aliquot Theologis, agnitum a Protestantibus nostris. Quam vim impetrandi, saepe nostri meritum de congruo vocant. Aliis non placet nomen meriti de congruo ne quidem pro se, multo minus pro aliis. Audivimus etiam Mestrezatium admittentem merita proposita ut supra. In quo ergo, secretionem illa exacta doctrinae fidei nostrae ab aliis doctrinis facta, ma-

net dissidium, seu *de meritis* seu *de satisfactione*, seu *pro se*, seu *pro alio* per modum impetrationis, ut in oratione, seu *de Thesaurò Ecclesiæ*? Quantas adversariorum hallucinatio circa doctrinam Fidei nostrae excivit dissensiones? Quot ex hallucinatione ita implent libros? quae nobis probabilior doctrina *de his quatuor articulis seu deductionibus*. Resp. Eadem quae de meritis et de satisfactione Tridentinum supra allatum loquitur, et similis militat ratio. Quare censemus probabilius 1. Satisfactiones esse de condigno, condignitate orta partim ex natura operis, partim ab acceptatione divina. 2. Non sola opera charitatis elicitive vel impetrative, sed alia etiam aliarum virtutum, maxime poenalia, esse satisfactoria. 3. Põsse fideles sibi invicem suffragium ferre, dum unus pro alio solvit poenam temporalem pro peccatis remissis debitam satisfactionis nomine in proprietate, et rigore sumpto, quod non est solum impetrare gratuitam remissionem poenae; sed et debitum solvere: non est itaque solum per modum impetrationis. Addo, quod fideles hoc modo satisfaciunt, tum pro vivis, tum pro defunctis: et utramque satisfactionem infallibiliter prodesse iis, pro quibus offeruntur, sive viventibus in hoc mundo, sive in purgatorio existentibus, et secundum totum harum satisfactionum valorem: 4. Unde dicendum etiam esse in Ecclesia Christi thesaurum, non solum et quidem praecipue constantem ex Christi meritis et satisfactione, quo sensu Thesaurò sumpto, Fide is constat; sed etiam ex Sanctorum tum meritis, tum satisfactione propriè sumpta, pro aliis, ut dictum supra. Quae omnia fusc probat Suarez, tom. 4. disp. 48. sect. 2. 3. 5. 6. et disp. 51. sect. 1. et 2. quo lectorem amandamus: cum nostri sit solum instituti, quae sint Fide Catholica credenda proponere; et ab aliis quibusvis discernere, quod praestitum numeris praecedentibus.

§. 4.

De Indulgentiis:

Professio nostra et Concilium Tridentinum haec

habet, nec aliud, de Indulgentiis. Professio quidem nostra, ex Tridentino excerpta: (« Indulgentiarum potestatem a Christo in Ecclesia relictam fuisse, illarumque usum Christiano populo maxime salutarem esse affirmo. *Tridentinum*, sess. 25. decretum de indulgentiis. Cum potestas conferendi Indulgentias a Christo Ecclesiae concessa sit, atque huiusmodi potestate, divinitus sibi tradita antiquissimis etiam temporibus illa usa fuerit, sacrosancta Synodus Indulgentiarum usum Christiano populo maxime salutarem, et sacrorum Conciliorum auctoritate probatum, in Ecclesia retinendum esse docet, et praecipit, eosque anathemate damnat, qui aut inutiles esse asserunt, vel eas concedendi in Ecclesia potestatem esse negant: in his tamen concedendis moderationem, juxta veterem et approbatam in Ecclesia consuetudinem, adhiberi cupit, ne nimia facilitate Ecclesiastica disciplina enervetur. Abusus vero, qui in his irrepserunt, et quorum occasione insigne hoc Indulgentiarum nomen ab haereticis blasphematur, emendatos et correctos cupiens, praesenti decreto generaliter statuit, pravaeque sectae omnes pro his consequendis, unde plurima in Christiano populo abusuum causa fluxit, omnino abolendos esse. Caeteros veto, qui ex superstitione, ignorantia, irreverentia, aut aliunde quomodocumque profluxerunt, cum ob multiplices locorum et Provinciarum, apud quas hi committuntur, corruptelas, commode nequeant specialiter prohiberi; mandat omnibus Episcopis, ut diligenter quisque huiusmodi abusus Ecclesiae suae corrigat, eosque in prima Synodo Provinciali referat, ut aliorum quoque Episcoporum sententia cogniti, statim ad summum Romanum Pontificem referantur; cuius auctoritate et prudentia, quod universis Ecclesiis expediet, statuatur: ut ita sanctarum Indulgentiarum munus pie, sancte, et incorrupte omnibus fidelibus dispensetur. ») Haec, nec plura Concilium. Unde sequitur: Ut haec Fide Catholica sunt credenda, quia proposita a Concilio universali; ita nec plura, quia nec plura proposita a Concilio hoc universali, nec ab alio oecumenico.

Itaque *de Fide est, potestatem esse in Ecclesia concedendi Indulgentias divinitus sibi traditam; quia sequitur ex Regula Fidei.*

E contrario sequitur: *Non esse de Fide Catholica in usu seu concessione Indulgentiae prout de facto sit, remitti poenas temporales debitas post peccatum remissum in foro Dei, sive in Purgatorio, sive in hac vita: aut etiam Ecclesiam habere voluntatem, cum concedit Indulgentias, has poenas relaxandi, et de facto illas relaxari.* Probatur 1. Quia hoc non proponitur a Tridentino. Et sane, cum quaestio sit de facto, seu quid velit Ecclesia relaxare, quomodo posset esse de Fide? 2. Probatur; quia variae sunt Doctorum hac de re sententiae, relatae a Suario, et aliis. (¶ Quidam Catholici, inquit, disp. 49. sect. 1. dixerunt, per indulgentias non remittit reatum poenae apud Deum, sed solum tolli obligationem exequendi Canonice poenas, seu injunctas per Ecclesiam. Quod docuit Cajetanus: sed ille non loquitur de potestate, sed de actu. Est, refere idem disp. 50. sect. 3. de Indulgent. diversitas opinionum. Quidam enim senserunt, per indulgentias quae de facto conceduntur, non remitti reatum poenae apud Deum, sed solam obligationem exequendi Sacramentalem Poenitentiam. Quae opinio antiqua fuit, eam enim referunt D. Thomas, et Bonaventura, et insinuat Albertus, definiens Indulgentiam, remissionem esse de poenitentis injunctis; fundamentum est, quod in Jure saepe dicuntur dari Indulgentiae *de poenitentis injunctis, ut patet ex c. cum ex eo, de poenit. et remiss. et ex c. Romana. eodem tit. in 6. et ex Clem. unic. de reliq. et venerat. Sanctorum.* Ex quo loco intelligere licet generalem formam concedendi Indulgentias *de poenitentis injunctis*. Ideoque licet indulgentiae concedantur simpliciter, et aliud non exprimatur, intelligendas esse secundum Juris formam, atque adeo *de poenitentis injunctis*; eo vel maxime quod Pontifices saepe concedunt Indulgentias sub hac forma, *Concedimus 7. annos, vel 40. dies, aut tot quadragenas Indulgentiae, quae numeratio manifeste fit juxta Canones Paenitentiales*, taxantes hoc modo poenitentias peccatis imponendas. Tandem confirmari potest haec sententia, ex iis, quae supra adduximus, de antiquo usu Ecclesiae in indulgendis poenitentis, nimirum ex eo non posse colligi, per illas remissio-

nes solitas fuisse remitti poenas etiam in foro Dei. Sed usus Indulgentiarum postea extensus est ad poenitentias inunctas etiam in foro Sacramentali sub eadem ratione, et ad similem effectum introductus est, et ille est qui nunc durat in Indulgentiis concedendis: ergo etiam nunc per Indulgentias nihil aliud relaxatur, nisi poenitentiae inunctae. Ita Suarez: ») Quorum auctorum relatorum auctoritas, et rationes, etiam probant sententiam illam esse probabilem. Ex qua facile Indulgentias hoo modo explicatas admittunt protestantes: cum nihil sit aliud, quam relaxatio Canonum antiquorum poenitentialium, quos ipsimet non observant. Adde, quod et saepe saepius poenas, quas infligit eorum disciplina, variis excusis relaxent. Junge, quod censeant, quotiescumque ab eorum ministris remittuntur peccata, ministros, ut utamur verbis Molinaei in Erasmo. 20. remittere peccata nulla remanente poena luenda nec in Purgatorio, nec in hac vita. Dant ergo Indulgentias et plenissimas, et singulis fere diebus, quibus conveniant in templis.

Sequitur II. *Ne quidem esse de Fide, loquendo de potestate, esse in Ecclesia potestatem concedendi Indulgentias, per quas remittuntur fidelibus poenae pro peccatis remissis debita apud Deum, sive in hac vita, sive in Purgatorio; seu, non est de Fide Catholica, posse Ecclesiam talem Indulgentiam concedere, ut per eam remittat reatum poenae temporalis apud Deum, immediate, ac per se, per solam relaxationem seu condonationem ipsius poenae, luenda sive in Purgatorio, sive in hac vita.* Probatur 1. Quia Tridentinum hoc non proponit. D. Thomas in supplemento, quaestione 25. art. 1. cui titulus est, *Utrum per Indulgentiam possit aliquid remitti de poena satisfactoria?* sic habet: (,, Respondeo dicendum, quod ob omnibus conceditur, Indulgentias aliquid valere; quia impium esset dicere, quod Ecclesia quid vane faceret. Sed quidam docent, quod non valent ad absolvendum a reata poenae, quam quis in Purgatorio secundum iudicium Dei meretur, sed valent ad absolvendum ab obligatione, qua Sacerdos obligavit poenitentem ad poenam aliquam, vel ad quam

etiam obligatur ex Canonum statutis. Sed haec opinio non videtur vera, quia, etc.“) Ita D. Thomas, referens, nec arguens haereseos hanc opinionem. 3. Probatur, quia nec Suarez, disp. 49. sect. 1. et disp. 50. sect. 2. nec quivis alius quidquam assert, quo sufficienter probet esse de Fide, praesertim *Catholica*, si bene quae profert expendantur ad Regulam Fidei, et ad ea, quae ex illa supra deduximus. 4. Ostenditur positive ex ipso Concilio. Nam non agnoscit Concilium potestatem conferendi Indulgentias in Ecclesia, nisi eam, qua antiquissimis etiam temporibus illa usa fuit, scilicet in Concilio Ancyrano, cap. 2. 5. 9. 21. 22. Neocaesar. cap. 3. Nicaeno. cap. 1. 12. Carthag. IV. cap. 75. Agath. cap. 60. At ipsemet Suarez, disp. 49. sect. 2. „Cum Tridentinum, inquit, habet, hunc usum sacrorum Conciliorum auctoritate fuisse approbatum; ad hoc citari solent Concilium Nicaen. can. 11. Carthag. IV. can. 65. Neocaes. cap. 3. Agath. cap. 60. Laodic. cap. 1. et 2. Sed in his solum legimus, semper licuisse Episcopis, ex Canonicis poenitentis publicis, quae pro diversis criminibus imponi solebant, aliquid peccatoribus, et poenitentibus remittere, si eorum vita et laudabilis conversatio id mereri videretur. Quod autem illa remissio se extenderet usque ad ablationem vel diminutionem reatus poenae apud Deum, ex illis Conciliis non satis colligitur. Ideoque non potest ex illis sumi argumentum efficax, sed ad summum conjectura quaedam, seu probabilis ratio a simili, fundata in potestate clavium.“) Et paulo post, adductis testimoniis Cypriani, Basilii, Gregorii Nysseni, et diversorum Conciliorum. („Recte convincitur, inquit, testimoniis adductis, fuisse antiquum morem in primitiva Ecclesia remitteendi aliquando huiusmodi poenas (*lege Ecclesiastica taxatas*) vel condonando illas, postquam impositae fuerunt, vel aliquando etiam condonando delicta in externo Ecclesiastico foro, nullam, vel leniorem poenam imponendo; difficile autem videtur explicare, quomodo ex illo modo remissionis satis probari possit, tunc consuetum usum Indulgentiarum, prout nunc illum probare intendimus. Nam licet huiusmodi pec-

catores hanc veniam a Praelatis Ecclesiae acciperent, ut sine tali, vel tali Canonica poenitentia admitterentur ad pacem et Communionem cum aliis fidelibus, vel ut liberarentur ab onere exhibendi talem poenitentiam publicam; nihilominus haec remissio vel condooatio praecise sumpta, nihil ab eis auferbat de reatu poenae pro tali peccato debitae apud Deum: quia praelatus Ecclesiae recipiens hujusmodi peccatorem ad pacem et unitatem Ecclesiae absque onere talis poenae, non propterea liberabat illum ab eadem purgatorii poena; sed necessarium erat, ut peccator ille alio modo satisfaceret Deo, vel certe supponebatur, et credebatur ex modo et fervore conversionis, vel alia via, illum plene satisfacisse. *Et paulo post*: His similibus rationibus videtur convictus Cajetanus, ut diceret per Indulgentias quae sunt in usu Ecclesiae, solum remitti poenitentias per ministros Ecclesiae impositas; non vero poenas ipsas in judicio Dei debitas. Quod quidem licet falsum sit de praesenti statu Ecclesiae, de illis tamen temporibus ante Gregorium magnum, de quibus nunc inquirimus, non videtur impossibile; non quod positive, ut sic dicam, nobis constet, tunc non fuisse eundem morem et usum Indulgentiarum qui nunc est, hoc enim nullo historiae testimonio, aut ratione ostendi potest; sed tantum negative, quod ex his, quae de illis temporibus legimus, non satis convincitur hic usus, et hoc apud me suadent omnia, quae adduxi, nihil enim occurrit, quod omnino satisfaciat; solum ergo potest aliqua conjectura fieri ex illo antiquo usu.“) Haec Suarez: ex cujus admissione, juncta cum minore ex Tridentino accepta, induco conclusionem.

5. Notandum diligentissime, non defuisse doctissimos Theologos in Concilio, qui probe nosset, quod talia agitabantur in scholis; sciebant etiam quod Protestantes de hac remissione coram Deo, item praecipue intentabant Indulgentiis. Ergo Concilii reticentia de hac re, non est minimum argumentum positivum, quo probatur Concilium censuisse non esse de Fide, talem potestatem in Ecclesia conferendi Indulgentias, quae forent *Remissiones poenae temporalis coram Deo debitae*, seu

in purgatorio, seu in hac vita. 6. Nec Bellarminus tractans de hac difficultate, lib. 1. de Indul. cap. 7. prop. 4. relata dicta opinione, damnat eam haeresis, sed solum dicit: *Et quidem adversus Catholicos in hac re minus recte sentientes, probatur, etc.* Nec ipsemet Suarez locis citatis eandem damnat haereseos. Denique nec ullum Doctorem eam sic damnantem legimus: ergo non est de Fide Catholica, de qua sola loquimur. 7. Nec praxis praesens Indulgentiarum, aut sensus fidelium ex ea praxi manans, evincit id quod quaeritur, esse de Fide: tum quia non omnes praxes Ecclesiae etiam universales sunt sufficientes fundando articulo Fidei Catholicae: probabilem opinionem aliquando in praxi secuta Ecclesia aliquid facit, tamen non tanquam certum dogma Fidei declaret, ut fuisse supra probavit Vasquez; et ne quidem constat, quod Ecclesia habeat voluntatem remittendi has poenas, cum concedit Indulgentias. Quomodo ergo ex praxi constaret, esse de Fide hanc potestatem, de qua quaerimus?

Subscribimus tamen iis, quae addit S. Thomas loco citato supplementi, relata praedicta opinione. Sed haec opinio non videtur vera. 1. Quia est expresse contra privilegium Petro datum, cui dictum est Matth. 16 19, ut quod in terra remitteret, in caelo remitteretur: unde remissio, quae volet quantum ad forum Dei. Et praeterea Ecclesia hujusmodi Indulgentias faciens, magis dumificaret, quam adjuvaret, quia remitteret ad majores poenas, scilicet purgatorii, absolvendo a poenitentibus injunctis. Et ideo aliter dicendum, quod valent et quantum ad forum Ecclesiae, et quantum ad iudicium Dei, et remissionem poenae residuae post contritionem et confessionem, sive sit injuncta, sive non, etc. Vide probationes hujus potestatis in Ecclesia fusissime apud Suarium, Tom. 3. disp. 48. sect. 1. et 2. petitas praesertim ex usu praesenti, et plurium retro seculorum, Pontificum Romanorum Bullis pluribus, quae refert, concedentium Indulgentias, per quas remittantur fidelibus poenae pro peccatis remissis debitae apud Deum: quas probationes concedimus esse bonas. Sed non placet, quod habet ibidem

Suarez, sect. illa 1. hanc doctrinam esse *de Fide*. Nec haec praxis, ut jam diximus, et iterum dictum contra Suarium, sufficit ad fundandum hanc doctrinam esse *de Fide*. Sicut nec praxis similis sufficit ad statuendum, *satisfactiones pro aliis*, aut *Thesaurum Ecclesiae*, *constantem ex satisfactionibus aut meritis Sanctorum esse de Fide*, quae duo etiam supra negavimus, esse *de Fide*, maxime *de Fide Catholica*, de qua sola loquimur. Imo sola probabilitas opinionis sufficit rectae et prudenti praxi statuendae in Ecclesia, ut supra docte probavit Vasquez: ut in variis materiis, ita et in istis tribus sufficere posset, *satisfactionis pro aliis*, *distributionis Thesauri*, et *Indulgentiarum pro vivis*, ut et, *pro defunctis*, de quo in sequela 3. mox; et certum est sufficere pro multis Indulgentiis in particulari, ob causas non ita graves datas, ut dicitur in sequela 4. In quibus etiam elargiendis Pontificem prudenter, et proinde bene operari, pro certo est habendum.

Sequitur III. Longius ab objecto Fidei Catholicae, seu non esse *de Fide*, *Ecclesiam posse concedere defunctis*, quae sit vera Indulgentia, id est, remissio poenae, multo minus *de Fide* est, *Ecclesiam habere voluntatem remittendi has poenas*, nisi per modum suffragii. Probatur 1. Quia nihil horum habet nec confessio nostra, nec Tridentinum. 2. Quia variant in hac re Doctorum explicationes. Alii Catholici, refert Suarez, disp. 49. sect. 1. („ dixerunt, Ecclesiam posse concedere Indulgentiam, non autem defunctis. Et disp. 53. sect. 1. Inter Catholicos Hostiensis negavit simpliciter, Indulgentias prodesse defunctis: quem secutus est Gabriel: idemque tenuit Gerson. Quia Indulgentiae, ait Gerson, ordinatae sunt pro his, qui submitunt se curiae misericordiae, quae durat usque ad mortem, non vero post mortem. Et confirmatur; Nam concessio Indulgentiae est actus jurisdictionis, sed Pontifex non habet jurisdictionem in purgatorium, quia non est iudex illarum animarum, sed a Christo immediate judicatae sunt, et ad illas poenas ligatae: ergo non possunt ab illis solvi ab alio iudice quam suo. Idem Suarez, sect. 3. Putant aliqui, quod In-

dulgentia per modum suffragii non est omnino infallibilis, sed pendens semper ex libera acceptione et misericordia Dei. Et confirmatur; nam etiam privata suffragia pro defunctis non habent tantam efficaciam, ut infallibiliter acceptentur. Imo aliqui putant ipsum sacrificium Missae illam non habere, neque esse aliquod opus, quod ex opere operato liberare possit animas defunctorum ab illis poenis lege certa et infallibili. Denique de hoc necdum habemus divinam promissionem, in qua sola possit haec infallibilitas fundari. Hanc sententiam docuit Cajetanus, et eam secutus est Canus, et eam etiam magis probat Corduba. *Hucusque Suarez, et Vasquez, 3. par. disp. 228. cap. 4.* Solus, Canus, et Corduba censent, sacrificium Missae circa vivos certa lege semper operari remissionem poenae; circa defunctos vero existentes in purgatorio, non item; sed illis solum ad hunc effectum valere per modum suffragii; vocant autem per modum suffragii idem quod iustar suffragii: ut quemadmodum, inquit, orationes vivorum defunctis solum prosunt, prout Deo placuerit eas acceptare, neque certa lege statuerit, propter illas, defunctorum poenas remittere, ita etiam sacrificium Missae defunctis prosit. Idemque de Indulgentiis, quae defunctis conceduntur, affirmant. Imo ex eo quod existiment Indulgentiarum effectum circa defunctos non esse ita certum sicut circa vivos, idem de effectu sacrificii Missae arbitrantur. »)

Diximus porro, nisi per modum suffragii; quia res non est certissima, notat bene Bellarminus, de Indulg. lib. 1. cap. 14. et apud Catholicos indubitata: *Indulgentiis juvari posse animas, quae in Purgatorio poenas luunt.* Sed quis Protestantium non facile admittet Indulgentias sic explicatas per modum suffragii, seu per modum orationis, si concedat purgatorium? Nam admittunt, fideles posse orare pro se, et pro aliis viventibus, et impetrare quae petunt: sic habet eorum forma precum tempore pestis: *ad impetrandam veniam utendum hac orationis forma*; quod est suffragium illis ferre, et Deum intuitu talium orationum misericorditer quae petunt elargiri. *Propter David servum tuum, non avertas faciem Christi tui.* Psal. 131. 10. Cur Ec-

clesia offerente Deo merita Christi, et Sanctorum vitam piam, et petente, *propter* verum David Christum, et *propter* hanc Sanctorum vitam piam, sicut *propter* David dicebat Salomon Deo, remissionem poenae debitae defunctis, quod est Ecclesiam largiri Indulgentias *per modum suffragii*, aut fidelibus pro defunctis privatim orantibus, *Deus misericorditer non elargiretur quod petitur*, qui exaudit alias preces, tum Ecclesiae ejusdem, tum aliorum fidelium? Repete memoria, quae de ministris retulimus, *remittentibus peccata* fidelibus plene, et cum remissione totius poenae debitae: et miraberis, quo modo audeant Indulgentias denegare Pontifici Romano, cum plura sibi arrogent quique vel infirmi ministri. Sola ergo, superest difficultas, *an detur purgatorium, et maneat poena temporalis remisso peccato luenda*. Quae est diversa difficultas. Hoc porro solum est de Fide; reliqua solum sunt probabiles opiniones.

Inter quas, ut probabiliori adhaeremus 1. (» Hunc effectum remissionis poenarum tum defunctis viventibus virtute sacrificii Missae semper concedi, et certa quadam lege a Deo ita constitutum esse: (» quae est communis, et vera sententia, inquit Vasquez loco citato: (» 2. Suffragia, quae a fidelibus pro defunctis fiunt certa lege illis prodesse. ») Quin et cum Suario, disp. 53. sect. 3. (» verbis censeo Indulgentiam concessam pro defuncto infallibiliter habere in illo effectum, sicut habet in vivente, quando pro illo conceditur. Hanc sententiam magis probat Soto, et fuit opinio S. Thomae: qui supposita forma Indulgentiae sufficiente, ita dicit prodesse illam defuncto sicut vivo. ») Sed cum nostri instituti solum sit, quae sunt *de Fide* secernere ab aliis: et haec sola proponere Devius credenda: cum sufficiat, quo fiant Catholici, subscribere iis solis, quae sunt *de Fide Catholica*, omissis aliis, quorum ne quidem cognitionem ullam habere tenentur, talia non moramur.

Sequitur, *Nullum Jubilaeum, nullam indulgentiam*, datam a Pontificibus, aut a Conciliis, sive plenariam sive aliam tot vel tot annorum *in specie*; aut *particularem*, ob hanc vel illam causam, haec

vel illa opera praestando, esse de Fide, seu certitudine Fidei certam; plurimae sunt tantum probabiliter validae; aliquae quae circumferuntur, sunt ob pravos quaestus effectivae, et scandalosae, proindeque eliminandae. *Quod nulla sit de Fide*, probatur. 1. Quia nulla in specie ut particulari credenda proponitur in Professione nostra, in Tridentino, aut alio Concilio; 2. et quae dantur a Conciliis, vel Pontificibus, praxes sunt: jam autem diximus, non semper praxes Ecclesiae sufficere probando articulo Fidei, sed posse fundari in opinione probabilis. 3. Longius a certitudine Fidei absunt, quae dantur a Pontificibus, cum dixerimus, quae proponuntur a Pontificibus, tanquam puncta doctrinae, multo minus praxes Pontificum esse de Fide. 4. Nunquam est de Fide, quod sequitur ex duabus propositionibus, quarum una est extra verbum Dei, multo minus si una sit tantum probabilis; at talia sunt Jubilaei et omnes Indulgentiae, ut mox probabimus. Tertio itaque sic probatur auctoritate nostrorum Doctorum: *Quia convenit inter omnes*, inquit bene Bellarminus, de Indulg. lib. 2. cap. 12. (« Siue justa causa Indulgentiam non esse ratam, quod attinet ad expiandum reatum poenae coram Deo, vel in hac vita, vel in alia, docent Thomas, Bonaventura, Durandus, Gabriel et recentiores omnes: Sed quaestio est, an ad justam causam requiratur *proportio* aliqua operis injuncti cum Indulgentia, ita ut pro majori Indulgentia major causa requiratur, an vero possit pro opere minimo dari Indulgentia maxima? de qua re duae sunt opiniones. Prior est eorum qui docent, non requiri proportionem ullam, sed satis esse si causa sit pia, id est, modo non concedatur Indulgentia pro opere malo, vel pro opere mere temporali, aut pro opere vano et nihil ad divinam gloriam pertinente, sed pro quocumque opere quod ad honorem Dei vel Ecclesiae utilitatem cedat, Indulgentia rata erit: Ita docuit Sanctus Thomas, Durandus, Paludanus, Valentia et alii. Posterior sententia est aliorum: qui contendunt ad justam causam requiri aliquid non solum pium et utile, sed etiam quod proportionem habeat cum Indulgentia, ita ut non sit ratum, si detur pro causa

levissima, Indulgentia maxima: ita docent Bonaventura, Richardus, Gerson, Gabriel, Cajetanus, Major, Soto, et alii. Quoniam si pro quacumque pia causa concessae Indulgentiae ratae essent, nullae dici posset superfluae vel indiscretae, cum semper sit in promptu aliqua pia causa quae allegari possit, et alias posset Summus Pontifex in momento liberare omnes animas purgatorii, quia posset dici, non deesse piam causam, cum ad gloriam Dei pertineat, ut tot animae citissime volent in Coelum. Posterior sententia, ut est communior, ita etiam verior mihi videtur; ut ex. g. Si detur Indulgentia plenaria iis, qui semel recitant Orationem Dominicam pro conversione Haereticorum, causa non videbitur justa; quomodo etiam si detur Indulgentia iis, qui nummunt unum exponunt pro recuperanda Hierosolyma, non videbitur justa causa tantae Indulgentiae »). Haec Bellarminus. At nunquam constat Fide, hanc vel illam causam, seu hoc vel illud opus, cujus intuitu datur Jubilaeum vel Indulgentia, esse justam causam, et opus habere proportionem cum Indulgentia, ergo de nullo Jubilaeo vel Indulgentia constat esse valide datam.

Quae ratio probat etiam secundam partem hujus illationis, *plerasque imo fere omnes esse solum probabiliter validas*; quia vix constare potest, quae sit ista proportio requisita, et quo levior est causa sive opus, quales sunt plerimae quae conceduntur, dicendo, v. g. Orationem Dominicam et eleemosynam aliquam elargiendo, eo probabilitate minori valida est Indulgentia. Porro non est culpandus, sed potius laudandus Pontifex in earum concessione, eo quod sufficit ad praxim legitimam opinio probabilis, qualis est 1. quam retulimus. Etsi tales Indulgentiae, si sententia secunda sit verior, non sunt ex toto validae, nullum ex ea Indulgentia damnum sequitur, imo inde fideles ad pia opera inducuntur.

Denique (a justa semper causa requiritur, *inquit ibidem Bellarminus*, sed non est subditorum judicare, utrum causa sit justa vel injusta; debet enim simpliciter existimare justam esse; sed veteres Pontifices parcissimos fuisse in Indulgentiis conferendis notissimum est »). Nec talis etiam certitudo retar-

dare debet fideles ab Indulgentiis consequendis; quia fere in omnibus rebus humanis homines prudenter (ex opinione probabili varia aggrediuntur; præscribit Medicus medicinam prudentissime, cum probabiliter putat profuturam, licet non certo, sed certum non esse obfuturam. Litigans, Mercator, etc. ex spe probabili lucri, licet etiam non constet illi damnum non inde secuturum, naufragio, aut causa cadendo. Ergo prudenter et Pontifices elargiuntur, et fideles conantur, lucrari tales Indulgentias. Et addit idem auctor ibidem: (« 1. Nullum inde esse ut plurimum deceptionis populi periculum; quoniam sicut potest fieri, ut aliquando Indulgentia non sortiatur effectum, ob defectum ejus qui eam suscipit; ita nec debet videri absurdum, si aliquando idem accidat ob defectum causæ, et Christianus populus non ignorat ad Fidem pertinere, quod sit in Ecclesia potestas Indulgentias concedendi, non autem quod in particulari non possit fieri, ut Indulgentia vel non sit rata, vel non prosit; et ideo sic accipiunt prudentes Christiani Pontificias Indulgentias, ut simul etiam studeant dignos poenitentiae fructus ferre, ac pro suis peccatis Domino satisfacere »).

Tertiam partem nostri illati habet etiam Bellarminus. (« Non desunt, inquit cap. 9. qui negent Indulgentias, quæ continent condonationem poenitentiae, multorum millium annorum esse a Pontificibus datas, sed a Quaestuariis confictas dicant. Ita sentiunt Gerson et Soto. Pontifices enim non solebant Indulgentias concedere, nisi tot annorum, quot annorum poenitentiae iungebantur; poenitentiae vero non solebant injungi; nisi unius, duorum, trium, quinque, septem, decem, viginti annorum, aut ad summum per totam vitam, quæ ultra centum annos porrigi non solet. Et lib. 2. cap. 20. Si quis nosse cupit veras historias de Indulgentiis Romanis, non eas petat vel ab hostibus Ecclesiae, neque ab obscuris quibusdam libellis, qualem unum Kennitius se vidisse dicit editum Norimbergæ, Germanice scriptum, et amplificatum de stationum Romanarum Indulgentiis, cum antea latine et brevius editus Romæ fuisset, sed a Pontificum diplomaticis, vel ab authenticis Ecclesiarum tabulis, aut

certe ab auctoribus certis, gravibus, doctis, probatis; neque enim dubitari potest, quin multa vel conficta in ejusmodi libellis incertis et anonymis legantur. Sane in probatis auctoribus non leguntur concessa fuisse aliquando multa millia dierum vel annorum Indulgentiae u). Non paucae etiam aliae circumferuntur, quae falsae videntur, aut certe valde incertae, et vix probabiles, quas hic referre non est operae pretium, quae quaestus causa identidem a Quæstuariis publicantur, magno Deviorum præsertim scandalo, quorum abusus occasione, inquit Tridentinum, *Indulgentiarum nomen ab hæreticis blasphematur*. Hinc Synodus pravos quaestus omnes pro his consequendis, unde plurima in Christiano populo abusus causa fluxit, abolendos statuit.

Hac secretionem facta doctrinae Fidei ab aliis, Devii facile subscribent doctrinae Fidei Catholicae de indulgentiis, qui hallucinatione doctrinae Fidei nostrae, tot tragoedias hoc seculo excitarunt; et ab hac materia scissionem ab Ecclesia infelicitè sunt auspicati. Proponamus nos solum iis ea quae habentur in professione nostra, et Tridentino relatis, ne plus sapiamus; quam sapuit Pius IV. Pontifex scriptor professionis, et Tridentinum; sufficitque sine dubio quo quis sit Catholicus in hac materia, reliquis silentio sopitis:

§. 5.

De Purgatorio et suffragiis pro Defunctis.

Professio nostra sic habet: *Constantèr teneo Purgatorium esse: animasque ibi detentas, fidelium suffragiis juvari*. Et, *Prosteor in Missa offerri Deo verum, proprium, et propitiatorium sacrificium pro vivis et defunctis*, de qua sola ultima particula hic agimus. Et Trid. Sess. 25. Decret. de Purgatorio. (, Cum Catholica Ecclesia Spiritu S. edocta, ex sacris litteris et antiqua Patrum traditione, in sacris Conciliis, et novissime in hac OEcumenica Synodo docuerit Purgatorium esse, Animasque ibi detentas fidelium suffragiis, potissimum

vero acceptabili altaris Sacrificio juvari, praecepit Sancta Synodus Episcopis, ut sanam de purgatorio doctrinam, a Sanctis Patribus et Sacris Conciliis traditam, a Christi fidelibus credi, teneri, doceri, et ubique praedicari diligenter studeant. Apud rudem vero plebem, difficiliore ac subtiliores quaestiones, quaeque ad aedificationem non faciunt, et ex quibus plerumque nulla sit pietatis accessio, a popularibus concionibus secludantur. Incerta item vel quae specie falsi laborant, evulgari ac tractari non permittant; ea vero quae ad curiositatem quamdam aut superstitionem spectant, vel turpe lucrum sapiunt, tanquam scandala et fidelium offendicula prohibeant. Curent autem Episcopi, ut fidelium vivorum suffragia, Missarum scilicet sacrificia, orationes, eleemosynae, aliae pietatis opera, quae a fidelibus, pro aliis fidelibus defunctis fieri consueverunt, secundum Ecclesiae instituta pie et devote fiant).

Hinc primo patet, quae sunt de Fide credenda ex regula nostra, scilicet quae proposita ab universali Concilio Tridentino.

Sed a contrario scilicet, quia non proposita ab illo circa purgatorium. (« 1. Non est de Fide, inquit Bellarm. lib. 2. de purgatorio, cap. 11. verum et proprium esse ignem purgatorii, et ejusdem speciei cum nostro elementari. Quia nusquam in Concilio definitum est imo in Concilio Florentino Graeci aperte professi fuerant, se non ponere ignem in purgatorio, et tamen in definitione facta sess. ult. definitur purgatorium esse, nulla mentione ignis habita. Tamen est sententia probabilissima. 1. Propter, etc. Idem cap. 6. Sequitur quaestio ubi sit purgatorium? de qua quaestione, nihil Ecclesia definit. Sunt autem multae opiniones. Refert plurimas, et octava, inquit, est communis Scholasticorum, purgatorium esse infra viscera terrae, inferno ipsi vicini. 3. Idem cap. 14. De gravitate poenarum, quamvis aliquo modo omnes admittant poenas purgatorii esse majores poenis hujus vitae, tamen dubium est, quomodo hoc intelligatur. Bonaventura docet purgatorii poenas esse majores poenis hujus vitae solum in hoc sensu, quia maxima poena purga-

torii est major, quam sit maxima poena hujus vitae, licet aliqua poena purgatorii reperiatur minor aliqua poena hujus vitae. Quae sententia mihi placet. 4. *Nec est de Fide*, quanto tempore duret purgatorium. Res est incertissima, inquit Bellarm. cap. 9. et non nisi temere definiri potest »).

Sane secretionem hac posita, facile est Devio persuadere sibi purgatorium; cum praesertim Calvinus instit. lib. 3. cap. 25. §. 6. dicat: (« Non est licitum, nec utile nobis inquirere curiosius de statu qui est inter mortem et resurrectionem. Torquentur valde plurimi, disputantes in quo loco sint animae receptae, et utrum fruantur jam gloria promissa, an non. Scriptura non eo usque progreditur. Quis Doctorem docebit nos, quod Deus nobis celavit? Quandoquidem Scriptura vult, nos esse suspensos usque ad adventum Jesu Christi, et praecipit nos eum expectare, et ad illam diem nos remittit, recipiendae coronae gloriae; contineamus nos his terminis, quos Deus nobis assignavit, scilicet animas fidelium in requiem recipi, ubi expectant cum gaudio fruitionem gloriae promissae, et sic omnia suspensa manere, usquequo Christus appareat in Redemptorem »).

En locus 3. ex Galvino, et quidem cum suspensione et dilatione: *Spes* autem quae differtur, affligit animam, en ergo species saltem purgatorii.

Quod ad suffragia attinet, ut patet ex Trid. quae sint de Fide, scilicet quae ibi sunt proposita.

Ita sequitur a contrario, nullam sequentium doctrinarum, esse articulum Fidei. 1. *Non est de Fide* (ut supra ostensum) sacrificium Missae certa lege et promissione semper operari remissionem poenae circa defunctos existentes in purgatorio: sed illis solum ad hunc effectum valere per modum suffragii: communis tamen et vera sententia est contraria. 2. *Nec est de Fide*, suffragia quae a fidelibus pro defunctis fiunt, certa lege illis prodesse. Ratio est, quia Concilium nihil horum determinat. Probabilius tamen est, certa lege id fieri. 3. *Nec de Fide est*, sacrificium Missae ex opere operato hoc operari. Tacet enim de his Concilium, et ut bene docet Vasquez, disp. 229. cap. 1. (« Varias sunt Theologorum opiniones, qui et diverso modo loquuntur »).

Et Suarez, disp. 53. sect. 3. (« Aliqui putant sacrificium Missae non esse aliquod opus, quod ex opere operato liberare possit animas defunctorum ab illis poenis lege certa et infallibili ».). Relege circa tria quae supra diximus. 4. Nec remissionem hanc quae sit, fieri per applicationem satisfactionum nostrarum animabus purgatorii. Primo, quia nihil habet Tridentinum. 2. Variant Doctores. Suarez, disp. 48. sect. 5. (« Prima sententia, inquit, generaliter affirmat hunc modum, scilicet per modum impetrationis suffragia prodesse defunctis, non solum esse possibilem; sed etiam nullum alium posse nos exhibere animabus purgatorii, ad hunc effectum obtinendum. Hoc a fortiori teneat illi Theologi, qui inter viventes nullum admittunt alium modum satisfactionis unius pro alio. Nam hoc principium apud omnes certum est, non posse nostra suffragia esse efficaciora ad remittendam poenam Defunctis, quam aliis viventibus ».).

§. 6.

De legum humanarum Obligatione in conscientia.

Professio Fidei nostrae hoc habet: *Ecclesiae observationes et constitutiones firmissime admitto et amplector. Receptos et approbatos Ecclesiae Catholicae ritus in omnium Sacramentorum solenni administratione recipio et admitto. Romano Pontifici veram obedientiam spondeo ac juro, caetera item omnia a sacris Canonibus et OEcumenicis Conciliis tradita recipio.* Et Trid. sess. 6. can. 20. (« Si quis hominem justificatum dixerit non teneri ad observantiam mandatorum Ecclesiae, anathema sit. *Et sess. 7. can. 8.* Si quis dixerit Baptizatos liberos esse ab omnibus S. Ecclesiae praeceptis, ita ut ea observare non teneantur, nisi se sua sponte illis submittere voluerint, anathema sit. *Denique sess. 25. Tit. de delectu librorum, jejuniis, et diebus festis.* Hortatur Sancta Synodus et Pastores omnes obtestatur, ut tanquam boni milites illa omnia quae Sancta Romana Ecclesia statuit, necnon ea quae tam in hoc Concilio quam in aliis OEcumenicis statuta sint, quibus-

cumque fidelibus sedulo commendent, omnique diligentia utantur, ut illis omnibus, et his praecipue sint obsequentes, quae ad mortificandam carnem conducunt, ut librorum delectus et jejunia, vel etiam quae faciunt ad pietatem augendam, ut dierum festorum devota et religiosa celebratio, admonentes populos crebro obedire praepositis suis; quos qui audiunt, Deum remuneratorem audient, qui vero contemnunt Deum ipsorum ultorem sentient &c.) Hactenus Concilium: nec plura. En ergo doctrina Fidei Catholicae, quia proposita a Concilio universali.

Hebr. 13. v.
17. Luc. cap.
10 v. 16.

Ex quo a contrario sequitur. 1. *Non esse de Fide, Ecclesiam seu ejus leges, aut a fortiori leges Principum saecularium posse obligare*, aut de facto obligare conscientias sub peccato mortali, seu ut utamur terminis Confessionis Novitantium, art. 24. *ita ut imponant jugum conscientis.* Hoc, inquam, non est de Fide praesertim Catholica. *Nec proinde Haereticum est quod habetur in Confessione Deviorum, art. 24. Rejicimus inventiones humanas, quae imponunt jugum conscientis.* Et art. 33. *Excludimus omnes inventiones humanas, et omnes leges quibus quis vellet ligare conscientias.* Et in confessione Augustana, Art. 27: *Collocant Romanenses in novo Testamento peccatum in cibis, in diebus, in vestitu et similibus rebus; hinc certe illa onera, quod certi cibi polluant conscientiam; quod horas Canonicas omittere sit mortale peccatum: unde habent jus Episcopi has traditiones imponendi Ecclesiis ad gravandas conscientias, etc.*

Probatur istud corollarium primum: quia non habetur in professione nostra aut in Tridentino, quod Ecclesia aut Magistratus civiles habeant talem potestatem obligandi sub peccato mortali, nec quod leges notatae, aut quaevis aliae Ecclesiasticae aut civiles obligent ita de facto sub poena inferni, ut patet in relatis. 2. Cum tot doctissimi Theologi Concilio interfuerint, nec ignorarent quid Augustana confessio sentiret, quum etiam varie Scholastici loquerentur; siluit tamen de hac re, quo silentio tacite declarasse videtur, non esse haec de Fide. 3. *Sotus et Castro*, inquit Vasquez, part. 2. disp. 154. cap. 1. (a referunt fuisse sententiam Gersonis, nul-

la lege humana etiam Ecclesiastica decerni aliquid posse aut juberi sub reatu culpae, quod aliqua lege divina praeceptum non sit; sed jus humanum, etiam Ecclesiasticum solum possit declarare jus divinum. Alii recentiores pergunt ulterius, et non solum dicunt Gersonis opinionem fuisse, nullam legem humanam, etiam Ecclesiasticam, fieri posse de aliqua re, quae nec jure divino, nec naturali fuerit praecepta, quinimo in eam sententiam referunt Almainum »). Nec tamen seu Vasquez seu alius Doctor damnat haereseos hanc doctrinam. 4. Verum quidem est sequi certo hanc veritatem ex principio aliquo revelate, seu mediate, ut mox dicemus; sed supra demonstravimus, non esse de Fide Catholica, quod sequitur ex una vel duabus praemissis revelatis: nec item de Fide est ob similem rationem quod sequitur ex definitione Ecclesiae, sed non est expresse ab ea propositum. At, ut ostendimus, istud non est ab Ecclesia expresse propositum; ergo ex duplici capite non est de Fide.

2. Quinimo probabilior mihi videtur Gersonis sententia, qualem eam referunt Almainus, Medina, Driedo, Adrianus, Castro, relatore Vasquez, 2. 2. disp. 158. cap. 1. legem humanam, sive Ecclesiasticam, sive civilem, quatenus humana est et a sola potestate humana profecta, non posse ad culpam mortalem obligare; idemque Gersonem sensisse de lege naturali quod de humana autumant praedicti auctores. Probatur autem haec sententia 2. quia lex humana et naturalis non attingunt cognitione sua finem supernaturalem, ergo non attingunt aeternam poenam vel praemium, quae ad finem supernaturalem, et plus quam humanum spectant. Deinde nullus Legislator potest lege sua ad eam poenam obligare, quam ipse non potest infligere in suo tribunali ».

3. Non potest lege humana homo obligari ad actus omnino internos, eo quod non potest de illis in in suo tribunali ullo modo judicare; atqui neque ullus humanus legislator Ecclesiasticus aut civilis, neque natura potest aeternam poenam infligere; ergo nec obligare ad culpam, quae homines reos talis poenae constituat.

4. Ex hypothesis tamen legis humanae, seu posito quod lex humana Ecclesiastica, aut civilis aliquid praeceperit ex intentione praecipendi, et non solum dirigendi, aut ordinandi, per modum consilii, *supervenit lex divina*, jubens obedire superioribus Ecclesiasticis et politicis, parentibus et Dominis; quae *lex divina superveniens obligare potest et obligat ad peccatum, etiam mortale et ad poenam aeternam*, seu ejus transgressio reos nos facit poenae aeternae. Quod lex divina obliget ad obediendum 1. potestati Ecclesiasticae patet ex Scriptura: *Qui vos audit me audit, et qui vos spernit, me spernit; obedite Praepositis vestris*, etc. 2. civili, *Qui resistit potestati, Dei ordinationi resistit. Qui autem resistunt, ipsi sibi damnationem acquirunt: nec sitate subditi estote, non solum propter iram, sed etiam propter conscientiam*. 3. Parentibus, *fili obedite parentibus vestris in Domino, hoc enim justum est. Honora patrem tuum, et matrem tuam, quod est mandatum primum in promissione*. Denique Dominis, *servi obedite Dominis carnalibus, ut servi Christi, facientes voluntatem Dei ex animo*. Et sane, (» natura ipsa docet, inquit bene Vasquez, d. 158. (2. Parentibus et Superioribus non obedire, si notabilis materia est, scelus esse; est enim contra rectam rationem, majoribus non obedire: *naturaliter consequitur ut idem, disp. 152. cap. 8. dignitatem capitis in aliqua congregatione, ut ei omnes parere et obedire debeant, alioqui si justum esset contra illius praeceptum operari; magna esset in manibus, et in tota congregatione confusio. Quis autem gentiliū hactenus dixit, inhonestum non esse majoribus non obedire*) ? » Quod vero lex divina obliget etiam ad mortale et poenam inferni, patet saepe saepius ex Scriptura, sicut et Deus in tribu- nali suo potest tales poenas infligere; et sane quod disponat rationi in gravi materia, Deo graviter displiceri, ac proinde ejus amicitiam erga nos dissolvi, ex se poenam aeternam mereri. Hoc modo itaque seu mediate, lex Ecclesiastica et civilis, et praecepta parentum et Dominorum obligare possunt, ad peccatum etiam mortale, et sub poena inferni non ex seipsis, sed ob divinam legem supervenien-

Luc. 10. v. 16.

Hebr. 13. v. 17.

Rom. 13. v. 5.

Eph. 6. v. 1.

Ibid. cap. 6.

v. 6.

tem; et hac ratione, nec alias, obstringere possunt conscientias.

4. Porro sic explicata potestate humana, seu obligatione legis humanae, Protestantes eam nec negant, nec negare possunt. Nam 1. admittunt Ecclesiam et Reges potestatem habere leges condendi, et varia praecipendi, sicut et parentes, et Domini aliqua possunt praecipere, subditosque debere obedire illis. 1. Scriptura jam allata, et ratioe ipsa hoc dictante. 2. Nostrorum Deviorum disciplina plurimum praecipit, eaque sub poenis et ceosuris suspensionis a coena et excommunicationis 14. capita continet, et articulos 251. hoc est, fere totidem ordinationes, praecepta, leges. Cap. 5. art. 16. habetur: *Rebelles consistorio, suspensione a caena punientur*: cap. 10. art. 3. jejunia certis diebus indicuntur, art. 5. *Nom fient Eleemosynae publicae in funeribus*. Cap. 14. art. 27. *Qui choreas ducunt, vel eis assistunt, excommunicabuntur*. Art. 29. *Qui chartis ludent, censura afficientur*. Varia prohibent connubia, cap. 13. art. 13. *cum ea, cum qua adulterium vir commiserat vivente uxore, etc.* art. 12. *cum vidua fratris uxoris suae, etc.* cap. 5. art. 31. *Qui Synodi nationalis resolutioni noluerit acquiescere, abscindetur ab Ecclesia*. Art. 8. *Ecclesiae gubernatio regulabitur ex disciplina in Synodis nationalibus statuta*. Cap. 14. art. 33. *Non erit in potestate ministrorum aut Synodorum Provincialium quidquam addere, mutare, imminuere in articulis disciplinae absque consensu Synodi nationalis*. Potest vero ista Synodus quae voluerit statuere, et in Conf. art. 32. *Possunt esse ordinationes particularis cujusque loci, seu Ecclesiae*. Art. 33. *Recipimus quae sunt apta nutriendae concordiae, et unoquoque in officio suo continendo; in quo debemus sequi quod Dominus declaravit quantum ad excommunicationem, quam approbamus et fatemur esse necessariam, cum omnibus suis circumstantiis*. Et de potestate civili, art. 39. *Credimus velle Deum mundum gubernari legibus Regum*. Et art. 40. *Oportet ergo obedire eorum legibus et statutis*.

Nec etiam negant lege divina praeceptum esse,

obedire Praepositis spiritualibus, Regibus, Magistratibus, Parentibus. Nec inficiantur transgressionem legis divinae esse peccatum, et saepe mortale. Imo, (« ubi est transgressio legis Domini, docet Calvinus instit. lib. 2. cap. 8. §. 58. 59. ibi parata est maledictio Dei. Omne peccatum est mortale, cum sit rebellio contra voluntatem Dei, quae necessario provocat iram ejus, cum sit transgressio legis, in quam denuntiata est mors aeterna, sine exceptione ulla »). In quo ergo potest esse dissensio Protestantes inter et Catholicos; cum Protestantes negare nequeant praeceptum illud divinum sic obligans, nec nos alio quam ex praecepto illo divino, seu *mediate*, leges humanas obligare posse ad peccatum mortale dicamus?

En ergo in hoc, hallucinatione semota, *pax coacta*. Quae porro leges humanae vere praecipiant, et quae vere sint praecepta, quae autem sicut solum instar consiliorum et ordinationum, seu directionum, quaeque etiam obligent, solum ad poenam temporalem, quae dicuntur *leges solum poenales*, pendet hoc ex intentione Superioris, et terminis legis, seu praecepti, quod non est controversiarum spectantium fidem. Nec porro dicimus superiores Ecclesiasticos, aut civiles, parentes, seu dominos posse quodlibet praecipere. Sed, (« par est ratio, inquit bene Vasquez, disp. 154. cap. 3., ferendi novas leges in Ecclesia, aut Republica, et in Religione, seu statu religioso, quod attinet ad hoc, ut nihil novi statuatur, quod non pertineat ad pristinum statum cujuscuque conservandum. Quare qui leges prudenter ferunt in Republica vel Ecclesia, haec observare debent, ut id quod praecipitur, illiusque observatio ad finem cujusque pertineat. At pro libitu ferre legem, certe non licet. Non est tamen *Subditorum* judicare de injustitia, aut inconvenientia legis, nisi manifesta esset ejus iniquitas, aut inutilitas; interim enim pro legislatore praesumendum est »). A quibus nec dissentiunt Protestantes, ut patet ex confessione nostrorum Deviorum, Art. 32. et 33. supra relatis, ubi habetur (« Qui in regimen eliguntur, videant quem modum servare debeant, toti corpori regendo, nec

declinent tamen ullo modo ab ordinatis a Christo, etc. »). Idem dicimus de restrictione harum potestatum. Sic in hac materia facile consentimus distinctione illa adhibita, *mediate* vel *immediate*. Si non obstante illa dissentiant adversi, manifeste sibi ipsi contradiunt. ut patet ex dictis.

5. Non est de Fide, de ullo praecepto pure humano, illud obligare ad peccatum mortale, v. g. esse obligationem audiendi Missam in diebus Dominicis, vel communicandi in paschate, etc. Diximus *pure humano*, quia non loquimur de praeceptis Apostolicis, nec enim Devii disceptant multum de iis. Probatum facile 1. Quia Ecclesia nullum proponit tanquam revelatum in Verbo Dei. 2. Hoc ipso quod sic humanum est, non est revelatum a Deo; quomodo ergo posset divina Fide credi? 3. Nequidem revelatum est a Deo, quod exstet tale praeceptum, multo minus quod obliget sub peccato mortali. Quis ergo non videt, non esse in Verbo Dei, audienda est Missa diebus Dominicis, etc.? Verissimum tamen est et manifestum: 1. exstare talia praecepta humana. 2. Esse potestatem in Ecclesia talia ferendi sub obligatione peccati mortalis *mediate*, ut ostendimus, si ex intentione vere praeciendi Ecclesia haec sanciat. 3. Constat ex sensu communi et interpretatione, Ecclesiam habere intentionem vere praeciendi. Patet itaque *jejunia Ecclesiae* v. g. obligare ad peccatum mortale *ex communi interpretatione*. Addit Cajetanus *verbo jejunium*, loquendo de jejunio; (., hoc ego non audio ex jure scripto asserere, quia nullibi scio scriptum esse praeceptum obligans ad mortale non jejunantem; et propterea quantum est ex jure scripto, nullum cognosco intervenire peccatum mortale in fractione jejunii Ecclesiae, si desit contemptus. Aperta falsitas est, *inquit Vasquez. disp. 154. cap. 2.* in ea esse opinione, ut observatio jejunii quadragesimalis aliaque Pontificia decreta sub reatu culpae mortalis non obligent »). Et idem de aliis communibus praeceptis Ecclesiae dicendum, confitendi semel in anno, communicandi in paschate, sanctificandi dies festos. Nec possunt adversi probare ullo Scripturae loco; Conciliorum, aut Patrum

testimonio, aut ratione, ea quae praecipiantur humanis legibus, manere adiaphora seu indifferentia. Nos probavimus contrarium etiam ex *praecepto divino* obediendi praepositis. Quae porro, et quot leges, et praecepta humana in specie, seu in particulari, sint vere leges et praecepta et non simplices ordinationes, et instar Consiliorum ad nihil obligantes; quae etiam sint leges *pure poenales*, id est, obligantes solum ad poenam; quae denique obligantes ad peccatum etiam mortale, ut pendet ex intentione Legislatoris; ita colligendum est ex verbis legis, materia praecepti, qualitate et similibus, quae Theologi moralis est examinare, non nostri hic instituti, qui solum quae sunt credenda proponimus: quae autem ita sunt de facto, non possunt esse de Fide. Solum addemus duo; ne conquerrantur Devii de onere hinc gravi manente in Catholicos, et propterea refugiant in ejus castra transire. 1. quod habet Cajetanus in summa, *verbo transgressio praecepti*. (, Legis Ecclesiasticae intentio est, non injicere laqueos animabus, sed ad aedificationem Corporis Christi Mystici promovere: et hinc fit, ut non tam late multitudo praeceptorum obligantium ad mortale, jure interpretaunda sit, ne loqueus multiplicatus contra animas censeatur, 2. Hinc etiam fit universalis regula; Quod in iis, quae sunt positivi juris, si absque contemptu, ex ignorantia puta (*id est non crassa nec supina*) aut ex apparente sibi excusatione transgressio fiat ab eo qui animum habet nullo pacto consentiendi contra praeceptum obligans ad mortale, non incurritur mortale peccatum; quando non est intentio pie ac justae Matris Ecclesiae bonas ejusmodi animas illaqueare tam hostili vinculo; et propterea tales apud Deum non incurrere excommunicationem, *sive ut habet Vasques* 1. 2. *disp.* 158. *cap.* 6. Facile excusantur a mortali transgressores, quando absque contemptu ex ignorantia non crassa nec supina, aut ex apparente aliqua ratione et excusatione legem non observant, qui alias parati erant ex animo illam observare, si scirent eam tum obligare. Neque praeceptum jejunii, aut audiendi Missam ita obligat, ut nulla causa excuset; qui vero bona Fi-

de putavit causam similem esse, excusabitur a mortali ut docet Cajetanus ».) Haec Vasquez. Sed de his pluribus Theologi Morales, seu Casuistae doctiores.

Dico consensui faciliori placet adicere istud: ingerunt ideotidem adversi discordiae serendae causa, et in odium traducendae religionis Catholicae, Tridentinum Concilium prohibere Catholicis lectionem Scripturae vulgari idiomate, Sed haec mera calumnia est; haec enim, nec aliud habet Tridentinum, sess. 18. Titulo, *Decretum de librorum Delectu*. (Cum Synodus adverterit hoc tempore suspectorum, et perniciosorum librorum, quibus doctrina impura continetur, et longe lateque diffunditur, numerum nimis excrevisse; censuit ut Delecti ad hanc dispositionem Patres, de censuris librisque, quid facto opus esset diligenter considerarent atque etiam ad eandem S. Synodum suo tempore referrent, quo facilius, ipsa possit varias et peregrinas doctrinas tanquam zizania a Christianae veritatis tritico separare, deque his commodius deliberare et statuere »). Nunquid ibi ulla vel levis mentio prohibitionis Bibliorum idiomate vulgari? Neo regula 4. *Indicis* vulgati quam falso adscribit Molinaeus et alii Tridentino, est illo modo Tridentini Concilii. Nec unquam etiam fuit accepta in Gallia; quare in ea non obligat: est enim *verissimum*, inquit bene Vasquez, disp. 56. cap. 5. (« iunc legem non obligare quando non est promulgata, et non recipitur a populo, connivente et consentiente legislatore. *Adde quod in eodem indice habetur Regula 6. libri vulgari idiomate de controversiis inter Catholicos et Haereticos nostri temporis dissonantes non passim permittantur, sed idem de his servetur, quod de Bibliis vulgari lingua scriptis statutum est* »). At certissimum est regulam hanc 6. non obligare in Gallia; ergo nec 4. quanquam nec illa quarta prohibetur absolute haec lectio. Sed iudicio, inquit, *Episcopi stetur, et cum consilio Parochi, vel Confessarii lectionem eis concedere possint, quos intellexerint inde non dampnum, sed Fidei atque pietatis augmentum copere posse*. Variant leges humanae pro conditione locorum et personarum, sed quidquid sit, nihil ad nos, cum Regula illa nec sit Concilii, nec promulgata, nec recepta in Gallia, ac proinde non obligat, nec plures aliae.

7. Nec etiam ullus obligatur, quo sit Catholicus, legibus ullis Confraternitatum, nec eis subscribere, Rosarii, Cinguli S. Francisci, S. Monicæ, Scapularis Carmelitarum, eorumque Bullæ quæ vocatur Sabbatina; uno verbo, *nihil horum in professione Fidei Catholicae, aut in Tridentino habetur*. Haud ergo propter hæc morentur Devii Fidei Catholicæ subscribere; nec Molipæum audiant toties in hæc blaterantem; Sophistæ hoc est agere, *fallacia ignorationis Elenchi*.

§. 7.

De invocatione Sanctorum.

Constanter teneo sanctos una cum Christo regnantes, venerandos atque invocandos esse, eosque orationes pro nobis offerre. Ita habet professio Fidei nostræ. Et Concilium Tridentinum sess. 25. fusius et explicatius: (« Mandat S. Synodus omnibus docendi munus sustinentibus, ut de Sanctorum intercessionem et invocationem fideles diligenter instruant, docentes eos: sanctos una cum Christo regnantes, orationes suas Deo pro hominibus offerre; *bonum* atque utile esse suppliciter eos invocare, et ad beneficia impetranda a Deo per filium ejus JESUM CHRISTUM; qui solus noster Redemptor et Salvator est, ad eorum orationes, opem auxiliumque confugere; illos vero qui negant Sanctos æterna felicitate in coelo fruente, invocandos esse, aut qui asserunt, vel illos pro hominibus non orare, vel eorum, ut pro nobis etiam singulis orent; invocationem esse idolatricam, vel pugnare cum verbo Dei, adversarique honori unius mediatoris Dei et hominum JESU CHRISTI, vel stultum esse in caelo regnantibus voce vel mente supplicare, impie sentire »): Ita Concilium. En ergo doctrina Fidei, quia a Concilio generali proposita.

A contrario sequitur 1. Non esse de Fide, sanctos in Cælo audire preces, quæ illis fiunt a viventibus. Probat 1. quia nec professio nostra, nec Tridentinum id habet, seu id non proponit, saltem expresse non credendum. 2. Cum doctissimi Theologi Concilio interfuerint, nec ignoraverint Protestan-

tes hujus seculi, sanctis hanc cognitionem inficiari; quin et ideo damnare invocationem, quod Beati preces vivorum in terris non audiant, abstinuit nihilominus Synodus, in ipso decreto de invocatione, ab hac definitione, scilicet *sanctos audire preces nostras*. Nonne tale silentium in tali occasione, argumentum etiam positivum videtur, censuisse id non esse de Fide? 3. Esto, sequatur necessario ex eo quod sunt invocandi, seu *bonum atque utile sit eos invocare*; jam supra diximus, non esse de Fide, quae sequuntur per necessariam consequentiam ex verbo Dei revelato, aut ex propositione ab Ecclesia Dei facta; Ergo licet Ecclesia proposuerit *credendum sanctos esse invocandos*, seu *bonum atque utile esse eos invocare*, et ex illa propositione sequatur necessario, illos audire; non propterea eadem Ecclesia proposuit, *Fide credendum ipsos audire*. Item licet in verbo revelato, saltem tradito sit, invocandos esse sanctos, et deinde sequatur *ipsos audire*, non propterea revelatum est, nec de Fide ipsos audire. 4. Quinimo Aug. lib. de cura pro mortuis, cap. 15. minime agnovit, hanc consequentiam esse veram; et quod plus est, dubius videtur fuisse, *an Sancti audiant preces nostras*, qui tamen certum erat, et docet eodem libro, cap. 4. *invocandos esse illos*, multo minus probat hanc auditionem *esse de Fide* praxis Ecclesiae; tum quia ex invocatione non sequitur necessario auditio precum, ut diximus; tum quia praxes Ecclesiae possunt aliquae fundari in opinione probabili, ut fusius relatum. Verum tamen est sanctos de facto audire preces nostras, Deo illas illis revelante, et aliis modis explicatis ab Augustino et Gregorio Magno. Quod autem dubius fuerit in hac re Augustinus, inde manavit, quod dubitaverit an beatorum animae sint in caelo, et fruantur clara visione Dei aule resurrectionem, seu diem Judicii, quod definitum jamdiu fuit ab Ecclesia in Concilio Florentini definitione, et quod admittunt adversarii, licet Calvinus contrarium senserit instit. lib. 3. cap. 25. §. 6. Idem tamen Augustinus docet, et probat multos sanctos, postquam coelo recepti fuerint, et beata visione Dei felices fuerint, *videre omnia, etiam unde sunt absentes, cum Deus*

erit omnia in omnibus, lib. 22. de Civit. Dei, cap. 29.

2. Sequitur non esse de Fide, sanctos esse mediatore nostros, et non solum Christum. Probat^{ur} 1. quia id non habetur in nostra professione, nec in Tridentino. 2. Variant in hoc Patres et Doctores nostri, prout diversimode nomen *mediatoris* accipiunt. Chrysost. Hom. 7. in Epist. ad Tim. accipit pro eo, qui *ambarum naturarum particeps est*, divinae et humanae; Augustinus contra Parm. lib. 2. cap. 8. accipit pro eo pro quo nullus interpellat, sed ipse pro omnibus, et sic uterque solum Christum mediatorem esse docet; et optime alii latius pro quolibet mediante vel intercedente, et sic tum viventes tum sanctos in coelo dicunt esse mediatore^s pro omnibus pro quibus orant, sicut et Paulus, in *manu mediatoris*, scilicet Moysis, legem esse a Deo datam dicit ad Galat. 3. v. 19.

3. Mera et impudentissima est calumnia Molinaei, dicentis in novitate, lib. 7. cap. 12. in *Litanis dicitur*, sancte Petre, ora pro nobis; sed *B. Virgini non dicitur*, sancta Virgo, ora pro nobis, sicut nec Christo. Alia item calumnia, qui orant sanctos, non solum petunt ipsos Deum orare pro nobis; sed creditur S. Nicolaum posse placare mare, etc. Plenus est his calumniis in omnibus fere materiis controversis, quo avertat populum a doctrina Catholica. Absit ut haec Fide credamus; imo abominamur. Et, ut ait Augustinus alia occasione contra Faustum Manichaeum, lib. 20. cap. 21. (« Alia est disciplina Christianorum, alia error infirmorum; et quisquis in errorem dilabitur, corripitur per sanam doctrinam, sive ut corrigatur, sive ut caveatur »). Alia subtilior calumnia est ejusdem Molinaei dicentis, jussos nos invocare sanctos. Falsum id est, ut patet ex relatis ex Tridentino, docente solum bonum atque utile esse sanctos invocare, nulla mentione praecepti facta; quamquam peccaret, qui dubitaret an licitum sit eos invocare, et hoc sensu, an sint invocandi, et propterea ab invocatione abstineret; quamquam etiam ex particulari officio teneantur aliqui ex praecepto, v. gr. beneficiarii aliquando recitare Litanias Sanctorum.

4. Sequitur non esse de Fide, Sanctorum Canonizationem, seu sanctos quos invocamus, esse sanctos et beatos, v. g. Laurentium, Vincentium, Gervasium, etc. Blasium, Chrysostomum, Ambrosium, Dominicum, Franciscum, etc. iis exceptis qui tales in Scriptura nobis exhibentur, v. g. Stephano, de quo dictum est, *obdormivit in Domino*. Probatur 1. quia id non habetur in professione Fidei nostrae, nec in Tridentino. 2. Nihil habetur in verbo revelato, seu scripto sive tradito, ut patet, cum nati fuerint hi sancti longe post verbum scriptum, et Traditiones Apostolicas. 3. Quinimo nec de Fide est, hos homines existisse, multo minus sancte vixisse, sicut nec canonizatos fuisse, ut patet: certe haec omnia sunt quaestiones facti, non juris, ut evidens est. 4. Canonizantur maxime ex miraculis factis post tempora Apostolorum, quorum miraculorum plenae sunt vitae Sanctorum, tum in vita tum post mortem ab eis editorum. At nullum talium miraculorum etsi revelatum in Verbo Dei, proinde nullum est de Fide divina: quomodo ergo canonizatio ex illis facta, seu iudicium Ecclesiae quod sint sancti, esset Fide divina credendum? Nullae ergo Bullae canonizationum, quae fere omnes sunt Romanorum Pontificum, et continent quaestionem, seu doctrinam *facti*, scilicet hunc vel illum esse sanctum, facient rem de Fide. Ex quo rursus dicimus, ne quidem *infallibilem esse* in his canonizationibus Papam aut Concilia etiam generalia. Probatur ex dictis in Regula Fidei, ubi asserimus: *Conveniunt omnes Catholici posse Pontificem et generale Concilium errare in controversiis facti particularibus, quae ex informatione testimonisque hominum praecipue pendent*; et probavimus ex Bellarmino ipso concedente, Conc. Generale 6. errasse in damnatione Honorii Papae tanquam haeretici, ex falsa informatione; ergo multo magis errare possunt Pontifices ex informatione falsa. Gravissima tamen est auctoritas ex hac canonizatione, et temerarius omnino foret et plectendus, qui post talem canonizationem, quae ex informatione exactissima miraculorum et vitae praeteritae sancti fit, negaret canonizatum illum esse sanctum, aut de eo

Actor. cap.
7. v. 57.

dubitaret: sicut supra diximus, gravis esse auctoritatis; quod a Pontifice Romano ex Cathedra definitur in doctrina, et gravioris, quod definitur ab eo in Concilio Provinciali, praesertim cum totae Ecclesiae proponit in canonizatione, hunc vel illum esse sanctum. Nec propterea non est honestum, invocare sanctum illum, praxisque Ecclesiae illum invocandi post talem canonizationem est culpanda, aut est incerta: quia praxes pleraeque Ecclesiae etiam universalis possunt fundari in opinione solum probabili; quanto magis in canonizatione quae rem reddit certam, v. g. Franciscum esse sanctum et beatum, licitum est, ut utar verbis Tridentini, *bonum atque utile Sanctum illum invocare*? Et qui aliunde tenerentur ad invocationem, v. g. beneficiarii ad recitandas aliquando Litanias Sanctorum, tenerentur ad illum invocandum, nec sufficiens foret illis excusandis ab invocatione talis Sancti, obtinere non esse de Fide, illum esse sanctum; quia praxes et praecepta, etiam ex opinione probabili, possunt manere et habere suam vim ad obligandum.

§. 8.

De Imaginibus.

Professio Fidei nostrae hoc habet, nec aliud. *Firmissimè assero Imagines Christi ac Deiparae semper Virginis, necnon aliorum Sanctorum habendas et retinendas esse; atque eis debitum honorem ac venerationem impertiendam.* Et Tridentinum, sess. 25. statuit: (» Imagines Christi, Deiparae Virginis, et aliorum Sanctorum in templis praesertim habendas et retinendas; eisque debitum honorem et venerationem impertiendam: non quod credatur inesse aliqua in iis divinitas vel virtus, propter quam sint colendae; vel quod ab eis sit aliquid petendum; vel quod fiducia in Imaginibus sit figenda, velut olim fiebat a gentibus, qui in idolis spem suam collocabant; sed quoniam honores qui exhibetur, refertur ad prototypa quae illa repraesentant, ut per Imagines quas osculamur, et coram quibus caput aperimus, et procumbimus, Christum

adoremus, et Sanctos, quorum illa similitudinem gerunt, veneremur, id quod Conciliorum, praesertim vero S. 2. Nicaenae Synodi decretis contra Imaginum oppugnatores sancitum. Quod si aliquando historias et narrationes Sacrae Scripturae, cum id indoctae plebi expediet, exprimi et figurari contigerit, doceatur populus non propterea divinitatem figurari, quasi corporeis oculis conspici, vel coloribus aut figuris exprimi possit. ») Haec Concilium; unde patet Imaginum cultum esse de Fide, quia propositum ab Ecclesia universali.

Ita contrario sequitur 1. Non esse de Fide, SS. Trinitatis, aut Patris, aut Spiritus Sancti apparatus, Imagines habendas aut retinendas esse, atque eis honorem ac venerationem impertiendam. Probatur 1. quia non proponitur in professione nostra, nec in Tridentino; ubi solum habetur, *si figurari contigerit, doceatur populus non propterea divinitatem figurari, quasi corporeis oculis conspici vel figuris exprimi possit*, quod longe est aliud a definitione, eas habendas, et venerationem impertiendam. Nec praxis frequens in Ecclesia, habendi hujusmodi Imagines, et venerandi; seu Deum per eas adorandi, sufficit statuendo articulo Fidei; quia ut dictum est supra, *Non omnes praxes Ecclesiae etiam universalis sunt sufficientes fundando articulo Fidei Catholicae*, sed possunt invariabiliter etiam solum probabili; ut ibidem demonstravimus. 2. Nec Scriptura, nec Traditio Apostolica id habet; imo probabile est Deum vetuisse Judaeis in Decalogo, praecepto illo, *Non facies tibi sculpsile*: expressius vero. *Non vidistis aliquam similitudinem in die, qua locutus est vobis Dominus in Horeb de medio ignis, ne forte decepti, faceretis vobis sculptam similitudinem, aut Imaginem masculi vel faeminae*. 3. Licet in Tridentino fuerint doctissimi Theologi, et litis motae a Protestantibus de quibusvis Imaginibus haud ignari, et etiam censuerint Doctores aliqui Catholici, quos mox referemus, id non esse licitum; tamen abstinent Synodus ab hac doctrina definienda, et solum dixit Imagines Christi et Deiparae Virginis, et aliorum Sanctorum in templis praesertim ha-

*Exodi cap:
20. v. 4. Deut.
cap. 4. v. 15.*

bendas, etc. Nonne silentium Tridentini in tali circumstantia videtur testimonium positivum quo probetur, hanc doctrinam excludendam esse a Fide? (* 4. Aliqui Catholici, inquit Vasquez, 3. parte, disp. 113. c. 3. Henricus, Abulensis, Durandus, Martinus de Ayala affirmant non licere ullo modo Trinitati, sed solum Deo in humanitate, quam assumpsit, imaginem effingere. Alia opinio quauquam non adeo certa est, ut tanquam Fidei dogma sit amplectenda, multo tamen verior mihi videtur, et quae sine temeritate contra communem Ecclesiae usum negari non potest, in uuiuersum asserit Trinitatem depingere, ex natura rei licitum esse, et Imaginem Spiritus Sancti in specie columbae. Quod probat multis. Et confirmatur, inquit, usu Ecclesiae frequentissimo eadem sententia; quae passim Romae et aliis in locis Trinitatis Imaginem adorandam (seu venerandam) populo proponit. Quamvis autem Concilium Tridentinum eo capite nihil certi statuatur et definiat; praecipit tamen, ut si quando historias Sacrae Scripturae contingat describi (intelligit in quibus etiam Deus depingendus est; id quod nec damnat, nec tam serio, quam sanctorum hominum et Christi Imagines approbat, explicetur populo id non fieri, quia Deitas oculis corporeis videri possit, sed ut inde humano more cognitionem virtutis ipsius incorporeae veniamus. *) Haec Vasquez cni subscribimus.

2. Non solum non est de Fide, sed nequidem certum est, Deum non vetuisse Judaeis omnem usum Imaginum. (* Non pauci auctores, inquit Vasquez disp. 104. cap. 2. quorum opinio mihi multo probabilior semper visa est, dicunt Judaeis non solum adorationem illam gentilium, quae naturali jure prohibita est, verum etiam quemlibet usum Imaginum et Statuarum, praeepto Dei positivo, Exodi 20. etc. fuisse interdictum. Sententia est Alexandri, Alberti; Bonaventurae, Richardi, etc. Ex quibus Alexander, Albertus, Bonaventura, Marcellus, Abulensis de Imagine Dei solum dicunt illi populo omnino vetitam fuisse, caeteri autem absolute de omni in universum loquuntur. Ex iis autem solus est Abulensis, qui putat jure naturali non esse permissum

Dei Imaginem effingere ; caeteri vero videntur docere solum antiqua lege usum illius fuisse sublatum. *Et cap. 6.* Quod vero circa latera Arcae duae figurae Cherubinorum positae fuerunt , respondere quis posset cum Catharino , eas omnes figuras seu Imagines , factas fuisse iussu Dei , qui praecepto suo nomine , aut ea parte derogare potuit ; aut respondeo , lege veteri non fuisse vetitam omnem similitudinem , aut effigiem quomodocumque , sed omnem cultum et adorationem ipsius , atque adeo omnem quoque Imaginem seu effigiem modo accommodato adorationi erectam aut constitutam : quare nec Cherubinis , nec aliis figuris in templo factis , aliquem cultum fuisse delatum. Modus autem accommodatus adorationi est , cum Imago depicta aut sculpta est per se , non veluti appendix et additamentum alterius rei , in ornatum illius.

3. Quod ad cultum spectat, longe longius est a Fide adorandam esse Imaginem ne quidem Christi , multo minus Sanctorum , quin nequidem adorationis mentio est in professione nostra , aut in Tridentino , nec proinde in Nicaeno , quia Tridentinum sequitur illud , nec adorationis meminit. Quod ergo cultus ille nominetur aliquando *adoratio* , quaestio est de nomine. Certe populus intelligit *adorationis* nomine *cultum latrae absolutum* ; ille autem siue dubio non redditur , nisi soli Deo , et blasphemum esset illum reddere ulli Imagini. Cumque dicimus , nos *adorare crucem* , sensus patet , ex iis quae retulimus ex Tridentino , scilicet , *per illam quam osculamur , et coram qua caput aperimus , et procurabimus , Christum adoramus.*

4. Nec de Fide est , cultum delatum Imagiûibus esse *Religiosum* : cum nec de Fide sit, cultum delatum Sanctis ipsis , esse Religiosum , ut paulo post dicemus.

5. Longe longius abest a Fide Catholica , cui calumniose id adscribit Molinaeus et alii *adorandas latrae Imagines Dei* , et eadem qua adoratur Deus , seu eadem *eneratione cum exemplari Imagines honorari*. Probatur 1. Quia id non habetur in professione nostra , nec in Concilio Tridentino aut alio universali. 2. Quia varia sunt placita problematica

Theologorum, relata a Vasquez, disp. 108 cap. 1. circa hanc quaestionem, seu modum cultus. 1. « Sententia est, inquit, Imagines ut terminum proximum et integrum adoratione quadam ipsis pecoliarri, qui exemplar non comprehenditur adorari, etiamsi in ipsis exemplaria quoque adorentur, eamque adorationem inferiorem et distinctam esse ab adoratione exemplaris, quam ipsi honorariam appellant. 2. Sententia fatetur cum prima, quoties Imagines per se adorantur ab exemplari divisae, inferiori quadam adoratione coli, etiamsi illa propter exemplar tribuatur; cum vero adorantur per accidens conjunctae scilicet prototypo, tanquam aliquid illius, eadem adoratione latriae cum ipso per accidens adorari. 3. Sententia, quam ego veram existimo, est, motum adorationis in Imaginem, ita in ejus prototypon, et exemplar transire, et utrumque sub eadem veneratione cadere, ut nec sola cogitatione Imago per se, sine illo, vel ab eo separata, adorari possit; non solum quia necesse propter exemplar, tanquam propter rationem remotam, sicut legatum propter Regem, Imaginem coli, sed quia qui imaginem adorat, in ea quoque et per eam, exemplar ut terminum et materiam proximam adorationis necessario venerari debet; ita Alexander, Cajetanus, Bonaventura, etc. et hi non solum docent Imaginem cum suo exemplari eodem motu adorationis posse adorari, verum etiam ipsam per se nisi exemplar contineat et cum eo jungatur, non esse alicujus venerationis et adorationis capacem, ac proinde non nisi cum exemplari, cum quo integrum et proximum terminum adorationis constituit esse colendum. *Quam ultimam sententiam fusc probat cap. 4. 5. 6. Conciliis, Patribus et rationibus. Addit, et bene cap. 11. eodem modo atque Imagines, nomen Jesus, et alias res sacras esse adorandas; et cap. 12. Idem modus in Sacramento Eucharistiae, seu signorum adoratione servandus est. Et disp. 109. cap. 1. Major, inquit, crucem adorari latria per accidens: Corduba, adoratione latriae analogico: Durandus, solum adorari rememorativo: Alexander solum asserit Imaginem esse materiam adorationis latriae. Henricus dicit, Imaginem Christi hyperduliae adoratione esse colendam »).*

Ita varii varie et sentiunt et loquuntur de modo, et specie cultus Imaginum. Tridentinum, ut patet, ab iis omnibus abstrahit, seu silet, dum prudenter, nec aliud docet, eis debitum honorem et venerationem impertiendam. Quare nihil praedictorum est de Fide; proinde intra septa Scholastica sola contineantur; nulli horum subscribere, quo Catholicus sis, teneris. Subscribere Tridentino.

6. Hac secretionis facta, Dajillaeum Catholicum esse in cultu Imaginum, aperte demonstrari potest.

§. 9.

De reliquiis Sanctorum, et earum veneratione.

Professio nostra haec habet: *Constanter teneo Sanctorum Reliquias esse venerandas*, nec aliud. Tridentinum, sess. 25. (« Mandat Synodus Episcopis et cæteris, ut de Reliquiarum Sanctorum honore fideles instruant, docentes eos Sanctorum Martyrum et aliorum cum Christo viventium sancta corpora, quae viva membra fuerunt Christi, et templum Spiritus Sancti, 1. Cor. 3. v. 17. ab ipso ad aeternam vitam suscitanda et glorificanda, a fidelibus veneranda esse; per quae multa beneficia a Deo hominibus praestantur: ita ut affirmantes Sanctorum Reliquiis venerationem atque honorem non deberi, vel eas, aliaque sacra monumenta, a fidelibus inutiliter venerari, omnino damnandos esse, prout jam pridem eos damnavit, et nunc etiam damnat Ecclesia »). Haec ibi nec plura. Quare ut haec sunt Fide credenda, quia proposita a Concilio universali, ita a contrario non sunt de Fide, quae non proposita a Concilio, sicut supra diximus de Imaginibus. 1. Adorandas esse Reliquias, nequidem Christi, multo minus B. Virginis, aut Sanctorum. 2. Nec de Fide esse, venerandas esse cultu, qui sit et dicatur *Religiosus*, potius quam dubiae observantiae aut alio speciali nomine. 3. Longe etiam abesse a Fide eas eadem veneratione cum exemplari honorari, non autem alia, sicut nec venerationem istam esse, aut vocandam esse *per se*, vel *per accidens*, venerationem analogicam secun-

dariam, etc. sicut diximus de Imaginum veneratione. Probatur 1. quia nihil illorum determinate, vel in specie, habetur in Tridentino, nec in professione nostra. 2. Quia varia sunt placita problematica Theologorum in his quaestionibus relata a Vasquez, 3. parte, disp. 113. ubi recte, cap. 2. (« Eodem prorsus modo de Reliquiis, atque de Imaginibus univ-
 ersim esse dicendum: eas videlicet secundum se honorari non posse, sed solum conjunctas cogitatione cum eo cujus reliqua sunt, cum in ipsis apprehendo, sicut Imagines sine exemplari venerari nullo modo licet, *quod fusissime probat; praesertim* quia res inanimes, quales sunt Reliquiae, secundum se non sunt capaces contumeliae; ergo nec honoris, etc. »). Affirmant nihilominus aliqui, Reliquiis secundum se, sine eo cujus sunt, cultum posse deferri animo; nullum alium modum eas colendi constituunt. Alii vero non nisi conjunctas colunt, etc. ut supra de Imaginibus. Eandem esse rationem cultus Reliquiarum et Imaginum supra jam ostendimus. Missa haec omnia facimus, tanquam extra septa Fidei.

2. Longe longius abest a Fide has vel illas Reliquias, quae in hoc vel illo templo coluntur; esse hujus vel illius Sancti, cujus tanquam Reliquiae proponuntur colendae. Probatur 1. quia nihil horum habetur in professione nostra, aut Tridentino. 2. Quia sunt quaestiones facti, ex informatione aut aliis capitibus pendentes. *In controversiis autem facti particularibus, quae ex informatione testimonii hominum praecipue pendent*, etiam Papam et Concilium generale posse errare, conveniunt omnes Catholici: multo magis Ecclesiae particulares falli in his possunt. 3. Diximus *praxes Ecclesiae etiam universales*, quandoque posse fundari in opinione solum probabili; quanto magis praxes particulares hujus vel illius Ecclesiae, has vel illas Reliquias proponentis publice colendas, et de facto colentis? et cum regula praxeos sit prudens judicium, sufficit honestando cultui hujus vel illius Reliquiae, quod prudenter ex variis testimoniis, seu probationibus indicetur esse Reliquiam hujus vel illius Sancti, et si contingeret de facto non esse illius, aut nullius,

nihil propterea decederet sanctitati cultus illius particularis, ut supra dictum de Canonizatione Sanctorum. Et bene Vasquez, disp. 112. c. 8. (« Quod apud aliquos incertae aliquando Reliquiae sint, non obest quominus eas, quas humanis conjecturis, et rationibus certas habemus, reverenter colere debeamus. Itaque si quis putans aliquam esse particulam Sancti, quae revera non est, merito suae devotionis non caret. Ut tamen publice colendae proponantur, prudens diligentia adhiberi debet, *eaque major, quam cum privatim, quod licitum est, eas deferimus, et colimus. Placet et illud aliud addere ex eodem Doctore, disp. 113. cap. 4.* Qui Rosariis et aliis rebus pretiosis, Reliquias Christi aut Martyrum tangunt, et secum servant, non debent existimare ex contactu illo virtutem aliquam aut excellentiam, imo nec corporalem, in res ipsas ex Reliquiis derivari; sed inde manere respectum rationis ad ipsas, ratione cujus memoriam ipsius Christi, et Sanctorum in nobis excitant, et ad eorum venerationem affectum movent, atque hac sola ratione non superstitiosum, sed pietatis et Christiani cultus opus censi debet »).

Hac secretionem facta, patet, 1. inaniter blaterare Molinaeum in Reliquias varias, quas non esse Sanctorum, quorum habentur, inimice more suo disputat. 2. Consentire Daillaeum in cultu Reliquiarum, ut supra ostensum.

§. 10.

De Cultu et honore Sanctorum.

Professio nostra habet: *Constanter teneo Sanctos una cum Christo regnantes venerandos esse.* Et Tridentinum, sess. 25. *Christum adoramus et Sanctos veneramur*; nec plura. Quare sequitur non esse de Fide, honorem illum esse, et vocandum *Religiosum*, seu quovis alio specifico nomine. Probatur 1. Quia nihil horum habetur in professione nostra. Et Trid. 2. Quia variae sunt doctorum sententiae, quas fuse refert Vasquez, et excutit, 3. part. disp. 96. 99. 130. (« Marsilius existimat, inquit D. 98 cap.

1. eandem virtutem reipsa esse latrariam, quam dixit versari circa cultum Dei, et duliam circa cultum et honorem Sanctorum, solum autem differre per diversa connotata. Vera tamen sententia est duliam peculiarem esse virtutem, a latria, aut religione distinctam, qua Sancto cultum exhibemus. Atque adeo religionem circa cultum solius Dei versari: sic tradunt Albert. Durand. Bonavent. etc. An vero sit una et eadem virtus, quae Sanctis et omnibus in dignitate civili constitutis honorem adhibet, non satis convenit inter doctores. Aliqui videntur sentire, unam et eandem esse virtutem; sic Bonavent. Albert. Gab. «). Quae brevius jam diximus et deduximus.

Hac secretionem patet, Protestantes non dissentire nec posse dissentire a doctrina Catholica; nec enim venerationem omnem negant Sanctis debitam in Caelis, cum hominibus pie viventibus agnoscant reddendam, et reddant in terris. Quin et Drelincurtius libello hac de re scripto: honorem religiosum B. Virgini deferendum sentiat. Plus ergo credit quam opus sit, quo sit in hac materia Catholicus.

J. 11.

De Christi praesentia in Eucharistia.

Ita habetur in professione fidei nostrae: *Profiteor in Sanctissimo Eucharistiae Sacramento esse vere, realiter, et substantialiter, corpus et sanguinem, una cum anima, et divinitate Domini nostri Jesu Christi.* Et in Trid. sess. 13. can. 1. (« Si quis negaverit in Sanctissimae Eucharistiae Sacramento (scu sub specie rerum sensibilium, ullius ut exprimit in cap. 1. mox referam) contineri vere, realiter, et substantialiter corpus et sanguinem una cum anima et divinitate Domini nostri Jesu Christi, ac proinde totum Christum; sed dixerit tantummodo esse in eo ut in signo, vel figura aut virtute, anathema sit. Et ibidem cap. 1. cum dixisset: Principio docet sancta Synodus, in Eucharistiae Sacramento, Christum vere, realiter, ac substantialiter

sub specie illarum rerum sensibilium (*panis et vini*) contineri, *addit et docet*: Nec enim haec inter se pugnant, ut ipse Salvator noster semper ad dexteram Patris in caelis assideat juxta modum existendi naturalem; et ut multis nihilominus aliis in locis sacramentaliter praesens sua substantia nobis adsit, ea existendi ratione, quam etsi verbis exprimere vix possumus, possibilem tamen esse Deo cogitatione per fidem illustrata assequi possumus; et constantissime credere debemus »). Haec ibi Concilium.

Quare realis praesentia ita expressa, id est, sacramentaliter, sub speciebus, est de Fide, quippe proposita est ab universali Concilio; sed nihil aliud est de Fide, nec aliter de realitate istius praesentiae, quia nihil aliud propositum a Concilio. Itaque haec dicamus, facilitantes Devotissimam doctrinam Fidei nostrae, in hac omnium gravissima materia, et captu difficillima.

1. Cum Paulus dicat, 1. Cor. 15. v. 4. de corporibus gloriosis in resurrectione, *seminatur corpus animale, surget corpus spiritale*; si est corpus animale, est et spiritale, sicut scriptum est, factus est primus homo Adam in animam viventem, novissimus Adam in spiritum vivificantem; sed non prius quod spiritale est, sed quod animale. Corpus Christi sub symbolis Eucharistiae potest dici corpus spirituale, et non corpus animale, et ipsemet ibi existens, potest dici spiritus vivificans, et non in animam viventem. 1. Patet ex se, ex Paulo. 2. Christi corpus est in parva quantitate, totum in toto, et totum in quavis parte, ac si esset Spiritus, inquit bene Vasquez, 3. part. disp. 187. cap. 2. Hinc Cyrillus Hieros. Cat. 5. vocat spiritualem victimam, quem offert Sacerdos in liturgia Christum.

2. Non solum Corpus Christi sub symbolis potest dici spirituale, et ipsemet Christus Spiritus, sed etiam sub symbolo spirituali modo, seu spiritualiter, et non animali, nec corporali modo, seu corporaliter, seu carnaliter. Probat. 1. quia est ibi ad modum Spiritus multipliciter; scilicet sicut Angelus est hic vel ibi indivisibilis, impatibilis, et totus in toto, et totus in qualibet parte,

est enim indivisibilis, et non frangibilis: ita Corpus Christi, seu Christus, est sub symbolis, *indivisibilis, impatibilis, et totus in toto, et totus sub qualibet parte*, quia ibi est indivisibilis, et non frangibilis. Modus vero existendi corporalis, seu corporaliter et carnaliter existere, est existere visibiliter, patibiliter secundum extensionem ad totum, seu totum in toto, et partem in parte, et frangibiliter: ergo Corpus Christi, seu Christus, est in symbolis *spirituali modo seu spiritualiter*, et non corporali seu carnali, nec corporaliter, seu carnaliter in dicto sensu. Probatur 2. horret animus dicere Christum esse natum de Virgine Matre, *carnali modo*, seu carnaliter, licet vere ex ea natus sit. Cur non et negabimus Christum esse sub speciebus carnaliter, licet vere sub illis sit. Probatur 3. Trident. profitetur, sess. 13. cap. 1. (» Christum semper ad dexteram Patris in coelis assidere, juxta modum existendi naturalem, et multis nihilominus aliis in locis sacramentaliter praesentem nobis sua substantia adesse, ea existendi ratione, quam etsi verbis exprimere vix possumus, possibilem tamen esse Deo, cogitatione per fidem illustrata assequi possumus, et constantissime credere debemus. Cur non et profitebimur Christum semper ad dexteram Patris in coelis assidere juxta modum existendi corporalem, carnalem, corporaliter, carnaliter, haec enim naturalem illum modum existendi sequuntur, et multis nihilominus aliis in locis spiritualiter praesentem sua substantia nobis adesse ea existendi ratione, etc. »).

3. Totum quod diximus de corpore *spirituali* et modo illo *spirituali* existendi sub speciebus, potest etiam ob id dici de receptione et manducatione, scilicet *Christum manducari*, ut sacramentaliter ex Concilio, ita *spiritualiter, et spirituali modo*, et non carnaliter, seu carnali modo, ore tamen corporis. Patent haec ex se ex his, et applicari hic facile possunt. Manducare corporali modo et carnali, seu corporaliter et carnaliter, est manducare ad modum, quo manducamus carnes alias, scilicet masticando, et dividendo carnem in ore, palato gustando ejus saporem, etc. Non sic manducamus Chri-

atam, ergo nec corporaliter, nec carnaliter, nec corporali et carnali modo, sed spiritali et spiritaliter. Adde etiam effectum manducationis corporalis et corporaliter, esse nutritionem corporis; at vero effectum manducationis Christi esse gratiam per modum refectionis animae, id est, vegetantem et roborantem animam, in operationibus vitae spiritalis, et sic esse refectionem et nutritionem animae nostrae, quae est spiritus; ergo etiam inde, scilicet ex effectu, potest dici manducatio spiritalis et non corporalis, seu non carnalis, seu non carnaliter et corporaliter in dicto sensu. Sed redeamus ad corpus sub speciebus.

4. Non est de Fide, imo falsum est, Corpus Christi contentum sub symbolis, esse, aut dicendum esse sedens, jacens, rectum, aequale, aut inaequale alteri corpori vel loco, aut sibi ipsi sedenti in coelo, aut ita grande, crassum, longum, latum sicut in cruce; aut esse in symbolis, seu contineri in illis tanquam in loco. Et ne quidem de Fide est, esse quantum sub symbolis, aut habere suam quantitatem. Probatur 1. quia nihil horum habetur in professione nostra aut in Tridentino. 2. Positive ex verbis allatis Tridentini, cap. 1. scilicet Christi Corpus sub speciebus, esse praesens quidem sua substantia, sed sacramentaliter solum, nec juxta modum existendi naturalem, neutiquam juxta modum existendi sacramentaliter. Ergo etc. Probatur 3. quia spiritus, v. g. Angelus praesens sua substantia alicubi, aut anima nostra praesens corpori, non est sedens, jacens, aequalis aut inaequalis loco vel corpori, nec proinde est ibi commensuratus loco vel corpori. At Corpus Christi, seu Christus sub speciebus est, et dici potest esse Spiritus, ut diximus: ergo nec illi quidquam supradictorum convenit.

5. Probatur et explicatur ex Vasquez, 3. part. disp. 187. cap. 2. („ Inter alias proprietates quantitatis haec tanquam praecipua recensetur, ut secundum illam, unumquodque aequale vel inaequale dicatur, quod sane provenit ex quantitate, quatenus habet modum illum seu proprietatem, siquidem ratione illius subditur mensurae, sine qua a-

quale et inaequale nihil dicitur. Licet vero quantitas Christi, secundum essentiam et modum ipsius sit cum Christo in coelo, nihilominus in Eucharistia solum est secundum essentiam, non autem secundum modum. Hinc ea quae sunt in Christo aut alio corpore, absolute sine respectu, aut sine proximo fundamento hujus respectus ad locum, ubique cum illo debent esse; ea vero quae proxime habent ordinem ad locum, qualis est modus ille, aut sunt fundamentum existendi in loco, qualis est passio quantitatis, secundum quam res aequales et inaequales loco contineri et circumscribi dicuntur, non item; et hac ratione, cum Christus retineat in Eucharistia quantitatis essentiam, quae est absoluta a loco, tamen modum illum quantitatis, secundum quem aequatur et continetur a loco Eucharistia, non habet „). Haec ibi Vasquez qui inde bene explicat; quo pacto Corpus Christi cum sit quantum, non occupet locum, et intra parvam quantitatem specierum panis esse possit totum in toto, et totum in qualibet parte, quia non habet dictum modum quantitatis, et est ibi sicut *Spiritus*, seu *Angelus et anima*, quae est tota in toto corpore, et tota in qualibet parte ejus. Ex dictis saltem patet, quod sufficit nobis, *nihil praedictorum esse de Fide*. Quin imo refert ibidem Vasquez, cap. 1. quosdam Theologos docere, *Corpus Christi in Eucharistia non esse quantum*, licet suam habeat quantitatem, et alios etiam docuisse *esse ibi sine quantitate sua*; quae falsa quidem sunt, sed sufficiunt ad probandum *nihil praedictorum esse de Fide*; idest, non esse de Fide, Christi Corpus sub speciebus, *esse jacens, aequale, grande, crassum, longum, latum* sicut in græce, etc. cum haec omnia sequantur quantitatem, et modum ejus supradictum. Sane sumpto saltem termino, *lati, longi, grossi*, ut populi communiter concipiunt, pro habente extensionem in ordine ad locum, quis non videt Christi Corpus sub speciebus, nec esse grande, nec latum, aut saltem *nihil harum esse de Fide*. Quare frustra blaterant adversi de combustione hostiae, etc. di quibus Vasquez disp. 191. v.g. si comburatur hostia, aut pedibus conculcetur, non propterea quidquam poenae patitur Corpus Christi; nec com-

buritur, nec pedibus calcatur, licet sub symbolis contineatur; sicut nec ex eo quod divinitas sit ubique substantialiter praesens, sequitur enim quid comburitur aut calcatur, divinitatem comburi, aut pedibus calcari. Item ex eo, quod divinitas sit in pane, quem mus aut canis comedit, non sequitur divinitatem manducari a mure aut cane; ita nec ex eo quod forte mus aut canis rodat aut manducet hostiam seu symbola, et symbola manducentur, sequitur eos manducare Corpus Christi. Et sicut non est indignum divinitatem esse praesentem in mure, cane, imo et luto et sordibus, ita nec Corpus Christi esse in tali casu comestionis seu corrosionis symbolorum, praesens substantialiter muri aut cani, et ventri eorum, transmissione per guttur symbolorum; sicut etiam proportionem servata, nec est indignum esse substantialiter praesens in pyxide, altari aut arca inanimatis. Et sicut ista non manducant corpus, licet contineant, ita nec canis dicendus foret manducare proprie Corpus Christi, licet manducaret symbola, et per illa sit praesentia substantialis, sicut est in ventre et omnibus rebus praesentia divinitatis substantialis; manducatur enim ab homine Corpus Christi, quia recipitur ut signum, seu, ut causa gratiae; quomodo non est in pyxide, nec foret in ventre canis; quare a cane non dicendum foret *proprie manducari*, ut manducatur ab homine; nec mirum cum etiam adversariis, si canis manducet frustum panis coenae ipsorum, non propterea manducat Sacramentum, quia non manducat, quia signum est. Imaginatio nescio quem horrorem facessit in his conspiciendis. Sed missa haec omnia, cum sint extra fidem, quia extra Confessionem nostram et Tridentinum, sunt facienda.

6. Idem Vasquez, disp. 190. refert aliquos Theologos docere, *Christum esse in hoc Sacramento tanquam in loco per se*; alios Christum in hoc Sacramento non esse tanquam in loco, neque habere proprium *ubi* et distantiam, sicut nec Angelus, cum est praesens alicui corpori, in quo est, seu loquitur, quod ipse probabilius existimat.

7. Extra fidem, et intra septa scholastica considerandae sunt hae aliae quaestiones; 1. *An Chri-*

stus prout existens in hoc Sacramento, videri possit ab oculo corporeo, non naturali sed supernaturali virtute? Affirmat Vasquez et probat, neque agere, neque pati posse Corpus Christi, prout est in hoc Sacramento, corporea actione, neque passione. 2. An existentia Corporis Christi in Sacramento (« pendeat ab existentia naturali extra Sacramentum. Et, An quaecumque imprimuntur Corpori Christi extra Sacramentum, necessario comitentur ipsum in Sacramento. De quo 192. disp. cap. 3. longius amandandum, an Corpus Christi possit esse simul in pluribus locis visibili modo. et secundum extensionem, seu circumscriptive. c. 4. Et adhuc longius, an aliud Corpus a Christo possit esse in diversis locis simul, idque non tantum invisibili modo et definitive, sed etiam secundum extensionem, de quo disp. 189. in quo censet nequidem Corpus Christi, posse esse in diversis locis simul secundum extensionem, etc. »).

8. Longe longius est a Fide, imo falsum puto, *Christi Corpus produci de novo aut conservari in Eucharistia per consecrationem*; quod jam diu productum fuerit in utero Virginis, et conservetur aeternum in caelis: falsum etiam quod eo adducatur, falsissimum quod descendat e caelo ad altare, quasi relinquens caelum et transire per medium aërem. Commenta haec tamen fere omnia deludendis populis, Ministri falso doctrinae Fidei Catholicae adscribunt; quaeque Theologi aliquot in his materiis tenent, solum ut *opinionem probabilem*, Fidei Ecclesiae Catholicae, cui soli subscribere sufficit, hallucinati aut potius malitiose imponunt Ministri, secessioni, ex qua vivunt, fovendae in damnum maximum animarum, et pacis Ecclesiae ac Imperii. Solum dicimus Corpus Christi *esse praesens sub symbolis* virtute divina: quia impossibile est *menti-ri Deum*. Hebr. 6. v. 18. seu ut utamur termino Confessionis Deviorum, Art. 16. *fit hoc virtute secreta et incomprehensibili Spiritus Dei*, seu per ejus omnipotentiam.

9. Secretione hac facta, vix est difficultas ulla, vel ad speciem, qua moti dissideant a nobis adversi: quia habet articulus 36. Confessionis eorum,

Credimus quod virtute secreta et incomprehensibilia nutrit nos et vivificat substantia Corporis sui. Si substantiam hanc praesentem animae substantialiter, quod necessarium est nutritioni quocumque modo fiat etiam per fidem, tenent indubitanter, quid praepedit eam cognoscere sub symbolis et corpori nostro? Praesertim cum ex eo quod anima nostra sit praesens corpori nostro, substantia Corporis Christi nequeat esse vere praesens animae nostrae, quin sit et corpori. Et pares sunt tum numero, tum pondere utriusque praesentiae substantialis, seu substantiae difficultates solvendae, si momentis suis aequae eodemque pondere exacte librentur. Sed utcumque sit, Lutheranorum opinio, inquit Daillaeus Apol. cap. 7. pag. 35. (« qui statuunt Corpus Domini esse realiter praesens in pane Eucharistiae, nullum habet venenum, non praepjudicat pietati »). Et pag. 37. Non praepjudicat eorum saluti ex eorum principiis; non creditum autem devolvit eos ad tartara, ex nostris principiis? Quod securius est amplectantur: Daillaeo praesertim ipso generaliter pronuntiante, Epist. ad Munglatium, pag. 72. (« Credentem posse suam operari salutem in Ecclesia Romana, et tamen viventem extra ejus communionem nec bonum Christianum, nec ferendum civem, nec hominem sensatum haberi posse »). At ex eodem Daillaeo possunt suam operari salutem, credentes Corpus Domini esse realiter praesens sub symbolis Eucharisticis, seu hoc credere non praepjudicat eorum saluti: credant ergo.

§. 12.

De Transubstantiatione.

De hac ita Professio nostra: Profiteor in SS. Eucharistiae Sacramento fieri conversionem totius substantiae panis in Corpus, et totius substantiae Vini in Sanguinem; quam conversionem Catholica Ecclesia Transubstantiationem appellat. Et Trident. sess. 13. can. 2. (« Siquis dixerit in sacro-sancto Eucharistiae Sacramento, remanere substantiam panis et vini una cum corpore et sanguine Christi, Teol. Dogm. Pars IV. 14

negaveritque mirabilem illam et singularem conversionem totius substantiae panis in corpus, et totius substantiae vini in sanguinem, manentibus dumtaxat speciebus panis et vini, quam quidem conversionem Catholica Ecclesia apertissime transubstantiationem appellat, anathema sit. *Et cap. 3. quod inscribitur de Transubstantiatione*: Quoniam Christus Corpus suum id quod sub specie panis offerebat, vere esse dixit, ideo persuasum in Ecclesia Dei semper fuit, idque nunc denuo S. haec Synodus declarat, per consecrationem panis et vini conversionem fieri totius substantiae panis in substantiam Corporis Christi, et totius substantiae vini in substantiam sanguinis ejus; quae conversio convenienter et proprie a sancta Catholica Ecclesia Transubstantiatio est appellata. Haec ibi Concilium, nec plura. Quare ut haec sunt de Fide, quia haec sunt in professione nostra, et proposita a Concilio Generali; ita a contrario, nulla alia doctrina de Transubstantiatione est de Fide Catholica; quia nec in professione nostra, nec in Concilio Tridentino, aut alio generali, licet fovendae discissioni, ex qua vivunt, frequentissime varias, et plerasque partim valde exosas populis, partim blasphemias Fidei Catholicae adscribant Ministri et imponant. Explicatius haec dicamus. Quare 1. non est de Fide, imo blasphemum in hoc mysterio transubstantiari panem in Corpus Christi, sicut panem quem comedimus transubstantiatur in corpus nostrum; aut per transubstantiationem fieri, ut materia panis incipiat esse sub forma corporis Christi, sicut cum panem comedimus, materia panis per nutritionem incipit esse sub forma corporis nostri. Probatur 1. Quia non habetur id in Tridentino: imo contrarium; si enim id fieret, non fieret conversio totius substantiae panis in Corpus Christi, sed materia illius dumtaxat transmutaretur, sicut in nutritione nostra ordinarie fit. 2. Quia si ita esset, Christus esset corruptibilis, augetur, minueretur, ut fit cum panem comedimus, et mutatur in corpus nostrum. Nec de Fide est, Transubstantiationem fieri ex eo, quod de novo producat Corpus Christi, aut conservetur: etiam supra diximus Corpus Christi in Eucharistia

nec produci de novo, nec conservari de novo: aut saltem per illum modum substantialem aut accidentalem produci, quae productio, conservatio, aut modus substantialis, aut accidentalis, aut per quae sit impossibile Corpus Christi, aut Sanguis cum substantia panis, aut vini, et per illam impossibilitatem eam expellat, sicque et hac ratione Transubstantiatio fiat. Imo Corpus Christi, et substantia panis, non sunt ex se impossibiles.

Probatur 1. Quia nihil horum habetur in professione nostra, aut Tridentino. 2. Quia Vasquez et cum eo plurimi, falsa esse haec omnia et singula variorum Scholasticorum placita demonstrat. Falsum inquam esse multis probat, disp. 181. cap. 3. (« Transubstantiationem formaliter esse actionem, per quam modus aliquis substantialis producat »).

(« 2. cap. 4. et 5. Transubstantiationem esse conversionem ipsius Christi, seu productionem novam »).

(« 3. cap. 5. Transubstantiationem esse novam conversionem Corporis et Sanguinis Christi in Eucharistia »).

(« Et cap. 9. praedictum modum conversionis, eum supervacuum esse ex veritate verborum consecrationis, et ex fine Sacramenti ostenditur »).

Quae sit horum opinionum verior, quamquam falsas haec omnes esse arbitremur cum doctissimo Vasquez, non est nostrum hic discutere; sufficit inde probari, longe haec esse a Fide, ex doctorum omnium nostrorum sententia; quorum nec unus somniavit aliquid horum esse, de Fide. Quam ergo calumniose Ministri haec et similia Fidei Catholicae imponunt!

3. Nec est de Fide, panem et vinum per consecrationem annihilari. Probatur 1. Quia neutrum habetur in Tridentino. 2. (« Controversia vocum et non rerum est, inquit bene Vasquez, disp. 183. cap. 1. qui addit: Nonnulli Scholastici veram Transubstantiationem concedentes, docent panem et vinum, quae dicuntur converti, ita desinere, ut vere annihilentur; in hac sententia est Scotus, Okam, Gabriel, Major; quin, inquit, neque de hac re nimium contendendum est, sed unicuique liberum

relinqui debet. hoc aut illo modo loqui. Peranti-qua tamen, habet Vasquez, cap. 2. Scholasticorum sententia quam libenter amplector, est dici non posse panem et vinum in hoc Sacramento annihilari »). In cujus probatione susinus est, cap. 2. et 3.

4. Longe longius a Fide sunt hae aliae quaestiones, quia etiam sunt extra Transubstantiationem particularem in Christi corpus de qua sola agimus, propositae et discussae a Vasquez, qui haec habet: Primo, disp. 82. (« An Corpus Christi praesens fieri poterit huic Sacramento absque conversione panis in ipsum ») variae sunt Scholasticorum sententiae quas fuse refert cap. 2. disp. 184. An quaelibet res in quamlibet aliam converti possit, variae Scholasticorum sententiae. Probatur ex regulis datis nihil horum esse de Fide.

5. Quid ergo est, et in quo consistit haec Transubstantiatio? Non discedendum a verbis Trid. cap. 4. citatis, et ibi haerendum, *nec sapiendum plus quam oportet sapere, sed sapere ad sobrietatem*. Adhuc tamen quae conformiter huic capiti habet Vasquez, non quod statuamus quae inferi de Fide esse; sed sufficit, quo quis sit Catholicus, Transubstantiationi hoc modo, aliis si placet refutatis, acquiescere: potro facillimum erit enivis subscribere, nullam enim prorsus difficultatem habet doctrina Transubstantiationis sic docte explicatae: (« Explois, inquit, disp. illa 18. cap. 11 aliorum opinionibus, superest, ut nostram sententiam, quam antiquorum Scholasticorum sine controversia esse censemus, in medium proferamus »).

(« Ea vero est, rationem formalem Transubstantiationis, neque esse mutationem, neque productionem alicujus rei, sed relationem quamdam ordinis, inter substantiam quae desinit, et eam in quam desinere dicitur, ex quo fit, ut haec conversio seu Transubstantiatio, nulli alii mutationi aut actioni omnino assimiletur. Et cap. 12. Memorandum quod supra diximus, talem esse significationem verborum consecrationis, ut vi significationis ipsorum, non solum fiat Corpus et Sanguis Christi praesens reipsa sub speciebus, sed etiam desinat substantia panis et vini; quia cum sint a Christo instituta, et

nomine illius proferatur, vera esse debent: vera autem esse non possunt, nisi efficiant Corpus et Sanguinem Christi praesentem sub speciebus, et destruant panem. Potuit adductio Corporis Christi, et desitio panis a Christo fieri alia forma verborum; cuius altera parte significaretur praesentia Corporis et Sanguinis Christi, altera vero desitio panis et vini, ut si Christus aut Sacerdos nomine Christi diceret, *Hic sit Corpus meum, et amplius non sit panis*: vel contra: *Hic non sit panis, et sit Corpus meum*: Et de Sanguine similiter. Quamvis autem tunc idem effectus fieret, qui nunc fit, quod attinet ad desitionem panis, et praesentiam Corporis et Sanguinis Christi, tamen non fieret eodem modo: neque enim tunc Christus aut Sacerdos diceretur, adducendo Corpus Christi, destruere panem, aut destruendo panem, adducere Corpus Christi: sed diceretur simul adducere et destruere: quia eodem modo desitio et adductio in re ipsa se haberent, sicut etiam in significatione verborum; in significatione autem ita se haberent, ut significatio unius, non esset causa significationis alterius; neque ad suam veritatem illam, ut quid consequens necessario postulant, sed simul tantum se invicem comitareutur, et per accidens seu comitanter, ut dicitur se habereut, sicut in ea forma verborum apparet: ut vero in forma qua nunc utimur ad consecrandum, illa duo sic se habent, ut unum tantum significetur, nempe Corpus, aut Sanguis Christi praesens (neque enim verba consecrationis significant desitionem panis et vini, ut patet) ita tamen ut vera significatio Corporis et Sanguinis Christi praesentis, necessario postulet desitionem panis et vini: ac proinde desitio necessario consequatur Corpus Christi praesens, prout illis verbis significatur: quo fit ut Sacerdos utens illis verbis, vere dicatur efficere praesens Corpus et Sanguinem Christi, et ipso corpore praesente vere significatio destruere panem »).

Nam docet bene idem, disp. 180. cap. 4. (« Accidentia primarie saltem indicant propriam substantiam quamdiu ibi est, non autem alienam, et ita ostendens quodlibet corpus in quo Deus reipsa est, nemo vere enuntiare potest: Hoc est Deus; et si

Angelus esset in aliquo corpore, nemo ostendens corpus illud vere et proprie dicere posset: *Hoc est Deus: hoc est Angelus*; sed ut vere enuntient, dicere debet: *Hic est Angelus, et hic est Deus*; hoc est, in hoc loco aut corpore. Cum enim pronomen hoc demonstrativum, directum ad accidentia quae sentiuntur, non demonstret illa, sed substantiam sub illis, et propria haec substantia primarie, imo solum demonstretur; efficitur ut praesente propria substantia aliena nequeat demonstrari. E contrario vero si propria substantia sub accidentibus suis non sit, sed aliena, recte etiam, imo necessario, aliena demonstratur. Cum igitur Christus postquam accepit panem, vere enuntiaverit illud, quod sub speciebus offerebat, esse corpus suum; et accepto calice cum vino, illud quod sub speciebus illis offerebat, esse sanguinem suum, neque vere haec verba enuntiare potuerit, de ipsa substantia panis et vini, ut patet, neque de suo corpore et sanguine naturali, si cum substantia panis et vini sub propriis accidentibus illis simul manerent, ut probatum est; necessario fieri debuit, ut substantia panis et vini desineret, et sola substantia corporis et sanguinis Christi sub illis accidentibus maneret. Praedicta ratio, quod attinet ad destructionem substantiae panis et vini, de qua hic solum disserimus ») (nam de praesentia reali satis diximus) *efficacissima*. Uno verbo transubstantiatio nihil addit praesentiae Corporis Christi, nisi *desitionem panis* virtute significationis verborum, seu quo verba Christi sint vera; et nomine transubstantiationis, nihil aliud est intelligendum, ut patet ex dictis. *Conversio formaliter*, inquit Vasquez, disp. 181. cap. 12. (« est demonstratio quaedam Ordinis, in eo quod desinit relata ad id, quod fuit causa desitionis in hoc Sacramento, *quo verba sint vera*; et nihil aliud esse potest praeter denominationem Ordinis, et quidem extrinsecam et solius rationis, seu praeter relationem et quidem non realem »); sed rationis solius. Saltem certissimum est, tenere sic transubstantiationem, efficere quo sis Catholicus, quidquid sit de variis opinionibus quorundam Scholasticorum rejectis a nobis supra.

Rogamus te quae difficultas, posito quod creda-

tur *Corpus Christi realiter esse praesens in pane*, seu sub symbolis *Eucharistiae*, credendi Transubstantiationem haec? nulla sane.

6. Aut saltem doctrina Transubstantiationis sic exposita, non est legitima causa secessionis, seu posito ex Daillaeo Apol. cap. 7. quod credere (« *Corpus Domini esse praesens in pane Eucharistiae, nullum habeat venenum, nec praepjudicet pietati; nec saluti, ne quidem credentis id, dicendum certo transubstantiationem nullum continere venenum, nec praepjudicare pietati seu saluti credentis illam* »); cum ipsa nihil addat reipsa praesentiae nisi *desitionem panis*, quo verba Christi sint vera; quae desitio non potest nisi ab emotae mentis homine censeretur *praepjudicare pietati seu saluti*, posito quod credere praesentiam illam non *praepjudicet*. Unde recursus ex alio Daillaei principio supra relato sequitur: *Nec bonum Christianum, nec ferendum civem, nec hominum sensatum haberi posse in imperio, qui non credit transubstantiationem ut jam explicatam.*

§. 13.

De adoratione Eucharistiae.

Professio nostra nihil habet distincte de hac adoratione, quod sequatur ex praesentia Christi sub symbolis. Trident. autem de ea expresse sic sess. 13. can.

6. « Si quis dixerit in Saucto Eucharistiae Sacramento Christum non esse cultu laetiae etiam externo odorandum: adeoque nec festiva peculiari celebritate veverandum, neque in processiouibus secundum laudabilem et uniuersalem Ecclesiae sanctae ritum et consuetudinem solemniter circumgestaudum, vel non publice, ut adoretur, populo proponendum, et ejus adoratores esse idololatrias, anathema sit. *Et cap. 5. postquam cap. 3. assertum est, verum Domini nostri Corpus verumque ejus Sanguinem, sub pauis et vini specie, una cum ipsius anima et diuinitate, existere: et Transubstantiatione, cap. 4. stabilita, docet inferenda, cap. 5.* Nullus itaque dubitandi locus relinquitur, quia omnes Christifideles, promore in Ecclesia Catholica semper recepto, laetiae

cultum, qui vero Deo debetur, huic Sanctissimo Sacramento, in veneratione exhibeant. Neque enim ideo minus est adorandum, quod fuerit a Christo Domino ut sumatur institutum; nam illum eundem Deum praesentem in eo adesse credimus, quem Pater aeternus introducens in orbem terrarum dicit: *Et adorent eum omnes Angeli ejus.* Psal. 96. v. 8. Hebr. 1. v. 6: *Quem Magi procidentes adoraverunt.* Matt. 27. *Quem denique in Galilaea ab Apostolis adoratum fuisse Scriptura testatur,* Matt. 8. v. 12. »). Hoc ergo est de Fide, quia propositum in Concilio universalis. Unde e contrario sequitur nihil aliud de adoratione hac esse de Fide. Sequitur itaque.

Primo: non esse de Fide, imo meram putamque calumniam, eamque gravissimam, quod imponit Daillaeus doctrinae Ecclesiae Catholicae, eoque majori poena dignum crimen, quod doctrinam hanc nobis impositam statuit tanquam principem discessionis in religione, et proinde turbationi tum Ecclesiae, tum Imperii, in Apolog. cap. 9. subscripta ab aliis Ministris Maestrezatio, Drelineurtio, et Aubertino, et in Epist. ad Munglatium his verbis: (« Quaestio est, *inquit*, non quod oporteat adorare Corpus Christi in Eucharistia, sed quod oporteat adorare Eucharistiam ipsam, ut inclamo et protestor in titulo, principio, et medio, et fine, cap. 9. Apol. At magnum discrimen est inter has duas adorationes. Haec ultima defertur certo cuidam objecto subsistenti in loco quo dirigitur, scilicet substantiae relatae ab accidentibus panis et vini; quo fit ut praesupposito quod haec substantia sit quaedam creatura, talis adoratio ei exhibita, erit necessario servitium illicitum et prohibitum a Deo: cum tamen prima adoratio sit solum vana et inutilis, et cadat, ut sic dicam, in nihilum, errans, non quod deferatur objecto non adorabili, sicut facit alia, sed in hoc solum, quod errore quaerat eum, et putet se complecti ibi, ubi non est »). Ita Daillaeus, ultimam istam adorationem distinctam et aliam a prima, sed duas adorationes objectorum subsistentium sub symbolis, quod horremus, nobis affluens. Sed quod talis adoratio *non sit de Fide*,

patet. 1. quia non habetur in Trident. 2. Nullus nostrorum Doctorum finxit duplicem illam adorationem sic relatam a Daillaeo, duorum objectorum subsistentium, seu ultimam scilicet, *delatam certo cuidam objecto* subsistenti in loco quo dirigitur, nempe substantiae velatae sub accidentibus panis et vini, praeter adorationem primam delatam ipsi Christo. Quis Catholicorum, dico, haec objecta adorationis sub speciebus somniavit? nullus sane: et pestifere somniaret; nec adoramus *aliquid subsistens indefinite, quidquid illud sit*, sub speciebus, sed solum Christum creditum ibi esse; ergo calumnioso id nobis affingit Daillaeus. Probatur 3. ex Responso doctissimae Facultatis Theologicae Parisiensis in haec verba: Petitur a DD. Doctoribus, respondeant: (¶ An factum contentum in pag. 63. epist. D. Daillaei, ad D. Munjat. anni 1634. sit verum. Subsignati Doctores Theologicae Facultatis Parisiensis respondent quod factum est falsum, et impositum Ecclesiae Catholicae, quae adorando Sanctam Eucharistiam, non credit ibi adorare aliud subsistens velatum ab accidentibus panis et vini, quam Jesum Christum; dicit anathema iis, qui ibi vellent adorare aliam quaecumque substantiam. Et falso supponitur ab auctore plus esse periculi in adoratione Catholici, quam Lutherani, quod Catholicus defert adorationem suam objecto non adorabili, et proinde ejus servitium necessario illicitum esse et prohibitum a Deo; cum verum sit, objectum quod Catholicus ibi adorat, esse Jesum Christum adorabilem, ubicumque est, et proinde in Eucharistia, in qua Ecclesia Catholica, post consecrationem, non cognoscit nec recognoscit aliam substantiam, quam Jesum Christum: quare nec aliam ibi adorat, nec potest adorare. Et si ex inconsideratione aut aliter, loco Eucharistiae, propositus foret panis non consecratus, Catholicus non intendit, nec credit adorare, nec posse adorare dictum panem; nec vult eum adorare, nec aliud subsistens quam Jesum Christum. 18. Aprilis 1643. Subsignati in Originali. *Jacobus Hennequin, Emmeretz, Perret, du Fresne, de Minie, Chapelas, M. Cantat, Brouffè, Judas, A. de Mauhy.* »). Quis vel

Deviorum ferat Ministros doctrinam falsam Catholicam imponentes, et ea impostura scissionem foveutes tam noxiam Ecclesiae, salutem animarum et Imperio?

2. Haud longe dissimilis calumnia est, cum idem Daillaeus praeter adorationem Christi sub speciebus, fingit Apol. pag. 45. 46. 66. nos adorare Sacramentum latriae absoluta. Quis Catholicorum fingit duas adorationes absolutas, unam Christi in Eucharistia, aliam Eucharistiae ipsius, sive subsistentis ficti a Daillaeo? Et cum dicimus nos adorare adoratione absoluta Sacramentum, intelligimus Christum ipsum sub speciebus, quem saepe rem Sacramenti et Sacramentum; quod ibi sit tanquam causa gratiae, solemus nuncupare; alias absit ut Sacramentum adoratione absoluta, quod sine idololatria non possumus, adoremus. Veneratio Symbolorum, de qua postea ut distinctorum a Christo, est omnium nostrorum sententia solum relativa, non absoluta. Eo aliam itaque vel similem praecedenti imposturam.

3. Non est de fide, imo nec verum, duas adorationes poni a Trid. sess. 13. cap. 5. alteram Christi, alteram Sacramenti, ut supponit Daillaeus. Quia Trident. non habet esse duas. 2. Recte Vasquez, disp. 109. cap. 3. Cum, inquit, Trident. de adoratione Sacramenti Eucharistiae loquitur atque affirmat latriae cultum, qui vero Deo debetur, huic Sacramento in veneratione esse exhibendum, de («Christo sub speciebus contento, vel de ipsis ut Christum continentibus loquitur; nam et ipsum Christum ad rationem Sacramenti pertinere multi recte arbitrantur; cum ipse sit res sacramenti, Sacramentum etiam dicitur; aut saltem species non dicuntur Sacramentum, nisi quatenus sub se corpus et sanguinem Christi reipsa continent »). Haec recte Vasquez. 3. Probatur. Quia habet Trident. Latriae cultum, qui vero Deo debetur, huic Sacramento in veneratione exhiberi. At certum est cultum illum latriae esse absolutum, et certum etiam absolutum non deberi nisi Christo. 4. Quia addit Trident. cultum illum delatum a Magis, etc. Quis autem non videt cultum illum fuisse absolutum Christi ipsius, nec alium? 5. Infert illum ex praesen-

tia Christi, adorabilis ubicumque sit. Ergo nulla ibi mentio adorationis symbolorum. Quare Sacramenti nomine adorandi *latria absoluta*, Christus ipse sub symbolis intelligitur, qui sub illis etiam Sacramentum a nostris saepe dicitur, quod sit ibi significans et datus gratiam, uti jam diximus. Saltem quae dicimus, a nemine Catholicorum habentur; ergo saltem falsum est, *de Fide esse*, duas adorationes poni a Trident. *Christi et Sacramenti*, tanquam distinctas, seu ut duas: una et eadem varie et vario modo exprimitur.

4. De Veneratione symbolorum, quae sine dubio *relativa* est, non *absoluta*, non foret quod quidquam diceremus; de illa enim nihil dixit Dailaeus, nec ulla est peculiaris difficultas. Vasquez, 3. part. disp. 118. cap. 12. docet pluribus: « Eundem modum in Sacramenti Eucharistiae adoratione servandum, quem in Imaginum cultu: scilicet Corpus Christi in Eucharistia dignum esse adoratione latriae. Quod pluribus probat, cap. 12. Quomodo vero, addit ibidem, species ipsae Sacramenti adorantur, seu veneratione dignae sint, inter Scholasticos dissensio est; omnes enim eodem modo de speciebus Sacramenti, quod de Imaginibus Christi, philosophari debent, cum sit utrobique terminus idem formalis, Christus scilicet adoratur; non est tamen tam fervens affectus reverentiae erga Christum in Imagine, quam in Sacramento, ob ejus in isto praesentiam, et aliquo signo exteriori majorem hanc reverentiam erga Christum in Sacramento, quam in Imagine indicamus. Species sacramentales, inquit ibidem, sunt res inanimatae, et secundum se capaces non sunt cultus et honoris, nisi quatenus conjunctae cum Christo quem continent. Quare adoratio nulla ratione in exterioribus accidentibus sistere potest, sed ad intima penetrare debet, nec adorantur accidentia, sed Christus contentus sub illis »). Relege quae diximus de Imaginum cultu, et licet applica eodem omnino modo, sicut ibi diximus, non esse de Fide Imagines ne quidem Christi adorari, multo minus latria, imo vel cultu religioso coli, multo minus eodem cultu quo prototypum; ita dicimus non esse de Fide species sacramen-

tales seu symbola adorari, multo minus cultu latriæ coli, vel cultu religioso, vel eodem cultu quo Christus; nec proinde Sacramentum Eucharistiæ, sumptum, ut sæpe sumi solet, pro symbolis, signis, et speciebus.

Nec Catholicus ullus intendit sic adorare albedinem, et rotunditatem quam cernit oculis, sed solum Christum, quem non videt, credit tamen ibi contentum: symbola tamen, sicut vestem regis veneratur. Recentiores aliqui putant, inquit Vasquez, cap. illo 12. (« Gabrielem in ea fuisse sententia, ut diceret Sacramentum hoc, id est, species sacramentales, per figuram Synecdochen, hoc est, ratione Christi sub eo contenti, non autem proprie, adorari »): quod ipsemet Vasquez censet non improbandum.

5. Placet etiam ob multa alia conjuncta, addere istud ex Vasquez, disp. 109. cap. 4. (« Ex effectu latriæ, qui dicitur adoratio, et circa exemplar primo versatur, derivatur nota exterior submissionis, quæ communi modo loquendi dicitur honor, cultus, et adoratio ejus, quod corporaliter contingit, aut coram quo fit; ita ut per illud in prototypum transmittatur; at opus externum laudis, quo laudamus exemplaris excellentiam, opus etiam orationis, et sacrificii, solum dicitur communiter aut laus, aut oratio, aut sacrificium ad exemplar relatum, non ad Imagines; et ideo communiter nec ad Imagines, nec ad res inanimatas et adhuc per accidens hæc omnia referri, sed coram illis fieri dicuntur. Idem quod de Imaginibus hactenus diximus, de speciebus et accidentibus sacramentalibus dicendum arbitror: ob eandem prorsus rationem. Data opera dixi, de speciebus seu accidentibus sacramentalibus; nam si de Sacramento loquamur, cum aliquid illius sit Christus ipse, ut supra notavimus, sicut absolute dicimus ipsi latriam in spiritu exhiberi, sic etiam et orationem, et laudem divinam, et sacrificium, ad ipsum posse referri hæc de causa fatendum est »).

6. Uno verbo, ut eodem honore regio, non duplici aut diverso, honoratur Rex sine pallio et cum pallio, aut rheda tectus; ridendumque se aulicis et

prudentibus exhiberet, qui Regi, absque pallio honorem redderet regium, palliato aut rheda tecto denegaret; et stultus omnino judicaretur, si hinc a Regia rebellis fugeret, ne palliatum aut rheda tectum colere cogèretur: ita ridendos, ne dicam stultos, se exhibent Devii, dum *Eucharistiam ipsam adorare*, idololatriae incusant, seu Christum vel ut palliatum et tectum symbolis (quomodo propositum Christum sub speciebus *Eucharistiam*, et Sacramentum *Eucharistiae* nuncupamus) horrent adorare, et propterea scissionem ab Ecclesia faciant, neutiquam faciendum licite, seu non esse idololatriam, si non adoretur *Corpus Christi in Eucharistia*; seu si Christus seu extra Sacramentum, seu etiam in Sacramento adoretur; ut habetur in Epist. ad Munglatt. pag. 63. jam relata. O singularem stultitiam in hoc praecipue schisma facere ab Ecclesia Romana, quod tamen ex Ministris in hoc maxime fundatur, ut ex Apologia et Epist. ad Munglatt. supra citatis retulimus! Sane Christus seu nudus in praesepti, aut cruce, seu tectus vestibus, seu operatus caelo aut symbolis (quo in statu Christum ipsum Sacramentum *Eucharistiae* nuncupamus; et hoc sensu, nec alio Sacramentum hoc latría adoramus) eodem prorsus cultu adoratur. Riderent Devios, doctoresque nostros aulici, si quis haec regio honore applicata discuteret, et quali honore pallium Regis operiens Regem, aut in vestiario repositum, honorandum foret, multis clamoribus digladiaretur.

7. *Spectatum admissi risum teneatis amici?* Devios acriter, et tam multis decertantes *quali honore seu species sacramentales*, quae sunt pallii, seu opertorii instar, seu *Sacramentum*, id est, species tegentes Christum, et ut includentes Christum, seu Christus sic tectus, sit colendus, et an duplex sit honor, et praeterea alius sit relativus specierum, et qualis.

Vereor et ne aulici, cum ista tot subtilitatibus in scholis nostris involvimus, taciti subsannet nos; nec forsán immerito, cum non sine risu exciperentur applicata honore regio, in quo tamen est eadem omnino ratio, et similes prorsus formari circa illum possint difficultates, et moveri lites.

8. Attamen saltem, si credere Christum esse, realiter praesentem sub symbolis Eucharistiae, ejusque corpus sub iis creditum, adorare in Eucharistia, nullum habet venenum, nec praedjudicat salutem illud credentis, et sic adorantis, nemo sanae mentis potest dicere praedjudicare salutem, aut venenum aliquod habere, Sacramenti seu Eucharistiae adoratio, et quidem patriae absolutae et summae, modo a nobis explicata. Unde rursum sequitur, nec bonum Christianum, nec ferendum civem, nec hominem sensatum haberi posse, qui dictam refugit adorationem sacramento seu Eucharistiae exhibere, ut patet ex dictis.

§. 14.

De sacrificio Missae.

Sic habet Professio nostra: *Propterea in Missa offerri Deo verum, proprium, et propitiatorium sacrificium, pro vivis et defunctis.* Et Trid. sess. 22. can. 1. (» Si quis dixerit in Missa non offerri Deo verum et proprium sacrificium, aut quod offerri non sit aliud, quam nobis Christum ad manducandum dari, anathema sit. Et can. 3. Si quis dixerit Missae sacrificium tantum esse laudes et gratiarum actiones, aut nudam commemorationem sacrificii in Cruce peracti; non autem propitiatorium, vel soli prodesse sumenti, neque pro vivis et defunctis, pro peccatis, poenis, satisfactionibus, et aliis necessitatibus offerri debere, anathema sit »). Haec ibi de Fide, quia proposita a Concilio universali: a contrario nihil sequentium est de Fide.

Primo, itaque de Fide non est, sacrificium Missae esse Sacrificium absolutum, et non tantummodo commemorativum, seu relativum, veruntamen verum et proprium: sed et quae sequuntur, in quibus nutant Doctores, ut referam, non sunt de Fide. Probatur 1. Quia Tridentinum nihil de his rebus statuit, in quo non deerant viri doctissimi, qui scirent haec controversa esse in scholis. Probatur itaque.

2. Quia haec controversantur etiam inter Docto-

res Scholasticos, referente Vasquez, disp. 222. cujus vel soli capituli tituli sufficiunt nostro intento his verbis.

(„ Oblationem illam quae quibusdam verbis fit a sacerdote ad rationem sacrificii nullo modo pertinere, *cap. 1.* Neque fractionem, neque distributionem hujus Sacramenti ad essentiam sacrificii spectare, *cap. 2.* De consumptione hujus Sacramenti comparata cum sacrificio variae sententiae, *cap. 3.* Essentiam hujus sacrificii in sola consumptione non consistere, neque eam aptam esse ut ad aliquid horum a Christo institueretur, *cap. 4.* In sola consecratione hujus Sacramenti totam essentiam hujus sacrificii positam esse in universum probatur, *cap. 5.* Vera ratio sacrificii in consecratione posita, varie exponitur a Theologis, *cap. 6.* Eatenus solum in consecratione rationem hujus sacrificii positam esse, quatenus sacrificium crucis eo repraesentatur, testimoniis Patrum ostenditur, *cap. 7.* Essentia hujus sacrificii ex sola mortis Christi repraesentatione, optima ratione colligitur, *cap. 8.* Diluuntur objecta adversariorum, *cap. 9.*). Ita varii varie sentiunt; proinde nihil horum est de Fide. Summa sententiae Vasquez habetur *cap. 8.* (Ratio sacrificii in significatione omnipotentiae Dei auctoris vitae et mortis formaliter posita est: ac proinde sit oblatio aliqua per quam absque rei oblatae immutatione vera et reali, Deus auctor vitae et mortis denotari et coli possit, vere et proprie sacrificium dici debet. Hujusmodi autem est consecratio corporis et sanguinis Christi, absque reali immutatione ipsius Christi, ob solam repraesentationem mortis ejus; illa igitur vere et proprie sacrificium erit. Porro autem per solam repraesentationem mortis Christi in consecratione, ita significari Deum auctorem vitae et mortis, sicut per ipsam cruentam mortem Christi, manifestum est; nam commemoratio mortis Christi repraesentat, et quasi praesentem,) eam facit, denotat Deum, auctorem vitae et mortis, ac si tunc Christus in honorem Dei reipsa occideretur; atque adeo ad essentiam sacrificii in universum immutatio rei oblatae non requiritur, quia commemorativum sacrificium, sine illa esse po-

test, tamet si ad essentiam sacrificii *absoluti* necessaria sit, eo quod ratio formalis sacrificii, quae est significatio non in verbis sed in rebus, qua denotatur Deus auctor vitae et mortis, sine tali immutatione in sacrificio commemorativo reperitur.

Est tamen valde observandum ad sacrificium commemorativum, quod vere et proprie sacrificium dicitur, non satis esse si solum sit signum nudum mortis alicujus rei, nullo modo continens in se rem ipsam cujus mors repraesentatur; sic enim non diceretur res illa cujus mors repraesentatur, in sacrificio offerri, neque vere commemorativum sacrificium, quin potius signum tantum et larva sacrificii esset, et necessario requiritur ut ipse cujus mors repraesentatur, sit signum mortis sui ipsius: v. g. si vera esset sententia haereticorum, qui negant sub speciebus panis et vini Corpus, et Sanguinem Christi, et substantia panis et vini ibi esset, repraesentari quidem posset mors Christi, ut ipsi haeretici etiam concedunt, at Christus in sacrificio non vere et reipsa, sed tantum in figura offerretur. Nam quo pacto vere et reipsa in sacrificio offerri dici potest id, circa quod actio Sacerdotis offerentis non reipsa, sed tantum similitudine quadam, et in figura versatur? („Caeterum etiam ipsemet Christus sit sub speciebus panis et vini, et circa illum actio sacerdotis offerentis ipsa ita versetur, ut ipsemet per species panis et vini, ex modo peculiari quo a sacerdote consecratur, repraesentet cruentam et realem mortem sui ipsius, et ea repraesentatione denotet Deum auctorem vitae et mortis, quamvis non dicatur reipsa et vere, sed in sola figura et similitudine, occidi et mori; tamen vere, et reipsa immolari, et in sacrificio offerri dicitur»). Haec Vasquez. Quid facilius creditu sacrificio vero et proprio, solum tamen commemorativo, non absoluto, sic explicato?

2. Aut saltem, posito quod credere Corpus Christi esse realiter sub symbolis panis, nec habeat venenum, nec praepjudicet saluti credentis, ex Apol. cap. 7. quis non dicet, credere Sacrificium verum et proprium, sed commemorativum, ut explicatum,

non habere venenum, nec *præjudicare salutis*? Ex quo rursus deducet, *bonum Christianum*, nec *ferendum civem*, nec *hominem sensatum haberi posse* in imperio, qui non credit tale *sacrificium*, quod sufficit quo quis sit Catholicus, ut supra diximus in simili.

De *Propitiacione*, præter jam relata ex Tridentino, habendum in explicationem ex eodem, quod habet sess. illa 22. cap. 2. (, Et quoniam in divino hoc sacrificio quod in Missa peragitur, idem ille Christus continetur, et incruente immolatur, qui in ara Crucis semel seipsum cruenta obtulit, docet sancta Synodus Sacrificium istud, vere propitiatorium esse, per ipsumque fieri ut si cum vero corde et recta Fide, cum metu et reverentia contriti ac poenitentes ad Deum accedamus, misericordiam consequamur, et gratiam inveniamus in auxilio opportuno. Hujus quippe oblatione placatus Dominus gratiam et donum poenitentiae concedens, crimina et peccata etiam ingentia dimittit; una enim eademque est hostia, idem nunc offerens Sacerdotum ministerio, qui seipsum tunc in cruce obtulit, sola offerendi ratione diversa; cujus quidem oblationis cruentae inquam fructus, per hanc uberrime percipiuntur, tantum abest ut illi per hanc quovis modo derogetur. Quare non solum pro fidelium vivorum peccatis, poenis, satisfactionibus, et aliis necessitatibus, sed pro defunctis in Christo nondum ad plenum purgatis rite juxta Apostolorum traditionem offertur »). Haec ibi. Quare ut haec sunt de Fide, ita nec plura sunt Fide credenda. Sicque quae blaterant adversarii contra *propitiacionem*, facile diluuntur. Itaque.

Longe abest ut sacrificium Missae sit *propitiatorium*, sicut sacrificium crucis. Nam istud meritum fuit redemptionis, seu remissionis peccatorum, et gratiarum omnium, quae nobis conferuntur, et omne meritum Christi in eo fuit consummatum, et hoc sensu fuit *propitiatorium*; illud vero esse voluit Christus, *veluti instrumentum*, inquit bene Vasquez, disp. 229. cap. 2. *quo meritum passionis suae nobis applicaretur*, ut et applicatur per Sacramenta, per fidem, et per bona opera: et hoc.

sensu propitiatorium est, quomodo etiam fides, et pleraque sunt propitiatoria. Quid facilius credita tali propitiatione? Et quae ibi derogatio propitiationi sacrificii Crucis?

2. Non nisi per *impetrationem* hoc conferre, et proinde nonnisi (» per *impetrationem* et mediate esse propitiatorium, docet bene Vasquez, disp. 128. cap. 2. et 3. ubi probat hoc sacrificium non habere vim instar Sacramenti Poenitentiae, scilicet *immediate*, non modo remittendi mortalia, sed nec venialia, vel conferendi gratiae seu justificationis augmentum, sed tantum mediate, seu vim inpetrandi Patris auxilium, quo et a venialibus justificari, et in justificatione sua homo crescere possit, seu *inpetrandi* spiritum poenitentiae et contritionis, per quam peccata nobis remittuntur ») aut alios sanctos motus animi, per quos homo possit crescere in justificatione. Hoc modo, scilicet per *impetrationem*, sunt propitiatoriae fides, oratio, etc. sed istae ex pietate et honestate operantis: illad virtute rei oblatae seu justificationis Christi: eodem modo scilicet per *impetrationem* bona etiam temporalia, salus corporis, liberatio ab aegritudine aliqua, fructus terrae, et id genus alii effectus sunt hujus sacrificii, quae etiam oratio impetrat. Quae ergo difficultas credendae talis propitiationis, et obtentionis talium effectuum?

3. Non semper certa lege, inquit idem Vasquez, ead. disp. cap. 4. (» sed aliquando virtute hujus sacrificii obtineri auxilium gratiae ob justificationem et bona temporalia, experimento compertum est. Et ibidem addit idem: Nam non semper remittit peccata eo modo, quo supra dictum est per ipsum remitti, neque semper virtute ipsius conferuntur illa auxilia spiritualia, neque semper bona temporalia intuitu illius a Deo impetramus »).

(» 4. Oblatione hujus sacrificii proxime, seu *immediate*, et semper certoque remitti poenam temporalem viventium, seu debitam eorum peccatis, et hoc etiam modo propitiatorium esse pro-vivis, nulla ratione negari potest, inquit Vasquez ibidem, et probat: Quia cum sit causa particularis, per quam nobis applicatur meritum universale Passio-

nis Christi, *ut ex Trident. retulimus*, opus est ut illi aliquem effectum sicut etiam Sacramentis, certo tribuamus, tametsi pendeat ex dispositione ejus, pro quo offertur; nullus autem ei tribui commodius potest, quam remissio poenae, si quidem reliquos non semper confert (*ut jam ex ipso retulimus*). Reliquum igitur est ut effectus quem certa lege hoc sacrificium semper operatur, sit remissio poenae jam in viventibus, juxta cujusque dispositionem (*et hoc etiam nomine est propitiatorium pro vivis et defunctis* »). Addit tamen: *Quamquam ab Ecclesia definitum non sit*. Hoc ergo quod certo semper, seu certa lege, poena haec temporalis remittatur, non est de Fide.

5. Disputat Vasquez, disp. 229. (» Utrum omnes effectus hujus sacrificii, tam pro vivis, quam pro defunctis, dicendi siut ex opere operato, an non. Tametsi, inquit, Scholastici omnes, quod attinet ad rem ipsam, eodem modo sentiant, diverso tamen modo loquuntur, variasque Theologorum opiniones refert, cap. 1. Nec est idem, inquit, aliquid nobis donari virtute sacrificii ex opere operato, et certa lege conferri »). Non itaque est de Fide, sacrificium hoc praedicta operari *ex opere operato*; nam Trident. nihil habet de hac re, et Theologi diversimode hunc modum loquendi exponunt, de quo ibi fuse Vasquez.

6. De propitiatione ejusdem sacrificii *erga defunctos*, haec specialiter notanda 1. ex Vasquez, disp. 218. cap. 4. (» Defunctis sacrificium illud nullo alio modo prodesse potest, quam remittendo poenam temporalem, ut patet »).

2. Quod jam notavimus supra, *aliquos putare specialiter de sacrificio Missae oblato pro defunctis, non habere tantam efficaciam ut infallibiliter acceptetur, neque esse aliquod opus, quod ex opere operato liberare possit animas defunctorum a paenis lege certa et infallibili*. Et Vasquez ibidem, cap. 4. *Sotus*, inquit, *Canus*, et *Corduba* censent, sacrificium Missae circa vivos certa lege semper operari remissionem poenae; circa defunctos vero existentes in purgatorio, non item, sed illis solum ad hunc effectum valere per modum suffragii; vo-

cant autem per modum suffragii, quod solum pro-
sit prout Deo placuerit illud acceptare, neque certa
lege statuerit, propter illud defunctorum poenas
remittere; sic arbitrantur effectum sacrificii Missae
circa defunctos non esse ita certum, sicut circa
vivos.

7. Longissime est a Fide, valorem hujus sacri-
ficii esse infinitum, de quo Vasquez, disp. 130 cu-
jus caput 1. inscribitur, valorem et virtutem hujus
sacrificii finitam esse, non pauci Theologi autem-
mant.

8. Hac secretionem facta doctrinae Fidei, ab ea
quae non est de Fide, quam facile est credere *Sa-
crificium Missae* esse propitiatorium pro vivis et
defunctis! Patet etiam ex ea, quam multa Ministri
affingant falso doctrinae Fidei Catholicae, schisma-
ti et divisioni, ex qua vivunt, fovendae.

9. Sed esto, difficultas aliqua maneat; saltem do-
ctrina haec Fidei sic exposita *nullum habet vene-
num, nec praepjudicat pietati et saluti credentis il-
lam*, posito quod credere *Corpus Christi* esse rea-
liter praesens in panis symbolis, nullum habeat ve-
nenum. Unde rursus sequitur *nec bonum Christian-
um, nec ferendum civem, nec hominem sensatum
haberi posse in imperio*, qui huic doctrinae non
subscribit.

§. 15.

De Papa, ejus primatu et auctoritate.

Confessio nostra hoc solum habet: *Sanctam Ca-
tholicam et Apostolicam Romanam Ecclesiam, om-
nium Ecclesiarum matrem et magistram agnosco:
Romanoque Pontifici, B. Petri Apostolorum Prin-
cipis successori, ac Jesu Christi Vicario, veram
obedientiam spondeo ac juro.* Ex Trident. sumptum,
sess. 25. in quo nec plura. (« Sancta Synodus Pa-
stores omnes obtestatur, ut illa omnia, quae san-
cta Romana Ecclesia, omnium Ecclesiarum mater
et magistra statuit, quibuscumque fidelibus sedulo
commendent, omnique diligentia utantur ut illis
omnibus sint obsequentes. Et in singulis fere ses-
sionibus habetur: In Tridentina Synodo praesiden-
tibus tribus Apostolicae sedis Legatis »).

Sed explicatius in Concilio Florentino, in definitione Synodi: (« Definimus Sanctam Apostolicam Sedem, et Romanum Pontificem in universum orbem tenere primatum, et ipsum Pontificem Romanum Successorem esse Beati Petri Principis Apostolorum et verum Christi Vicarium, totiusque Ecclesiae Caput, et omnium Christianorum Patrem et Doctorem existere, et ipsi in B. Petro pascendi, regendi ac gubernandi universalem Ecclesiam a Christo plenam potestatem traditam esse, quemadmodum etiam in gestis oecumenicorum Conciliorum; et in sacris Canonibus continetur »). Hoc ergo est de Fide, quia propositum a Concilio universali: sed nihil aliud est de Fide, nec aliter, quia neutiquam propositum a Concilio universali, hoc praesertim in quo Graeci et Latini consederunt, et exactissime potestas haec fuit a Graecis praesertim discussa.

Quare 1. non est de Fide, Pontificem Romanum docentem aliquid, sive in Concilio particulari, sive in Synodo Provinciali, etiam cum alloquitur totam Ecclesiam, seu cum ex cathedra, ut ajunt, loquitur, dum extra universale Concilium doceat, esse *Judicem supremum controversiarum*, aut esse infallibilem; nec quod sic definitum foret, esse de Fide, Ecclesiae nisi aliunde sensus totius constaret. Probatur 1. quia id non habetur in Tridentino, aut Florentino, aut in ullo Concilio universali; quinimo, in professione nostra, et in Tridentino, sess. 4. de sola Ecclesia dicitur: cujus est judicare de vero sensu, et interpretatione Sanctorum Scripturarum. 2. Quia nullus doctorum hucusque, nec ipse Bellarminus id esse de Fide Catholica censuit. 3. Quia inter Doctores Catholicos varii varia sentiunt, ut relatum supra etiam ex Bellarmino, tom. 1. de Rom. Pontif. lib. 4. cap. 2. (« Ubi secunda opinio est, *inquit*, Pontificem etiam, ut Pontificem, posse esse haereticum, et docere haeresim, si absque generali Concilio definiat, et de facto aliquando accidisse. Hanc opinionem secuti sunt aliqui Parisienses, ut Gerson et Almain, Castro et Adriannus VI. Papa. Qui omnes non in Pontifice, sed Ecclesia, sive in Concilio Generali tantum, constituunt infallibilitatem Judicii, in rebus Fidei »):

Et haec opinio, addit ipse Bellarminus, non est proprie haeretica; nam adhuc videmus ab Ecclesia tolerari qui illam sententiam sequuntur. Quod autem ipsemet durus censor subicit, tamen videtur omnino erronea, et haeresi proxima; non satis firmo fundamento dicit; sed potius probabilis est illa opinio, tum ob auctoritatem tantorum Doctorum, etiam Adriani VI. Papae (non tamen proventi ad illam sedem, cum haec scripsit) qui rexit Ecclesiam paulo ante Tridentinum; tum quia in Tridentino nihil de hac re dictum. Denique si quid rationes Bellarmini valerent, probarent Papam, etiamsi aliquid solus definiat, aut solum opinionem suam declaret aliis, aut particularibus solum, non toti Ecclesiae respondeat, infallibilem esse, quaeque sic docens pronunciat, esse de Fide; quae tamen ipsemet Bellarminus negat, et concedit Papam in his casibus posse errare, et de facto errasse, ut retulimus supra. Quia testimonia allata a Bellarmino loquuntur universaliter, ut patet ex eorum relatione etiam ut facta a Bellarmino; ergo si quid probarent, contra Bellarm. probarent.

Quaeret forsitan aliquis, quid in hac quaestione probabilius censeam? Respondeo, quaestionem hanc, diversionem esse a proposito nostro; nec proinde mihi illi respondendum esse. Doctorem solum ago Catholicum, non scholasticum. Cum itaque nihil de hac re doceat Ecclesia, nec ego debeo quidquam docere: nec Devius, quo Catholicus fiat, quidquam scire; abstrahat ab his quaestionibus, seu ignoret haec; sufficit illi, quo sit Catholicus. Addo tamen ex abundanti, liberum illi esse utramvis; prout placuerit, quippe nullo Fidei praedjudicio, sententiam sequi, utpote probabilem utramque. Sed utcumque sit, verissimum est, id quod manat a sede tantae auctoritatis; esse cum magna veneratione suscipiendum. Fuisse haec jam diximus et statuimus supra.

2. Non est de Fide, Papam esse supra Concilium universale, seu supra Ecclesiam totam reliquam; sicut nec etiam Concilium aut totam Ecclesiam reliquam esse supra Papam, seu quocumque modo quaestio bene proponatur. Probatur: 1. quia nihil horum habetur in professione nostra, nec in Con-

cilis universalibus, Trid. Flor. aut aliis. 2. Concedit id expresse Bellarm. ipse, jam supra relatus. (« Non sunt, inquit, tom. de Concil. lib. 2. cap. 17. proprie haeretici, qui sentiunt Pontificem non esse supra omnia Concilia, et supra Ecclesiam universam, ita ut nullum in terris supra se judicium agnoscat; et fatetur dubium saltem esse, quod Lateranense ultimum Concilium, sub Leone X. sess. 11. id definerit proprie ut decretum Fide Catholica tenendum »). 3. Probatur et explicatur magis: Quia variae hac de re sunt Doctorum sententiae, etiam referente Bellarm. Tomo 1. de Concil. lib. 2. cap. 14. quod vel solum sufficit, probando id non esse de Fide Catholica, cui soli pelliciendis Deviis scribimus. Sic itaque habet Bellarm. cap. illo 14. (« De proposita quaestione tres invenio doctorum sententias. Prima est, Concilium esse supra Pontificem. Id quod asserunt Cardinalis Cameracensis, Joannes Gerson, Jacobus Almanius, et alii nonnulli, in suis Tractatib. de potest. Eccles. Item Nicolaus Cusanus, Panormitanus et Magister ejus Card. Florentinus. Abulensis, et quidam alii (*locis a Bellarmino relatis*). Ut autem haec sententia intelligatur, notandum est duo esse fundamenta hujus opinionis. Primum est, Papam non esse proprie caput Ecclesiae universae simul congregatae. Id quod non eodem modo intelligunt haeretici, et alii auctores: haeretici enim volunt Papam nullo modo esse caput Ecclesiae totius, sed tantum Episcopum suae Ecclesiae particularis, et ad summum Patriarcham occidentis. At alii auctores docent Papam esse caput et Pastorem singulorum Christianorum, et singularem Ecclesiarum si seorsum sumantur, non autem totius Ecclesiae simul congregatae in Concilio Generali; tunc enim Ecclesia accipit quasi formam corporis; et tota potestas quae erat sparsa in variis membris, ibi unitur: ita ut comparare Papam cum caeteris Christianis seorsim sumptis, sit comparare membrum nobilissimum cum minus nobili; at comparare Papam cum Concilio, sit comparare partem cum suo toto, et proinde minus cum majore. Et ne dicamus Concilium sine Papa non esse totum perfectum, sed corpus sine capite; addunt secundum

fundamentum, quod est supremam Ecclesiasticam potestatem esse tam in Concilio, quam in Papa; sed in Concilio principalius, immediatius et immobilius. Dicunt enim Christum immediate omnem potestatem solvendi et ligandi tribuisse Ecclesiae, et cum Ecclesia semper duret, immobiliter in ea semper manere hanc potestatem; quia tamen non potest Ecclesia semper congregata manere, et exercere hanc potestatem per se, instituit Christus Summum Pontificem, tamquam instrumentum generale ad omnes actiones Ecclesiae, et in eo posuit hanc potestatem summam, ut eam exercent nomine Ecclesiae. Differunt quidem inter se hi auctores; quod aliqui ponant hanc potestatem formaliter et subjective in solo Pontifice, in Ecclesia autem ponunt eam ut in fine, quia est propter Ecclesiam, et ut in Regulante, quia Ecclesiae est regulare et dirigere Papam, cum ipsa non possit errare, *Papa autem possit*; et denique ut in supplente, quia deficiente Papa propter mortem naturalem, vel civilem, Ecclesia supplet ejus officium. Alii vero volunt esse formaliter et subjective, principaliter in Ecclesia, instrumentaliter in Pontifice; conveniunt tamen in eo omnes, ut doceant hanc potestatem immediate in Ecclesia; et proinde mortuo Papa, vel depositio, vel nolente adesse Concilio, Concilium non propterea esse corpus imperfectum, sed perfectum, et habere potestatem papalem definiendi de Fide, sanciendo leges, dandi Indulgentias, etc. Ex quibus deducunt Concilium esse supra Papam, et posse ipsum judicare et punire; et idem esse quaerere, an Papa sit major Concilio, ac si quaereretur an pars sit major suo toto. Denique volunt Papam esse in Ecclesia id, quod est Dux Venetiarum in Rep. Veneta; vel Magister Generalis in aliqua Religione; constat enim Ducem Venetum esse supra singulos Magistratus et esse supra singulos Senatores, et civitates Venetas, non tamen supra totum Senatum simul collectum; et quando moritur Dux, certum est totam auctoritatem etiam Ducalem, esse in Senatu. Quomodo etiam Magister generalis est supra singulos Religiosos, etiam Priores, et Provinciales, tamen non est supra congregationem generalem, cum

ei parere debeat, non imperare. 2. Opinio est aliquorum Canonistarum qui volunt quidem Papam esse supra Concilium, et a nemine judicari posse invitum; tamen posse ipsum sese subicere Concilio, et dare illi supra se potestatem; et si hoc fecerit, acquiescere debere sententiae Concilii, etiamsi de ipsius depositione ageretur. Ultima sententia est ferre communis, quod videlicet Papa adeo sit supra Concilium, ut non possit etiam se subicere ejus sententiae; si proprie de sententia coactiva agatur. Ita Turrecremata, Cajetanus, Ferrariensis, Turrianus, Sanderus, etc. »). Haec Bellarminus. *Quare nihil horum est de Fide*, hoc ipso quod varii varia sentiunt, nullo haeresos insimulante dissidentes a propria sua sententia. *Quaestio haec*, inquit Bellarminus de Concil. lib. 2. c. 13. (« exorta est tempore Concilii Pisani, Constantiensis et Basiliensis: coeperunt Patres quaerere, an tenerentur obedire Pontifici, an Pontifex potius teneretur obedire ipsis, id est, generali Concilio; tum plurimi in eam sententiam iverunt, ut Concilium esset supra Pontificem; usque ad hanc diem, quaestio superest etiam inter Catholicos »). Quod omnes hae opiniones, et prima etiam, sint probabiles, et proinde cuivis liberum sit, etiam nunc absque ulla censura, quam velit sequi, et proinde amplecti, si vult, *primam*, Probatur 1. ex auctoritate tam gravium Doctorum, qui eam secuti sunt, Gersonis, Almaini, etc. 2. ipsamet suis librata ponderibus, ut audivimus expositam, referente ipso Bellarmino per se satis prudens apparet, et natura corporis et capitis fundatur. Ergo probabilitate non caret. Et bene Vasquez 1. 2. disp. 62. cap. 4: (« Quando videmus fundamenta omnia et rationes, Doctores oppositae sententiae vidisse et considerasse, et ad eas aliquo modo respondisse, nec eis convictos fuisse ») probabilem manere sententiam illam judicare debemus. 3. Ex exemplo Magistri generalis, quod clarum est: nec enim refert a quo Papa habeat potestatem tanquam a causa efficiente; nam causa efficiens non mutat rationem formalem capitis comparati cum corpore. 4. Nihil habet Bellarminus, quod facile solvi non possit. Nam nec testimonia Conciliorum, ne

quidem verba Lateranensis ultimi, sess. 12. relata a Bellarmin. nec Patrum quos producit, quidquam sonant expresse contradictorium primae illi sententiae, ut ex lectione patet. Omnia et singula solum probant quod de Fide est, et habetur in Fide Concilii Florentini, *Papam esse caput Ecclesiae*; nec quidquam de contentis in prima sententia damnat, nisi ad summum per consequentias deductas inde a Bellarm. quae non sunt Conciliorum aut Patrum, et facile est cuivis eas negare. Sane nec Concilia nec Patres, ad hoc vel ut Juris apices unquam descenderunt. 5. Vel solum Synodi Florentinae et Tridentinae super has difficultates oon ignotas Episcopis et Theologis, silentium, testimonium videtur positivum probabilitatis retinendae pro illa prima sententia. Cur enim post tot hac de re motas quaestiones in Conciliis Constantiensi et Basiliensi siluerunt? Quare sine fundamento sufficiente pronunciavit Bellarminus, *a temeritate magna excusari non posse qui primam illam tenent* opinionem, et contraria esse fere de Fide, et ejus censura potius censura digna foret, qui sic tali audet censura notare Doctores tam graves, quos ipsemet pro prima illa sententia citavit, Cardinalem Cameracensem, Almainum et Patres omnes Concilii Constantiensis, et Basil. etiamsi spectentur ut particulares Doctores; cum praesertim post haec tempora, nullum Concilium generale contrarium pronunciaverit, ut jam diximus. In Concil. Constantien. Tom. 3. pag. 849. sess. 4. Sic habetur: (« Declarat Synodus quod ipsa Synodus generale Concilium faciens, Ecclesiam Catholicam militantem repraesentans, potestatem a Christo immediate habet, cui quilibet cujuscumque status, vel dignitatis, etiamsi Papalis existat, obedire tenetur in his quae pertinent ad fidem, et extirpationem schismatis, et reformationem generalem Ecclesiae Dei in capite et in membris »). Idem in Basil. sess. 32. et 38. habetur. Num tot Patrum et Basiliensium auctoritas sufficit fundandae huic doctrinae saltem probabiliter? Equidem Vasquez et omnes fere Theologi, docent *probabilem* eam opinionem dici et esse, *quae suos habet auctores et patronos doctos et prudentes, qui eam ut probabilem amplectuntur* 1. 2. disp. 62. cap. 4.

Quod si quis quaerat, quid mihi videatur probabilius? Respondeo ut respondi in simili de infallibilitate Papae; sed neutram harum quaestionum pluribus licet agere.

3. Longe longius abest a Fide, *potestas indirecta Papae in temporalia, seu Pontificem, ut Pontificem*, etsi non habet ullam mere temporalem potestatem, tamen habere, in ordine ad bonum spirituale, summam potestatem disponendi de temporalibus rebus omnium Christianorum, et proinde posse mutare regna, et uni auferre, et alteri conferre, tanquam summum Principem spirituales, si id iudicet ad salutem animarum necessarium, aut posse abrogare leges Principum aut condere.

Probat. 1. Quia nihil horum habetur in professione nostra, aut Tridentino, aut alio universali. 2. Nullus Doctorum id dicit esse de Fide, ne quidem Bellarmin. 3. Ignota haec fuisse omnia Patribus et Conciliis primorum seculorum, evidens est; nec enim Papae Liberius Constantium, Damasus Valentem, et nec idem Liberius Julianum etiam apostatam, regno deponere vel cogitarunt. 3. Ne quidem omnes praxes Ecclesiae universalis sufficientes sunt fundando articulo Fidei, ut supra diximus, quod releget lector, et his applicabit; multo minus praxes recentiorum aliquot Pontificum sufficit praxi quod fundetur in opinione probabili ex iudicio sic agentis, et aliorum multorum, ut ibidem annotavimus. Hinc contra hanc praxim possunt esse opiniones probabiles. Sane in hac materia praestaret silentium loquacitati, eo praesertim quod cum occurreret occasio, parum ad rem referret discussio hujus quaestionis speculativae, cum facile foret solum minorem propositionem discutere, scilicet, deposito contendente hic et nunc non esse sufficientem causam depositioni, quidquid sit de generali illa potestate; certum enim inter omnes est, saltem nonnisi ex gravissima et justissima causa, depositiones has esse attentandas; et qui in tali casu non praestaret armis, hic de facto caderet intentata; et meo quidem iudicio, crimen deberet esse particularibus, de his statuendo quidquam pronunciare, cum sit semina discordiarum inter Papam et Reges

bene consentientes spargere. Ob quas etiam vel similes rationes praestat, nec de duabus praecedentibus quaestionibus agere. Satius est sequi Concilium Tridentinum, quod de his omnibus siluit; nec sapere plusquam oportet sapere, sed sapere ad sobrietatem, Paulo id prudenter admonente, Rom. 12. 3.

§. 16.

De Iudice controversiarum.

Sic habet professio nostra: *Sacram Scripturam juxta eum sensum quem tenuit, et tenet S. Mater Ecclesia, cujus est judicare de vero sensu et interpretatione sacrarum scripturarum, admitto; nec eam unquam nisi juxta unanimem consensum Patrum accipiam et interpretabor.* Et Trident. sess. 4. (» Decernit Synodus ut nemo suae prudentiae iunxus, in rebus Fidei, et morum ad aedificationem doctrinae Christianae pertinentium, sacram Scripturam ad suos sensus contorqueat, contra eum sensum quem tenuit et tenet S. Mater Ecclesia, cujus est judicare de vero sensu et interpretatione Scripturarum sanctarum, aut etiam contra unanimem consensum Patrum, ipsam Scripturam Sacram interpretari audeat »). Haec, nec plura Concilium. Quare ut doctrina huius contenta est de Fide, et quod ibi praescribitur sequendum, quia propositum a Concilio universali: ita a contrario nihil aliud est de Fide in hac materia, nec oportet plus sapere, quam sapnit Concilium. Itaque.

1. Ut concilium abstinuit a termino *infallibilitatis in Ecclesia*, etiam universali, in doctrina Fidei et morum, ita licitum cuique ab eo abstinere. Quinimo ut utile est uti hoc termino, quippe ap-
prime significativo, tum in scholis, tum in Concionibus erudiendo populo, ita praestat abstinere in collationibus cum Deviiis.

2. Quia terminus iste non est *Conciliaris*, non enim in ullo Concilio reperitur, ut nec in Scriptura; cur ergo eo, praesertim exoso adversis, utemur? Difficiliorem eis reditum ad Ecclesiam, sic reddemus, et probationem ejus quod iniecerimus?

Transubstantionis nomine utitur Tridentina Synodus, sess. 13. can. 1. et cap. 4. Eo itaque nobis utendum, et non solum res eo significata credenda; at non usa est termino *infallibilitatis*; nec nos ergo utamur, nec sapientiores in Fidei rebus simus Concilio. Et si devius quid sentiendum sciscitetur, respondeamus sufficere illi obvolvere id silentio, et ignorare id posse quod Tridentinum, non docuit.

3. Res significata per ipsum terminum est *de Fide*, dummodo nihil aliud eo termino significetur, nisi quod habet Tridentinum, *Ecclesiae esse judicare de vero sensu Scripturarum*, et de qualibet mota controversia, eique assentiendum, et ejus sensum admittendum, quae nunquam errat *ob assistentiam Spiritus Sancti, ei promissam*. Joan. cap. 14. 16. 26. et cap. 16. 13. *qui errare non potest*; nam *impossibile est mentiri Deum*, Hebr. 6. v. 18. Si quid aliud Scholasticus nomine *infallibilitatis* significet, ut saepe saepius ingerit subtiliter, *non erit de Fide*, quidquid illud sit, sive certissimum, sive probabile, et subtilitatis Scholae proprium nec simplicitati Fidei aptum, Scholis denique continendum, neutiquam Devius in castra Catholica reducendis proponendum; et si quaerunt illi, *quid in hac re sit illis sentiendum, quo fiant Catholici*; Respondendum, silentem de iis Ecclesiam debere imitari, et sine praesudicio Fidei haec posse ignorari; *non plus sapere, sed sapere ad sobrietatem*, Rom. 12. v. 3. Nos Ecclesiae nomine nihil debere docere, nisi quod docuit; cum in Castra Catholica transierit Devius, nos illum, si sequi libuerit, in Schola ducturos, et subtiliora esse docturos. Sane similis, vel fere similis est haec quaestio, illi Scholasticae, *An praedestinatus possit damnari, et reprobis salvari*. Ut enim Ecclesia non est Ecclesia, nisi habeat assistentiam Spiritus Sancti qui est *infallibilis*, et proinde Ecclesia per ipsum est *infallibilis*; ita praedestinatus non est praedestinatus, nisi cum *praedestinatione*; itaque sicut posita illa, seu ut loquimur in Scholis, *in sensu composito*, quia Deus non potest non perducere ad effectum quod statuit, *non potest damnari*; *in sensu tamen diviso*, ut loquantur nostrae Scholae, *potest damnari*; ita

Ecclesia in sensu diviso, posset errare, sed in tali casu non foret Ecclesia, sicut in simili casu non foret *Praedestinatus*: *in sensu vero composito non potest errare*. Sed quis non videt haec nimis subtilia, esse extra septa Fidei, seu non esse de Fide mixtis his subtilitatibus, et proinde continenda intra Scholas? Contineamus ergo nos intra terminos Tridentinos, nec aliud tanquam de Fide proponamus. Facillima sane erit probatio dogmatis nostri sic propositi, et ei facile Devius subscribet. Cur viam relictus sentibus et dumetis obsidemus, ne facilis sit relictus?

4. Non est de Fide, Deum vel Scripturas non esse *Judicem controversiarum*, sed *Ecclesiam totam*; imo proclamandum, quod pellicit Devios ad nos, *Deum esse primum et summum judicem, et Scripturam esse judicem et quidem potiore Ecclesia*; quippe cum illa contineat Verbum Dei, hujus locutio sit humana seu hominum. Probatur 1. Quia nec Professio nostra, nec Tridentinum denegat Deo, vel Scripturae hanc dignitatem judicis. Imo Christus, Joan. 12. v. 48. *Sermo quem locutus sum, ille judicabit eum in novissimo die*. Ut et Joan. 7. 5. *Lex nostra judicat hominem*, etc. Et bene Suarez, Tract. de Fide, disp. 5. sect. 2. (*Regula Fidei est vel inanimis, vel viva animata: prior est Scriptura et traditio; viva et loquens est Ecclesia, Concilium generale, et Episcopus Romanus; et ita resultant quinque Regulae*). Idem repetit saepius, sect. 3. 4. 5. 6. 7. 8. Ubi, tum alibi, indiscriminatim Scripturae seu Verbo Dei, et Ecclesiae, judicium de controversiis adscribit, et cum eo alii Theologi post Augustinum, lib. de Unit. Eccl. cap. 2. et alios Patres frequenter. 3. In more positum est dicere litigantibus, *lex judicabit*. Quidni ergo idem dicemus de Scriptura? 4. Quod subtilius dicimus in Scholis, legem esse *Regulam*, ex qua *Judex judicat*, legem autem proprie non judicare, quia non potest audire contententes, unaquaque parte ad se eam attrahente; ita scripturam: est extra simplicitatem Fidei, et proinde non est cum illa subtilitate de Fide, sed intra septa Theologiae coercendum.

5. Non est de Fide, ut jam diximus, Papam extra Concilium Generale, esse *Judicem* summum controversiarum: nec etiam extra illud esse *infallibilem in judicio ferendo de rebus Fidei, aut morum*. Patet quia nec est in Professione nostra, nec in Trident. et haec jam ostendimus. Atque haec satis de *Regula Fidei, et secretione ex ea doctrinae Fidei Catholicae a Scholastica, quibusvis opinionibus, et popularibus erroribus, in omnibus controversiis hoc seculo motis.*

Finis Tomi Quarti.

VA1 1529210

INDEX

PARS SEPTIMA

SECTIO III.

De Justificatione , et Merito.

<u>CAP. I.</u>	<u><i>DE justificatione.</i></u>	<u>5</u>
<u>CAP. II.</u>	<u><i>De merito.</i></u>	<u>37</u>

De Fruitione Salutis per Christum partae post
vitae humanae exitum.

<u>CAP. I.</u>	<u><i>DE mutationibus antecedentibus par-</i></u>	
	<u><i>ticularibus.</i></u>	<u>54</u>
<u>CAP. II.</u>	<u><i>De mutationibus praecedentibus uni-</i></u>	
	<u><i>versalibus.</i></u>	<u>78</u>
<u>CAP. III.</u>	<u><i>De vita aeterna.</i></u>	<u>96</u>

PARS OCTAVA.

	<u><i>Francisci Veronii Regula Fidei Ca-</i></u>	
	<u><i>tholicae.</i></u>	<u>129</u>

FINIS.



11

~~163~~
~~3~~
~~24~~

163
3
24

